

悲愤而后有学

欧阳渐

文硕阁

wenshuoge.com

关于我们	4
序	6
編選者序	7
第一編《佛學通論》	13
佛法非宗教非哲學而為今時所必需	14
附：佛法為今時所必需	22
附：歐陽競無先生答梅君書	27
唯識抉擇談	28
心學大意	52
《內學》敘言	84
辨方便與僧制	86
辨虛妄分別	90
辨二諦三性	92
附：解惑四則	94
辨唯識法相	96
附：解惑二則	98
第二編《佛教教育》	99
支那內學院研究會開會辭	100
法相大學特科開學講演	102
今日之佛法研究	103
談內學研究	109
支那內學院院訓釋釋師訓第一	114
支那內學院院訓釋釋悲訓第二	123
支那內學院院訓釋釋教訓第三	137
第三編《佛典研究》	158
《瑜伽師地論》敘卷上	159
《瑜伽師地論》敘卷下	172
《大般若波羅蜜多經》敘卷一	183
《大般若波羅蜜多經》敘卷二	191
《大般若波羅蜜多經》敘卷三	206
《大般若波羅蜜多經》敘卷四	213
《藏要》第一輯敘	223
《藏要》第二輯敘	226
《維摩詰所說經》敘	229
贈友《藏要》	234
支那內學院經版圖書展覽緣起	235

《經論斷章讀》敘	237
精刻大藏經緣起	238
第四編《論佛學書》	241
《心經》讀	242
與章行嚴書	247
覆陳伯嚴書	250
覆魏斯逸書	251
答熊子真書	252
覆歐陽浚明書	254
答陳真如書（二則）	255
與李正剛書	262
覆梅擷芸書（七則）	263
第五編《儒學通論》	273
夏聲說	274
孔佛	276
孔佛概論之概論	278
第六編《儒典研究》	281
《論語十一篇讀》敘	282
《孟子十篇讀》敘	283
《中庸讀》敘	285
《大學王注讀》敘	288
附：讀《大學》十義	290
《心史》序	293
《孟子課》敘	294
《論語課》敘	295
《毛詩課》敘	296
《中庸》傳	297
第七編《論儒學書》	311
與陶士書（四則）	312
覆張溥泉書	316
跋《中庸傳》寄諸友	320
覆蒙文通書	322
第八編《人物行狀》	324
歐陽東泐斃哀紀碑	325
楊仁山居士傳	327
附：親教師歐陽先生事略	330

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

編選者序

王雷泉

二十世紀前半葉的中國思想界，處于萬花筒般的動蕩劇變中，要找出能轉時代潮流而不為時俗所轉的大思想家，委實不多。在長江流域，先是在下游的南京，抗戰期間轉移到上游的江津，存在著一個特立獨行的佛教知識分子集團。他們以殉道者的精神，過著近乎苦行僧的研修生活，探討著終極的佛教真理，卻公開宣稱"佛法非宗教非哲學"，與一切迷信和獨斷無緣。在一個義利不辨、師道不行的時代，他們高揚師道的價值，終生獻身于師門事業，前赴後繼，薪盡火傳；然而，為了求道的真實和學術的尊嚴，以"依法不依人"的磊落胸懷，敢于修正師尊的思想。他們終日與青燈黃卷相伴，對數千卷佛經進行了最嚴格的校勘，卻敢于對師尊和自己藉以入門的《楞嚴經》、《大乘起信論》等經典的真實性提出質疑。在回到唐代唯識學這一表面看來極端保守的口號下，他們對一千余年來以天台宗、華嚴宗、禪宗為代表的傳統中國佛學，進行了犀利的思想批判。而且把批判的矛頭直指佛教的組織製度，提出"居士可以住持正法"，攪動起二千年來已成定局的僧主俗從格局。

這個佛教知識分子集團，以楊文會（1837—1911）、歐陽漸（1870—1943）、呂澄（1896—1989）三個傑出人物為代表，將中國佛學帶出籠統顛覆的古代形態。在中國佛教歷經劫波，即將迎接下個世紀的曙光之際，人們會再次涌動感恩的心潮，緬懷他們的世紀性貢獻。楊文會，作為一個傳統的佛教知識分子，最先接受西方剛創立不久的近代宗教學研究方法，創辦學校，校刻佛典，被譽為中國近代佛教復興之父。呂澄，一個冷靜求實的佛教學者，本世紀數一數二的佛學大師，與當今依然健在的台灣印順法師同稱為中國佛學雙璧。而作為承上啟下樞紐的歐陽漸，則是一個具有強烈宗教熱忱和孤憤氣質的佛教思想家和教育家，用晚年致門下陳銘樞信中語來講，他的治學求道、講經說法，"有激于自身而出者，有激于唐宋諸儒而出者"，他是把學問與生命體驗和醫民救國結合在一起的。"悲而後有學，憤而後有學，無可奈何而後有學，救亡圖存而後有學。"（《內學雜著·內學序》）讀歐陽之書，如同他摧金裂石的書法一樣，充滿著"生死事大，無常迅速"的悲涼之感，而又從字裡行間激蕩著不媚時俗、窮未來際的豪邁情懷。

歐陽漸在世時，他所從事的事業已是"別調孤彈"，在他死後的相當長歲月中，亦不為世俗社會和佛教界所理解，"宗教則屏為世學，世學又屏為宗教，舂糧且不能宿，蓋垂青者寡矣。"（《內學雜著·與章行嚴書》）然而，他以"破釜沉舟，同向毗盧遮那頂上行去"的悲壯精神，帶領一小批同道者，在一個充滿悖論的時代環境中左沖右突：他要在中国舉辦有如當年印度那爛陀寺一樣宏大規模的佛教大學，卻苦于沒有多少像樣的佛學教材；他要繼承恩師楊仁山的遺志，對汗牛充棟的上萬卷佛經進行嚴格的學術整理，而合格的佛學人才卻寥若晨星。他別無選擇，擺在面前的只能是一條荊棘叢生的道路："講學以刻經"。通過辦學以培養整理佛經的人才，在整理佛

經中造就佛學人才。平生所學主要體現在對佛典的選編校訂及敘論中，故治學不在于一字一句的研討，而是善于歸納，扼其大意。尤在晚年感到來日無多，故將自己的學術觀點體現在講學和書信中，以《內學雜著》和《孔學雜著》最為精要。歐陽漸晚年親自手訂二十六種著作，輯成《歐陽競無內外學》三十冊，由支那內學院蜀院于一九四三年木刻印行。這部文選主要根據于此，並酌收發表于支那內學院學報《內學》等刊物上的重要論文。全書根據文章體裁和內容分為八編，每編之內則按時代順序排列，為方便讀者閱讀，選文皆由編選者重新分段標點。各編主要內容及選編理由如次：

第一編《佛學通論》，收錄了《佛法非宗教非哲學而為今時所必需》、《唯識抉擇談》、《心學大意》、《〈內學〉敘言》、《辨方便與僧製》、《辨虛妄分別》、《辨二諦三性》、《辨唯識法相》等八篇文章和三篇附錄。歐陽漸對佛教的系統理論，大量見于他對佛教經典的提要敘說，以及關於佛教教育的論述之中。本編所收的只是他對佛法的一般論述。面對二十年代反宗教、反迷信運動的社會大背景，以及傳統佛教界衰敗的現狀，歐陽漸堅持佛法于宗教及哲學、科學外，別為一學，故應屏除宗教與哲學、科學的弊病："佛法之晦，一晦于望風下拜之佛徒，有精理而不研，妄自蹈于一般迷信之臼；二晦于迷信科哲之學者，有精理而不研，妄自屏之門牆之外。"（《致章行嚴書》）支那內學院開學之初，歐陽漸開講《唯識抉擇談》，列舉當時中國佛學有五蔽：一、盲修禪宗者作口頭禪、野狐參而廢棄經教；二、思想方法侗而憑私見妄事創作；三、天台、賢首等宗畛域自封、得少為足，而使佛法之光日晦；四、學人于經典著述不知簡擇最精當之唐人之書，所以義解常錯；五、學人全無研究方法而妄執難易、世、出世法門。針對"時俗廢疾"的空疏之病，在體用、真俗等關係上，強調即用顯體、即俗修真，並辨別法相、唯識實有二系。認為唯有法相、唯識之學能對治上述五蔽。本文發表之後，引起了同出楊仁山門下的太虛法師的反駁，由此帶動了對中國佛教史的深入研究。歐陽漸一生的治學充滿論戰的特點，範圍涉及對傳統中國佛教的定位，對政教關係及僧俗關係的闡述，以及對漢藏佛經翻譯中佛教術語的歧解等各個方面。歐陽漸的治學重點雖是《瑜伽》、《唯識》，然中年以後旁通《般若》，融貫空有，並最終以《涅槃》為歸趣。

第二編《佛教教育》，收錄了《支那內學院研究會開會辭》、《法相大學特科開學講演》、《今日之佛法研究》、《談內學研究》、《支那內學院院訓釋》等五種。歐陽漸的佛教教育，具有重建現代佛教教團的意義。民國元年，他曾參加過一個短暫的"中國佛教會"，因口號偏激，綱領超越于時代而告失敗。在這以後，他埋首書齋，稟承楊仁山刻經須設立居士道場的遺訓，先是在金陵刻經處主持研究部，然後于1922年，和學生呂澄等人創辦支那內學院，建立具有真正近代意義的中國佛教教育。抗戰期間遷至四川江津，仍稟"講學以刻經"的一貫宗旨，並發文踴躍，以激勵忠憤之氣。四方從游者甚眾，名流賢達如梁啟超、黃懋華、湯用彤、梁漱溟、陳銘樞、陳獨秀等，先後入室受業，恭執弟子禮。他把佛教教育的宗旨定為：第一、哀正法滅，立西域學宗旨；第二、悲眾生苦，立為人學宗旨。為支那內學院立"師、悲

、教、戒"四字院訓，"師、悲"著重對於人群社會的責任，"教、戒"強調學佛的理論與實踐。嗣後更立四信條："為真是真非之所寄，為法事光大，為居士道場，為精神所系。"《支那內學院院訓釋》系統闡述了他的教育理念和治學方向，在《釋師訓？辟謬五》中，列舉十條經証，而倡居士堪以住持正法之說。《釋教訓》作于蜀院時期，形成成熟的思想體系，提出"証智無戲論，佛境菩薩行"，以頓境漸行之論，期由言教史實之真，以求觀行實踐之真。並確立毗曇、戒律、瑜伽、唯智（般若）、涅五科院學。在教育的目的、對象及方法上，歐陽漸有著許多精辟的見解。他認為佛法為一切教育之極，教育首在于確立師道，"師體曰慧，所謂知見；師道曰悲，所謂為人之學，充人之量。"教育對象雖有平民和豪傑之分，但救今天下，應以舍生取義的豪傑之教為前提。發心須立乎其大，而作聖成佛必須篤實漸進，故概括以一個"續"字："相續增上，是為精進。難行苦行，遍一切行，不思議行，是為精進。日月以續而明，四時以續而成。涓涓之滴，續成江河。青青之茁，續成尋柯。悲悲不已，續成薩婆若。"（《釋悲訓》）

第三編為《佛典研究》，收錄《〈瑜伽師地論〉敘》、《〈大般若波羅蜜多經〉敘》、《〈藏要〉第一輯敘》、《〈藏要〉第二輯敘》、《贈友〈藏要〉》、《支那內學院經版圖書展覽緣起》、《〈經論斷章讀〉敘》、《精刻大藏經緣起》、《〈心經〉讀》等九篇。歐陽漸繼楊仁山之後，走上了中國佛教有史以來第一次科學整理藏經的不歸路。"釋迦以至道救世，承其後者事乃在于流通。迦葉、阿難，結集流通；龍樹、無著，闡發流通；羅什、玄奘，翻譯流通。自宋開寶雕版于益州，至予師楊仁山先生刻藏于金陵，為刊刻流通。先生之徂西也，付囑于予曰：'我會上爾至，爾會上我來，刻藏之事，其繼續之。'"（《支那內學院經版圖書展覽緣起》）二十余年中，夙夜不敢康，刻成經籍二千卷，于俱舍、瑜伽、般若、涅諸科要典，皆發明要義，作成敘言。自1927年起，歐陽漸即組織人力，用新的研究方法在全部藏經中選擇要典，校勘文字，編輯一套精要的佛經叢書《藏要》。原計劃將菩薩藏、聲聞藏中之經律論、西土此方著述，抉其要分為六輯，因戰爭等原因，實際上只編成三輯。編輯《藏要》是為今後徹底整理全藏作準備。"藏貌雖存，藏真早喪。一喪于金沙雜聚，而魚目混珠；二喪于浩渺無津，而久隳簡陋；三喪于義深文澀，而屏棄誰披？經律論撰，但日增加，宋元明清，從無整理。嗟乎！瓊瑰雖備，棄不莊嚴；海藏空羅，任其潰壅。遂使既得金而反礦，久握珠而還貧。教不能行，藏不能讀，藥不能醫，豈不冤哉！故茲之刻藏，整理為宗，以為是先務之急也。整理應分三事：一、刪蕪；二、嚴部；三、考訂。"（《精刻大藏經緣起》）對於大量汗牛充棟的後世著述，提出"余付藏外，任世浮沉"的主張，雖然驚世駭俗，卻發人深省。

第四編為《論佛學書》，收入《與章行嚴書》、《覆陳伯嚴書》、《覆魏斯逸書》、《答熊子真書》、《覆歐陽浚明書》、《答陳真如書》（二則）、《與李正剛書》、《覆梅擷芸書》（七則）等書信。在這些與友朋和門人的書信中，再現了歐陽漸一生治學求道的軌跡，尤以《答陳真如書》、《覆梅擷芸書》等晚年書信，為一生佛學思想之總結。早期的《與章行嚴書》，向當時教育總長章士釗備述支那內學

院辦學特點及研究成果，並以"教育不以興國為的，而以民能充其所以為人之量為的"，視為"教育神髓"。在致門人陳銘樞（真如）的信中，對他另一個弟子熊十力（子真）背離師說的理論失誤，作了入木三分的揭示："自既未得真甘露味飫人飢虛，而徒跡襲宗門掃蕩一切之陋習、宋儒鞭辟為己之僻執，遂乃孤明自許，縱橫恣睢，好作一往之辭。"認為自韓愈以來至熊十力，對佛教的根本誤解，就在于誤認寂滅為斷滅，以清談廢事為禪而惡之。因此在晚年書信中，不厭其詳地論述涅槃、法身、法界等佛教的終極命題。在《再答陳真如書》中，回顧了在接踵而來的身家痛苦中，堅忍發奮而求道有成的過程。四十歲前後，因寡母去世，由陸王心學進而學佛，由此知生死由來。五十歲前後，女兒、兒子、胞姊、愛徒相繼夭折，于痛徹心脾中，通宵達旦，鑽研《瑜伽》、《般若》，撰成《〈瑜伽師地論〉敘》和《〈大般若經〉敘》。至六十歲，作《〈大般涅槃經〉敘》，而後知無余涅槃為佛法之唯一宗趣，確立一生學說之重心。

第五編為《儒學通論》，選錄《夏聲》、《孔佛》、《孔佛概論之概論》等三篇。歐陽漸于深通程朱陸王之學後研究佛學，然後以佛攝儒，闡孔、佛之同歸，本內外之兩明，故將一生著述編定為"內外學"。在《孔佛概論之概論》中，以寂滅寂靜義、用依于體義、相應不二義、舍染取淨義四點，系統闡述儒佛二家的異同。認為"孔學是菩薩分學，佛學則全部分學也。"一切哲學，都是在求安身立命、安邦定國的道體，而其間的差異，不過是求道的深淺、廣狹而已，即"佛學淵而廣，孔學簡而晦"。就趨向人生究竟而論，孔學是菩薩分學，佛學則全部分學。孔行而無果，佛則是行即是果。然而，根據真俗、體用不二的辯證關係，儒學若無超世出世之精神，則不能排除意、必、固、我之封執；佛學若無入世治世之方便，則流入頑空守寂的小乘境界。因此，佛不礙儒，得佛法而儒道愈精深；儒不礙佛，得儒術而佛法以普被。"知孔道之為行者說生生，生生，行也，非流轉于有漏，奔于習染也。知佛法之為果者說無生，無生，果也，非熏歇、燼滅、光沉、響絕之無也。淆孔于佛，壞無生義；淆佛于孔，壞生生義。"（《孔佛》）明白體用不二的原理，則儒學的發揚光大，就是救亡圖存的當務之急。

第六編為《儒典研究》，收錄《四書讀》、《心史敘》、《論孟課》、《毛詩課》的《敘》和《中庸傳》等九篇。多為自編內學院詩文課本。歐陽漸精于文學，晚年因國難而倡忠義救國之心之氣，選《毛詩課》敘曰："綢繆在作新，作新在作氣，作氣在觀感而憤悱。"1940年作于蜀院的《中庸傳》。認為孔學有系統談之概論，止是《中庸》一書。沿憨山德清之說，以寂滅般若為自本體，以法相唯識釋性天情Q欲Y，謂舍染取淨即是教。性無頓漸，教有等差。離位育參贊，是個人事，亦天下大事。故中庸之道，實大乘菩薩道。值此抗戰時期，尤應提倡"狂狷中庸"，認為"中國自孟子後數千年來，曾無豪傑，繼文而興，蓋誤于鄉愿中庸也。"在《跋〈中庸傳〉寄諸友》中，認為孔、佛相通，通于此冊，此非積七十年之學不能說此，將《中庸傳》與《心經讀》同視作晚年定論之作。

第七編為《論儒學書》，選錄《孔學雜著》中的《與陶士書》（四則）、《覆張溥泉》、《跋〈中庸傳〉寄諸友》、《覆蒙文通書》等討論儒學的書信。抗日軍興，歐陽漸猛烈抨擊產生漢奸的文化心理根源"鄉愿"，"世之敗壞，至是極矣。觀國是者，莫不歸過于貪污之官吏，豪劣之士紳，苟且偷墮之社會，此固然矣。然亦知病本之由來乎？二千余年，孔子之道廢，鄉愿之教行。"因此，真正的孔孟之道必取狂狷，"孫中山先生革命是一條鞭，不可雜保皇黨開明專製。今日抗戰到底是一條鞭，不可收容主和敗類。孔子謀道不謀食，孟子舍生而取義，踽踽獨行，不可夾雜鄉愿、兩邊立足之相似教。"（《與陶士書三》）值此抗戰，為貞元交會之非常時期，應具一段超遠精神，而立天下之大本。此超乎常人思議之大本，"由二千年鄙儒謗棄之寂滅來，由二千年鄉愿誣蔑之中庸來。"即佛教的最高境界"寂滅"，與儒家中庸的"素隱"，具有體與用、全體與部分的關係。"寂之境界，人欲淨盡，天理純全境界也。一泓秋水，蕩滌纖塵，漣漪不動，寂滅寂然：于此悟人欲淨盡境界，佛家名寂靜寂滅。天光雲影，人物山川，悉于中現，無勞一睇：于此悟天理純全境界，佛家名無損惱寂滅。小乘寂滅，止用寂靜，大乘兼用無損惱。今談治國，應大乘同，觸處洞然寂滅全體，故曰真孔中庸還我實落。"（《覆張溥泉》）1943年2月1日的《覆蒙文通書》，是歐陽漸逝世前二月所作，可視作最後的學術遺囑。認為欲弘揚孔學以正人心，應談最勝極最勝三事：第一、道定于孔孟一尊；第二、學以性道文章而得其根本；第三、研學必革命。"數千余年，學之衰弊，害于荀子，若必興孔，端在孟子。《詩》、《書》、《春秋》，統歸而攝于《禮》，《荀子?禮論》無創製之意，《中庸》本諸身，徵諸人，皆製作之能。學《荀》未免為弊人，學《孟》然後為豪傑之士也。有志然後能文章，更能進于性天。《禮》須囊括宇宙，《易》則必超于六合之外；《禮》唯集中國之大成，《易》則必契般若、瑜伽之妙，而得不可思議之神。《中庸》之素隱不已與修道，語語皆與涅槃寂靜相符，漸既揭之矣，而《易》之契般若、瑜伽者，留待能者可乎！"

第八編為《人物行狀》。據周邦道、章斗航所撰《歐陽大師傳》，呂澄嘗謂："凡佛子之具教主規模者，愿力太宏，悲心太切，其一身所踐更，往往非人所堪。"歐陽漸曾有"回將極苦代娑婆"之句，意謂愿世人無複有自己之慘痛，有之，則一人代受可也。本編選入《歐陽東泐斃哀紀碑》，由此可窺歐陽漸激于自身喪子失女的慘痛經歷，而有如此血淚凝結的文章。歐陽漸去世前一年，撰《楊仁山居士傳》，贊揚楊仁山于佛法中有十大功德，並認為自己批判《大乘起信論》等經典，並不違背師說，因為楊仁山在《與桂伯華書》曰："研究因明、唯識期必徹底，為學者楷模，俾不顛倒，走入外道而不自覺。"在他去世的當年，掌門弟子呂澄撰《親教師歐陽先生事略》，進一步指出："師之佛學，由楊老居士出。《楞嚴》、《起信》，偽說流毒千年，老居士料簡未純，至師始毅然屏絕。荑稗務去，真實乃存，誠所以竟老居士之志也。初，師受刻經累囑，以如何守成問，老居士曰：母然，爾法事千百倍于我，胡拘拘于是。故師宏法數十年，唯光大是務，最後作老居士傳，乃盛贊其始愿之宏，垂模之遠焉。嗚呼！師亦可謂善于繼述者矣。"

二十世紀末葉，有著太多的浮躁和無奈，各類橫空出世的"大師"，各種五花八門的體系，匆匆來去，各領幾年乃至幾月的風騷。為本已喧囂的世間，平添幾多躁音。自古英雄多寂寞，從楊、歐、呂三代大師非凡的事業中，我們可以深切地感受到那種道義相托，薪盡火傳的精神。

本書大部分由舍弟王雷波先生承擔電腦打字，研究生聶士全、曾奕、宋道發諸君作了部分校對工作，特此申謝！本人雖在電腦上對每篇選文皆作三番校對，仍恐有錯，敬請讀者不吝指正。

第一編 《佛學通論》

佛法非宗教非哲學而為今時所必需

今日承貴會要請，來此與諸位講演佛法，此是鄙人最願意事。但是鄙人沒有學問，今日只將我對於佛法一點意思說出，與大家共同研究而已。

今日講演題目是：《佛法非宗教非哲學而為今時所必需》，內中意義向後再說，先將佛法名詞解釋一過。

何謂佛？何謂法？何謂佛法？按佛家有所謂三寶者：一佛寶，二法寶，三僧寶。佛寶指人，法寶指事，僧者眾多弟子義。寶者，有用有益之義，言此三者能利益有情，故稱為寶。已得無上正等菩提的人，是稱為佛。法則範圍最廣，凡一切真假事理，有為、無為，都包在內。但包含既如此其廣，豈不有散亂無章之弊耶？不然。此法是指瑜伽所得的。瑜伽者，相應義，以其于事于理，如如相應，不增不減恰到好處，故稱為法。此法為正覺者之所證，此法為求覺者之所依，所以稱為佛法。

宗教、哲學二字，原係西洋名詞，譯過中國來，勉強比附在佛法上面。但彼二者、意義既各殊，範圍又極隘，如何能包含得此最廣大的佛法？正名定辭，所以宗教、哲學二名都用不著，佛法就是佛法，佛法就稱佛法。

次、言義。云何說佛法非宗教耶？

答：世界所有宗教，其內容必具四個條件，而佛法都與之相反，故說佛法非宗教。何者為四？

第一、凡宗教皆崇仰一神或多數神，及其開創彼教之教主，此之神與教主，號為神聖不可侵犯，而有無上威權，能主宰賞罰一切人物，人但當依賴他。而佛法則否。昔者佛入涅槃時，以四依教弟子。所謂四依者：

一者、依法不依人；

二者、依義不依語；

三者、依了義經不依不了義經；

四者、依智不依識。

所謂依法不依人者，即是但當依持正法，苟于法不合，則雖是佛，亦在所不從。禪宗祖師，于天上地下唯我獨尊語，而云：我若見時，一棒打死與狗子吃。心佛眾生，三無差別，即心即佛，非心非佛。前之諸佛但為吾之導師善友，絕無所謂權威賞

罰之可言。是故，在宗教則不免屈抑人之個性，增長人之惰性，而在佛法中絕無有此。至于神我梵天種種謬談，則更早已破斥之，為人所共悉，此即不贅。

第二、凡一種宗教，必有其所守之聖經，此之聖經，但當信從，不許討論，一以自固其教義，一以把持人之信心。而在佛法則又異此。曾言依義不依語、依了義經不依不了義經，即是其證。今且先解此二句名詞。實有其事曰義，但有言說曰語，無義之語是為虛語，故不依之。了有二解：一、明了為了；二、了盡為了。不了義經者，權語略語；了義經者，實語盡語。不必凡是佛說皆可執為究竟語，是故盲從者非之，善簡擇而從其勝者，佛所贊嘆也。其容人思想之自由者如此。但于此有人問曰：佛法既不同于宗教，云何復有聖言量？答：所謂聖言量者，非如綸音詔旨更不容人討論，蓋是已經證論，眾所公認共許之語耳。譬如幾何中之定義公理，直角必為九十度，過之為鈍角，不及為銳角，兩邊等，兩角必等之類，事具如此，更又何必討論耶！此而不信，則數理沒從證明。又，聖言量者，即因明中之因喻。因明定法，是用其先已成立共許之因喻，比而成其未成將立之宗。此而不信，則因明之學亦無從講起。要之，因明者，固純以科學證實之方法以立理破邪，其精實遠非今之論理學所及，固不必懼其迷信也。

三者、凡一宗教家，必有其必守之信條與必守之戒約，信條戒約即其立教之根本，此而若犯，其教乃不成。其在佛法則又異此。佛法者，有其究竟唯一之目的，而他皆此之方便。所謂究竟目的者，大菩提是。何謂菩提？度諸眾生，共登正覺是也；正覺者，智慧也；智慧者，人人固有。但由二障，隱而不顯，一煩惱障，二所知障，此二障者，皆不寂淨，皆是擾攘昏蒙之相。故欲求智慧者，必先定其心，猶水澄清乃能照物耳。而欲水之定，必先止其鼓蕩此水者。故欲心之定，心先有于戒。戒者，禁其外擾，防其內奸，以期此心之不亂耳。然則，定以慧為目的，戒以定為目的；定者慧之方便，戒又方便之方便耳。是故，持戒者菩提心為根本，而大乘菩薩利物濟生，則雖十重律儀，權行不犯，退菩提心則犯。此其規模廣闊，心量宏遠，固不同拘拘于繩墨尺寸之中以自苦為極者也。夫大乘固然，即在小乘，而亦有不出家、不剃髮、不披袈裟而成阿羅漢者（見《俱舍論》）。佛法之根本有在，方便門多，率可知矣。

四者、凡宗教家類必有其宗教式之信仰。宗教式之信仰為何？純粹感情的服從，而不容一毫理性之批評者是也。佛法異此。無上聖智要由自證得來，是故依自力而不純仗他力。依人說話，三世佛冤，盲從迷信，是乃不可度者。《瑜伽師地論》："四力發心：自力、因力難退，他力、方便力易退"，是也。然或謂曰：汝言佛法既不重信仰，何乃修持次第資糧位中，首列十信；五十一心所十一善中，亦首列信數？答之曰：信有二種，一者愚人之盲從，一者智人之樂欲。前者是所鄙棄，後者是所尊崇。信有無上菩提，信有已得菩提之人，信自己與他人皆能得此菩提，此信圓滿金剛不動，由斯因緣始入十信。此而不信，永劫沉淪。又，諸善心所信為其首者，由信起欲，由欲精進，故能被甲加行，永無退轉。是乃丈夫勇往奮進之精神，吾人登

峰造極之初基，與夫委己以依人者異也。

如上所言，一者崇卑而不平，一者平等無二致；一者思想極其錮陋，一者理性極其自由；一者拘苦而昧原，一者宏闊而真證；一者屈己以從人，一者勇往以從己。二者之辨，皎若白黑，而烏可以區區之宗教與佛法相提並論哉！

所謂佛法非哲學者，按哲學之內容，大約有三，而佛法一一與之相反，故佛法非哲學。何者為三？

第一、哲學家唯一之要求在求真理，所謂真理者，執定必有一個甚麼東西為一切事物之究竟本質，及一切事物之所從來者是也。原來，哲學家心思比尋常聰明，要求比尋常刻切。尋常的人見了某物某事便執定以為某物某事，一例糊塗下去。譬如宗教家人說有上帝，這些庸人便承認以為有上帝，牧師教人崇拜耶穌，這些人便崇拜耶穌，一味盲從，更不思索，千百年來只是糊塗下去。自有哲學家以來，便不其然。你說有上帝，他便要問問上帝是個甚麼東西，眼可以看得見麼？耳可以聽得到麼？如謂世界人類都是上帝造的，上帝又是誰造的？上帝如果不待誰個造他，世界又何必要上帝造他？所以自從有了哲學，一切人便不肯一味糊塗了。哲學家在破除迷信一方面，本來是很對的，是可崇拜的。但是，他一方面能夠破除迷信，他果真能不迷信麼？他能破人謬執，他果能不謬執麼？他天天求真理，他果能求得到真理麼？翻開一部西洋哲學史，中間大名鼎鼎的哲學家，如像破除有人格的上帝過後，便迷信一個無人格的上帝；破除獨神論過後，便迷執一種泛神論。不信唯物的便主張唯心，不信唯心的便主張唯事。笛加爾善于懷疑，于是便破壞世界一切事實，都以為非真理，但隨即迷信一個我，以為我既能懷疑一切非真，我便是真。到了現在的羅素，便說他那個我能懷疑，我固是真還靠不住。羅素既能破一切唯物唯心非真理，然而隨又執定一切現象是真。仔細想來，他那種現象是真，與笛加爾的我是真，有何分別呢？總而言之，西方一切哲學家對於世間一切事物，你猜過去我猜過來，紛紜擾攘，相非相謗，皆是執定實有一理。甲以為理在此，乙以為理在彼，別人誠都可破，自己卻不能有個不可破的學說服人。破一立一，不過增加人許多不正確的見解而已。

問者曰：如你說世間既無真理，到底還有甚麼？如謂一切都無，則彼虛無主義無世界、無人類，豈非是唯一獨尊的學說嗎？答曰：虛無主義，克實亦只是一種妄見，如說真理者一樣，但名辭不同耳。並且當知，此種見解為害更大。彼輩計一切都無，趨向斷滅，主張破壞與自殺，使人橫生邪見，思慮顛倒，行為悖亂，危于世界，蓋難盡言。諸君又當知，此種異說非但在現在的時候方有，從前印度亦復如是，所謂斷滅外道，所謂惡取空者皆是也。今復質問彼曰：如謂一切皆假，此假又何所從來？如謂一切都無，云何復有斷滅？且既一切無矣，何以你又起如是見，立如是論？又何以要懷疑？又何以要破壞？此種自語相違，自行矛盾，是為誕妄之極。但其立說膚淺，也可不必多辨了。

問者曰：你謂哲學家之真理無有，又說真理不可求，而又不許人計空計滅，然則你們到底說甚麼、作甚麼呢？答曰：佛法但是破執，一無所執便是佛也。故佛之說法，不說真理而說真如。真如者，如其法之量不增不減，不作擬議揣摩之謂。法如是，說亦如是，體則如其體，用則如其用，決不以一真理範圍一切事物，亦不以眾多事物奔赴于一真理。所謂在凡不滅，在聖不增，當體即是，但須證得，凡物皆然，瞬息不離者也。夫當體即是，何待外求。如彼所計之真理本來無有，但屬虛妄，則又何可求耶？有則不必求，無則不可求，故云不求真理也。問曰：如你所說，既云真如即吾本體，不待外求，云何又為吾人所不知？且既當體即真，物物不二矣，云何又有此虛妄耶？答曰：茲先設一喻：諸君夜靜三更時，寢于床榻，忽生一夢，倏見山河草木宮室樓台，更有人物或親或怨，汝時感情激發，喜怒愛惡，或泣或歌，或欣或懼，及至醒時，了無一物。當汝夢中見山河人物時，汝能知其假否？當汝夢中喜怒悲懼時，汝能知汝妄否？然雖假雖妄而實不離心，如離汝心，汝又安能有夢？然又不可謂汝夢即是真實。如謂汝夢即真，醒時何以又知其顛倒不實？諸法真如亦復如是。未至真覺，終在夢中；既在夢中，虛妄顛倒，昏蔽纏心，云何得識真如本性！然雖不識真如本性，而此世間種種山河大地人禽動植，一切喜怒哀懼，一切心行語言，要皆不離真如本性。此雖不離真如本性，而又非即真實，及成佛果，大覺菩提，始知當時顛倒有如昨夢。然雖大覺，契證真如，此覺此如亦非從外而得，非從無忽有，仍亦即汝當日自體。是故，既不可以不識而撥無，又不可以執假以為實也。真如自性，如是如是。

問曰：真如既如所言，吾人又如何證得耶？答曰：此間有一句格言，聞者應深信受，即所謂不用求真，但須息妄是也。夫本體既恆不失，自可不必徒勞，獨妄為真障，是以當前不識，彼障既除，真體自現。譬之人處夢中，亦能思慮察覺，然任汝若何推尋，終始總是夢中技倆；任汝推尋有獲，所得仍惟是夢。及一旦醒時，而昔之虛妄，不求知自有知；今之真實，不求覺而自覺。故吾人真欲了知真實，惟當息此虛妄，跳出此虛妄之範圍耳。

雖然，所謂息妄者，非一朝一夕所能成功。吾人歷劫以來，種種顛倒煩惱種子，蒂固根深，豈能一期拔盡？園師藝園尚須時節，農人播穀且歷春秋，況欲跳此生死範圍，證得菩提碩果，而可不歷劫修持？但求速效，烏能濟也！故必境、行、果三，明了無蔽，由聞而思，由思而修，三大僧祇，始登究竟。若不明此，徒以少數功德，片刻時光，見彼無成，退然思返，且謂無效，墮人信心，此乃愚痴謬妄，可悲可痛者也。

復次，所謂息妄，亦非如伐木拔草，斬斫芟夷。應知依他起性，有相是空，空自不必除，有則不可除。但權衡審度，應識其機，用舍黜陟，唯辨其性，善者既伸，惡自無由，如秤兩頭，低昂時等。此中妙用，未可悉言，真發心人，應自探討。

然又當知，夫妄亦何過，妄本無過，過生于執。譬如吾人開目則妄見山河人物珠玉

珍奇，此乃自識相分，妄而非實，不離自體。然眼識變現，任運起滅，都無執著，不生好惡，則雖此幻妄，抑又何害？唯彼俱時意識，尋思執著，認為實有，而曰：此實山河也，此實人物也，此實珠玉珍奇也。又從而推究之曰：此實有山河種種者，必有其從來之真理也。持之而有故，言之而成理，執之而益深，遂為天下之害根。所謂生于其心，害于其政，發于其政，害于其事者是也。蓋由執生愛，由愛生取，與愛相違，復生于嗔。由此，好惡逞情，爭訟斯起，相殺相淫，相盜相欺，惡業輪迴，終古不已。夫果何過，過生于執耳。苟能不執，物物聽他本來，起滅任其幻化，都無好惡，取舍不生，身語意業，悉歸烏有，云何異熟招感，而起生死輪迴？迷苦永消，登彼大覺。是故，執破為佛，破執為法，非別有佛，非別有法。

二者、哲學之所探討即知識問題，所謂知識之起源，知識之效力，知識本質，認識論中種種主張，皆不出計度分別。佛法不然，前四依中說依智不依識。所謂識者，即吾人虛妄分別是也。所謂智者，智有二種：一者根本智，二者後得智。根本智者，親緣真如，和合一味，平等平等，都無分別是也。後得智者，證真如已，復變依他與識相應，而緣俗諦以度群生是也。此後得智既緣一切，是故真妄虛實、五法三自性、八識二無我、世間出世間，盡無不知，盡無不了。由斯建立法相學，由斯建立唯識學，由斯建立一切方便學。彼所謂認識論者，從彼之意俱可了達。如是設問知識之來源何如乎，則可答曰：有阿賴耶識含藏一切名言種子（具受熏持種之性，而非是種，但是持種）無始傳來，種（種子）現（現行）熏習；八、七、六、五，展轉變現，能了能別，所謂知識由斯而起。彼不達此阿賴耶者，或謂知識出于先天，而先天為是甚麼？不了其體，何以示人？又或謂出于經驗者，經驗何以存而不失？又復何以無端發此經驗？此疑不解，何以取信。其為批評論者，則又不過調停兩是，舍百步之走，而取五十步之走而已。然彼二既是徒虛，更何長短可說？今既了達賴耶，一者、識有自種，為生識因緣，故不同于經驗論但執法塵。二者、諸識現行復熏成種，復由此種能生後識，故不同于先天論但執一常。種生于現，現生于種，八識因依，執持含藏，理實事真，不復同彼調停兩可論但有言說。吾敢斷言之曰：若必談知識之本源，惟有佛法為能知也。

所謂知識之效力如何耶？在彼未達唯識者，則或以為吾人知識無所不了，是謂獨斷論；其或以吾人之知識了無足恃、一無所能者，是為懷疑論；其或以為吾人之知識實有範圍，越此範圍則在所不悉，是謂積極論。今唯識家言，俱異于彼。一者、眾生之識，各局其量，詳彼哲學家知識之範圍體性，不出唯識家所謂之率爾尋求決定之六識也。六識局于法塵，八識、七識之緣得著者，六識尚緣不著，況乎與淨識相應之四智之緣得著者，而謂六識能緣得著耶？恆河沙數世界外一滴之雨咸知頭數，而謂六識能知耶？故不同于獨斷論。二者、凡屬有情，皆具八識五十一心所，此心、心所，由見、相、自證、證自證四分成就。見緣相分，自證緣見，內二互緣，皆親所緣，皆現量得。雖或見分緣相有比有非，而自證緣彼亦屬現量，自證為見果，證自證為自證果，自證復為證自證果，而皆現量（柏格森直覺非現量，但是率爾尋求之獨頭意識）。是故無無窮過。是以，無染無淨，無比無非，一入自證，悉成真

實。七識執我雖為非量，然若疏緣我影，任緣第八，而不執八為我以我為八，亦復無過（六識遍計同此）。過生于執，非生于緣，是故一切真實一切決定。以是理故，不同于懷疑論。彼積極論者，但為調停兩可，而此于彼一切俱非，是故不同于彼積極論。

所謂識之本質為何耶？彼未了達唯識者，或謂知識本質唯吾觀念，或謂知識本質存于實在之物體，或謂非心非物但現象耳。了達唯識義者，始知凡識四分合成：一者、見，謂能識。二者、相，謂所識。三者、自證，此見、相二分皆依自證而起，此自證分是稱自體，此體若無，便無相、見，亦無量果。四者、證自證，此證自證分復為自證分之量果，而復以彼以為量果，俱如前說。如謂無相則無所緣，既無所緣即不成識，非于龜毛而生識故，是故不同于觀念論。如謂無見則無能緣，亦不成識，非彼虛空亦能了故，是故不同于實在論。如無自證即無相、見，相、見俱無即不成識，非無蝸頭起二角故，假依實有，現象依自體有，是故不同于彼現象論。從上說來，所謂知識問題，在彼則謬妄重重，乖舛莫定，在此則如實正智，金剛不搖。如何佛法同彼哲學？今之哲學非特不知知識之來源、效力、本質而已，即曰彼知，亦只是知散亂意識之一部分耳，識量之廣大，彼俱不知也。

問：人有此知識，止知有此知識可耳，更求識量之廣大，有何必要耶？答：即此知識，不能孤起，相繫相成，不能獨立，故有求識量廣大之必要。知識之本體名自性，自性之起必有所依，此依名根。自性依根而起矣，起必有所及，此及名塵。一識之起必有其伴，此伴名心所。自性、所依、所及、所伴四者合，而識起之事得矣。然此識起亦非徒然而起，起必有所為，此所為名作業。必有此五事，而後知識之事始畢。此事雖畢，經數十年後復能記憶之，則必有攝藏此事者為之攝藏，此攝藏名八識。知識自性名六識，與知識同起之眼耳鼻舌身識名五識。五識有依根，六識亦有依根，名七識。此其識量之廣如是，而俱與知識有密切關係，知識不能離是而獨立也。是故獨隘一知識而求知識之來源、效力、本質，決不能得其真相也。是故，哲學者無結果之學也。（上來說理稍近專門，如欲求精詳，當研唯識。）

三者、哲學家之所探討為對於宇宙之說明，在昔則有唯心、唯物，一元、二元論，後復有原子、電子論；在今科學進步相對論出，始知宇宙非實物，不但昔者玄學家之唯心論、一元論無存在之理由，即物質實在論亦復難以成立。今之科學之所要求者唯方程式耳，世界之所實有者惟一項一項的事情，非一件一件的物質也。羅素之徒承風而起，由是分析物、分析心，物析而心，心析而物，但有現象不見本體。夫既無本體，現象復何由而生？且既執現象實有，亦是離識有境。此種論說，以較西方舊日，誠見高明，以彼西方學說舊無根柢，而科學勃興于二百年間能有此成功，亦良足欽佩。然佛法之言，猶異夫此。茲以唯識之義略為解釋于後。唯識家但說唯識，不言宇宙。心即識也，色亦識也。譬如于眼，能見于色是為眼識，此色非離眼識實有，以離識不起故。相分不離自證，亦猶見分不離自證，是故色非實有，但有眼識。聲香味觸法，亦復如是。一切色法，但為識之相分。山河大地亦有本質，

而此本質即為八識相分。故曰三界唯心、萬法唯識。故宇宙離識非是實有。

復次，又當知此識亦即是妄，都無自性。何者？仗因托緣，方得起故。譬如眼識生時，非自然生，待因緣合，其數為九：一者根，二者境，三者作意，四者空，五者明，六者分別依六識，七者染淨依七識，八者根本依八識，九者識自種子。如是，耳識生時因緣必八，鼻舌身識因緣需七，六識需五，七識需五，八識需四。既有所仗托和合而起，故非實有，但如幻耳。既無主宰，亦非自然，是為依他起性。

復次，又應當知此因緣，有亦不常。何者？以其頓生頓滅，剎那不停故。蓋識之生，眾緣既合，種起現行，現行起時，復熏成種，才生即滅，現謝滅已，種復生現，現又熏種，種又生現。如是剎那剎那，相續前後，于現生時，山河大地歷歷在目，生已即滅，又復寂然。是故，吾人一日半日中，已不知歷盡許多新天地矣。或曰：既云頓生頓滅，何以吾人目視山河但見其生未見其滅？但見其有不見其無？曰：此無可疑，譬如電影，以彼電力迅速，遂乃見彼影像確然，前後始終宛如為一，而不知彼數分種之間，頓滅頓生，舊去新來，已易百千底片矣。宇宙幻妄，頓滅頓生，亦復如是。復次，此雖幻有，而即是識。識雖起滅無恆，而種子功能永無消滅。但有隱顯之殊，絕無生滅之事，既無有始，亦無有終。是故，不同彼現象論者謂無心有事，從無忽有；又不同彼斷滅論者，有已忽滅。雖則頓起頓滅，而實不生不滅。

復次，當知一人八識，各有相、見，是故山河大地有情各變，而非多情共一山河大地。以俗語表之，即人各一宇宙是也。雖同居共處，而互始互終彼此不能相離。彼不能越出彼之宇宙，而攙雜此之宇宙；此亦不能越出此之宇宙，攙雜彼之宇宙。是故，對語一室，而天地各殊；同寢一榻，而枕衾各異。此中妙理，更復難言。或曰：既云彼此之天地各殊，何以復能共處一室而不相礙？又，有情所變既異，云何復能共證一物耶？答：此亦設一喻，譬如燈光，于一室中然彼多燈，一一燈光都非相礙，一一燈光都能照室。有情變相亦復如是，業力既同，處所無異，所變相似，不相障礙，如眾燈明，各遍似一，光光相網，胡為相礙！業力既同，處所既一，故所緣雖別，亦互證而知。雖互證知，而實各證所知，非共證一知也。何者？以業力異者，雖同一處所證別故。如無病人與有病者共嘗一味，甘苦各別，由此故知境非實有，唯有心耳。

復次，既知心外無境，大地山河與吾為一，由此當悟吾人之身非復局于七尺之軀，吾人之心量廣闊，如同法界，遍于虛空。自從虛妄分列，遍計固執，遂乃把握七尺臭皮以為自我，自此之外別為他物。愛憎劫奪，橫起狂興，歷劫沉淪，永無超拔，棄舍瀛渤，認取浮漚。是故，佛告文殊：善男子，一切眾生，從無始來，種種顛倒，猶如迷人，四方易處，妄認四大為自身，六塵緣影為自心相。譬彼病目，見空中華，及第二月。善男子，空實無華，病者妄執，吾等眾生，無始時來，長處夢中，沉莫治，今當發無上菩提之心，息此一切虛妄，復吾本性，識取自身，是為丈夫唯一大事。

總而言之，彼諸哲學家者所見所知，于地不過此世界，于時不過數十年間，不求多聞，故隘其量，故局其慧。若夫佛法，則異乎此。彼諸佛菩薩，自發起無上菩提心、廣大心、無邊心以來，其時則以一阿僧祇劫明決此事，二劫見之，三劫修滿而證之，然後隨身現化，普度有情，以彼真知，覺諸後起。其說為三世諸佛所共證而莫或異，其地則自一世界至無量無邊世界而不可離。舍此不信，徒自暴絕，以螢火之光當日月之明，高下之辨不待言矣。

問者曰：如汝所云，類為常情所難了，亦為世理所未經。汝斥宗教為迷信，汝言得亦非迷信耶？曰：佛法之與宗教，其異既如上言，此即不辨。至佛法，亦有難信難解者，雖然，稍安無躁。世間難信難解之事理亦眾也，然勿謂其難信而遽斥其迷焉。譬如，物質實在，此亦常人之恆情也，然在羅素等，則謂無有物質，只有事情，吾人遽可以常理而斥彼迷信乎？又如萬有引力之定律，二百年來人所不敢否認者也，自安斯坦相對律出，而彼萬有引力之定律乃失其尊嚴，吾人遽可以舊日之見，而斥安斯坦之迷信耶？抑又如任何三角形，三角之和必等于二直角，此亦自希臘以來人所公認之定理也，然近日新幾何出，復云三角之和有大于二直角者，亦有小于二直角者，吾人又安可以常情而斥其為迷信耶？以一指翻動太平洋全體，人必曰此妄人也，此妄語也，然事有誠然，如將入此一指于太平洋中，其近指之水必排動其鄰近之容積而後能納之，此鄰近又必排其鄰近，則雖謂太平洋全體翻動亦可也。牽一發而全身動，故必知三阿僧祇劫，然後知此一刹那也；故必知無量無邊世界，而後知此一世界也。是故，人智原有高下之不齊，而斷不可用常情以度高明之所知。彼科學家哲學家與吾人同處夢中者耳，智慮不齊尚不可以常情測，佛與眾生一覺一夢，則又烏可以夢中人之知解，而妄測大覺者之真證耶！如真欲斥佛法之迷妄者，亦非不可，但必先讀其書，先達其旨，而後始可從事。苟于彼之書尚未曾讀，或尚未能讀，而動以逸出常情相非難，且將見笑于科學家矣，于佛法奚損毫發耶！（以上言佛法與宗教哲學之異既盡）

（恩洋按，上來所談，妙味重重，俱達問題深處。洋六月自北大來謁吾師，朝夕侍側，渥聞勝義，玄音一演，蒙妄頓消。始知昔日所治哲學種種迷執，有同說夢，安身立命，別有在也。晨鐘木鐸，更焉求之。由是踴躍，愛莫忍去。今以記錄之便，備以平日所聞，具列如上，以餉好學。嗟乎！同志盡其歸哉！）

此篇系歐陽竟無先生在南京高等師範學校哲學研究會講演。由其弟子王君恩洋筆記。當時講題，系《佛法非宗教非哲學而為今時所必需》。因限于時間，未畢其半。《佛法為今時所必需》一段，系王君恩洋續成。附錄篇後。頃承歐陽先生郵寄來粵，特由同人印成單行本流布。（又，此篇曾付刊南京高師《文哲月刊》，後《民鐸雜誌》李石岑先生函索此稿，擬刊諸《民鐸》三卷三號。）刊者志。

附：佛法為今時所必需

王恩洋

雲何謂佛法為今日所必需耶？答此問題，先需聲明幾句話。便是一切有情，但有覺迷兩途，出迷還覺，舍佛法別無二道，是故欲出迷途，必由佛法。佛法者非今日始需，非現在始需，又非特中國人始需，又非特人類始需。佛告須菩提：諸菩薩摩訶薩，應如是降伏其心，所有一切眾生之類，若卵生、若胎生、若濕生、若化生、若有色、若無色、若有想若無想、若非有想非無想，我皆令入無余涅槃而滅度之。遍極大千沙界，窮極過現未來，一切一切，無量無邊，皆佛法之所當覆，皆菩薩之所當度者。而于時間則分現在，于空間則分中國，于眾生則分人類。而曰人類當學佛法，中國人必需佛法，現在當宏佛法，若是舍棄菩薩大愿，是為謗佛法，非宏佛法也。然而，謂佛法為今日所必需者，謂夫時危勢急，于今為極，迫不及待，不可稍緩之謂耳。

所以者何？答曰：縱觀千古，橫察大地，今日非紛亂危急之秋乎？強凌弱，眾暴寡，武力專橫，金錢驕縱，殺人動以千萬計，滅國動以數十計，陰慘橫裂，禍亂極矣。雖然，此猶非所最痛，亦非所最危。所謂最痛最危者，則人心失其所信，競無安身立命之方，異說肆其紛披，競無蕩蕩平平之路。莊生有雲：哀莫大于心死，而身死次之。心既失其所信，而無可適從，于是言語莫知所出，手足不知所措，行為不知所向。潦倒終古，醒一生，如是而生，生曷如死！且夫人心不能無所用，不信于正則信于邪；人身不能無所動，不動于道則動于暴。如是，則盜竊奸詭，何惡不作矣！

然則，今日世界之亂，特其果耳；今日人心之亂，乃其因也。蓋彼西歐，自希臘、羅馬之末，國勢危惴，學說陵夷，于是北方蠻族，劫其主權，複有猶太耶教，劫其思想，千余年間，是稱黑暗時代。然人心不能久蔽而不顯，思想不能久屈而不伸。爰有哲學家破上帝造物之說，除迷信，研形而上學，而一元、二元之論，唯心、唯物之談，紛紜雜出；嗣有科學家，研物質學，創造極多，而利用厚生、日用飲食之事，于茲大備。二者之間，科學盛行。持實驗主義者，既不迷信宗教，亦不空談玄學，以為人生不可一日離者，衣食住也，要當利用天然，以益人事，本科學之方法，謀人類之幸福耳。夫利用厚生，亦何可少？人類一日未離世間，一切有情，皆依食住，是故科學家言，甚盛行也。雖然，人心不能無思，所思不能以此衣食住為限；人心必有所欲，所欲不必唯在物質之中。而欲人之盡棄哲學妙理而不談，而不思，而不欲，此大不可能之事也。又況唯是主張人生，于生從何來，歿從何去，一切不問，但以數十年寒暑之安樂為滿足，其或有鄙棄此數十年之寒暑為不足，而更思其永久者，則又將奈何？又況科學進步，物質實在之論既已不真，彼蓋安斯坦輩之所要求者唯一方程式耳，羅素輩目中所見之物非物也，所見之人非人也，一件一件的事情，由論理學而組織之耳。由此以談，則所謂人者何？一方程式耳；物質者何

？現象之結合耳。如是，一切虛幻，除虛幻更無有實。是人生之價值既已完全取消，又何必勞勞終日，苦心焦思，以事創造，以事進取耶？是故，今之哲學家之言，科學家言，大勢所趨，必歸于懷疑論。然于此際有異軍起，一切哲學理智及科學方法、論理學概念、觀念廢而不用，以為此皆不足以求真，皆不足創造，而別有主張，號為直覺，謂此直覺但事內省，便可以得一切真，見一切實，便可以創造進步，使生命綿延于無窮，則所謂伯格森者是也。平心論之，人類之行為豈果出于理智？一舉一動而必問其所以然，而必推其結果，則天地雖大，實無所措其手足矣。是故，為行為之動力者，純屬感情，則欲事創造生活，良以直覺為當。雖羅素主張理性，而于行為則認沖動為本，故欲生命之綿延，柏氏主張誠非無見。又科學之組織，純以概念觀念為具，以方程為準。概念也，方程式也，皆名言也，皆假說也。名言所得，唯是名言；假說所得，唯是假說。欲求本體，親証真實，愈趨愈遠。是故，柏氏之反對科學，亦非無故。雖然，彼所主張之直覺，遂至當乎？遂無弊乎？當知吾人同在夢中，于此夢中，一切之意志、感情、知識均不可恃，則彼直覺亦胡可恃？蓋雜染種子，紛措混淆，隨緣執我，所得常為非量故也。直覺之說非至當也，而彼主張理性主張科學者，又即以修正此情感沖動之錯誤為其理由。故羅素反對柏格林曰：文明人都由理智，野蠻人反之；人類都用理智，動物反之。如尚談直覺，則請回到山林中可也。以吾觀之，使今人準柏氏之道而行之，棄科學規律而不用，盲參瞎証，取舍任情，其不流入武斷派者鮮也。是故今日哲學界之大勢，一面為羅素之現象論，一面為柏氏之直覺論，由前之勢必走入懷疑，由後之道必走入獨斷。平心而論，羅氏、柏氏果非昔日之懷疑派、獨斷派乎？不過科學進步，其所憑藉以懷疑、獨斷者根據既厚，以視昔之懷疑、獨斷者為有進步焉耳。然在昔懷疑、獨斷風行一世之日，又豈非持之有故，言之成理，而莫可奪者？後之視今，亦猶今之視昔，二者之辨，相差何能以過也。抑又以理推之，今後之哲學當何如耶？吾意繼羅、柏而起者，必有風行一世之虛無破壞斷滅派。何者？西方哲學于相反兩家學說之後，必有一調和派出現。而二氏之學，果有調和之余地乎？以吾觀之，于善的一面部無調和之余地，于壞的方面，則融洽乃至易也。何者？由羅氏之推論，歸于一切皆虛，然懷疑至極，終難舍我。要知我執至深，隨情即發，縱理論若何深刻，此我終不能化，羅氏既于哲理一面破壞所謂人之實在也，然而仍複主張改造，主張進化，我既虛偽，改造奚為？故知其非真能忘我也。由我見之存，則柏氏直覺之說即可乘機而入。其必曰：一切皆假，唯我是實，但憑直覺，無為不可。以羅氏之理論，加入柏氏之方法，自茲而後，由懷疑而武斷，由武斷複懷疑。于外物則一切皆非，于自我則一切皆是。又複加以科學發達以來，工業進步，一面殺人之具既精，一面貧富之差日遠，由茲怨毒潛伏，苦多樂少，抑郁憤慨之氣，充塞人心，社會人群既無可聊生，從而主張破壞，主張斷滅，機勢既順，奔壑朝東。是故吾謂二氏之後，必有風行一時之虛無破壞斷滅派出世也。諸君諸君，此時非遠，現已預見其倪，邪思而橫議，橫議而狂行，破壞家庭，破壞國家，破壞社會，破壞世界，獸性橫流，天性將絕，馴至父子無親，兄弟相仇，夫婦則獸合而禽離，朋友則利交而貨賣。當斯時也，不但諸佛正法滯礙不行，即堯舜周孔所持之世法亦滅亡淨盡，人間地獄，天地鐵圍，危乎悲哉！吾人又當思之，宗教果無死灰複燃之日乎？吾意當彼支離滅裂

之際，人心危脆，必有天魔者出，左手持經，右手持劍，如模罕默德之徒，芟夷斬伐，聚殲無辜；又必有若秦始皇坑焚之舉，今古文獻，蕩滅無余，以行其崇奉一尊之信仰。何者？狂醉之思想，非宗教固不足以一之；紛亂之社會，非武力固不足以平之；而脆薄弱喪之人心，又至易以暴力、宗教惕服之也。若是，則全球盡為宗教、暴力所壓服，而人類黑暗之時代複至矣。羅素在北京末次講演告我國人曰："中國人切莫要單靠西方文明，依樣模仿的移殖過來。諸君要知，西方文明到現在已經走入末路了。近幾十年來，引入戰爭一天甚似一天，到得將來也許被他文明所引出的戰爭，將他那文明摧滅了。"此語之發，非無故也。吾人今日而不急起直追，破人類一切疑，解人類一切惑，除宗教上一切迷信，而與人類以正信；辟哲學上一切妄見，而與人類以正見，使人心有依，而塞未來之患，是即吾人之罪，遺子孫以無窮之大禍矣。諸君諸君，心其忍乎！

方今時勢之急，既有若此，然而求諸近代學說能有挽此狂瀾，預防大禍者，縱眼四顧，除佛法曾無有二。蓋佛法者，真能除宗教上一切迷信，而與人以正信者也；佛法者，真能除哲學上一切邪見，而與人以正見者也。何以故？宗教家之信仰唯依乎人，佛法則唯依于法；宗教以上帝為萬能，佛法則以自心為萬能；宗教以宇宙由上帝所造，佛法則三界唯心、萬法唯識，山河大地與我一體，自識變現非有主宰；宗教于彼教主視為至高無上，而佛法則種姓親因唯屬自我，諸佛菩薩譬如良友但為增上。又當知：即心即佛，即心即法，心佛眾生平等無二，從此則依賴之心去，而勇猛之志堅矣。仰又當知：彼諸宗教唯以天堂為極樂，以自了為究竟，實亦不能究竟；而佛法者，發大菩提心，發大悲心，自未得度而先度他，三大僧祇皆為度眾。是故，菩薩不舍眾生不出世間，寧自入地獄而不愿眾生無間受苦。然則，佛法與宗教之異，非特真妄有殊，抑亦公私廣狹、博大卑陋永異矣！

複言佛法與哲學異。哲學家所言之真理乃屬虛妄，佛法言真如乃純親証；哲學家求真理不得便撥無真實，佛法則當體即是更不待外求；哲學之言認識但知六識，佛法則八識五十一心所無不洞了；哲學家惟由六識計度，佛法則以正智親知；哲學家不走絕端則模糊兩是，佛法則如如相應，真實不虛；哲學家于宇宙則隔之為二，佛法則與我為一；哲學家則迷離而不知其所以然，佛法則親親切切起滅轉變一唯由我。以是之故，哲學家不走入懷疑而一切迷妄，則走入武斷而一切固執；佛法則真真實實，是是非非，有則說有，依他幻有、圓成實有故；無則說無，遍計俱空故。由是，一切諸法，非有非無，亦有亦無，實有實無，不增不減，不迷不執，遠離二邊，契會中道。由上之故，一切哲學唯是說夢，于人事既無所關，于眾生且極危險，懷疑武斷易入邪見故。入邪見者，執斷執常，計有計無。計無之禍其害尤烈。何以故？一切虛幻都無所有，善既無功，惡亦無報，更何為而修習功德？更何為而濟度眾生？由彼之言，必至任情取奪，異見橫生，破壞一切世間出世間善法故。而在佛法則異乎此，所謂依他如幻，以因緣生故；如幻有相，相複有體，即真如故。所謂一切唯識，但遮外境，而不遮識。當知一切有情，皆有八識五十一心所，無始以來與我光光相網，俱遍法界，必發大悲大愿之心，與之同出苦海，不似計滅者，竟至忘

情背恩入險薄故。又當知，依他起性如幻起滅，而真如體如如不動，不增不減，無生滅故，現識雖複時起時滅，而八識持種，永無壞故。由斯過去、現在、未來恆河沙劫，永非無有，以是因緣，當勤修學，自利利他，善惡果報，毫發不爽故。故哲學為危險之論，佛法為真實之談，取舍從違，理斯準矣。

諸君應知：吾言佛法非宗教非哲學，非于佛法有所私，非于彼二有所惡也。當知一切宗教家、哲學家皆吾兄弟，彼有信仰之誠，是吾所敬；彼有求真之心，尤吾所愛；惟彼不得其道，不知其方，是用痛心，欲其歸正。又應當知：佛法陵夷，于今為極，諸信佛法者流，不同二乘之顛愚，則同外道之橫議，坦坦大道，荊棘叢生。自近日西化東來，乃複依稀比附，或以擬彼宗教而類我佛于耶穌，或以擬彼哲學而類三藏于外道，婢膝奴顏，苟且圖活，此非所以宏佛法，是乃所以謗三寶也。諸君應知：天地在吾掌握，吾豈肯受宗教之束縛？萬法具吾一心，吾豈甘隨哲學而昏迷？一切有情，但有覺迷兩途，世間那有宗教、哲學二物！當知我佛以三十二種大悲而出于世，三十二種大悲者，即悲眾生起一切執，生一切見耳。一切見中，差別有五：一、我我所見；二、斷常見；三、邪見；四、見取；五、戒禁取。見取者何？謂于諸見及所依蘊，執為最勝，一切斗諍所依為業。戒禁取者何？謂于隨順諸見戒禁及所依蘊能得清淨，無利勤苦所依為業。所謂哲學，即是見取，一切斗諍之所由興故。所謂宗教，即戒禁取，一切無利勤苦所由起故。是二取者，佛法之所當辟，而何複比附依違之也？

或複難曰：佛法誠高矣廣矣！雖然，當今之世有強權而無公理，使人皆學佛，則國不亡、種不滅乎？又況乎佛法以出世為歸，以厭世為始，一切都是消極主義，于人類之生存，世道之混亂，有何關乎？答曰：凡此之難，如前所言，俱可解答。彼輩之惑，蓋一則以宗教例佛法，一則以二乘目大乘故耳。今後總答此問，一者、當知佛法根本乃菩提大愿，二者、當知佛法方便多門不拘形式，三者、當知學佛要歷長劫。菩提大愿者，求正覺而不求寂滅故，眾生不成佛，我誓不成佛故，由此大愿以為根本，曰定曰戒皆其方便。所謂方便多門不拘形式者，佛度眾生，其徒有四，曰比丘、比丘尼、優婆塞、優婆夷，在家出家俱無礙故。佛有三乘，曰人天乘、曰小乘、（中分二：聲聞，獨覺）曰大乘，種姓不定，應機說法故。佛法製戒，有大乘律，有小乘律，大持戒，菩提以為根本，是以經權互用，利物濟生，犯而不犯故。所謂學佛要歷長劫者，佛由一切智智成，一切智智由大悲起，大悲由不舍眾生起，自未得度而先度人者，菩薩發心，眾生成佛菩薩成佛，菩薩以他為自故，他度為自度故。以是因緣，菩薩不厭生死，不住涅槃，歷劫修行，俱在世間，化度愈宏，種姓斯生，馴而不已，即成正覺。而三身化度，窮未來際，是故佛不出世，佛不厭世，佛法非消極，佛法非退屈。治世御侮，濟亂持危，亦菩薩之所有事也。總之，佛法之始，唯在正信，唯在正見，唯在正行；佛法之終，唯在正覺。然則，根本決定，金剛不搖，外此則隨時方便，豈執一也。然則，種種危懼，皆屬妄情，一切狐疑，非達佛旨。

如上所明，于佛法要義略示端倪，如欲求精詳，當專研經論。諸君諸君，今何世乎，眾生迷妄，大亂迫前，我不拔度，而誰拔度！又復當知，我佛大悲，說法良苦，諸大菩薩，慘淡經營。我國先哲，隋唐諸彥，傳譯纂記，垂統綦勞；宋明以來，大道微矣，奘師、窺師之學，唯識、法相之義，若浮若沉，幾同絕響。是則，賢聖精神，擲諸虛牝，大道橐籥，漫無迪人。譬諸一家，其父析薪，其子弗克負荷。既內疚于神明，徒虛生于宇宙。誰有智者，而不奮然以正法之宏揚為己任，以眾生之危苦而疚心？先業中興，慧輪重耀，勃乎興起，是在丈夫。

（恩洋按，此文吾師在南京高師哲學研究會之講演錄也。師以局于時間，未盡其意，詞亦未畢其半，恩洋復以平日所受，備而錄焉，以供同志研討。自"雲何佛法為今日所必需耶"以下，洋謬以己意續成之者。前後文詞未及修正，知不雅馴，閱者但求其意可耳。）

（據民國十一年（1922年）四月廣州惠愛中路壬癸坊即廬印行《佛法非宗教非哲學》單行本）

附：歐陽競無先生答梅君書

（前略）批張君文雲：用是生滅，體是真如，見相生滅，內二分正智緣如；若克實言之，內二分安立証義概屬正智邊；言以証自証為如自証緣之，則自証為智；以自証為如証自証緣之，則証自証為智雲雲。王君疑以証自証為如自証為如兩句，令為解之，分三段：

（一）自証與如義：《述記》五十五卷七頁右一行雲：自証分與真如境體義無別。《義演》二十三解之雲：真如是一切法體，亦是無分別智之體，自証複是見相二分之體，據此道理說雲無分別。相見道不法自証者，以其無分別與如俱屬體邊故也。相見後得須表詮分別，故唯法真見道之見分，屬用邊故也。是自証與如就用有分，就體雖非是一而無分也。

（二）自証緣如義：智如雖二，然無分別智為能緣，緣真如所緣時宛若如一。且智不起用時，寂然泯然與如無別。智不起用者，如處女腹中他日有生子用，今日謂之為處女子，然實處女今日無子也。智雖不起，他日必起，今日不謂如而謂智，如處女子也。然其實智與如相處寂然泯然，無能條然即時別出其智，如實處女今日無子也。自証緣如與如相處，如是如是。

（三）批文是曲順自証緣如一句之意：自証緣如，今自証緣自証及証自証緣自証，豈非不緣如耶？故曰：以自証為如，以証自証為如也，以為之言，非自証即如，特以之為如耳（將能作所之意）。于此有難者曰：如即是如，智即是智，絕然不同，而可容人隨意顛用耶？答：依如為智體、智為相見體言，說智而如攝其中，且以之為體，一無別也。依智不起用時言說智而如不可離，二無別也。又況批文是說能緣邊事，主旨成就內二分是智之意也。能緣而緣其所緣，一向是說真如所緣矣，今忽說自証是所緣，不亦是變其能而作所境耶？能不可任意變作所而變之者，必其有可以變作之理在故也。即自証智不起用與其真如無別，所以以之為所，而緣彼之証自証亦乃得用其所謂能者也。然其實則非真如也。今批文亦然，以之為所、為如，非即是如故也。

然則以智緣智耶？以智緣如耶？克言之，以智緣如不可分之智如也。就如邊言曰正智緣如也，就智邊言曰自証智緣証自証智也。法相不可亂，而亦不可不細察其微也。（後略）

唯識抉擇談

第一次（民國十一年九月二日）

【將談《成唯識論》之八段十義，先于本宗要義作十抉擇而談。】（引用標以內系直錄演講原稿之文，以下並同此例。注

）將談十抉擇，先明今時佛法之蔽。其蔽為何？略舉五端：

一者、自禪宗入中國後，盲修之徒以為佛法本屬直指本心，不立文字，見性即可成佛，何必拘拘名言？殊不知禪家絕高境界系在利根上智道理湊拍之時。其于無量劫前，文字般若熏種極久；即見道以後亦不廢諸佛語言，見諸載籍，非可臆說。而盲者不知，徒拾禪家一二公案為口頭禪，作野狐參，漫謂佛性不在文字之中；于是前聖典籍、先德至言，廢而不用，而佛法真義浸以微矣。

二者、中國人之思想非常侗，對於各種學問皆欠精密之觀察；談及佛法，更多疏漏。在教理上既未曾用過苦功，即憑一己之私見妄事創作。極其究也，著述愈多，錯誤愈大，比之西方佛、菩薩所說之法，其真偽相去誠不可以道裡計也。

三者、自天台、賢首等宗興盛而後，佛法之光愈晦。諸創教者本未入聖位（如智者即自謂系五品位。）所見自有不及西土大士之處。而奉行者以為世尊再世，畛域自封，得少為足，佛法之不明宜矣。

四者、學人之于經典著述，不知抉擇。了義不了義乎，如理不如理乎，皆未之思也。既未之思，難免不誤。克實而談，經論譯文雖有新舊，要以唐人新譯為勝。唐人之書間或深博難通，然其一語義俱極諦審，多舊譯所不及。又談著述，唐人亦稱最精。六朝要籍未備，宋明古典散亡，前後作者乏于依據，難雲盡當。今人漫無簡擇，隨拾即是，所以義解常錯也。

五者、學人全無研究方法；徘徊歧途，望門投止，非視學佛為一大難途，即執一行一門以為究竟，如今之言淨土者即是。如此安望佛法之能全顯露耶！且今之學者視世、出世智截然異轍，不可助成，于是一切新方法皆排斥不用；徒逞玄談，失人正信，比比見矣。

欲祛上五弊，非先入唯識、法相之門不可。唯識、法相，方便善巧，道理究竟。學者于此研求，既能洞明義理，又可藥思想侗之弊，不為不盡之說所惑；且讀唐人譯述，既有了義之可依，又得如理之可思，前之五蔽不期自除；今所以亟亟提倡法相唯識也。抉擇之談理難詳盡，【時俗廢疾，略而起之，要其精義，絡繹隨文。】

第一、抉擇體用談用義

【無為是體，有為是用；】此粗言之也。若加細別，則有體中之體、體中之用、用中之體、用中之用。今先言其粗者：無為有八，即虛空、擇滅、非擇滅、不動、想受滅（此五皆就真如義別而立）、三性真如是也。雲何虛空？真如離障之謂。雲何擇滅？由慧簡擇得証之謂。雲何非擇滅？緣缺不生之謂。雲何不動？苦樂受滅（即第四禪）之謂。雲何想受滅？離無所有處欲，想受不行之謂。雲何三性真如？謂善、惡、無記法中清淨境界性。蓋真如遍一切一味，非惡無記中即不遍也，此理須辨。無為法不待造作，無有作用，故為諸法之體。反之由造作生，有作用法，即是有為，故有為是用。此所謂粗言體用也。次細分體用有如左表：

一、體中之體

一真法界

二、體中之用

二空所顯真如（又三性真如）

三、用中之體

種子

四、用中之用

現行

何以謂一真法界為體中之體？以其周遍一切故，諸行所依故。何以謂二空所顯為體中之用？以其証得故，為所緣緣故。何以謂種子為用中之體？以種子眠伏藏識，一切有為所依生故。何以謂現行為用中之用？以現行有強盛勢用，依種子而起故。此總言體用也。如更以相明體用二者、則【非生滅是體，生滅是用；常一是體，因果轉變是用。】何謂非生滅與生滅？欲明此義，須先解剎那義。剎那者，念之異名。念者，變動不居之幻相也。吾人一生心之頃，有無數幻相于中顯現，非可以暫時止息。此頃間無數幻相，以其至促至細，故假以剎那之名。言剎那者，微細難思，才生即滅，不稍停留；正成果時，前念因滅，後念果生，如秤兩頭低昂時等（然將成果時種現同在一處，此即因果同時之義）。常情幻現，亙古遷流，所謂生滅大用，其實如是。反乎此則是非生滅之相也。

複次，何謂常一與因果轉變？轉變即是生滅。因果生滅，相續幻現，証得其實相，是謂如幻三昧，亦名不空金剛。蓋幻相歷然，如量顯現，不壞一法成其全知，故曰如幻三昧。有種能生，勢用終存，幻作宇宙眾相，從無始來盡未來際轉變而現，故

曰不空金剛。所謂因果轉變其相如是。反乎此則是常一之相也。

上以諸相顯體用，體用之義則已明矣。然【有為生滅因果無漏功德，盡未來際，法爾如是，非獨詮于有漏也。】生滅向流轉邊是為有漏，向還滅邊是為無漏。從來誤解生滅之義，以為非無漏果位所有；所據以証成者，則涅槃生滅滅已寂滅為樂（《大論》十八譯作由生滅故彼寂為樂）之文也。此蓋不知寂滅為樂之言非謂幻有可無、大用可絕、滅盡生滅別得寂滅，亦幾同乎斷滅之見而視佛法為死法也；其實乃了知幻相，無所執著，不起惑苦，遂能生滅不絕而相寂然；夫是之謂寂滅為樂也。諸佛菩薩皆盡未來作諸功德，常現其幻，生滅因果又如何可無耶？【是故須知有為不可歇，生滅不可滅，而撥無因果之罪大。又復須知一真法界不可說。】何以故？不可思議故，絕諸戲論故。【凡法皆即用以顯體；】十二分教皆詮俗諦，皆就用言。【又復須知體則性同，心佛眾生三無差別；用則修異，流轉還滅語不同年。】

第二次（九月四日）

第二、抉擇四涅槃談無住

涅槃一名，向來皆以不生不滅解釋之，此大誤也。不生不滅所以詮體也，非以詮用。諸佛証得涅槃而作諸功德盡未來際，故其涅槃實具全體大用無所欠缺；其體固不生不滅，其用則猶是生滅也。此生滅之用所以異于世間者，以盡破執故，煩惱、所知二障俱遣；以真解脫故，相縛、粗重縛，一切皆空。障縛既除，一切智智乃生，即此妙智以為用，一切自在而有異于世間。假使僅以不生不滅為言，則涅槃猶如頑空，果何以詮于妙智之用耶？

涅槃義別有四，即自性涅槃、有余依涅槃、無余依涅槃、無住涅槃是也。自性涅槃者，諸法自體性本寂靜，自然具有，不假他求，凡夫三乘無所異也。有余依涅槃者，顯苦因盡，苦依未盡、異熟身猶在，故名有余依。無余依涅槃者，有漏苦果所依永滅，由煩惱盡果亦不生，故名無余依。此二皆就滅諦為言，故三乘具有而非凡夫。無住涅槃者，就大用方面以詮，諸佛如來不住涅槃，不住生死，而住菩提；菩提者即因涅槃體而顯之用，非可離涅槃而言之也。體則無為，如如不動；用則生滅，備諸功德；曰無住涅槃，即具此二義。此唯大乘獨有，非二乘之所得共。今本宗之所側重，則在是也。

【佛為一大事因緣出現于世。大事因緣者，所謂無量眾生我皆令入無余涅槃而滅度之是也。】或者曰：何不曰令入無住涅槃，而謂無余涅槃耶？解之曰：涅槃為全體大用，在前已明；今茲無余就體邊言，即亦賅用邊言之。體用不離，故舉無余即所以顯無住。《法華經》有法身說法不假言詮之義；其全體表白即全用顯現，最可以見無余不離無住之理。又無余涅槃四姓齊被，三乘通攝，故獨舉以為言也。有人于此不如理思，【遂有歧途曰：大事因緣，出離生死，灰身滅智。】此惑之甚者也。

大智由大悲起；聖者不斷生死，但于生死因緣既明了不迷，雖複生死而不為生死漂流；如是乃能出入生死以說法度生，如是乃得謂永遠出離生死証得涅槃。此豈灰身滅智之可比者？【故唯識家言，雖則涅槃而是無住；不住生死，不住涅槃，盡未來際作諸功德。然作功德乃曰無住，而相寂然仍曰涅槃。《金剛般若不壞假名論》亦作是說：無余涅槃者何義？謂了諸法無生性空，永息一切有患諸蘊，資用無邊，希有功德清淨色相圓滿莊嚴，廣利群生妙業無盡。是則無余涅槃者，決非灰身滅智之謂也。】自其了諸法無生性空、永息一切取蘊、所知清淨、能知圓滿方面言之，即是涅槃寂靜相；自其資用無邊、妙業無盡、廣利群生方面言之，即是無住功德相。涅槃寂靜相者顯體，無住功德相者顯用。故舉無余涅槃即所以顯無住涅槃也。

【此大事因緣亦即是佛唯一不二之教。】佛雖三時說法，分乘為三，然教唯一，即一切眾生我皆令入無余涅槃而滅度之也。【諸有不知，說頓，說漸，說半，說滿。】如天台有四教之判，賢首亦有五教之稱。尋其依據，天台則《無量義經》，賢首則《瓔珞本業經》，皆以事義判別，教味無殊；故說四說五，以義言則可，以教言則不可。教所趣歸，三乘無別，故謂三獸渡河、河流是一也。諸有味此義者，【豈識圓音無非一妙，聞者識上故局一偏，】瀛渤潢污率視其量。【然子貢因論學而知詩，子夏因論詩而知禮；執詩執禮，世典且難，況于佛說？】

行者修習地波羅蜜有地前、地上、地後之三期。地之為言，近取譬也。能生，能持，其象如地，故以地喻。地前二位，曰資糧、加行。資糧位曰順解脫分，加行位曰順抉擇分，即地前七方便；所謂十住、十行、十向、暖、頂、忍、世第一法是也。地上二位，曰見道、修道，即由初地乃至十地是也。地後一位，曰究竟，即等覺、妙覺是也。又地地有三心，曰入、住、出。即地地有四道，曰加行、無間、解脫、勝進。以四道配三心，入心則加行道也，住心則無間道、解脫道也（無間道是正住，解脫道是住果），出心則勝進道也。因有勝進，乃得愈趣勝妙至于圓滿。修行次第雖如是其繁，然一以涅槃貫之，無異趣向。【故初發心入資糧位曰順解脫分，金剛喻定曰無間道，大覺極位得大菩提曰解脫道，】其因、其果，皆以解脫為言也。

【問：教既是一無余涅槃，然發心者不曰發涅槃心而曰發菩提心，証果者不曰証解脫果，而曰証大覺果，何耶？答：涅槃是體，菩提是用，體不離用；用能顯體。即體以求體，過則無邊；但用而顯體，善巧方便。用當而體現，能緣淨而所緣即真，說菩提轉依即涅槃轉依；唯識所以巧妙莫階也。】諸有不知如是義者，每以現法樂住為涅槃，如初禪之離欲、二禪之離苦、三禪之離喜、四禪之離樂，乃至于神我周遍、自然（道家以用為體）、自在（上帝造物之類）、哲學真理、儒家世樂（暫時息機），此皆誤以體為可求，妄構似相執著之；然此似相轉瞬即非，樂且無常，況雲涅槃。至于佛法，但于用邊著力，體用不離，用既面面充實，不假馳求全體呈現，不期而然。是故菩提轉依不異涅槃轉依，于發心者亦不曰發涅槃

心而曰發菩提心也。又【諸佛與二乘解脫身同，牟尼法身不同。】牟尼法身具足涅槃菩提之果，功德莊嚴，【故不曰証解脫果】，而曰証大覺果。

第三次（九月六日）

第三、抉擇二智談後得

智是抉擇之謂。于一切所知境當前照了，複能抉別簡擇，明白決定，無隱蔽相，無迷惑相，是以謂之抉擇，此與慧異。慧是有漏，與我見相應，不離執著，常不如理分別而有迷昧；故有執之識（六七識）決定俱有。又慧雖間有抉擇之功用，然不盡明徹，遍而不全，皆與智有別。是以對治功用獨舉智為言也。智凡有三：一曰加行，二曰根本，三曰後得。加行未能究竟，根本究竟而不能起言說以利他，如今又獨舉後得而談也。

加行智何以非究竟？【加行智，四尋思後四如實，見似非真。】加行智所得蓋為似相真如。當其加功而行，尋思名、義、自性、差別皆假，而如實了悟之際，雖與真抉擇相順，聞思工夫亦不可以忽而視之，然其所証未至究竟處也。

根本智何以不起言說以利他？曰：【根本智入無分別，斯乃見道。】無分別雲者，非空除一切之謂，乃不變種種相狀相分而泯諸分別之謂也。正智緣如，恰如其量，能所冥契，諸相叵得，如是乃為誠証真如，名曰見道。此時戲論既除，思議不及，故無言說可以利他也。利他之用恃相見道。【然真見一三又益之相見十六者、必後得智見乃周圓。真見自悟，相見悟他；有一眾生未成佛，終不于此取涅槃，菩薩以他為自故。】所以須起後得智以悟他也。

何謂真見一三？釋真見道有一心、三心二家之言。一心真見道者，謂根本智實証二空真理，實斷分別煩惱所知二障，雖多剎那事方究竟，而前後相等，不妨總說一心。三心真見道者，謂由三方面緣遣一切有情等假：一則內遣有情假，二則內遣諸法假，三則遍遣一切有情諸法假。以是前後續起有三。是皆以根本無分別智為其體。

何謂相見十六？真見道後次第起心，取法真見道中無間解脫二道能緣正智，所緣四諦真如，變起相分，重加分別以說與他；于此有二重十六心差別。第一重十六心差別有如下表：

┌苦法智忍

┌苦┐

└┐苦法智

| 𑖀集法智忍

| 集 |

| 𑖀集法智

八心觀真如 |

| 𑖀滅法智忍

| 滅 |

| 𑖀滅法智

| 𑖀道法智忍

𑖀道 |

𑖀道法智

𑖀苦類智忍

𑖀苦 |

| 𑖀苦類智

| 𑖀集類智忍

| 集 |

| 𑖀集類智

八心觀正智 |

| 𑖀滅類智忍

| 滅 |

| └滅類智

| └道類智忍

└道 |

└道類智

何謂法（四諦教）忍？忍之為言忍可也；雖則忍可，而未重証，重証取者，要須法（四諦如）智。法忍雖已入住，而火候未熟，法智乃得圓証解脫（此即取法真見解脫道故爾）。于此了知法忍有觀之用，而法智則有証之用，此二者之區別也。然法忍、法智，皆系外觀，觀所緣故。類（後法是前法之類曰類）忍、類智，皆系內觀，重觀能緣故，用慧為忍，用智為智，要由無漏慧無間引生無漏智故，先後次第如此。

于此亦有歧說，謂真見一心、相見三心十六心者，以三心別緣人、法，同于安立，故亦說之為相見。斯說也，《唯識》從之，吾今不從。何以故？三心遣假，泯諸分別，不過次第總別有異，而與相見所緣四諦無關；故以真見一心三心、相見十六心為盡理也。

大乘相見道重之以兩重十六心，故後得智之功用極大。【菩薩于何求？當于五明求。一切智智，五明是資，聞思所成，修慧引生。直往（菩薩）不回心，趣（發心）異于初今。若入果位，所作獨攝（成所作智唯後得智攝），余三通二（圓鏡、平等、觀察三智皆通根本、後得）。如理（根本智証會真如）匪艱，如量（後得智遍知依他）實繁，盡所有性，斯乃殊勝。此義引伸，讀《菩薩藏經》。】

元明人未見古籍，多昧後得妙用之義，至有解《八識規矩頌》而輕視果位五識為未至者；今且一旁辨之。頌曰：變相觀空唯後得，果中猶自不詮真。變相觀空是後得智。其根本智無有影像，親証真空；後得則帶空相而觀空也。前五淨識至果位而後有，雖無根本智，不可証真，然其妙用，即依後得而不窮，並非以其不詮真即有所未至也。

又在因位起六七後得智，更有斷惑之用。惑從迷事起者（此就親迷而言，貪、嗔、慢、無明、戒取、見取等煩惱皆是），一分通後得智斷。惑從迷理起者（就親迷言，疑、無明、身見、邊見、邪見等煩惱皆是），一分不執非獨頭起，同于迷事，大乘修道斷之，亦用後得智；故後得智之用大也。

【問：唯識義是用義，于涅槃則無住，于菩提則後得；無住、後得，証（根本智証真如）以後事則依智不依識，何不曰唯智而曰唯識耶？答：無漏智強識劣，識應其智，智實主之。有漏識強智劣（此智體即是慧。又此有漏指地上所起者言），智應其識，識實主之。五位而及于資糧、加行（此皆用識為主），百法而及于煩惱、不定；作意在凡外小內故（凡夫外道小乘內大不善用取者），法為眾建故，舍智標識而曰唯識。】

第四次（九月八日）

第四、抉擇二諦談俗諦

性相二宗俱談空義，但性宗之談系以遮為表，相宗之談系即用顯體。以遮為表故一切諸法自性皆無，即用顯體故依他因緣宛然幻有，此兩宗之大較也。


性宗之空，龍樹與清辨所談前後迥別。所謂以遮為表者，惟龍樹得之，讀《大智度論》可以概見。蓋勝義諦本非言詮安立處所，說之不得其似，遮之乃為無過。譬如言紅，紅之相貌難于形容，愈描畫必愈失真，不若以非青非黃非白遮之；此雖未明言何色，而意外既有非青黃白之紅色在。龍樹言空，大都如是，故為活用。善解其義者，固不見與相宗抵觸，其實且殊途同歸矣。後來清辨之徒意存偏執，但遮無表，所談空義遂蹈惡取，相宗破之不遺余力，未為過也。

相宗談空所謂即用顯體者，此蓋于能安立言詮之處（即相）直以表為表也；故曰無能取、所取而有二取之無（此即顯空以無性為性），此義詳于《辯中邊論》。論以五義辨空性：第一為相，即謂空性非有（無二取）非無（有無性），非一非異（此與虛妄分別對辨）。第二為異門，第三為異門義，謂空性假名有五，義即各別。所謂五者：一、真如，無變義；二、實際，非顛倒義；三、無相，相滅義；四、勝義，最勝智所行境義；五、法界，一切聖法緣此生義。《對法》解空，七門分別，除前五外，加無我性及與空性。《般若》解空亦有十四門分別，除前五外，更加法性、空性、不虛妄性、不變異性、平等性、離生性、及與法住、虛空界、不思議界。但《般若》異門皆就遮遣為言，此與《中邊》、《對法》謂有"無相"者實不同也。第四空性差別，略有二種：一、染淨差別，由用有垢無垢以顯。十二分教舍染淨法外，別無可說，故《顯揚聖教》亦即此二門而顯揚之。蓋流轉、還滅于斯建立，一切佛法不能外也。二、所治差別，依對治法說，有十六種：一、內空，六根空故；二、外空，六塵空故；三、內外空，根身空故；四、大空，器界空故；五、空空，對治內外一切執故；六、勝義空，如實行所觀真理即空故；七、有為空；八、無為空，二淨法空故；此之八空依境上立；九、畢竟空，饒益有情所為即空故，菩薩以他為自，眾生盡成佛乃証果故；十、無際空，生死無際即空故，不住涅槃不畏生死故；十一、無散空，直至涅槃無一時而間斷故；此之三空依行上立；十二、本性空，種姓本有即空故；十三、相空，大士相好即空故；十四、一切法空，令力

無畏等一切佛法皆得清淨即空故；此之三空依果上立；十五、無性空，無人、法實性故；十六、無性自性空，無性為空自性故；此之二空總依境、行、果三上立。如是十六空，《顯揚》同一建立。複有異門。《大論》七十七，加此無所得，說十七空；《般若》第三分則立十九，加所緣、增上、樂無（四禪天）。又二會則立十八，于十六空除相空，加自共相、不可得、自性三種。一會則立二十，同上分自共相為二，又加散空。勘之可知（《中邊述記》卷一具引）。第五空性成立。總括頌雲：無染應自脫，無淨應無果，非染非不染，本淨由客染。蓋染淨是境，解脫是行，得果淨是果，三者相因。設無染淨之境，何得有于行果？又說染淨依用而殊，無關本性。《中邊》就相詮空，故得如此切實詳盡；此蓋一宗大旨所在也。

性宗之辨空有也，以二諦；相宗之辨空有也，亦以二諦。【空宗俗有真無，相宗則俗無真有。俗有真無者，于世俗諦一切皆有，于勝義諦一切皆空。《般若》所談，非義遮義，匪是其表。】清辨之徒從此立論，如上已說。【俗無真有者，于世俗諦瓶盆遍計一切皆無，于勝義諦一真法界圓成而實。然此真俗唯是一重，若說依他，則四真俗。三科、四諦、及于二空，真之前三即後三俗。】此四重二諦之說，乃窺師本《大論》六十四及護法義建立者，料簡空有，精審無倫。今更表明其大概如次：

次表所列四重二諦之名皆從略稱，若具列之，四俗諦一曰假名無實諦，二曰隨事差別諦，三曰証得安立諦，四曰假名非安立諦；四真諦一曰體用顯現諦，二曰因果差別諦，三曰依門顯實諦，四曰廢詮談旨諦。



攝境隨識

四諦——証得——唯識

攝相歸性

二空所顯真如——勝義——無相

性用別論

一真法界——真如

四俗中初遍計是無，四真中後圓成叵說，惟前三俗與前三真，是依他法，或其所証。【真俗皆有；俗則如幻，真則不空，是詮是表，非是其遮。《瑜伽》所說，不空空顯，如幻幻存，善巧絕倫，于斯觀止！空宗俗有乃相宗初俗，是為情有，情則有其遍計瓶盆也。空宗真無乃相宗後真，是為理無，理則無其遍計瓶盆，俱以一真法界不可名言也。若夫真之前三、俗之後三，不可名而可名，不可言而可言，不了義經烏乎齊量？】

第五、抉擇三量談聖言

就用而談【取舍從違，自憑現量。然真現量，見道乃能；非應無漏，雖現而俗。】蓋現量之現有三義：一者、現成，不待造作，當體顯露。二者、現見，全體呈現，無一毫模糊。三者、現在，現前實現，非過未無體。此三義約識分別，則第八識恆時現量，而微細不可知；五六識少有其義，以有執故唯是率爾心（墮境第一念）得，非如無漏之可以久也。蓋前五依第六識，第六識依意根。意根有染，前六識有現量時亦不免有染。由此可知，前六識所有現量唯是世俗，實不可恃。【據俗而評，患生不覺。故唯聖言，最初方便，馴至証真，縱橫由我。譬如五根（此謂淨色也。別有粗色相扶助者，名為扶根塵。舊亦視同根類，而謂為浮塵根，實屬錯誤），五識難緣，恃聖言量，以能發識比知有根。譬如賴耶，意識難知，恃聖言量，以能執持比知有八。不信聖言，瓶智涸海。聖不我欺，言出乎現，問津指南，豈其失已？】

第五次（九月十一日）

第六、抉擇三性談依他

依義淨《寄歸傳》之說，【空宗以二諦為宗，故談真絕對；相宗以三性為宗，故因緣幻有。因緣幻有者，依他起也。】本宗安立三性，理兼空有；而以因緣幻有之依

他起為染淨樞紐，包括全體大用于無余，故今所談獨在于是。【他之言緣，顯非自性。緣之為種；法爾新生起有漏種，法爾新生起無漏種，都為其緣。】法待緣生，即無自性，即顯畢竟空義。此與空宗本屬吻合，觀《中論》"因緣所生法，我說即是空，亦名為假名，亦名中道義"（此即天台三觀所本）一頌可知。但龍樹雖知有賴耶，而不談其持種受熏，于因緣生法之實際略焉不詳。至于清辨變本加厲，並賴耶亦遮撥之，緣起道理遂不能徹底了解。以視本宗立義，無即說無，有亦說有，稱量而談于我無與者，其相去誠遠矣。

緣起通于有漏、無漏，依他起法即有二別。【有漏緣生曰染依他，無漏緣生為淨依他。】遍計圓成二性即依依他而顯。【執為實有曰遍計所執，空其所執曰圓成實。夫以成之為言乃一成不變義者，則是常義，即涅槃、樂、我、淨義；彼依他緣生則三法印者，無常義、無我義、苦義。若以成之為言為究竟斷染義者，則淨分依他是其所事，體遍而用亦遍，非虛而亦非染；圓實二義依他別具。三界心、心所是虛妄分別故，淨分依他攝屬圓成。若分別立名唯目緣慮，則淨分染分皆依他攝。撥因緣無，黜依他有，彼惡取空流，諸佛說為不可救藥者。】

即如清辨造《掌珍論》，有頌曰：真性有為空，緣生故如幻雲雲，撥無依他起法。此頌具足三支，成一比量（真性簡過，有為正是有法，空是其法，合之為宗。緣生故為因。如幻為喻）。然量有過，立義不成。清辨宗俗有真無，以真性言簡有為是其真諦，故性本空。然對本宗真性有為勝義是有，如此出量，便犯因明有法一分不極成過。又因喻雲緣生故如幻，此雖遣法自性，而不遮功能，即可幻有，如何空無？故此量有過不能立也。據此談空，便鑄大錯。若以本宗道理解者，即可用其因喻立相違量雲，真性有為非空非不空，緣生故，如幻。蓋緣生法分明有相，是故非無；待緣而起，生滅不停，取喻如幻（《楞伽》幻不自生依明咒起，亦是緣生）。即因緣生法非有自性，不從自故，不從他故，不從共故，非自然生故；唯各自種子仗托而起，生必有滅，無實作用，故緣生諸法又畢竟性空；此亦喻之如幻。真性有為空一頌別見于《楞嚴經》，清辨立說似依至教；然在當時清辨對敵立宗並不提明此是聖言。若是聖言，顯揭以談，諍論冰銷，何勞千古？護法宗徒縱加破斥，而亦未聞有人據為叛教。奘師東傳法相，又亦未聞說有此經；故其門下直就量破，不留余地。若果聖言，顯蹈悖謬，豈其有智！故《楞嚴》一經入于疑偽，非無因也。（經文更有可疑之處，今不具舉。）

第七、抉擇五法談正智

五法者何？相、名、分別、正智、真如是也。雲何為相？謂若略說所有言談安足處事？雲何為名？謂即于相所有增語。雲何為分別？謂三界行中所有心、心所（有漏心法）。雲何為正智？（無漏心法）即是世、出世間如量如理之智。雲何為真如？即是法無我所顯、聖智所行、非一切言談安足處事。此之五法，前四為依他起（分別一種合諸識見相分而言。然安慧別義，淵源性宗，以相見為遍計無，不可遵信）

，後一為圓成實。或為能緣，或為所緣，先總括為一表：次釋其義。（分別惟緣相、名。正智自緣其智，亦緣分別，以成一切智智，將能作所故。篇末附錄答梅君書，可以參看。）

相——|

名——|

└——通能所緣

分別——| |——但為所緣

正智——|——|

|

真如——|——|

就無漏言，【真如是所緣，正智是能緣。能是其用，所是其體。詮法宗用，故主正智。】用從熏習而起，【熏習能生，無漏亦然。真如體義，不可說種，能熏、所熏，都無其事。漏種法爾，無漏法爾，有種有因，斯乃無過。】是故種子是熏習勢分義，是用義，是能義。正智有種，真如無種，不可相混。真如超絕言思本不可名，強名之為真如，而亦但是簡別。真簡有漏虛妄，又簡遍計所執。如簡無漏變異，又簡依他生滅。此之所簡，意即有遮。蓋恐行者于二空所顯聖智所行境界不如理思，猶作種種有漏虛妄遍計所執或無漏變異依他生滅之想，故以真義如義遮之。是故真如之言並非表白有其別用（如謂以遮作表，亦但有表體之義。本宗即用顯體，以正智表真如淨用，即但視真如之義為遮）。古今人多昧此解，直視真如二字為表，益以真如受熏緣起萬法之說，遂至顛倒支離莫辨所以，吁可哀也！

第六次（九月十三日）

（續講前節）真如緣起之說出於《起信論》。《起信》作者馬鳴學出小宗，首宏大乘；過渡時論、義不兩牽，誰能信會，故立說粗疏遠遜後世，時為之也。此証以佛教史實無可諱言者，次請約略述之。佛滅度後，小宗盛行。約百余年。有大天者，唱五事以說阿羅漢不遣所知障，未為究竟（上座部學者堅守舊義，故《毗婆沙論》、《異部宗輪》等，皆斥大天為極惡，不留余地）。五事者，頌雲：余所誘無知，猶豫他令入，道因聲故起，是名真佛教。阿羅漢仍有煩惱習氣為天魔嬈，是為余所誘。又微細無明不染污者未除，是為無知。處非處善巧方便未得，是故猶豫。自証不知，仗他指示，是故他令入。因聲聞得道，故道因聲起。即此五事是名佛法。當

時四眾爭論甚盛，遂分兩部；從此說者為大眾部，不從者為上座部。自後迄于佛滅四百余年。兩部又屢屢分歧，大眾部分為九，上座部析為十一，合有二十。其間說理精粗頗有等差，其最精處且有接近大乘性相兩宗而開其先路者。馬鳴初宏大教，由粗而精，由雜而純，法爾如是，無待飾言。今先表諸部分裂之次第，再敘其理論之大概。

（佛滅後百余年）（第二百年間）（———第三百年間———）（第四百年初）

（一）大眾┐——┐（三）一說

|┐——（四）說出世

|┐——（五）雞胤

┐——（六）多聞

┐——（七）說假

┐——┐（八）製多山

┐——（九）西山住

┐——（十）北山住

（二）上座（雪山）———（十一）說一切有┐（十二）犢子┐（十三）法上

|

┐——（十四）賢胄

|

┐——（十五）正量

|

└ (十六) 密林山

└ (十七) 化地—— (十八) 法藏

└ (十九) 飲光

└ (二十) 經量

諸部異執若以淺深列成次第，凡得六宗。第一犢子部"我法俱有宗"，計我在蘊外，非有為、無為；此正對破外道所計主宰常遍之我。第二說一切有部等"我無法有宗"，此計三世三科皆屬實有，但不立實我，較犢子部之說為進。第三大眾部"法無去來宗"，于三世法中惟說現在法及無為法有。第四說假部"現通假實宗"，于現在法中又分別界處是假（不可得故），惟蘊是實。第五說出世部"俗妄真實宗"，于現在實蘊更分別世俗是假，勝義是真。第六一說部"諸法但名宗"，于勝義世俗蘊法說為但有假名。此上四宗立義漸次精微，至于諸法但名則幾與法性宗說相銜接矣。然說法實有，乃小宗之通執。其間異論，或謂現在蘊法是實，界處是假；說假部（分別論之末流。分別論者，合大眾、一說、說出世、雞胤、四部而名之）、《成實論》（經量部別派），皆同此計。或謂界是實法，蘊處是假；經量部本宗作此計。又或謂界處是實，蘊是其假，《俱舍論》作此計（俱舍用經量部義，故亦是其別派）。所謂界則是因義種子義也，故小宗視界為實法者、自然意許有種，而其立說側重用邊，與大乘法相宗立種子義以界處攝無為而闡明依他者頗相接近。又小宗視界為假法者，自然不許有種，而其立說側重體邊，與大乘法性宗遮撥種子惟談圓成者亦甚接近。大乘教雖非直接自小宗出，然流布較後，傳播者對機立說，其與小宗思想難免關涉，不辯可知。今即本上所說，略示大小關合之點以成一表如次：

小 ┐上座部——經量部（計界實） ┐俱舍識（計界處實） 法相宗（立種子義）
└ 大

|

|

|

|

└成實識（計界處假）

|

乘 └大眾部——分別論——說假部（計界處假） 法性宗（不立種子義）┐ 乘

觀上表即可知法性宗之不立種子頗與分別論等相近，而首先就法性立說之馬鳴《起信論》即極見有此種形跡。又馬鳴初在中印度盛唱異說，中印度則分別論流行之地也，其思想之受影響當有不期而然者。及後為脅尊者弟子，北去迦濕彌羅，從五百尊者之後筆受《毗婆沙論》（解釋有部本論《發智論》）之文，備聞一切有部諸師異論，不能愜懷，以至于別宏大乘，其取反對一切有部之思想如分別論等者，又屬應有之事，可無待言也。然分別論之義頗覺粗淺支離，馬鳴為相似之談，其失遂同。【分別論者無法爾種，心性本淨，離煩惱時即體清淨為無漏因，如乳變酪，乳有酪性，是則以體為用。體性既淆，用性亦失（體為其因，因是生義，豈是不生？自

不能立，須待他體以為其因，故用性失）。過即無邊（本論出過備有八段，至文講釋）。】馬鳴之論與分別論相似處，觀下所對列各條自明。

【分別論：心性本淨，（一）客塵煩惱所染污故，名為雜染；（二）離煩惱時，轉成無漏。（三）

《起信論》：是心從本以來自性清淨，（一）而有無明；為無明染有其染心。（二）雖有染心而常恆不變。（中略）所謂以有真如法故，能熏習無明。（中略）謂諸菩薩發心勇猛速趣涅槃故。（三）

《分別論》：無為法有九，第八緣起支無為。緣起非即無為，然有無常生滅之理是常是一說名無為，（一）能令緣起諸支隔別有轉變故。（二）

《起信論》：以依真如法故，（一）有于無明，則有妄心，不覺念起現妄境界，造種種業，受一切身心等苦。（二）】

《起信論》不立染淨種子，而言熏習起用，其熏習義亦不成。【熏習義者，如世間衣服實無于香，以香熏習則有香氣。世間衣香，同時同處而說熏習；淨染不相容，正智無明、實不並立，即不得熏。若別說不思議熏者，則世間香熏非其同喻。又兩物相離，使之相合則有熏義，彼蘊此中，一則不能。如遍三性，已遍無明，刀不割刀，指不指指，縱不思議，從何安立？】

第七次（九月十五日）

（續講前節）《起信》之失，猶不止熏習不成而已，其不立正智無漏種子也，則于理失用義，于教違《楞伽》；其以三細六粗連貫而說也，則于理失差別，于教違《深密》。《楞伽》五法，真如正智並舉而談。《起信》無漏無種，真如自能離染成淨，乃合正智真如為一，失體亦複失用也。《深密》平說八識，故八識可以同時而轉，以是俱有依故；又識各有種，種生現行不妨相並故，因緣增上二用俱有故。《起信論》豎說八識，三細六粗次第而起，幾似一類意識，八種差別遂不可立矣。從史實與理論觀之，《起信》與分別論大體相同也如彼；以至教正理勘之，《起信》立說之不盡當也又如此；凡善求佛法者自宜慎加揀擇，明其是非。然而千余年來、奉為至寶，末流議論，魚目混珠，惑人已久，此誠不可不一辨也；（即如《起信》有隨順入無心之說，談者遂謂無分別是智，有分別是識，佛之遺教依智不依識，即是去識不用。然根本智無分別，而後得智則明明有分別，又與智相應者亦明明有分別之識，安可以無分別是智等概為解釋？無分別有分別系有所對待之言，正未可以一句說死。至于佛教依智不依識雲雲，蓋謂依智得証圓成而如量知依他起性，依識思惟分別則多為遍計所執而不能當理也。反觀《起信論》家所談，非錯解之甚乎？）今故因論正智有種而詳言及之。

馬鳴著《起信論》，立義雖多疏漏，然僅此一書不足以見馬鳴學說之全而決定其真價也。考馬鳴之重要著述已傳譯者猶有數種。一、《六趣輪回經》，詳談六趣生死輪回，無甚精義。二、《大莊嚴論經》，歸敬脅尊者而說引凡外入內事，又說歸依供養因果事，說十二因緣事；此似初入佛教時之作，猶限于小宗所說。三、《佛所行贊經》，與《大莊嚴論經》同其旨趣，而原典文辭特美。四、《尼乾子問無我經》。昔人于此未嘗重視，然提法空要領而談因緣生法俗有真無，實為法性宗之要籍。五、《大宗地玄文本論》。此論亦有疑為偽作者，然其所談五位，義極廣博，甚可推重。所謂五位乃談五義，非立五宗。一切諸法俱非位談《大般若經》法無自性之義，一切諸法俱是位談《阿毗達磨經》五姓齊被之義，無超次第漸轉位談《解深密經》三祇成佛之義，無余究竟總持位談《楞伽經》亂住之義，周遍圓滿廣大位談《華嚴經》帝網重重之義。五經皆大乘最要之籍，而此論已概括其大義而無余（又其說果位有無量過患，故教化之用盡未來際；此既含有無姓之義，實為甚精）。是故馬鳴所宏大乘不可但以《起信》一論相推測也。

第八、抉擇二無我談法無

【執之異名為我；煩惱障存則有人我，障其所知則有法執。】我者主宰義，人與法皆因緣和合而生。謂有主宰即名曰執。佛教大要無非破執二字。執著是眾生，執破即是佛，而破執者則二無我之教法也。依教修行，大小乘各不同。【大乘悲增，修一切智，十王大業，貫徹法空。】蓋智從悲起，所悲者深，故所修者廣，所知者遍，而歷時不得不久；自欲界人王至于色界諸禪（大乘直往菩薩必在色界成佛，與回心者異），皆受極果，得以自在度生；故地前造十王業（人中鐵金二輪王，欲界五天之王，色界初二四禪王），而後得除所知障淨盡，以貫徹法空無我也。補特伽羅無我亦大乘所証，但依小乘所不共者專談法無。此在法相唯識兩宗所修，又各有別。【三科（蘊、處、界）、緣起（十二有支）、處非處（善因果、不善因果）、根（二十二根）、六種善巧，法相所修。自性（八種識）、相應（諸心所）、色（諸所緣）、及無為（識體），百法明門，一切唯識】；唯識所修。法相道理等視萬法，有即說有，無即說無，故依他圓成真幻俱立，遍計本無不加增益；此之謂如量之証，【相應如如】；唯識道理獨尊識法，攝一切法不離心王，識亦虛幻，法空無我（空就體言，無我就用言，三法印中合此二為一法印也），【歸無所得。】兩宗究竟，【一極唱高，寧有容上！】

第九、抉擇八識談第八

凡夫小乘分別心粗，止知有六種識。蓋前五識現前可知，第六識亦顯明易加比度也。但了別之謂識，了別之用依根而起，前五識既各依一根，第六識亦必有不與他識相共之根。前五識外緣實色（此說第八識所變非前五識所親取名外緣），故五根屬于淨色；第六識多內緣獨影相分，待分別而後起，故所依根必非無知色法。又前五識緣現境色、聲、香、味、觸，相分自有其種，即有能引見分之力。六識緣境，相

分多隨見分種而生，不複能引于見分，故第六識所依根必倍有勢力助第六之能緣使其強盛而後可。依上三義應知別有第七識、自此識常與我執相應分別力強而言，得名為識；又自此識能發生第六而言，得名為根；蓋一心法而有二義也。但此第七識性有轉易，染淨功能仍不能依彼恆存，知必更有受持之第八識在。立第八識而後一切染淨起滅（此但功用隱顯，非是法體有無。猶如熟睡時五識不起，非其功能斷滅，特睡眠種子現行，前五識種隱而不現耳），皆有依據，不同憑空來去；此蓋大乘法相宗立義最精之處也。

法相宗之立第八識也，所依至教凡有五類，所依証成道理複有十種或八種。勘《唯識論》；

（一）五教十理及于八証而立此識。（第八識）【此義在八段十義後，姑不必談。然《顯揚》先談建立，後說體業，讀者心朗；今雖不能詳談，亦必略表其目。其顯近易知者，更抉一二別續而詳之。】

五教大意 五教者，《阿毗達磨經》二頌為二，《解深密經》、《入楞伽經》各一頌，又合小乘共許經，乃有五也。第八識梵雲阿賴耶，義譯為藏（舊譯阿梨耶，義為無沒失），凡具三義：能藏（持種），所藏（受熏），我愛執藏（第七識恆量所緣）。又梵雲阿陀那，譯為執持，亦有三義：執持，執受，執取。此種種義皆非前六識所能有。【五識無依義（為諸法依即所藏義）。六識無攝藏義（此即能藏義）。六識無執持法種，執受色根，執取結生相續義。】大乘四教証成此識，不外就此諸義立說。

初一教、《對法》頌雲：無始時來界，一切法等依，由此有諸趣，及涅槃得。此頌以用顯體，凡有三解：一解、初句明能生之因（界即是因），次句明依持之緣（前五識既依五根即不能更持五根，必別有一識持之，即是第八）。因緣具而後有諸趣之染及涅槃之淨。二解、初句說自性，次句說緣生，針對空宗立義；後二句同前。三解、初句明此識相續，次句明依他，三句明遍計，四句明圓成。此頌所明受熏及與依義，蓋偏就所藏邊為言。

第二教、同上經頌雲：由攝藏諸法，一切種子識，故名阿賴耶，勝者我開示。此頌明持種義，蓋偏就能藏邊言之。

第三教、《解深密經》頌雲：阿陀那識甚深細，一切種子如暴流，我于凡愚不開演，恐彼分別執為我。以其執持、執受、執取三義，說此識為阿陀那。此中言執與第七識之執不同，七計有主宰為我，而八則不爾也。所雲執受又有二義：一、覺受義，執受根身而能領略。二、執持義，執受器界。至雲恐彼執為我者，凡愚本有其俱生之我執，聞說不了，必更起分別我執，故不為說也。

第四教、《入楞伽經》頌雲：藏識海亦然，境等風所擊，恆起諸識浪，現前作用轉。此頌仍顯賴耶三藏之義。初二句明賴耶受熏即是所藏義，是顯我愛執藏之恆時不舍，起則顯能生諸法是持種能藏也。

第五教、合小乘諸密意經說而言。【大眾根本識，上座有分識（三有之因，即種子義），化地窮生死蘊（生死位俱有之），有部愛樂欣喜阿賴耶，五教外之小教皆談第八。】此等不過名目不同，所指之法實是第八也。皆詳《攝論》，可勘。（《述記》以大並為一教，小為四教；今以大為四，小為一，亦可。）

第八次（九月十八日）

十理大略【唯識十理：一、持種心；《瑜伽》、《顯揚》、《對法》八証第四，有種子性。】有契經說，諸法種子之所集起故名為心。此心必要決定、恆轉，方能持種。決定雲者，謂于三性中決定是一類無記。恆轉雲者，非斷非常，亙古相續。由前一義乃得遍持三性法種，由後一義乃得持久不失。前六識皆無此義，故必別立一第八識。此在小宗頗有異計，然皆不成，詳《成唯識》，今但略敘之、如經部計轉識是心。然有間斷故，易脫起故，不堅住故，非可受熏持種。彼部或計六識無始時來前後分位識類無別，即名為心。然即彼識類是實則同外道，是假則無勝用，受熏持種之義不成。彼部或計六識事類前熏于後而得名心。然前後念不俱有，如何相熏，此亦不成。又如大眾部計六識可俱時轉，第六為依名心。但諸識俱而無熏習，即無種子，更無持種之義。又如上座部計色心自類前為後種，有因果義。然彼自類無熏習，且有間斷，不成心義。又如有部計三世諸法皆有，因果感赴無不皆成。然過去未來非常非現，又無作用，亦不得名為心。又如清辨等惡取空者執大乘遣相空理為究竟，謂心非實有。彼違經論，成大邪見，無種無識，功用唐捐。是故應信有第八識能持種心，依此建立染淨因果。

【二、異熟心；八証第六、身受差別。】真異熟心酬牽引業，遍無間斷。依據此義應別立第八識（第八猶如庫藏，凡所藏物隨用取攜；諸法依第八，隨其業報有現有現），眼等識有間斷故，非一切時是業果故，又在定中或不在定、起眼識時或余識時、有別思慮無別思慮、如理作意或不如理、此來彼去理有眾多身受生起，後時此身遂有怡適或勞損，若非恆有真異熟心，如何有此？故知定有此第八識真異熟心。

【三、趣生體。】有情流轉五趣四生，為彼體者必應實有（有體）、恆（無間無雜）、遍（遍界地有）、無雜（惟生自趣法）。命根非實有故，諸生得善及意識中業所感者不恆有故，諸異熟色及五識中業所感者不遍無色界故，非異熟法住此趣起余趣生法故，皆非真實趣生體；故知別有第八識。

【四、能執受；八証第一、依止執受。】五色根及彼依處惟現在世是有執受，能執

受心必具五義：一、先業所引，體任運起，非現緣起。二、非善染等。三、一類異熟（此真異熟非異熟生）無記性攝。四、遍能執受五根等法，為五根等共依。五、相續執受不為爛壞。此五義皆前六識所不具，故應別有第八識能執受心也。

【五、持壽暖。】壽謂命根（因業所感第八名言種子現行之時長短不定，假名彼功能上生現分位為命根）。暖謂暖觸。經說壽、暖、識三，更互依持。壽暖一期相續，識應無間無轉。此義非前六識所具，故應別立第八識也。

【六、生死心；八証第八、命終不離。】經說受生終必住散心。當時身心昏昧，如極悶絕，明了轉識必不現起；非別有第八識相續無變，不成散心。又將死時，由善惡業下上身分冷觸漸起，若無此識，彼事亦不成。

【七、二法緣。】經說：識緣名色，名色緣識，展轉相依。名謂非色四蘊，色謂羯邏藍等。前六識即攝在名中，不能更與名色為緣，故應別立第八。

【八、依識食。】一切有情皆依食住。食是合義，為生順緣，與生合故。此食有四種，欲界香、味、觸三變壞時，能長養造色，是為段食（欲界身需段食乃自然之理，若行少欲，固不可非，然至違反生理時則不可許）。欲、色界六識相應之觸與思，皆有資益于身之義，謂為觸食、思食。又有相續執持之三界有漏識，能使諸根得受觸思資長，是為識食。一類相續，前六並非，故應別立第八識。

【九、識不離；八証第七、二定不離。】經說：住滅定者識不離身（持壽暖故）。滅定中前六識不行，故應別立第八以成不離身之識。（無想定例此可知。）

【十、染淨心。】經說：心染淨故有情染淨。此謂染淨法依心生，心持彼種子故。前六識于三性，時時轉易，無染心中（無想等上地）應不能持煩惱種，後時下沒應不起煩惱。世間道中應不能持淨種，彼出世道初不應生。故須別立第八識也。

上來十理當八証之五，余有三証皆對小宗有部不許諸識俱轉難立第八而說。即【第二、並不初起；】如有一俱時欲見乃至欲知者、爾時作意、根、境、三種無差別而現前。不應隨有一識最初生起；故立第八恆時現行與他識俱無妨也。【第三、並則明了；】眼等識緣境，意識分別，如不同時並起，則意識憶念過去，必不明了；實不如是，故諸識可以俱起，即不妨立第八識恆與他識俱也。（又五六俱起則應于別依外猶有總依，此即第八也。）【第五、業用差別。】識法起時隨有了別器、依、我、境等用，即用顯體，應有諸識俱轉，即不妨立第八識。

第九次（九月二十日）

（續講前節）法性法住，如是如是，本不待于安立。然而有五教十理証成唯識者，

此乃方便破執，不得不爾。凡夫外道計執實我，說是五蘊假名，小乘又計實法；更說法無自性，不了義大乘又蹈于惡取空；以是攝法歸識，顯二無我，示其中道。假使諸執盡除，唯識自亦不立。乃今人之聞唯識教者、每視為實有建立，有識可唯；是則仍成法執，同于所破也。于此不可不特舉現觀一義以補救之。現觀之義、同于証量。諸法相用歷然差別，由用顯體，由能帶所，現前現成，無用安排；此唯現觀能親得之。若談唯識猶不免執，毋寧即說佛教使人現觀之為究竟。今故略明其義如次：

一者、何為現觀？現有義三：一非造作而現成，二不隱沒而現在，三不迷昧而現見。觀亦三義：一思，二証，三行。思謂地前于諸諦理決定思惟，証謂地上証得二空所顯，行謂如量遍知諸法。此諸行相即能觀智；現前明了，觀察現境，故曰現觀。

二者、何所觀？見道以後所觀至繁，姑以六門列之：（一）三界九品（三界各有九品）所知事，（二）苦集有漏法，（三）滅道無漏法，（四）四諦所攝未見法，（五）滅道所攝未受法，（六）法智類智所行境。

三者、以何觀？以出世無分別智（平等性智與妙觀察智俱起）能觀。邪見、見取、戒取、及疑等俱遣故，方得現觀。

四者、何處觀？惡趣苦障，上界耽樂，皆無現觀。唯在欲界人、天，有佛出世，說三法印，方得現觀。

五者、誰能觀？此通三乘學、無學果，凡有五種人：一、未離欲者（離修道所斷欲界煩惱），此謂聲聞初果十六心見道、二果。二、倍離欲者（離欲界修惑盡），謂三果。三、已離欲者（離三界修惑盡），謂阿羅漢果。四、獨覺。五、菩薩。

六者、何者入？唯心能入，非我能入。心是無常（有漏能作無漏等無間緣）、有境、待緣、能生智故，依心能斷粗重我執及與我愛故；我由七識執起，違一切法無我，非是智因故。

七者、何次入？次第有六，即六現觀。一、思現觀，謂最上品喜受相應思所成慧。二、信現觀，謂緣三寶世、出世間決定淨信。三、戒現觀，謂無漏戒、除破戒垢，令觀增明。四、現觀智諦現觀，謂一切種緣非安立、根本、後得、無分別智。（有四後得智：一、緣理後得與根本智俱時；二、緣事後得在根本後時；三、有漏後得、地上無漏仍有漏故；四、無漏後得、佛果功德純無漏故。此非安立無分別智後得、緣理後得也。）五、現觀邊智諦現觀，謂現觀智諦現觀後諸緣安立出世智。六、究竟現觀，謂盡智等究竟位智。此六現觀，思、信、戒三，是現觀加行，所以引生現觀；次二是根本現觀，以因果分為二；究竟現觀則在圓滿佛位。修行次第，首重加行。依至教量廣為辯論，惟在凡夫（禪境好寂，聖位自証，都不喜諍；理以諍明

，惟凡夫事）；多聞熏習，如理作意，是思現觀。無漏種子由此引生，三十七菩提分法始于此修，三法印（無常，無我，涅槃寂靜）于此深契，一切法共相真如亦于此証知。益以信戒現觀，以次能得後三。

八者、現觀相。智境決定，凡有十相：一、眾生無；二、遍計無；三、無我（二無我）有；四、相有；五、粗重有（此二縛無）；六、我無無我有（此二不滅）；七、法及法空無別（法即空，空即法）；八、空無分別；九、法性無怖；十、自在能斷，不復從他求斷方便。

九者、現觀差別，有十八種：聞、思、修所生智為三，順決擇分智、見修究竟道智為四，不善淨善淨俗及勝義智為三，不善淨善淨行有分別、善淨無分別智為三，成所作前正後智為三，聲聞菩薩智為二；合有十八。現觀諸門，略如上辨。

談第八識以五門明建立所由，上來初一門訖。

（二）【唯識以識攝蘊而立此識。羯羅藍位（胎中初七日位，義雲雜穢）五識不行；而《名色經》言，識緣名色，名色緣識；則七八仍行。受想行識之名及色為五蘊，五蘊中之識為名中識，但是六識。名色緣識之相依識乃是八識。相依識與名中識互為其緣，即是八識與六識互為其緣耳。法相以蘊攝識（攝是不離之義），所被極廣，及于二乘。是故不善《般若經》、僻執聲聞藏、都但說六，信有五蘊，不信賴耶。時多邪慧，正學荒蕪，六識不足範圍，更恃誰何而堪折正？】

（三）深細不可知之識是此識：【二定、無想天、睡眠、與悶絕，此之五位、六識不現，七八仍行。】如加二乘無余依則為六位無心，就人分別有無、略如次表：

滅盡定—————佛及八地菩薩

無想定—————

—————聖者

無想天———

|

|

睡眠——|——|——|——自在菩薩

悶絕——|——|——異生

無余依———二乘無學

【且談眠悶，粗顯免爭。死生一寤寐間耳，斯又何奇！寤而複醒，仍依此身，死而又生，但身別易。身依容異，識有是同。但是細微極深無底，非若六識粗淺可知。若以深細不知而即言無，無則現前粗細俱無，雲何熟睡昏迷震驚仍覺？此意深長，烏容釋究。斯固知八識持種，六雖不現，種為八持，斷而複續。（就現行言）識是之由，立有八識，夫然後理可通也。】

第十次（九月二十二日）

（四）不為聲聞而立此識：【《攝論》雲：何故聲聞乘中不說此心名阿賴耶識，名阿陀那識？由此深細境所攝故。所以者何？由諸聲聞不能于一切境智處轉，是故于彼雖離此說，然智得成，解脫成就，故不為說。若離此識，不易証得一切智智。】一切境智則廣大，阿陀那境則深細，由深細而後成其廣大，亦惟廣大乃至深細處也。【《深密經》雲：阿陀那識甚深細，一切種子如暴流，我于凡愚不開演，恐彼分別執為我。一則無用乎此，二則益其僻執；不立之由，誠如經、論。】

（五）因為大悲而立此識：本宗約智談用，為智根源、為用血脈者，則大悲也。《瑜伽》四十四雲：是故如來、若有請問菩薩菩提誰能建立，皆正答言菩薩菩提悲所建立。是故智由悲起，悲之等流又以智為究竟。非有大悲貫徹，將無由求得遍知、三祇無厭。亦非至于一切智智圓滿無缺，不可得無緣大悲之所歸宿。二者表裡始終，蓋有如是者。然今時人談佛法每每昧此源頭，或則例同宗教，或則視為哲學，又或偏執不了義之說以概全體。例同宗教，遂有貌似之淨土、宗門（指不到家之淨土、宗門言耳。若真淨土、真宗門、與唯識是一貫之學），誤解了生死之言（此本謂明了，乃誤解為了結），並亡悲智。或隨順外道而有悲無智。或趣入小乘而悲智俱微。視為哲學，遂至少智無悲，漫談宇宙人生，于名相中作活計。又執不了義說如《起信論》等，無正智種，遂至大用無源，悲智不起。凡此皆非所以語于真佛法也。佛法以菩提為極果，而以大悲為根本。大悲之言絕待無緣，既非憂戚悲愁，亦非顧戀哀愍；一滯人、法，即有所不遍而不能成其大。今人于此亦多所誤會，次更以數門釋之。

大悲雲何差別？略有十門：一者自性，相屬憐愍本來具有故。二者數擇，數數抉擇見功過故。三者宿習，先世久修熏習積集故。四者障斷，障悲貪愛得斷除故。五者平等，于三受皆見苦而生悲故。六者常恆，亙古亙今無間斷故。七者深極，自他平

等故。八者隨順，如理拔濟一切眾生苦故。九者淨道，此是對治相貌故。十者不得，是無生法忍故。

雲何大悲緣起？此略有五：一由深細苦境而生，二由長時熏習而增上，三由救濟眾生猛利而生，四由極清淨地而生，五由慈力澆潤而生。（若以四緣分別，即以因力為因緣，等流為等無間緣，觀苦為所緣緣，善友為增上緣。）

複次，就深細境緣起而言：【雲何而悲？觀眾生百一十苦（詳《大論》四十四）而起大悲，觀眾生昧三十二法（詳《思益經》）而起大悲。雲何觀眾生而起大悲？無人，無我，無眾生，皆一心之差別。此識持一切種，遍周沙界；周沙界識網周沙界，相系相維，相與增上，觀乎眾生自然而悲。心穢則佛土穢，心淨則佛土淨，悲其穢矣，屬其心矣，必了心體。有斷然者。】蓋窮苦緣起于無常，差別于種子，必究阿賴耶而後能盡也。

此外猶有異門，他日詳談。今人不明大悲為學佛要事，實屬誤解佛法之尤，不可不抉擇發揮。且概括數言示其要略，曰：諸佛菩薩由觀苦而起悲（諸佛以苦諦為師，明了觀苦乃無系縛；見他即自，又自然牽動而生大悲，此非逃苦、厭苦、怖苦、舍苦、所可比也），由大悲而利他，由利他而起苦（一切苦悉入生死苦中，不舍生死即是不舍一切苦，此蓋觸真實苦以苦為大樂乃能如是），由起苦而不住涅槃。

上來五段明建立八識所由畢。

第十、抉擇法相談唯識

【一時極唱，性相兩輪。明了而談，一遮一表。都無自性故，所以必遮；相應如如故，所以必表。法相賅廣，五姓齊被；唯識精玄，唯被後二。詳見他敘，此姑不贅。（《瑜伽論》敘十義、〈真實品〉敘六義、參看。法相攝《阿毗達磨》全經，唯識攝《攝大乘》一品；法相攝十二部經全部，唯識攝方廣一部。）】

心學大意

詮解名義分

心學者何？禪學也，定學也。然禪名局于靜慮（靜慮只色界義，無色界及欲界定非靜慮故。禪只局于有心定，二無心定非禪故），定名不能賅慧（有定無慧乃同木石，故定慧不相離）。《解深密經》一心為止，多心為觀，止觀皆從心詮。奘師譯《大論》、《攝論》等，三學名皆為戒、心、慧。茲從其例名為心學，不循通例名為定學。

敷演因緣分

曷為而說心學耶？機已動故，示行軌故，防邪修故。且述其說。道無定則，貴在當機。邇來承學之士，多有以如何修持乃能入其所悟之理為問者，是宜可及時而開示心學矣！吾為茲喜。

多聞熏習，如理作意，吾所揭以自啟啟人者也。人亦有言：知者知所行，行者行所知。舍教而冥行，其為唐勞，固無論矣！倘徒博觀經論，而不圖切實証會，則空持名相，以興諍論，煩惱仍存，執障不破，為益于實際者幾何？吾為是憂。

院中同人，或以課余修觀，或以養習定，是則是矣；然心學學也，不先講究而遽從事，寧不虞其為邪道之歸乎？吾為此懼。

綜上三故，特講斯門。本意原在總合《般若》、《華嚴》、《瑜伽》、《舍利弗毗曇》、《顯揚》、《雜集》、《法蘊足論》、《解脫道論》、《俱舍論》、《成實論》等外，更合《等目菩薩所問三昧經》（《華嚴?十定品》）、《如幻三昧經》（《寶積?善住意天子會》）、《菩薩念佛三昧經》（《大集經?念佛三昧分》）、《般若三昧經》、《月燈三昧經》、《首楞嚴三昧經》、《慧印三昧經》（三乘）、《力莊嚴三昧經》、《無極寶三昧經》（似《維摩詰經》演說眾多三昧）、《金剛三昧不壞不滅經》、《寂照神變三摩地經》、《超日明三昧經》、《成具光明定意經》、《如來獨証自誓三昧經》、《佛印三昧經》、《法華三昧經》、《金剛三昧經》、《四童子三昧經》、《集一切福德三昧經》（以上大乘經）、《雜阿含經》（阿練若雜事）、《正法念處經》、《大安般守意經》、《禪秘要法經》、《治禪病秘要法》、《有部毗奈耶雜事》、《陰持入經》、《身毛喜豎經》（九次第定、十力、四無畏）、《治意經》（說安般守意）、《身觀經》（身不淨無可愛）、《禪行三十七品經》（少時修三十七品）、《禪行法想經》、《法律三昧經》、《五門禪經

要用法》、《坐禪三昧經》、《禪法要解》、《思維略要法》、《菩薩呵色欲法經

》、《禪要經》、《小道地經》、《修行道地經》（僧伽羅刹集）、《道地經》、《達磨多羅禪經》、《內身觀章句經》、《法觀經》（數息）、《修禪要訣》（以上小乘經律等），四十五種至教，類別部居，觀同較異，詳加檢擇，勒為一書，俾言定者有所法守。以成就需時，先舉體要焉。

料簡余宗分

定之為事，內外之所共有也，而宗旨途徑殊焉。古之外道不必譚，今之外道不屑譚，姑先舉中土所有諸宗，關於心學部分與印土交歧者略論之。

（一）天台宗。此宗精華在于止觀，其要籍為《六妙門》、《釋禪波羅蜜次第法門》、《摩訶止觀》三書。顧《六妙門》說安般守意（數息），誠便于初學矣，而未詳十六事（身、受、心、法四法各具四事，異生至無學皆修，是為十六事）。似此乃為有頭無腦，準之而行，不見果利之所在也。《釋禪波羅蜜次第法門》說世間禪、非世非出世禪，詮九次第定（色界四、無色界四、加減盡定一，為九）。只具大意，而不說出世禪，師子奮迅三昧亦未道及，蓋傷缺矣。至《摩訶止觀》，于此宗最為要典，其中心在于本般若宗龍樹《中觀論》"因緣所生法，我說即是空，亦名為假名，亦名中道義"偈之緣生勝義，而立三止三觀（見甲圖）。初則止觀雙運，更進則融三為一而即空即假即中，于一剎那打成一片，圓通之義于焉葉矣。特以瑜伽宗圓成實義格之。圓則圓矣，而未實也。彼三止三觀者，僅具總相通相，分析以求其實在則彼為無，是尚有待于商量者歟？

（表一）

空——┐

三觀

假——┐┌

中——┐┌┌

體真——┐┌┌

三止

方便隨緣——┐┌

息二邊分別——┐┌

（二）賢首宗。此宗宗《華嚴》，即無殊宗《瑜伽》。應講各各無量三昧，而彼用法界觀，亦僅言總相通相。其謂一攝一切、一即一切，而發揮四無礙、四攝、四即之理，固為精到，然于各各無量三昧亦未有明；故從之者多以宕然無藉之玄譚自困，而于禪學卒亦無由而入也。

（三）羅什派。什公言定之書，如《集禪秘要法》等，皆從小乘。小乘以涅槃為總相，以對治貪等為別相，而以不淨為勝定。蓋以淫為生死之本，所宗在了生死，故首之也。按：什公本宗般若，其言小乘定不足以盡所學。蓋中國禪學，源于安世高等，所譯有《安般守意經》等。睿法師不了所學，適什公在關中，時從質疑焉。什公乃順機集此以應其求，非修禪扼要之典則也。

標示正旨分

印土正宗有二：一、般若宗；二、瑜伽宗。就心學言，般若主空、無相、無愿三三昧，推而廣之則為百八三昧。此百八三昧攝入三三昧中，皆用無所得，于《大品》（第二分）問乘品》具明之，可核按也。

瑜伽宗主大乘光（智）、集福王（悲）、賢守（一切善法守而不失）、健行（強健之行菩薩不及）四三昧見乙圖），推而廣之，則為百三三昧。此百三三昧，入一切佛自在堅固，善現決定無相，于晉譯《華嚴》四十五卷具明之，可詳覽也。此三三昧、四三昧高矣遠矣，吾之宗旨于是乎在。

（表二）

「大乘光——初地、二地、三地、四地修此。一部分說，如《寶積》等，謂之小總。

|

一法王所說，相續、盡未來際作功德之法，謂之大總。無量佛所說謂之

四 |

無量總。鳩一部分或數部分總；鳩一部分或數部分總法，光弘于世界，

三——|

名大乘光。

昧 | 集福王——五地、六地、七地修此。菩薩修十王大業，成佛時稱兩足尊，未成佛時得大其用。

| 賢 守——八地、九地、十地修此。大總無量總任持不失，稱賢善守法。九地能以陀羅尼說法。

└ 健 行——佛地修此。號決定行，說法亦稱獅吼。

（此四名義，見《攝論·增上心學分》，《唯識述記》五十六，及《佛地經論》卷五。）

三三昧空後事，四三昧地上事，眾生何由而及之乎？曰，事有其序，安可驟企。登高自卑，則當由小乘世間出世間禪，而入于出世間無上之禪也。眾生煩惱所縛，頓超直入，談何容易？譬于定亂，對治為先。貪觀不淨，嗔觀慈愍，痴觀緣起，慢觀根界，疑則數息。此五停心實為初步（見丙圖）。此觀稍得相應，即可改修世間一切不可樂觀，欣上厭下而入初禪。漸入九次第定，引生五通。此小乘世間有漏禪一路也。其出世間無漏禪不必由五停心入，直捷由四諦入。

（表三）

「

「

「貪

觀不淨」

|

|

|

| 小乘詳

|

|

| 嗔

觀慈愍」

小乘——|

| 五停心——| 痴

觀緣起——大乘瑜伽詳

| 有漏——|

| 慢

觀根界

▽

|

|

|

| 小乘詳

|

|

└疑

數息以求心住┐

|

└九次第定

└無漏——四諦

複次，當知佛法住于二緣，一教，二証。教則十二部三藏，証則三十七菩提分法。就小乘言，非由《六足》、《婆沙》、《俱舍》、《成實》、《舍利弗毗曇》、《解脫道論》以入于《瑜伽?聲聞地》，則教不得通。非由四念住（三十七菩提分以四念住為主。《大智度論》慧多名念處，精進多名正勤，定多名如意足，十二法鈍根人名根，利根人名力，力則疾趨辦事，事未辦名道，正思辦名覺，故三十七菩提以四念住為主。《瑜伽?聲聞地》析心為三十六，受為二十一，身為二十，法為二十）以通五停心（如數息十六事），則証無從冀。明夫四念住十六事，則由五停心歷四禪、而加行、而見道，入四三昧、得百三三昧可也，由四諦觀入空三昧，得百八三昧可也。或根利障輕，不從五停四諦，而直從大乘光下手亦可也。惟是行依于法，法依于教，修心學人不務明教，師心自用而無失者，匪我攸聞。

條申體義分

止故能定，觀故能慧，定慧交長，止觀不離，此為大小乘通義。故《解深密?分別瑜伽品》十八門分別中，其同異門主張止與觀非有異（以觀所緣境為所緣故），非無異（一心為止，多心為觀），其雙單門主張一向修和合修，此為大乘止觀不離之証。若小乘之言止觀不離者，莫詳于《成實?止觀品》三能十五喻。三能者，止能遮結

，觀能斷惑；止能舍樂，觀能離苦；止能斷貪，觀能離痴；皆是共作一事，止以始之，觀以成之也。十五喻者，止如捉草，觀如鎌刈等十五也。（表四）

（表四）

┌ 捉草

| 掃地

| 揩垢

| 水浸

| 附癰

| 起脈

| 調心

止如————| 洒金

| 牽繩

| 鑷鑷刺

| 器鉀

| 平立

| 服膩

| 調泥

└ 調金

└ 鑷刈

| 除糞

| 水洗

| 火熟

| 刀決

| 刺血

| 沒心

觀如————| 火灸

| 用鑊

| 剪刀剪發

| 兵杖

| 發箭

| 投藥

| 印印

└ 造器

上來既總標綱要已，茲更條申體義以窮幽致。佛法所詮，盡于因果，定為佛事，自莫能外，述因果第一。一行之立，有名有數，有體有相，是名物相，述法相第二。一行之立，不能無待，內外處所，緣具理彰，述觀行第三。藥至病騰，道高魔奮，攻守有道，乃克奏功，述護持第四。

因果第一

果之發起為因，因之圓滿為果，因果相即，二者循環。先且明因。言因則有二。有以所求為因者，智其首也。有以資糧為因者，戒其首也。（如表五、表六）。

（表五）

（表六）

┌得通（內外）

┌戒

所求為因└ 除障（世、出世）

資糧為因└ 聞思

| 涅槃（大小）

└善知識——教理

└菩提（大）

若為求得通而修定，則與外道同，外道有五通有定。若為求除障而修定，則與世間同，界系由下障除，乃能升上而得上定。若為求涅槃而修定，則與小乘同，小乘極果入無余涅槃，由四諦出世定而得。是故大乘所為獨求而修定者，乃在無上菩提也。

菩薩地雲智是悲之等流，吾謂因智求定，定亦是智之等流。觀苦自起悲，聞法乃知苦，有慧乃聞法，得定乃有慧。故定可謂之道，亦可謂之修。《雜集》說定皆攝屬修道，職是故也。定非恰到好處不能得，得定則一切洞然，無掛無礙。習之既久，行往坐臥乃至夢中無不定時，如是乃可稱定。世途以兀坐如槁為定。此死定，非智定也。

（表七）

┌貪命—————死想

| 定散—————滅想

| 味定—————離欲想

|

┌強沉思┐

|

| 馳見聞 |

|

| 好起諍 |

|

| 驚滅怖空 |

|

| 掉

|

「十一種定患，一光明想即可治之。修此想者須

十障十治 | 定患| 潛利養 | 光明想| 知唯識托質自變影像相分而緣之義，或外托日

|

| 身心疲 |

└月之光為質，或內托教典法義為質。

|

| 睡蔽心 |

|

| 身粗重 |

|

| 疑業果 |

|

└大劣退┐

| 戲論—————一切世間不可樂想

| 段食—————厭食想

| 身見—————苦無我想

| 懶惰—————無常苦想

| 身行—————無常想

└母邑—————不淨想

戒為馬埵，定如馬行。循循而行，固雲是定，超速而行，亦可雲定，如奮迅三昧、如超禪皆是。《深密》雲：以尸羅為因，淨慧為果。《瑜伽?聲聞地》初持詳戒，四持詳慧。《解脫道論》、《婆沙》、《成實》等，莫不以戒為始，五通、四諦為究竟。定資于戒，無戒不定，大小共信，此其徵矣。

複次，所求因以慧為首者，更徵諸《深密?分別瑜伽品》十八門而益明白。初依住門言，以法假安立（十二部經模仿法爾道理，假施設以資人），及不舍阿耨多羅三藐三菩提為依為住。三能求門，謂由聞思起身心輕安（于所聞法了然明白，輕安自生），如是獲得止觀。九依法依人門，謂隨法行、隨信行，從他聞法憶念所從聞法。會而觀之，義具見矣。于此而談，定是修事，必從聞思得來。故學定，一要師，二要教。然教為勝，一以師難尋教具在故，二以隨法根利隨信根鈍故。

複次，更陳十障十治（如庚表），並略發之。（《大論?三摩多地》、《舍利弗毗曇》、《俱舍》、《成實》皆有修光明想法。）

（法相第二）

法相有四：名、數、體、相。凡學一法，凡作一事，先須了別其名，次須略了容積區別多少，次須了其性質，次須了其作業，四者備而法相得矣。《雜集》雲：初地無量三昧，除佛菩薩，余尚不知其名，況複能入？《婆沙》六十二雲：佛涅槃入不動明等至，舍利弗入師子奮迅三昧，目犍連入香象呌三昧，阿難入旋風等至；舍利弗等所入定，除舍利弗等，余不能知；佛所入定，余聲聞人舍利弗等不能知。據大小乘教欲習定學須講名數，不可以其名數而遂忽之也。

先審名。

名有總別，第一總名。定名等引，亦名等持，又名等至，名靜慮，名心一境性，名止，名現法樂住。（如表八）

（表八）

| 新譯梵文

| 舊譯梵文

|

新譯義

|

差別

|



| 三摩多


|

| 等引（一平等能引、

| 心通有無，位唯在定， |

| （大論分品） | 三摩提

| 二能引平等三平等所引發） | 就功德言就總概言。 |



| 三摩地

| 三昧

| 等持（《大論》前後

| 心唯其有，位唯在定。 |


|

|

| 同影，平等任持)

|

|



| 三摩鉢底

| 三摩跋提

| 等至（平等至極）


| 心通有無，位唯在定。 |

|

|

|

| 就體性言，就勝盛言。 |



| 馱衍那

| 禪那

| 靜慮（《大論》系心

| 義同等持，唯局色界。 |

|

| 持阿那

| 內緣，不外流散）

|

|



| 質多翳迦

| ——

| 心一境性（定不定地

| 位通定散，心唯其有。 |


| 阿羯羅多

|

| 系心于定)

|

|




| 奢摩他

| ———

| 止 (大論寂靜安止)

| ———

|



| ———

| ———

| 現法

|

|

--	--	--	--

從基師義，七名一法是為總名，名之為定。然有分別，等持等至四句料簡，大小不同。（如表九）

（表九）

「（大乘如《大論》十三有四句

《大論》又四句

|

等持非等至

是三三昧，

——善知名句文差別，

|

非勝處遍處滅盡。

——非入諸行狀相。

|

等至非等持

是勝處遍處滅盡，

一一隨一能入諸行狀相，

|

非三三昧。

一一而不知文句差別。

|

俱非俱句可知

一一同

| ?小乘如《婆沙》一百六十三有四句

|

等持非等至不定心相應等持。

《婆沙》又二義差別，等持一物為

|

等至非等持二無心定。

體，等至五蘊為體；等持一剎

└

俱非俱句可知

那間，等至相續

第二別名，如空、無相、無愿之類，繁多不舉，但括其數，詳在數中。

次審數。

小乘有定數，大乘初地即有無量三昧，即不能舉數。凡諸經論所舉者，猶是略舉總數為言也。（如表十）

（表十）

大乘三昧數

《攝論》、《唯識》 | 四三昧

《佛地經論》

|

《華嚴》

| 百三三昧（散見者菩薩十，六地十，七地十一，十地十

一，菩薩正受十等。）

《般若》

| 百八三昧

《大論》

| 三摩四多地五十八三昧，聲聞地二十三昧。

小乘三昧數

《身子毗曇》

| 二百六十三三昧

《法蘊足論》

| 十六三昧

《解脫道論》

| 九十八三昧

《俱舍論》

| 十六三昧

《成實論》

| 十二三昧

《婆沙》

| 十九十六三昧

┌未中四本一各百六十四 共九百八十四

└

《且明七法》

| 空處——五十二

└

└合一千又九十六

| 識處——三十六

└共一百一十二

」

└無所有處—二十四

」

次審體。

一切定以九次第為體。超出三界此其路故，欲界有定無定猶未決故，然言九次第定則無欲界定故，其勝處遍處等定則屬四空故，體又有總別，總以別境心所念定慧為體，別則大立十，小立十一。（如表十一）

（表十一）

|（《大論》十（《婆沙》、《雜心》、《俱舍》十一

| 尋—————尋

初禪

| 伺—————伺

| 喜樂—————喜

| —————樂

| 定—————定

二禪

| 內淨—————內淨

| 念—————念

| 舍—————舍

三禪

| 正智—————正智

| 樂—————樂

四禪

| 不苦不樂—————不苦不樂

前已明克實支數，茲更陳綺互配合支數。（如表十二）

（表十二）

《大論》六十八支

┌根本十八（初二等五，後二齊四）

四禪三十六┐

└近分十六（同根本）

└根本十六

四空三十二┐

└近分十六

《身子對法》四十支

四禪三十六 中四（觀喜樂心） 四空不立支分

上座部十一支

正量部十一支

初定五

二定三（除尋伺） 三定二（樂定）

四定一（一心）

《大集經》十七支

《本業經》三十八支

四禪十八（同《大論》）

四空五支（想念止觀一心）

據《成實》言，則欲界亦有定，即所謂如電三昧，以一剎那五停心依心一境性為體者是也（《舍利弗毗曇》亦有此說）。欲界身亦可入色無色界定，蓋身觸雖系于欲界，而所緣影像相分則色無色界也。

後審行相。

行相入觀行第三中講，可考行相之書有四十五種，應善理之而匯其通。

觀行第三

先述三圓滿。蓋事必待緣，緣具而事始順成也。

（一）處所圓滿。言夫地，則以息諸紛擾離諸慣鬧為急，故應處阿練若林間空室巖穴。而修不淨觀者，更宜棲處塚間，以便攝取尸骸壞脹朽惡之狀。若不得其處，則繪畫其相懸于坐臥之處，俾自識得托以為質變現影像相分以為所緣，使所作成辦也。言夫事，則以取求悉給掛礙都無為要。故須無怖、無毒、無匱、無牽，而又有善知識調護扶掖于其間也。


（二）威儀圓滿。行則分散行、經行、大眾行。住則分直立、翹足立等。坐則須坐具綿軟，衣服輕鬆，腎囊須空，谷道勿遏（道家行氣，腎囊谷道中間而過，《倫記》基師謂無道可通。《舍利弗毗曇》氣入即散，出則一尺以外即散，故修定者須保護尺地，目視亦以尺地為限，不拘開閉），眼視一尺以內，手放臍輪之間，全跏（右上左下）、半跏（左上右下）各隨其便（按密宗剛日或修金剛界則右壓左，柔日或修胎藏界則左壓右），而尤當注意者，口則閉七留三，鼻則正對於臍，坐之前後頸部腰部均數數揉之，揉七八反，剛合其度乘勢勿移，良以禪病之生往往由此也。臥則右脅而臥，以學師子王反耽欲故。

（三）遠離圓滿。內則屏絕一切惡見，外則杜絕一切惡友，由此正行無阻，正覺隨生也。

次述七作意。定即作意，蓋必策心警心念念相續乃能得定故，作意實引發定之根本

也。作意有七：（一）了相作意，于對治方便之能所二相，仗聞思力明了無疑故。（二）勝解作意，起粗細觀，由觀至禪，欣淨妙離厭苦粗障，此為六行伏惑，修以是為初步故。（三）遠離作意，遠離上品惑故。（四）攝樂作意，得靜妙斷中惑故。（五）觀察作意，審察煩惱斷未，靜妙得未，進修對治故。（六）加行作意，欲界一切煩惱不行故。（七）果作意，証初靜慮根本故。能觀七作意為瑜伽師，凡修瑜伽者，皆稱瑜伽師。攝初修、已習、已度三位，于修習善法欲至決擇分未起修前四作意者（自凡至資糧滿已觸未觸心一境性），名初修業位。于前六作意（四加行），名已習行位。于証入正性離生之果作意（二見道），名已度行位。七作意配三位，則見瑜伽行人深淺差別。若配眾多法相為四十作意，則彼彼法門，深淺差別，咸得其概。（如表十三）

（表十三）



八真實—————惑斷真乃現—————遠、攝、加—————」

九有學—————七—————」

十無學—————淨了果

| 以上配三學

十一非學非無學—————」

十二遍知—————了、勝、觀—————」

十三正斷—————遠、攝、加

| 以上配知斷

十四已斷—————果—————」

十五有分別—————影像相分—觀

十六無分別—————體相相分—除觀余六—————」

十七事邊際—————七

| 以上配所緣

十八所作成辦—————果—————」

十九思擇—————由止而觀—七」

二十寂靜—————由觀而止—七」—————」

廿一一分—————單止單觀—前六

|

廿二具分————止觀雙運— 果（蓋中得解）

| 以上配修証離染

「廿三無間————正住定」

|

「廿四殷重————遠得通」————七（結中得解）————」

廿五隨順————加行道——了、勝—————」

廿六對治————無間道」

|

解脫道「————遠、加、果、攝

| 以七配四道

廿七順淨—————攝

|

|————勝進道

|

廿八順觀————觀————」

廿九力勵————七不攝————」

三十有間」

|

卅一有功」

了、勝、遠、攝

| 以七配四位

卅二自然————加、果————」

卅三思擇————慧————了————」

卅四內攝————定————勝

|

卅五淨障———害漏種——遠、攝、加

| 以七配慧定離障自在

卅六依淨行———離粗身——果———」

卅七他立———聲聞從他悟「———」

卅八內取———獨覺菩薩自悟「七

|

卅九廣大———菩薩無住涅槃——七不攝（非自利）

| 以七配三乘因果

四十行———佛一切智菩薩諸善巧——佛果、菩薩七——」

若以四十作意之例，更推而配于一切法，則直可貫通三藏。故心學行相，作意而已。止事在九心，而所用作意乃在所配四位。觀事在四慧，而所用作意乃在所配四所緣。當次第說之。

次述止九心。（一）內住，令心住內不使向外馳逸也。（二）等住，挫心令微細也。（上二為力勵運轉）（三）安住，安置內境也。（四）近住，近于念住不令馳外也。（五）調順，挫心令不流散也。（六）寂靜，無五蓋也。（七）最極寂靜，視前更進也。（以上為有間運轉）（八）專注（以上為無間運轉）。（九）等持（以上為無功用運轉）。初學習止，但能使心不外馳，挫令微細，七作意行望塵莫及，唯是力勵運轉而已。牛若嚼青，紐轉其鼻，除余無法。然此力勵，又非都無方便一味逞強所能辦得，當知有六種力，能成九心：一、聽聞力；二、思惟力；三、憶念力；四、正知力；五、精神力；六、串習力。惟此六力，一、二為力勵運轉所攝；三、四為有間運轉所攝，五為無間運轉所攝，六為無功用運轉所攝。是則欲習奢摩他者，始于力勵，力勵之始，仍不外乎多聞熏習，如理作意已也。

次述觀四慧，而及于三門六事。其就觀位淺深而言，則有三門。三門者：一、隨相

行，于教授未思推也；二、隨尋行，于教授推察也；三、隨伺行，于教授審觀也。若就能觀正務而言，則有四慧。四慧者：一、正思擇，于淨行善巧淨惑三所緣思擇盡所有性也；二、最極思擇，即于三所緣思擇如所有性也；三、周遍尋思，取彼相狀也；四、周遍伺察，審諦于求也。亦就所觀而言，則有六事。六事者（五停心皆有六事）：一、觀義（語必有義）；二、觀事（內外二事）；三、觀相（自共二相）；四、觀品（黑白功過）；五、觀時（事在三世）；六、觀理（觀待証成作用法爾四道理）。本其四慧，運行乎六事，修觀業用于焉庶幾。

上來匯萃群言，于觀行之義，略已周盡，然僅明大綱，未及詳釋，樂尋繹其義者，應循斯目，更求之也。

（護持第四

修定過患，曰魔與病。魔有四魔、八魔之稱，病則為數無量，略言之有七十二治禪病法。四魔者：蘊魔，煩惱魔，死魔，天魔也。八魔者：一、出離善法退善耽欲也；二、密護根門樂趣相好也；三、于食知量樂趣美味也；四、寤瑜伽妙趣睡眠也；五、妙女妙事多作眾處也；六、疑三寶四諦也；七、怖畏人至也；八、心樂利譽慳也。祛彼魔病，禪乃無妨，所事護持，為數非簡，容俟他日委細條陳也。說大意竟。

民國十三年（1924）五月內院第六次研究會講演記錄

（韓孟鈞記）

（選自《內學》第一輯）

《內學》敘言

範圍之比例，因果之遞嬗，天然之模仿，天下古今，世、出世學，盡在乎是，是不可以已乎？雖然，有說。今吾且問：立範圍者誰？寧不操柄而聽其命！範圍有量，量寧局是？範圍有數，是數以外何獨無事？率爾操柄，是名武斷，武斷者不足以立範圍；聽命非創，非創者不足以立範圍。宛轉虛妄，無可憑據，吾復奈何而熒惑乎哉？因不以因起，是因以前因復有因，因則無窮；果不以果止；是果以後果更有果，果則無窮。無窮者莫可得而窮詰也，誰復有能疲[*]神精媾結虛牝？如水呈形，如鏡呈影。攝前遺後，顯表晦裡，語不足闡義，跡不足達旨，扣盤捫燭，璞周鳳楚。悲乎，執一行一門者之汨汨沉沉，無出期也！離諸根量宗因譬喻；我說因緣非第一義。三世佛冤，如言取義。是故範圍之比例，因果之遞嬗，天然之模仿，學其所學，非吾黨學。

處處經中皆作是言，善男子，爾及諸菩薩摩訶薩應如是學。此複雲何？現証而已矣。共所成立，不由審取，地唯是地，非水、火、風，苦唯是苦，非樂、喜、舍，是名世俗現証。諸法非實，如幻如化，如焰如夢，如影如響，水月鏡像，乾城虛空，是為勝義現証。雲何為現？三界分別，自心所現。雲何為証？不取于相，如如不動。世俗謂游方以外，吾學謂還滅自內。應如是學勝義現証，是名內學。現証雲者，不可以驟得，不可以一概；禹鼎神奸，一覽窮悉。如觀無常，五蘊無常，剎那集顯，是名現証。一真法界，周遍無外。應如是學，無外之內，是名內學。

吾所親愛，如一子地，寒暑陰陽，凌蔑失序，一舉一動，人之圖己，恐恐惴惴，光天無之。吾之愛矣，奈何勿悲？悲之甚矣，日夜迫切以思，求所以醫，豈秦人視越人之肥瘠？盡大地人皆吾一子，皆失其序，皆吾所悲，吾皆求醫。醫也者，學也。悲而後有學，憤而後有學，無可奈何而後有學，救亡圖存而後有學。不如是而有學，其施也不親，其由來也不真，其究也無歸，唐其智力精神。危乎冤哉！天下有如是學，吾其愈益悲也。夫人心理咸其一致，如理者事在一己，如量者發由乎人，不可以不審。聲聞、緣覺悲心微薄，是故聲聞出定不識食鹽，緣覺化人顯通無二，鈍之至矣，烏足以言佛！菩薩摩訶薩生心動念莫不皆悲，舉足下足無非是學，牛溲、馬勃，寶于芝、苓，醫方、工巧、因明、聲明，但可致用，都非蕪菁。惑執無邊，慧解無邊，過患不已，功德不止，三阿僧祇，豈有終極？其悲也大，故其學也大。應如是學，大往大來，是名內學。（吾嘗論之：亂之興也自無悲始，治之萌也自親愛起。生心動念唯私一己，天下亡矣。一舉一動環顧皆人，世界太平。食不搏飯，坐不橫肱，比丘立戒二百五十，多視大眾祛彼妨害。任教育者可以思矣，治學問者可以知矣。）

現証者學之自體，悲者學之緣起。然吾病病，又烏知乎人之病？吾亦常、樂、我、淨，又烏知乎無常苦空，無我寂靜？吾亦遍計所執外物真實，又烏知乎幻化夢焰、影響虛空、水月鏡像、乾闥婆城？以是因緣，又複須知方便者學之行軌。洪濤無梁

，舟楫是從；徑路雖絕，風雲可通；親辦無因，同類有功；銅山西崩，響應洛鐘；火騰陽燄，水液方諸。菩薩摩訶薩無漏種隱，有大方便引發勝品，曰聖言量，至心歸命。危懼而不舍，不可得也，不此之往，又何之矣？攬已于其間，不可得也；吾如足智，先已知矣。歸命曰信，一信以往，次解次行，大有事在。既非盲從，亦非臆度，研求有的，解無量也。既非冥行，亦非說食，遵道守轍，行無量也。隨順現証，趣向現証，臨入現証，學之序也。多聞熏習，熏此現証；如理尋思，思此現証；修斷轉依，依此現証；三慧漸頓，學之事也。無邊沙界，平等現証；盡未來際，一味現証；學之至也。如此而已矣。支那內學院刊一年《內學》，呈諸大雅，質諸同好，自今伊始歲其有。一星終矣，

獲年。刊成，歐陽漸喜而敘。

（1924年12月）

（原刊《內學》第一輯，收于《內學雜著》上，載《歐陽競無先生內外學》第十二冊）

辨方便與僧制

不畏聖言，天下無是非，當前之糾謬不能，遂亦無希望于後日，而教之危險何可勝言？漸既非比丘，亦未從政，又不與聞近時法事。然數十年讀書，是非則昭然明白，本其所知陳于當世，俾有不克匡正于現在者，必將有救于未來。世尊之遺囑雲何？淪胥之悲愿雲何？此固可已于一言乎？故前于僧人藉佛教會名義請預國選事，嘗據出家根本僧製以斥之。乃有謂是考據家言耳，有謂是不知方便之言耳，又謂是偏于小乘不適潮流之言耳。而佛教報章競載諸文于其篇首不以為異，以是知是非將淆亂于天下，乃不能已于言。夫聖言遺囑，但為供考據家資料，斯言也吾不欲辨。若夫居革命時代而不知方便、不適潮流，其顛倒是非，動人聽聞者，非善巧絕倫乎？惟其善巧，斯又非辨之不可者也。初辨明方便，凡四：

一、團體創製之為方便也。

究竟為方便（《華嚴》、《般若》皆有此義）。佛之知見為方便，一切智智為方便（《法華》有此義）。方便者，佛法之極詣，非証果人，不足以言此。是故，用方便于團體者，惟佛乃能。釋迦牟尼于一燈明國，以菩薩為僧，而于娑婆此土觀眾生根器下劣，無堪任能，于是大行方便，于此娑婆國土，唯以聲聞為僧（《大智度論》）。以是佛法住持，乃住持于聲聞也（《瑜伽師地論》）。佛法住持于聲聞，是團體方便佛為已施于娑婆世界，烏容于方便之余更用方便耶？今僧人請預國選，非個人權宜之舉，乃團體變製之為。夫全體變製，此何如事？初不聞咨于四眾，訪于有知，討論研求至再至三，先事長時審擇所處。但忽爾報載勸人熱烈參加，忽爾報載政府已準所請。迨至大義相繩，乃曰是行方便。嗚呼！方便雲乎哉？古德以個人方便益以團體，今人乃以團體方便益以個人，是之謂以劫奪之手段，行變製之妄為，方便雲乎哉？

二、利物利人之為方便也。

中國內地，僧尼約略總在百萬之數，其能知大法、辦悲智、堪住持、稱比丘不愧者，誠寡若晨星。其大多數皆游手好閑，晨夕坐食，誠國家一大蠹虫，但有無窮之害，而無一毫之利者。此如不整理、不嚴揀，誠為革命時之一大遺憾。說者如具方便之心，應思此百萬之眾如何俾以利國利民，不應但參加國選即以為利國利民也。漸以為，應于百萬眾中精細嚴察，朝取一人拔其尤，暮取一人拔其尤，如是精嚴，至多不過數百人。夫以數百人較四萬萬民眾，不啻九牛之一毛，以是從國家乞舍，如奘師乞太宗舍基師之例，以為專作住持大教之用，以為教團真正比丘真實宏教之用，以其清淨慈悲、超然無諍，為諸大夫國人所矜式。國家萬無沮尼之理。蓋所舍之民少，而所得利國之益大故耳。其余游民，則俾復公民之位，因以作其真正公民之事，若士、若農、若工、若商，日出而作，日入而息。則國家歲省百萬眾之耗食，歲收百萬眾之力作，夫然後乃得謂之為方便也。今置此不圖，乃輕率徒眾參加國選

，謂為方便，方便雲乎哉？在國家，未受公民之實，仍為棄民；在教團，驟受公民之名，翻礙規法；進既不能補于國，退復不能安于團，疚心盲目，未之思耳。狼狽一至于此，方便雲乎哉？

三、各族現身之為方便也。

佛法之住持聲聞者，其事雲何耶？被袈裟，住蘭若，不婚宦，不與俗事而住持也，如是謂之比丘。白衣塵，婚宦務俗，如是謂之公民。各以其類，不可混淆，淆則非驢非馬，不可顯類。故比丘變相，以無其類而佛教以亡。夫佛化群類現群類身，觀音三十二應，亦各以其類而現其身。彌勒住睹史天，即亦現其天身。菩薩十王大業，初地現轉輪聖王身，乃至十地現摩醯首羅身，皆不以本身，皆同所化之身。此固善權方便，不欲眾生發生疑竇故也。說者果具方便真心，以其高等以視團眾，則應勸其舍比丘身，現公民身，以救世行化也。以其卑等以視團眾，則應核其不足作比丘身，但可還其公民身，以各從其類之實也。乃說者以袈裟比丘之身，出而為白衣公民之身，一身跨兩頭以為方便，方便雲乎哉？夫公民為在家人，比丘已舍家而出家，今復為公民，是又舍出家而反俗為在家人也。藉曰不然，則又是騎牆蝙蝠，混沌窮奇，世無其類，立足何依？善巧之謂方便，拙笨至是，方便雲乎哉？

四、引外入內之為方便也。

出家菩薩行四攝法，法有同事一條，非方便之証歟？然四攝之所謂攝者，由世間之外攝之入佛教之內也。比丘參加國選，由出世之內舍之入世間之外也。四攝之同行，正導之不入而誘掖之，誘掖之不入而鉤牽之，鉤牽之不入而同化之。必目的之是達，一切手段之不擇，是何誠摯，是何善巧，是何悲智，故曰方便行也。比丘參加國選，問何目的之是達，而唯手段之不擇？誠摯善巧悲智之謂何？應于此判曰：引外入內是方便行，舍內趨外是慕膻行。今說者于比丘參加國選之慕膻行，乃竟誤為方便行，方便雲乎哉？曲當其情耶，除卻不以規矩無一合語，方便雲乎哉？

次辨明僧製，凡四：

一、出家者應行頭陀，居蘭若也。

聲聞弟子少欲少事，此無論矣。即以出家菩薩而言，應學應行，亦詳見龍樹、無著、寂天諸家同據之《寶積·郁伽長者會》。此經雲：出家菩薩應作是念，我今應住于四聖種，樂行頭陀。又雲：出家菩薩見十利故，終不舍于阿練兒處即阿蘭若。可知頭陀蘭若，固出家者所應行也。出家何事？學佛而已，自學未成，安能度眾？（此義詳龍樹《十住婆沙》卷一。）故如救頭然，專精三學，一念而不可懈。行戒在頭陀，則龍樹之言也（《十住婆沙》卷十四）。修定先蘭若，則寂天之說也（《集菩薩學論》卷十三、十四）。出家菩薩為利他故，固可廣受施襯，亦可聽法化生伽藍

入眾。然根本之行，不能廢頭陀蘭若。勤行自度，即為度他，超凡入聖，造端于是。龍樹大士不厭反複說為出家不共之行，其意深長，可思也見《十住婆沙》。我佛在世，游行宏化，不遑寧處，乞食露宿，時見經文。竹園、祇洹之精舍，集眾說法地，非常住也。後世僧製日壞，養尊處優，習于喧雜，故一聞頭陀蘭若，輒目為遺世絕俗，至舉迦葉頭陀第一之說相難，一若此非余人所得行者，何見之陋也。今出家者皆貌為菩薩受梵網戒矣，常應二時頭陀冬夏坐禪，非《梵網》明文耶？豈並此亦可忘之耶？

二、出家者不應參預世事，又不應為名利親近國王宰官也。

出家菩薩之異于在家者，以其無有攝受父母親屬，營農商估事王業等種種艱辛遽務憂苦也（見《瑜伽》卷四十七）。出家菩薩必免此攝受俗事者，出入聚落，則見聞聲色諸根難攝，發起三毒，六度心薄。又與白衣從事，則利養垢染發起煩惱，弱者不能以思力製心，或死或惱，或舍戒還俗也（《十住婆沙》卷六）。是故佛于《大涅槃經》中最後說戒：比丘不應畜財奴役、種植市易、談說俗事，又不應親近國王大臣。此等經律所製，皆是如來所說（經卷七）。又說息世譏嫌戒，不作販賣田宅種植，不畜財物，不觀軍陣，不作王家使命，乃至菩薩堅持是戒與重戒等（經卷十一）。又說聲聞弟子如修集在家世俗之事，又以稱譽親近國王王子，受使鄰國通致信命，如是之人，皆魔眷屬，非佛弟子（經卷二十六）。由是可見，出家不與世事，不親國王宰官，聲聞固不必論，即出家菩薩，亦懸為厲禁。誠以出家務俗必招譏嫌，既妨修道之專精，複失俗眾之信奉。此非自度度他之道，亦非住持大法之要也。佛囑護法有國王宰官，但必國王宰官之自來親附，非以僧徒趨奉為合法也。贊寧有言：末代垢重，情移奉身，罕聞為教而親近國王大臣者（《僧史略》卷中）。自昔已然，于今為烈，彼奔走權貴，自許國師之流，心地齷齪甚矣，豈可以為教親近解之乎？且稽之佛傳，佛在世時，教化國王宰官，絕少親赴。說法或不廢王法正論，亦所以引俗入道，而與干政有別。如為禹舍大臣說跋祇國七事難勝，同時以此喻誡弟子，有種種增長出家七法，不預世事、應居蘭若，皆在其數見（《長阿含》卷二）。說者乃引七事為出家參預俗務之証，可謂適得其反也。佛法東流，側重王護，歷代君王乃得以專製淫威，種種矯作，多不可為法。有如羅什之依涼、秦，一再毀戒，蓮華泥污，銜憾終身（《高僧傳》卷二）。乃至玄奘，便殿周旋，內宮就譯，亦違本懷（《奘傳》卷九，表請入少林寺翻譯，可見一斑）。至于譯場限制，難盡譯家之能事，尤難勝論。今者國體已更，教法自主，乃不惜曲解史實，以求引僧入俗，大謬矣！

三、出家者不應服官，不應與考也。

出家沙門，宏道利物，敝屣王侯，故能抗禮萬乘，高尚其事。六代而還，沙門不禮王者，論議不絕。此非吝于一拜，乃所以重佛法、護僧製，根本壁壘未可棄也。不居其實，即不受其名，故世俗爵秩亦未應施之方外。然南北朝因設僧官，弊端漸啟

，帝王專製必鄙視僧徒，如卿相而後已。降至宋代，譯場諸僧，俯首稱臣，一無異辭，而僧格掃地以盡。然此猶止于虛秩也，乃若慧琳因宋文之幸，竊參機要，賄賂相繼，孔叟為黑衣宰相，冠履倒置（《南史》卷七十八），此正深惡其不倫也。今之說者，乃欲舉此為僧徒楷模，可謂辱盡佛法矣。贊寧撰《僧史略》，摭取史實以資談助，不必盡為典據。然其言曰：朝廷行爵，釋子競官，官階勿盡，貪愛無滿，胡不養其妻子跪拜君親？有識者于此無取焉（《僧史略》卷下）。此誠快論也。一念之貪，非盡驅僧徒返俗不止，亦非返俗不能盡其官興也。說者知引贊寧之書，而不知贊寧之意，豈非大惑哉！至于國家考試製度，乃為干祿從公技術人員而設，僧徒不赴考，宜也。必以舊日考試度僧相附會，彼亦秕政，不足為訓。出家受戒，廣律本有專章，簡別嚴淨，而皆由僧團自主其事，不可以假手俗吏也。今之僧徒，淆雜浮濫，究其病源，即在不依律實行，故至為逋逃藪為卑田院，不可收拾，豈有關於考試哉？又豈足為參預俗事之藉口哉？

四、出家參政，大違戒律，亦有礙世法也。

出家離俗，自有其根本律儀，今三壇誓受，十方証明者，猶古之法，即所行持，亦必期古之人，不得藉口時代潮流，而自喪其信守。《梵網》有言：正見經律，皆應受持。則如前舉《寶積》、《涅槃》諸經者，豈復有絲毫可以參政之余地？必一切不顧，戒可毀，經可焚，俗事不可不為。是不但自喪其僧格，抑亦無人格之尤也，何待他人剝奪之哉？且即就參選事論，國法以公民平等而不簡僧徒，與佛法放棄俗利而專志道業，兩不相強，本無所礙也。今之熱中者，不僅欲參選，且必欲獲選，故僧徒例同普通公民，本屬區域選舉之類。一二黠者乃不惜利用佛教會，欲附會于職業團體。然國選名額早經規定，職業團體亦已列舉，無所謂佛教會員也。僧徒必欲于其間分一杯羹，勢非枉法不止，此所謂大礙世法也。至于蒙藏僧徒，所奉之教乃顯密雜參，非盡出之釋迦教，史實學理皆有可考。日本、暹羅之佛徒，以在家形式而干政，亦非此所論。但此數地，教非常軌，有待我先進，糾謬繩愆，導之正路，非可盲從顛倒所事也。說者藉口，又何足取哉！

（1936）

（選自《內學雜著》上，《歐陽競無先生內外學》第十一冊）

辨虛妄分別

虛妄分別，凡諸經論，如《楞伽》、《瑜伽》、《顯揚》、《中邊》，皆詮依他性。而以之詮一切法相，則《辯中邊論》與《辨法法性論》獨舉。藏傳彌勒五論，與奘師彌勒五論，書不相同，是大問題，訖未解決。對於此事，安能遽爾率然？然譯者既從藏譯五論，則藏人談《辨法法性》時，與《中邊》相提並論，謂其說依、圓實有，而遍計實無，如隆都喇嘛集內《慈氏五法名數錄》，即有此義，譯論者不應于此加之意歟？

《辯中邊論》談一切法法相，以非空非不空為宗，空是其無，不空詮有，蓋有無並舉也。虛妄分別有，言亂識上見、相二分是有也。于此二都無，言亂識上所無者是二取也。此中唯有空，言亂識上所有者是空性即法性也。于彼亦有此，言空性上所有者亦此亂識也。亂識從因緣有生，不從計執無生。其相如幻，其體是有，所謂其中少有亂識生是也。亂識非實有，亦非全無，許滅解脫故。謂于亂識相、見分上，擇滅二取計執，解脫二取纏縛，種種聖道許以慮托。若亂識全無，安所慮托歟？所謂有無並舉非耶？

今譯《辨法法性論》，談一切法法相，詳其趨勢，乃在無邊。蓋非有無並舉，以宗其非空非不空也。實無而現，無義唯計，無而現有，無有別非一，有無無別非異，最是有無一異一頌，則竟以全無義邊談法相也。夫談唯識，偏對外境，無其外義，而內識則唯。若談法相，則非談相之作用，而必談相之體性。體性之質實，體性之賅攝，必一一詳之。而《辨法法性論》乃詳無略有，何耶？若謂法性是有，法相止可談無邊者，何不舉法性真有、法相幻有義耶？若謂觀無乃可入真，幻有亦何礙于觀無義耶？是則談《辨法法性論》：一、五論未解決；二、法相異《中邊》義未解決也。此論梵文不存，根本無從研核，徒憑重譯，輾轉相沿，又烏知其中所蘊何若？卻怪譯者曾不矜慎，匆匆重譯，又不署重譯之辭，而直書某某所譯。一若非譯藏文，而直譯梵文者；一若原譯摩訶那等之責，皆可代負者。非所謂侮聖言、凌先哲、掩眾明者耶！

複次，分別與計度或遍計之名詞，古不區別，初無異議。至先哲玄奘法師時，則界限精嚴，不容稍混。計度或遍計義，範圍甚狹，唯六、七有；五、八則無。分別義寬，既賅六、七計度，亦攝五、八任運也。《成唯識論》周遍計度，故名遍計。安慧八識皆能遍計，所據理教不能精確，犯過重重。護法破以十義，會以三事，而計度、分別，惟攝屬第六、第七心品乃定。自是以後，辦理譯文，莫不奉為圭臬，是則計度之範圍至狹，不可概虛妄分別之全分也。《瑜伽》七分別，解家以任運分別，為五、七、八識有，余六分別，皆隨念計度所攝，計度唯六、七識有。是則必三分別，或七分別，始攝得八種識盡，所謂分別義寬也。

《辯中邊論》談分別，則悉舉五、八、六、七識。曰：識生變似義，有情我及了。

而《辨法法性論》談分別，譯者但以無義唯計為分別，又申之曰：分別者，謂一切無唯計度耳。又引其師說，妄現為有，妄執為有，二種俱名分別者，以實一切境義唯自遍計分別故。師弟舉分別名詞，俱但舉計度一面，一若分別唯攝六、七計度，不必攝五、八不計度者。夫其談妄現妄執于義無失，而名詞有失。又使譯名詞于古時無失，于今時有失。其師是藏人，或以僻遠不讀中籍，無論矣。譯者是中土人，不讀中籍而為中國譯典，可乎哉？譯家不閑千數百年輾轉辨別、最後定為一尊之名詞，或閑故不用，而徒執先時混沌不分之名相以迷惑國人，又非所謂侮聖言、凌先哲、掩眾明者耶！

（選自《內學雜著》卷上，《歐陽競無先生內外學》第十一冊）

辨二諦三性

大乘有兩輪：曰二諦，曰三性。二諦以說法，《中論》"諸佛以二諦，為眾生說法，一以世俗諦，二第一義諦"，是也。三性以立教，《密嚴》五法、三自性、八識、二無我，此即是諸佛最後之教理是也。說法無二道，其極曰一真法界；立教視機感，其極曰二空所顯。既已雲一真法界矣，而復曰二空所顯者，法界法爾，唯如是真，增益固不得；法界法爾，有如是幻，損減亦不得也。不真無體，幻滅無用也。依真說法，依幻立教，此其所以立二諦複談三性歟！二諦詮真，克實唯遮世俗諦；三性詮幻，克實唯詮依他起性。第一義諦周遍有也，依他起性少分有也；第一義諦如實有也，依他起性如幻有也。皆有也。其為無者，二諦中俗諦無，三性中計執無也。真俗以有無判，依、圓以真幻判也。

何謂二諦克實，唯遮世俗諦耶？談二諦者，莫不依般若波羅蜜，龍樹有言：觀一切法實相慧，名之曰般若波羅蜜，一切法實相涅槃也，即第一義諦也。第一義諦有，依之以觀一切法，則凡不與第一義諦相應者，無也、非也、不也，無色聲香味觸法，乃至無智無得等也，非常非樂非我非淨等也，不生不滅不增不減等也。此豈言一切法斷滅無哉？《般若經》言：如諸愚夫異生所執非一切法如有有故，應如無所有如是而有；若于無所有法不能了達，說為無明生死三界。《般若經》又言：甚深般若波羅蜜多，非如是等諸法所攝，亦非不攝，如是所攝所不攝法，所有真如不虛妄性、不變異性、如所有性，如諸如來及佛弟子菩薩所見，是謂般若波羅蜜多。是蓋言第一義諦如實而有也。其所謂無者，乃計執之俗諦無也。以計執之俗諦無，立一切法畢竟空義，文殊、龍樹、清辨等而以為宗。

何謂三性克實，唯詮依他起性耶？依他起上，若複起執，為遍計所執性，即二諦之俗諦，畢竟無有；依他起上，不複起執，為圓成實性，即二諦之真諦，如實而有。于二諦外別立一性，非無如計執，非有如圓成。而亦有亦無系于一法，繼二諦而創立者，其唯依他起性乎？二分之謂識，雜以二取之謂亂。二分識上之二取亂，所謂境無識亦無也；二取亂上之二分識，所謂識體不滅之為有也。此于變似，應得詳談。變之謂能，似之謂所，似于能邊謂之為分，似于所邊謂之為取，分取相錯，字為亂識。亦有亦無，就識邊言，則所謂少分有也。此非獨影從見如空中華，本無所有也，此由先種今緣，二分變現，不可雲無也。雲何立此亂識有耶？亂識之謂染，所謂染依他也；亂去之謂淨，所謂淨依他也。諸佛立教，莫不依于染淨，有染然後有淨，去染然後得淨。若染依他無，則識本無亂，何所為去！去之雲何，又何淨至？唯其有染，則有纏縛，乃有解脫。縛脫對治，染去淨存，是之謂教。法爾有亂識，法爾建立有，乃諸佛方便立教之深意歟！以依他之染性非真有非全無，立一切法非空非不空義，彌勒、無著、護法等而以為宗。

兩宗既立，共談一義，所趣不同。如共談計執無義，二諦唯詮二取之畢竟無也，三性則必詮二取之無，于二分識上有也。如詮計執，《密嚴經》言：諸法不生滅，不

斷亦不常，不一亦不異，不來亦不去，妄立種種名，是為遍計性。又言：諸法猶如幻如夢，與乾城陽焰、水中月、火輪雲電等，此中妄所取，是為遍計性。二諦以不義詮，唯談計執無也；三性以如義詮，必談無其執于有上也。又如共談圓成真義，若二諦邊，以真諦有對俗諦無，則有無異也；若三性邊，圓成真有對依他幻有，則依、圓同有，不以有無異，而以有上之真幻異也。兩宗既立，各詮其所詮，各極其所至。經言：文殊觀一切法平等平等，不見山河大地，瓦礫礪確是也。經言：若複一法超過涅槃，我亦說為如幻如化，是也。兩宗既立，各極其至，不可以相譏，法法不相知；不可以相淆，法法不相到。非彌勒不爛《般若》，非文殊不審《瑜伽》，既各宗其宗，法相自不容或亂也。然宗雖各別，而道不相離，八萬四千門一妙清淨道故也。二諦遮執，三性詮染，宗不同也。歸極于真有，結果于涅槃，彼雲第一義諦，此雲圓成實性，道無異也。

不達斯旨，《般若》、《瑜伽》之上別立一宗，昧法平等，俯瞰群流，高居統攝，謂為融洽。理不可通，教其無據，是謂波旬，象恭滔天。一或不慎，喪慧失命，誠可哀矣！若欲徹底爛《般若》、《瑜伽》于一，是唯涅槃三德伊字，一語三玄，一玄三要，乃稱妙旨。須再詳談，今姑且止。故曰：今所宜闡揚者，《般若》、《瑜伽》之教，龍樹、無著之學，羅什、玄奘之文。

附：解惑四則

前作《辨虛妄分別》，廣《瑜伽法相辭典》敘末段之義，其根本之點，在《辨法法性論》說分別是無，與彌勒非空非不空宗有無並舉不合，不得視為彌勒學。此學說異也。而又五論未決，無梵可核，更分別與計度譯名有違，故雲翻譯不可不慎耳。文意至明，然猶有惑者，因複略解之。

一、論宗不合。彌勒一切法非空非不空宗，建立于《中邊》。《中邊》說虛妄分別，以二分為有，又以空妄互有為有，有故非空；以二取為無，無故非不空。變現之自體，二分也，從因緣生，不可謂無；變現之所似，二取也，計所執境，不可謂有。因二分之現，乃有二取之執，安慧釋謂余分別執為二取，其體非有是也。《攝論》隨順《中邊》，說虛妄分別所攝諸識，由二性安立唯識性，有相有見二識別故，此為二分釋分別之所據。若雲自証之義，實發見于陳那，不可以後難前，而責無著二分之不合也。遍計所執之能取所取二取也，能遍計之能取取與所取取，亦略雲二取也，其《成唯識論》之說二取熏習，與由二取輪回者，亦皆就二取取言。安慧、護法翕然無諍，不可誤為所執之二取具能熏流轉之用為實有也。明分取義，則知《中邊》所說虛妄分別，有無並舉，始能盡概，義不傾動。《辨法法性論》非有無並舉，烏乎可立？論說法法性非一異處，據藏人所傳之世親注疏而釋，是謂虛妄分別法為無，真如法性為有，故法與法性非一。因法無而法性顯，故法與法性非異。又論說入轉依處，亦據藏傳以釋，是謂法性由法無而後顯，故法現則法性隱，法隱則法性現。此皆以無義談虛妄分別，乃達于極點，幾視依他與遍計為一，空妄互有亦無以立，其與《中邊》不符，與彌勒非空非不空宗不合，猶待深論乎！

二、五論未決。奘傳五論見《瑜伽倫記》，為瑜伽一系之舊說；藏傳五論，則超岩寺師子賢始顯現觀，大梅[口*旦]梨波始傳《法性》與《寶性》，是乃無著以後六百年中顯密雜參之談。故奘傳純而藏傳駁，明明因時代先後而性質以易也。奘傳五論中《金剛經論頌》，藏譯乃不諳作者為誰。藏傳五論中《寶性論》，奘門始斷為堅慧所造。又，奘傳謂《金剛論》、《瑜伽》、《莊嚴》、《中邊》皆彌勒為無著所說，而藏傳則謂彌勒但說《般若》、《瑜伽》，其《莊嚴》、《中邊》及余三書，乃彌勒自造，合為五論。此奘藏兩傳，明明因時代先後而內容以變也。（近人《慈氏五論頌合刊序》，于舊譯《寶性》，謂原題堅慧所造，于藏文《瑜伽》，謂非出慈尊所說，又謂藏文不聞有釋《金剛頌》雲雲，皆有誤。）奘傳五論，皆無著、世親傳之，至玄奘、義淨不替。藏傳則《法性》、《寶性》二論之師承，在宗喀巴一系即有異說，或謂無著、世親、安慧等歷代相傳，與《莊嚴》、《中邊》無異；或謂不然，無著後二論失傳，師子賢釋八千頌《般若》時，猶不知有其書，迨無著後六百年，大梅[口*旦]梨波始于荒塔得之，以遠承慈氏。（此第五代達賴《尊聞錄》之說。由此可知，藏人謂《法性論》有兩種傳承者，乃對於一種譯本之異解而說耳，與譯本之同不同無涉也。）揆之史實，後說較信。是奘、藏兩傳，又明明因時代先後而師承以改也。今既溝通漢藏，兩傳變遷之故俱得而詳，詎不應善事抉擇，以

期見彌勒學之真歟？不加抉擇，即視《法性》與《中邊》一類，甚至疑為分別《瑜伽》，欲以闖入奘譯之林，學統淆然，其烏乎可！

三、無梵可核。從目錄家通例，書之雲佚者，以並世不見其本為斷，流沙石室或有埋藏，非所問也。印度尼泊爾等地已發現之梵本，皆有目錄，皆不載《辦法法性論》，故謂梵本不存耳。今譯但有西藏本可據，而藏本異文雜出，摩訶那等初譯，為散文本，（北平刻藏文《慈氏五論》收之。）寂賢等異譯，又另為一散文本，摩訶那等再譯，又改為頌文本。據傳世親注解指論文處皆雲如修妒路，修妒路是散文體，兼以寂賢異譯亦作散文，似散文本最在先出，然與藏傳彌勒余論皆為頌文者即不侔。此底本有待刊定者也。娑那傳《法性論》入藏。授其子摩訶那譯之，所譯先後成散文、頌文兩本，以一傳承而自岐其例，此又底本有待刊定者也。至三本文義出入，名相異同，亦有審訂必要，皆非稽之梵文不可。今梵本不存，研核困難，翻譯可不慎之又慎歟？

四、譯名有違。分別有自性、計度、隨念三種，此本毗曇舊義，故分別與計度，名義寬狹各不同，護法許之，安慧亦許之。（見所糅《雜集論》。）以其兩家俱許，護法乃能據以為因，而與安慧諍八識之孰為計度，孰能遍計。（因明立量，因須極成，未有但自許是因，而可立義以曉他者。奘師唯識量因雲自許，乃簡因中初三兩字，並非簡因之全體，基疏釋之極詳。）即在陳那、法稱亦許之，《因明論》常說五識離隨念計度等分別是也。故從護法，不可混分別與計度為一，即從安慧、陳那、法稱，又何得淆分別、計度為一乎？此豈一家私言，而譯藏文可不必遵依者哉？舊譯名詞，精嚴未逮，自奘師刊定而後，百世譯宗，無可改轍。今猶欲概以計度譯分別，攝義不盡，所解全非，是亦不可以已歟！（舊譯常以計度、遍計為分別，如能遍計譯能分別，遍計性譯分別性，皆以總詮別，故其說泛。新譯嚴其界畔，總說處必譯分別，如依他性之為分別；別說處或譯遍計，如六、七識之為能遍計，各適其適，俾無異解。此固學說精研之由致，抑亦翻譯之例所應爾也。今譯虛妄分別義，于總說分別之處，而以別說計度義譯之，是則以別詮總，既異舊譯之以總詮別，複異新譯之以總詮總、以別詮別。新舊諸譯，皆無其例，顛倒解生，斷乎不可，又何涉于學說異同哉？故其譯札迦注解，既雲五識無計度，又雲五識唯自遍計分別為境，前後乖反，殆亦計度、分別二名察之未審，而譯之不當之故歟！札迦原書具在，可覆按矣。）

二十七年（1938）七月初與渝友談義

（選自《內學雜著》卷上，《歐陽競無先生內外學》第十一冊）

辨唯識法相

前辨二諦三性文，明二諦空宗為文殊學，三性非空非不空宗為彌勒學，而于彌勒學之內容未能剖判，今故繼述此文。

蓋彌勒學者，發揮法相與唯識二事也。初但法相，後創唯識。彌勒《瑜伽》中詮法相于〈本事分〉，而詮唯識于〈抉擇分〉。是法平等曰法相，萬法統一曰唯識。二事可相攝而不可相淆，亦復不可相亂，此彌勒學也。無著者，親近彌勒，此間以為初地菩薩，藏中稱為三地菩薩也。《解深密經》、《攝大乘論》者，相宗大匠皆據為講彌勒學之經論也。作論有一定格式者，無著《攝論》，遵彌勒攝釋而刊定其法則也。無著《攝大乘》之言曰：若有欲造大乘法釋，略由三相應造其釋：一者由說緣起，二者由說從緣所生法相，三者由說語義。緣起者，本轉種子之唯識也；法相者，三性之一切法也；語義者，佛功德與菩薩行之大悲相也。蓋前二為深義，後一為廣義；或初一為深義，後二為廣義也。此唯識法相德義，論本及世親《無性論釋》發揮明晰，不可誣也。所以唯識法相必分為二者、世尊義如是也。世尊于《楞伽》、《密嚴》，既立五法、三自性之法相矣，而又立八識、二無我之唯識。《密嚴》以為最勝之教理，衡量一切法，如稱如明鏡，照耀如明燈，試驗如金石，奈何淆而一之，或亂而易之哉？唯識法相德義之作論格式，試舉其例：初如《攝大乘論》，是唯識邊論，大乘對小乘，故適用尊勝也。于境則所知依立阿賴耶，由諸聲聞不于一切境智處轉故；于行則彼入因果立六度行，由諸聲聞但于三十七菩提分轉故；于果則彼果斷立無住涅槃，彼果智立法身，由諸聲聞但二涅槃解脫身轉故。唯識注重觀行，故于因果差別三學之先，提要特立入所知相分也。次如《辯中邊論》，是法相邊論，三乘莫不皆法，故適用平等義也。一切法者，賅染與淨，淨法是有，染法亦應是有。若染不立有，則何所滅而何所存耶？《中邊》談一切法中道，必立染有。先于〈相品〉辨亂識相為少有，而染得生；次故于〈障品〉立五障、九障、十因、三乘障之染有。若有若無，稱法而談，則染淨皆有其真實，故〈真實品〉立十種真實有。小乘對治三十七菩提分，小大分位共有十八，小乘得果但有所得也。若無上乘則行果異小，正行十波羅蜜行，而修別有六。十波羅蜜之所緣，十波羅蜜之修証，皆廣大無邊也。凡此皆法相邊義也。又次，如《大乘莊嚴經論》，是德義邊論，不但攝乎大乘而已，而且莊嚴乎大乘，故適用廣大義也。《瑜伽?菩薩地》詮菩薩行是廣大義，《莊嚴》品目悉不與異。然《莊嚴》意存光大，必較《瑜伽?菩薩地》而更充盈，則《瑜伽》所無而必加補，《瑜伽》所略而必加詳，于是于德義邊而亦賅攝乎唯識法相。如〈述求品〉詳談唯識，又加諸相也；如〈梵住品〉別說大悲有二十六門也，如〈菩提分品〉三十七菩提一一詳敘也。蓋《瑜伽?菩薩地》于唯識法相義，散見于前後諸地，而《莊嚴》則必聚于一處，直不啻以一論而賅攝《瑜伽》，誠可謂大乘經之極莊嚴矣！故西域不熟《莊嚴》不能弘法，意誠當也。舉此三例，唯識、法相，德義體例各別，不相淆亂，彌勒學也，反此或淆或亂，非彌勒學也。

複次，聽法眾生有樂廣文，有樂略文，故經論長行有前中後陀南以為賅攝；而極略

則在一經論之名。故世尊說一經竟，當機必請以何名此經，要使一望此經之名，而即知所說之事義若何也。論亦何複不然？《攝大乘論》十殊勝殊勝語，止是賅攝大乘，非是詳敘大乘。以少攝多，以統攝散，談唯識邊事義，一望其《攝大乘》名而即知梗概也。《辯中邊論》立虛妄分別有，乃有染有淨，是一切義普能決了三乘法故，非各局于一邊談法相事義，一望其《辯中邊》名而即知其梗概也。《大乘莊嚴經論》說經義，譬如蓮華開敷榮茂，非止賅攝，故于其初成大乘宗，而于中後即菩薩地而更詳之，談德義邊事義，一望其《大乘經莊嚴》名而即知其梗概也。即論名字，即論事義，此彌勒學也，反此，或義不與名合，或此名乃彼義用，非彌勒學也。

二十七年（1938）八月初與院友談義

附：解惑二則

一切法者，《百法明門》攝無為真如法，是知染法不足盡一切，染法之生死法更不足盡一切。處處經中談染法，皆指生滅而言，不第談生死，生死義狹，生滅義廣故也。今《辨法法性論》名為一切法，實則非一切法，但局于生死一法，名實異矣。又，生死涅槃相翻，通常法門亦平等法門，小乘解脫身相共，不足攝大乘法身，故亦不足盡一切法，而亦不足賅法性之量。今《辨法法性論》，謂抉擇依大乘，而又說唯以生死涅槃，是詮參差異矣。又，二諦以遍計所執詮一切法，則凡與法性不相合者，皆不之無之，故可言一切法無，唯法性有也。三性以依他起詮一切法，空中固有此虛妄分別，故不可言一切法無，唯法性有也。試舉其例：《大般若經》四百七十八〈空性品〉，具壽問如來：永斷習氣，豈亦是化？佛言：諸法若與生滅相合，亦皆是化；涅槃不與生滅相合，是法非化。是則菩提與不生滅相應，謂之轉依，而必與生滅相合，乃堪為用，乃堪盡未來際作諸功德。是故，遍計談行談畢竟空，依他談行乃談善巧。善巧即與寂滅寂靜相應也，焉可雲一切法無、唯法性有也？今《辨法法性論》謂一切法無，唯法性有，不覺詮體而廢用，說豈能圓滿哉！今為之說曰：若"法法性論"標"生死涅槃論"，則名實相符矣。乃內容生死，而外標一切法，一切法不足，與《中邊》談無欠缺者不同，故曰非彌勒學。

《中邊》虛妄分別，性是依他有，境是遍計無，而《辨法法性論》直是但詮遍計無耳。何也？《攝大乘論》遍計所執相，謂于無義唯有識中似義顯現，《法性論》不過于此一句演為一頌而已。現二及名言，實無而現故，以是為虛妄，即似義顯現也。彼一切無義唯計故分別，即謂于無義，唯有識中也。不得但以現字計字附會《中邊》有，遂惑遍計作依他用也。故曰非彌勒學。

（選自《內學雜著》上，《歐陽競無先生內外學》第十一冊）

注 1922年9月支那內學院開學之初，歐陽漸于開講《成唯識論》之前，首先分十次講演本文。此文紀錄稿由聶耦庚筆記、呂澄校訂；黑括號之內為歐陽漸本人親撰的原稿，後收入《歐陽先生內外學》第十冊。

第二編 《佛教教育》

支那內學院研究會開會辭

今日此會為內院第一次研究會。此會規模須貫徹到底，即貫徹到佛陀眾會說法之時，故不能盡效世俗學會辦法。現就會名研究略為解釋，以見此意。

其一研究性質，可分二層：

一、與尋常師弟之授受不同。諸佛以苦諦為師，師法不師人，今之研究亦依傳法之接續師。師非唯以行果為標準也，有果上師，佛菩薩是；有行上師，觀行有得者是；有境上師，精研法相者是。若學有師承不悖佛說，且能提出精華，資益後學，使慧命相續者，則接續師也。學依接續師，即于古人立義不應輕易改動；改動立義即非師承。有如法相家立種子義，今言法相而謂種子不可立，則失其師承也。（他宗或不贊成種子，亦有道理須研；然是他宗，即非此宗師承。）但宗義創自先哲，推闡亦留待後人，或詳其所略，或厘其所雜，或疏失之糾修，或他義之資發；破棄盲從，革除侗，有果有因，整然不亂：此乃真所謂師承，與標宗定義之授受不同，亦與泛爾皈依之師弟有異也。

二、與世間從多數不同。世間事從多數，期其能相安無害而已，不必求徹底也。今言學則不然。處處須得真相，即處處須以教理為斷。初言教者，由無漏智等流而出，非世間見之比。吾人今日既未見道，未起無漏，念念之心雜彼煩惱，舍教而外無足憑依。儒家者言人皆本有昭靈不昧者，可為依歸，此乃過信世智，與佛家根本不同，不可無辨。次言理者，由教引起，演繹而不離其宗，非徒憑直覺隨意立義可以相擬。教理皆為研究探討之所取決，故公認熟于教理者有批評之職，乃屬當然之事。研究者信其人之批評，不異即信教理也。今更有一點須附及之。吾人現在研究，乃結論後之研究，推闡發揮，皆不能外于已定之結論，非由研究遂別得一新結論也。此非迷信之談，處有漏而究無漏，其理則然耳。設不爾者，必須見道以得其教，再用因明以成其理，始得別作主張也。

其二研究規模。

此須從學派言之，又從資糧言之。以學派論，此間研究不可不景仰舊時天竺之那爛陀寺。此寺規模，佛滅以來允為第一，雖我國昔日關中慈恩之盛，不足方其百一也。如寺中每日講座百余，性、相、密三，鼎足傳宏，小乘、外道，無一不備，此其派別可謂繁極。今之規模，期在于此，余十年以來規畫內院者，亦在于此。再由資糧言，《大論》一序具提綱要，可以參研，且不贅說。今日研究，誠當以法相為主，其余研究則皆歸束于此。

其三研究效果。

言其大果，成佛與一切佛事無一不是。若在今時，縮小範圍，且說一種，即以研得各派學說精確無錯且堪傳布為目的也。此當今日事雜言龐之際，尤為急要。佛謂五逆之罪破僧第一，方今龐雜之言違背教理，斷人慧命，皆破僧之類也。吾人急宜于繼續慧命著眼，教理各端當求精確堪于流布，更何待言！于是有研究略法四條，須知遵守。

（一）凡學公例如因明之因喻，不待再用商量。如果別有所見，亦須種種發明，然後再立新例。

（1）必舊例實有缺點。

（2）必所立新例種種無缺。

（3）必真能立量破他，不蹈似破似立之過。

（二）虛心容順，不可輕易違反舊說。淺人謗深語，如初犢斗虎。然謂凡人一時揣摩，能勝菩薩數十年親証，世間寧有此理？故于舊說，須抱發明主義，不可抱違反主義。

（三）研究須靈活超脫，不可死煞句下。佛教依義不依語，如果于義緣得純熟，亦無不解之語。（依義即緣義作觀之謂。）又以喻語為法語，是學者通病，所謂不觀月而觀指也，切忌。

（四）讀書宜多作零碎筆記，不可動輒作長文。

讀書宜勤手錄。遇到稍有意義之處，雖一字一句之少，亦必如見深仇，眼明手快即時錄下，不可一絲放松。

讀書須一條一條商榷，不可自恕自是。

此會之研究，以上述種種為標的，為方法，必須切實做到；同人其共勉之。

民國十二年（1923）七月內院第一次研究會紀錄

（選自《內學》第一輯）

法相大學特科開學講演

今日支那內學院法相大學特科開學。創此大學者，為本人宜黃歐陽漸。漸創此學，固必有所創之宗旨，與其所經之歷史。

今先述歷史。明清以來，隨手掇拾一經一論，順文消釋，就義敷陳，如是講壇，無時不有。興設學校，編製學科，三乘教義抉要示人，如是規模，則向來無。世法且忌躐等，學佛自當有序。印土學人通例，先治小乘三年。降逮中國，鄙夷聲聞，小固可輕，然複何易？彼惟無悲，斯與大異；九事所攝，法則共同。小非外大，大實涵小；不知此小，焉足稱大？吾華昧此，遺棄小乘，任彼高談，終嫌籠統。因其基礎，繼長增高，固當大小通談，融求的當也。學校製度，通行東西，既著攸功，何妨采擷。我親教師楊老居士首創祇洹精舍，余亦曾觀發起。意在陶鑄真土，重入五天，考求文獻。一時學人有太虛、仁山上人、明居士等。旋因款絀，半載即停。諦閑、月霞二大法師，相繼設學。今茲所存，惟武昌佛學院與本院，實承祇桓精舍而來也。

次揭宗旨。《瑜伽》三十五雲：菩薩發心由四種緣：一、見佛神變；二、聞佛說法，此二為佛在時而發心者；三、哀正法滅；四、悲眾生苦，此二為佛滅後而發心者。吾人不幸不能見佛聞法，因于佛後感而發心，遂不得不立二種宗旨：

第一、哀正法滅，立西域學宗旨。正法能傳，賴真師承；真師承者，淵源于印度也。佛後真師，龍樹、無著，位皆初地，說法獨正。何以故？緣藏識中無漏、有漏二類種子絕對不蒙。下土凡夫無漏種隱、有漏種現，初地菩薩有漏種隱、無漏種現，無漏種現乃所謂正法也。初登地時，歡喜至極，說法遂詳，詳則易解，接近世俗。馬鳴八地，語略難知。若夫智者自謂五品，等是凡夫；其在賢首，多襲天台，所有說言，更無足恃。是故非西域龍樹、無著之學不可學。

第二、悲眾生苦，立為人學宗旨。為人雲何？無我之謂。所謂無我，非先有我，後使之無，如先有樹，執柯伐之。為己為人，方向不同，東西異步，為人則生心動念止知有人，即至無上菩提亦非為己，眾生不成佛我不成佛，蓋以他為自，非推己及人耳。今來學者自問：是否發心因法欲滅？是否發心因眾生苦？吾志在此，合者都來破釜沉舟，同向毗盧遮那頂上行去也。（劉定權記）

民國十二年（1923）七月內院第一次研究會紀錄

（選自《內學》第二輯）

今日之佛法研究

解釋此題可分數層：

- 一、佛法。（此即研究之境）
- 二、佛法研究。（此即研究者之行）
- 三、今日之佛法研究。（此即研究者隨分之果）

第一、雲佛法者，其詳可列一表如次：

「皆佛語言」

「事」

「蘊、處、緣起、界、諦、食（境）」

「九事所攝」

「

」

菩提分（行）———所學事

|

佛弟子（果）

└

|

八眾————能學人

┌不可言說┐

佛法┐

|

└方便言說┐┌

┌蘊假、界處實

| |

| 蘊實、界處假

| | 小乘 |

| |

| 蘊處、實界假

| 義 |

└ 三法皆真

| |

| | 大乘—三法皆假—空宗—涅 —寂靜┐

┐ 寂靜而圓明

| |

| —結論 |

└ └

相宗一知見一圓明^ㄐ

ㄐ圓明而寂靜

依表解釋。若說佛法實有勝法可學，此即魔說而非佛說。佛法乃日常應用恰到好處之事，亦猶人生眠食起居，不足希奇。無論佛出世若不出世，法性安住，法住法界，法爾如是。佛有所說，但老實人說本分事而已，論其實在固不可言說也。

然凡愚未能遽語于此也。凡外造三惡趣因，墮于有見。小乘偏執我空，墮于斷見。二皆增損，皆非老實，更不是說本分事。佛以大悲心憫凡愚之迷惘，從旁面反面而為說之，惟避忌諱不說正面。所謂從反面說之者，有如空宗說一切俱非而顯法性。從旁面說之者，有如有宗以二空所顯而說真如。凡此皆方便之說也。

余二十年來，談空談有，談小談大，時苦不能貫通。然今依教法，乃得文字上之一貫，悟佛說方便之法門。一貫之說無他，事義之分別而已。大小空有所依之事皆同，所謂諸佛語言，九事所攝；又謂乘則有三，教則唯一也（九事詳如表列）。然三乘于同依之事，說義即有不同。小乘解釋三法有假有實，乃隨少分所見以談，未能圓滿。大乘証見既周，乃說三法皆假。其中複具空有兩輪，不可傾動。不知空而言有，比乃空前法相，所謂毫發不可有者。既知空而言有，此乃空後法相，所謂毫發不可無者。二輪相成，不可缺一。然複分二宗言之者，如雲遍計一切非是，又雲依、圓一切皆是，比之是非一時不能並舉，並舉適成自違，以是各就一端言說，遂成兩面也。空宗說無余涅槃一切皆空，寂靜不起，此指體言。若正說之，即錯同外道，故但從遮而顯。相宗說涅槃同時之菩提知見，相貌圓明，無一毫之欠缺，此就用言，故從善巧方便而說也。二宗之不相蒙如此。

由空有二宗以談佛法結論，則寂靜而圓明、圓明而寂靜二語而已。合圓明寂靜為一片，而後言寂靜，不失于枯槁，言圓明又不失于浮囂。禪家所謂月在上方諸品淨者，仿佛似之。然此皆言說事，學佛究竟，猶不可拘此言說也。

第二、雲佛法研究者，因寂靜圓明之境非世間眾生所知，必無漏人乃見得到。此境既非世智所知，即不可以世智相求，于是研究上有兩種困難：

一、苦無出世現量。

二、苦世智不足範圍。

正面無路，乃不得不假借：

一、假聖言量為比量。此雖非現量，而是現量等流，可以因藉。此為假借他人。

二、信有無漏本種，久遠為期。以是發心最應注意。此為假借他日。

準是研究，有二要語應知：

一切佛法研究，皆是結論後之研究，非研究而得結論。

舉例釋之。如以佛說諸行無常為結論，而研究得其因于生滅。又以有漏皆苦為結論，而研究得其因于無常。又以諸法無我為結論，而研究得其因于苦。如是展轉相比，道理盡出，即是研究。否則但知言苦，不詳因緣，他人何不可無因而言樂。故學佛者全須用心思惟，徑路絕而風雲通，學佛有之。然不先有結論，專憑世智思量，則亦漫無歸宿而已矣。

于是，又得一研究之重要方法曰：

多聞聞持，其聞積集（此較會通），熏生無漏。

是數語也，亦可易辭言之曰：

多聞熏習（他力），如理作意（自力）。

第三、雲今日之佛法研究者，其事有二：

一、須明遞嬗之理。

（一）佛在世時說法隨機。此在當時未即記載，但于大小空有，義理皆具。後來菩薩詳細發揮，總不外其範圍。若並此一層亦不置信，則魔外並起，無從分割。

（二）佛滅度後，二十部小乘興諍。此皆切實可資研究。今人對於大乘立義，每有望塵莫及之嘆，而小乘思想接近，亦可藉以引導也。

（三）龍樹破小。此為大小轉移之一關鍵。所雲一切皆空者，空其可空，乃最得我佛之意。

（四）無著詳大。此繼龍樹之說而圓滿之。故二家缺一不可。

（五）唐人薈萃。此于無著以來各家學說皆得會通。然其後絕響及千余載，今繼唐人，須大家擔當。

二、須知正期之事。

（一）整理舊存。此有二事：簡別真偽，一也；考訂散亂，二也。真偽之簡別，在不輕置信，在讀書細心，終于無漏引生，知其相應與否。至為此初基者，則多聞也。多聞乃膽大，乃心細，乃眼明，而有判別。又舊存之書多有散亂，必考較異譯，論其短長，為之勘定，而後可讀。

（二）發展新資。此亦有二事：借助梵藏文，一也；廣采時賢論，二也。梵藏文中要藉未翻者極夥，如能參閱其書，多所依據，立論乃確。時賢議論不必盡當，惟讀書有由反面而見正面者。如法相要義散漫難尋，吾昔年讀《掌珍論》中駁相應論師數行，而得相宗大概；又如因大乘非佛說而得研究途徑，證明大乘實有演繹佛說而成之義；皆其例也。

本題解釋且盡于此，其中精微，他日當自為文以發之。

民國十二年（1923）九月內院第二次研究會講演紀錄

（選自《內學》第一輯）

談內學研究

今談內學研究，先內學，後研究。

內學之謂內，有三義：

一、無漏為內，有漏為外也。《雜集論》雲：墮于三界為漏。其有漏法即流轉法，與還滅法截然二事，猶水與火，猶黑與白，以其種子即成二類也。昔人于此每每講錯。以為真如本淨也，煩惱染之則流轉，煩惱遠離則還滅。二者相替如輪轉焉，而不知其實不相謀也。

因此而談，儒家所雲人欲淨盡、天理純全，措語亦有病。孟子亦雲：養心莫善于寡欲。宋儒注雲：寡者非絕。于此知其夾雜不純也。此在佛家謂之雜染，一分染亦是染法。染則須絕，非徒寡之。故儒家所雲寡欲，表面似有理，實則雜理欲二者、成黑白業，仍屬雜染，不究竟也。儒家又雲：大人者，不失其赤子之心者也。此赤子之心即雜染，而以為天理，故理終屬不淨，亦猶驢乳終不可為醍醐矣。儒家而外，如現行耶教講愛，亦屬偏頗，不能及物，故殺生非所禁戒。此皆成其為有漏與外而已。從無漏種發生，即不如是。故雲：有無漏可判內外。其理應于《大論?真實品》中詳求。四真實中，煩惱障淨智所行與所知障淨智所行，皆以純淨得名真實，內學即應認清此真實。又此雖就現行立說，所從來者乃在種子。此無漏種子之義雖自後人發明，然其道理建立不可傾動。

二、現証為內，推度為外也。如今人言哲學，研究真理而不得結論。以其出于推度，人各不同，遂無定論也。若出諸現証，則盡人如一，無有異說。如見物然，同見者則說同，出于想像則不同也。以是先佛、今佛、當佛皆言四諦，大小、空有、顯密乃至諸宗疏釋，亦莫不說四諦，以其現証同而立說同也。又如諸佛以苦空、無常、無我為教，乃至涅槃言常，亦為無常之注腳，此又現証同而立說同也。由此即得結論與哲學有異。

余常雲：內學為結論後之研究，外學則研究而不得結論者也。此為內外學根本不同之點。由此內外方法亦不同。哲學每用比方，以定例為比量，即有範圍限制。如以三百六十度測周圓，二直角測三角內和，皆屬一定限制，不論圓角之形大小如何，皆不出此限制，哲學家用心思推測，無論各人推測如何，而均在不得結果之一範圍內，人心所限制然也。內學則不如是，期在現証，無用比度，如說四諦，即是現証，即是結論。研求結論，乃有種種解析方法。又如不能理會苦而說苦由無常，復由種種分析以明無常，此皆為教導上不得已之辦法。故內學所重在親証也。然學者初無現証，又將如何？此惟有借現証為用之一法，所謂聖教量也。有聖教量，乃可不憑一己猜想。若不信此，亦終不得現証。世間哲學家即不肯冒險置信聖言，以為迷信，處處須自思一過，遂終墮于推度矣，此又內外分途之一點也。

三、究竟為內，不究竟為外也。經雲：止有一乘法，無二亦無三。故佛說法無不究竟者。惟此就起點含有全體而言。雖始有未竟，而至終則究竟，如不了義經，得其解釋終歸了義也。《無量義經》雲：四十九年皆說《法華》，其間雖實說三乘法，意則均在《法華》也。故雲：教則為一，乘則有三。乘以被機有三，實亦各究竟也。由此內學者，應生心動念皆挾一全法界而來，大悲由此起，大智從此生。即如大乘唯識說阿賴耶，亦以其挾全法界而得究竟也。此種全體大用上講求是為內學，反此皆屬外學。

次言內學研究。即知所研究者，為無漏現証究竟之學，而起研究也。此可分人、法兩者言之：法是所學，人是能學，各有四端。

法有四者：一、研究之必要；二、研究之範圍；三、研究之所務；四、研究之方法。今一、言研究之必要，先以理對學論之。

其一、理是法爾，學是模填。法爾八萬四千法門，言議不及，禪家每用但字調，以為但得即是，然此意仍可商。今謂法爾未得，先事模填，如畫作模填采也。學問即模填之事，可以由得法爾，故屬方便，非真實。

其二、理是現在，學是過、未。以學過念即非，落第二著。即雲參究，亦落次念，成為過去，惟由此方便，得到現在。

其三、理是現量，學是比量。學為方便，則屬借用現量，信解道理。能處處作此觀，開眼生心，皆此道理，則可以發生現量。此義見《真實品》。故學雖比量，而是現量方便。

其四、理是無為，學是觀察。此乃本其所有而精細審量，亦得証會無為。

其五、理是不動，學是建立。理皆法爾常住，有佛無佛不稍動移。學由人興，故出建立。但由學可証理。

其六、理是真如，學是正智。其七、理是無分別，學是有分別。其八、理是離心意識，學是猛用六識。此皆如前分別可知。

次以教對學言之。教待機感，而有權實、半滿、漸頓，又有詳略異門。由學研理，教仍是一，以是各端研學有必要也。

二、研究之範圍。但研究教，即概括宗在內。宗是總持，非差別，非分析，而亦不能違背三藏，實亦是教，今即總談教而不別開。

教分西方、東方。西方教先有三藏。經律則為阿難等在王舍城所結集，以十二分教攝大小乘，攝論議。又有律，為耶舍等在吠舍離之結集。又有論，為帝須等在華氏城之結集。自此以後。有大小、空有、顯密等別，而其學悉匯萃于那爛陀寺。蓋自佛滅以後，講學範圍之寬，無能逾此地者。西方佛學亦以此為終。

東方佛學，如關中之空，慈恩之有，匡廬之淨，曹溪之禪，南山之律等，皆本諸西土。此中禪宗雖雜有我國思想，然理與空宗相合之處，仍出西方也。

今茲研究範圍，應全概括諸教。範圍不寬則易衰歇，昔日空有諸家，其前車也。但佛教範圍雖大，內容仍是一貫，仍有條理充實。今之研究，亦將由分而合，以期成一整體之佛教。言余素愿，乃在建立支那之那爛陀矣。

三、研究之所務。此宜擇要而談，又分兩端：

其一、要典。依余見解，必由唯識入門。故應誦習之籍，初為一本十支論，次為《掌珍》四論，次為《俱舍》、《成實》、《毗曇》，次為四《含》，次為四律五論。余有密典，重在事相，必明理相而後可習。

其二、要事。讀要典竟，應做以下各事：（1）經論異譯比較。舊譯不必盡誤，仍有所本，仍有其學問。如《楞伽經》，由會譯比較，乃見舊時魏譯最好。又有翻譯經久不得定本者，則須參互考訂以定之。此為吾人應做之事，凡不能翻譯者，尤宜肆力于此。

（2）藏梵未譯研求。此有賴于翻譯。

（3）密典純雜考証。又咒印匯考。由此乃能習密宗。

（4）律典各部比較。由此可見各派異同，又可改正舊行各律之不合佛製者。

四、研究之方法。此宜知四入，四忌。

四入者：（1）猛入。此如數百卷書之一氣連讀，又如任何種類之取裁，不分晝夜之思，又如空宗之般舟三昧。教中蓋有如此猛晉之事，未可忽視也。

（2）徐入。此謂融貫、浸潤、結胎、伺鼠、湊拍、節取，而後有生發。

（3）巧入。此有反証、借徑等法，三藏十二部皆反覆申明之言，而能入之法不一。如佛法本甚莊嚴，宗門之悟道，乃向青樓浪語中得之。

(4) 平入。此謂循習而純熟。

四忌者：(1) 忌望文生義。(2) 忌裂古刻新。(3) 忌蠻強會違。(此謂泥古不化)
(4) 忌模糊尊偽。(如華嚴學者之尊《起信論》)

次言研究人。有四者：一、研究之因力；二、研究之可能；三、研究之緣助；四、研究之興趣。

一、研究之因力。平常但言求離生死，因猶不真。今謂另有二語曰：親証法爾，大往大來。証法爾即發菩提心，所謂菩提心為因也。大往來即大悲，所謂大悲為根本也。因須通盤打算，而後有力。因謂依，是人依我，非我依人。因又謂自，仗自不仗人。所謂法爾，即自也。萬法皆由法爾緣起，故有力能生。儒家亦有知此理者，如象山雲：六經皆我注腳。佛學亦然，從親証法爾下手，則十二分教皆我注腳。毗盧遮那頂上行，禪宗境界亦不過爾爾。

大往大來，由于信得因果。因果須合三世觀之。業有生受、現受、後受，不能拘拘一生以談因果。信此，則得大往大來。此雖老生常談，然今之學者不于此致意也。學者如以信因果心為根本，聞熏亦可依恃，不定須念佛等。此非反對彼等法門，但于此見出因力不退之理。《大論》有雲：自因力不退，可以為因，他力加持力皆退，但可為緣。故求不退，應熏因力大往大來，時間則三無數大劫，空間則大千沙界無量眾生，以他為自而思及眾生，此特擴而張之，即是因力，前所雲挾法界以俱來也。此是大悲為本，是真佛學。

二、研究之可能。此謂六度，乃為自憑藉者也。

(1) 布施。無我歸命為布施。不留一毫私用，將此身心奉塵刹，乃有力量，孟子所雲能盡其才者也。佛希望人皆盡其才，皆以出世法為目標而歸命。

(2) 持戒。此就可能為言，製之一處，事無不辦。戒如馬桴，馬受桴則力強而行速。學亦以戒為方便，而後有可能。吾人經驗中亦有此証明。如作事不廢時光。日計不足，月計有余。但亂念極耗歲月，去亂念即是戒，此不可作陳腐語看。

(3) 忍辱。諦察法忍之為忍辱。諦察則有味。《易》雲：苦節不可貞，其道窮也。有味乃不窮，乃有生發，觸處洞然，而後能耐。又道理一種涵萬，必細察乃省。前雲四入之徐入，與此相應。

(4) 精進。此是能力根本。佛力充足，全在精進。如世親治小乘則由有部而經部，而《俱舍》。繼而舍小入大，則又先法相，而後唯識。健行不息，此最能精進者也。精進為因，般若為果，般若為相為體，精進為可能為功用。又般若為總相，精

進為條理。故佛智骨髓在此。空宗貫六度以般若，相宗貫六度以精進，即是意矣。

(5) 禪定。畢生定向無他志，是為定。

(6) 智慧。此應注射于無師智，自然智。此雖非當下可得，然應隨順，趣向，乃至臨入。讀書多聞，尤須于此致意。

三、研究之緣助，有三：

(1) 指導門徑。欲學之省時省力，不可無師，不可我慢。然今人時習甚重，每每趨向無師。另有顛固者流，如天台家解說《梵網》四十二輕曲為說法一戒，以為不可為在家人說，在家無師範故。此則限制師道于極小範圍，心地何等狹隘！後來太賢即引《纓絡》夫婦可以互授之說而駁之。《纓絡經》雖待考，然此駁固是。依《大論》所說，比丘可在在家人邊學，故維摩為文殊說法。如天台家言，此又謂之何？可知其說或出于我慢耳。凡指導學者門徑者，不限出家或在家。師義亦有三類：圓滿師，分証師，接續師。不知接續師，即不能擔任，即是輕法犯戒，極宜慎之。

(2) 問辨釋疑。此乃朋友之事，因其能委婉曲折而盡之。

(3) 多籍參考。或乃求師友于古人，或聞時論于異域。

四、研究之興趣。研究須合眾，離群索居，則無生趣。故研究此學：(1) 須朝夕之過從。(2) 須風物之怡快，以暢天機。(3) 須有暮鼓晨鐘之深省。具三事，而後興趣勃勃也。

民國十三年（1924）九月第八次研究會講演記錄

（選自《內學》第二輯）

支那內學院院訓釋釋師訓第一

訓支那內學院。舉四句：曰師，曰悲，曰教，曰戒。次第釋之。注

作師一

有出類拔萃之物類，固應有出類拔萃之人類，即應有出類拔萃之思想，出類拔萃之先覺，與夫先覺覺後覺之事，而師之為物以立。識與識皆充法界，皆相梵網，故人與人、人與有情、有情與人、有情與有情，皆相系屬，皆相平等，性分質分，莫不皆有師之為物者在。充人之量，充有情之量，天地合其德，日月合其明，四時合其序，鬼神合其吉凶。充人之量，充有情之量，剎剎塵塵，法界法爾，位之育之，無余而滅度之。是故人之所以為人，有情之所以為有情，莫不皆有作師之責者在。佛者第一義也，師者第一義也，今而欲作師，是之謂作佛。菩提心者第一義也，師者第一義也，今而欲作師，是之謂發心。果之胎孕曰因，因之產生曰果，其為物不二，但厚薄、堅脆、濃淡、終始之差別。第一義之果必本于第一義之因，第二義之因不可得第一義之果。作佛即作佛耳，發心即發心耳，作師而已耳。索食而蒸沙，需潤而陽燄，東的而西矢，北轍而南轅，是故不能。

今天下荒亂矣，推根究極，豈不曰但知有己都不負責之由致耶？夫此但知有己都不負責，又誰實使然耶？澡發讀書，天壤名立，國人師友，新知舊習，冉冉悠悠，寒暑數十，曾不聞詔之第一義，告之以作師。有英挺之姿，凌霄之志，曰古之人，古之人，非斥大慢，即目狂馬十矣。嗟乎冤哉！此慢若狂，毗盧遮那頂上行，宗門何為贊之？爾見甚輒禮拜，又何為斥之？且孔子又何為惡鄉愿而思魯之狂士哉？（今時有謂聖經深理，不適孩提，當廢讀經。嗟乎冤哉！並此冥種而亦蕩然，有死之極無生之氣矣。）反覆沉錮，誰能超然？非無奇士，不甘隨同。然而第二義之因，終不得第一義之果。神明潛蟄，劣菌彌密，徐而移之，回而旋之，終亦必止知有己都不負責而已矣。

又學佛者誰不曰難行苦行，而奈何不曰作師？師者第一義也，難苦第二義也。無所謂難，而後乃能行難，變魚飼虎，稱鷹炙鹿，夫亦晚食安步而已耳。無所謂苦，而後乃能行苦，熱鐵洋銅，青蓮赤蓮，夫亦操縵安弦而已耳。苟作師也，唯曰眾生，念念眾生，悲之所至，無所不至。月在上方，清流濁流，容光等照。如或不然，已視為難，況能行難；已視為苦，況能行苦？僻執舛戾，終以自敗，何足道哉！

難者曰：師者第一義也，若是，則參第一義已耳，何為獨作師？

曰：覷破無明，麟角一人，弘法傳燈，菩薩度眾，宗門澈悟，不少大機，然多獨覺。是故大乘不舍眾生，作師第一。

又難：作之君，作之師，不舍眾生一也，何為獨作師？

曰：能為師，然後能為長；能為長，然後能為君。故師也者，所以學為君也；然君也者，所以學為師也，十王大業，天人師果。由前而言，于師取資；由後而言，于師為的。唯世、出世，胥應作師。嗟乎！天下同心，曷聞斯語，投袂而起？語在《華嚴》：菩薩摩訶薩，常生是心，我當于一切眾生中為首，為勝為大，為妙為微妙，為上為無上，為導為將，為師為尊，乃至為一切智智依此者。語在《瑜伽》：善男子，善女人，見諸濁惡眾生，十隨煩惱之所擾亂，能發下劣聲聞心者，尚難可得，況于無上正等菩提？我當發大菩提心，令此惡世無量有情，隨學于我，起菩提愿。

求師二

發愿作師，實踐作師，乎尚矣。而乃不知師有其真，作有其法。蒼莽孤特，艱苦卓絕，神之不寧，心之不平，唯私唯隘，唯亂唯慢，大愿奇難，複溺而陷，豈不冤哉？以是因緣，作師方便，求師第一。師有二義：一、法爾義；二、善巧義。

法爾義者：凡物滋生，法爾有因，法爾有緣，緣至而因通，緣慳而因塞。孤特無枝，安能扶蘇；錢芟夷，誰若待時；徒涉萬裡，何如舟車？荒漠之指南也，迷茫之洲渚也，歧途之向導也，險道之商主也，智慧之于師也，一也。因由自辦，緣必依他，唯先德之他，與同法之他，均足以增上也，一也。

善巧義者：生滅陰陽，苦樂羶良，恩怨憶忘，過現未來，支配迭相，若是者為史事，為言文，為思想，而皆謂之有漏。史事不獲現，言文不可道，思想不能到，絕對不待，唯証乃會，若是者謂之無漏。夫所謂學者，亦史事、言文、思想已耳，不現、不道、不到之境，烏乎能入？學之徑絕，入之術窮，徘徊狐疑，邪見叢起，不忍世間有無漏事。嗟乎冤哉！思想者，獨一無二之物也，天下若有超思之軌，不許超軌之思；既許超軌之思，胡乃不忍世間有無漏事？然而徑絕，然而術窮，望而不能即，思而不能由，其奈之何哉？絕而能融，窮而能通，不謂善巧，豈可得乎？漏但當陽，無漏但藏，非謂眾生無無漏種。既有其種，必得其顯。天下有不可親而引之以同類者，陽燧方諸火騰水液是也。天下有不能真而引之以相似者，嘅頤而鳴嚶鳥出林是也。師能聖言，聖言者，無漏之等流也，是之謂同類之引。師能施聞，受聞者，無漏之托變也，是之謂相似之引。初但隨順，浸假相似，浸假臨入，浸假而無漏當陽，漏種潛藏。于斯時也，不謂善巧豈可得乎？師有二義：法爾，善巧。實踐作師，學道歸命，而不求師，豈可得乎？

難者曰：後佛師先佛，先佛師誰佛？心、佛、生無差，不妨我作古。

曰：事無其前，自我作古；古既可因，何勞虛牝？文史不用而遞亢十

結繩，圖籍不探而乘槎通漢，是之謂不知類。

又難：世無孔子，不應在弟子之列；世不出佛，誰可為師？

曰：依法不依人，雪山半偈，羅刹可師，《纓絡》十無盡戒，夫婦六親互為師授。無常迅速，長劫孤露，不應我慢，焦種滅祜。

又難：大丈夫事，超祖越佛，理非佛專，我亦佛說。

曰：諸法法性，若佛出世，若不出世，常住不異，四十九年未說一字。爾若証真，說亦無說，無說已同佛說，誰為超佛？有說尚異佛說，況能超佛？今日且謀証真，固應借徑佛說。嗟乎！天下同心，曷聞斯語，投袂而起。語在《華嚴》：菩薩爾時作如是念，我以一句佛所說法，淨菩薩行故，假使三千大千世界大火滿中，尚欲從于梵天之上投身而下，親自受取，況小火坑而不能入？語在《華嚴》：善男子，若欲成就一切智智，應決定求真善知識，勿生疲懈，勿生厭足，皆應隨順，弗見過失。時善財童子一心憶念，依善知識，事善知識，敬善知識，于善知識起慈母想，于善知識起慈父想，得聞法已，歡喜踴躍，頭頂禮足，繞無數匝，殷勤瞻仰，悲泣流淚，辭退南行。

師體三

師以知見為體，不以得果或但儀式為體。此中理者，《攝大乘論?入所知相》：多聞熏習，如理作意，能悟入者，決定勝解資糧菩薩。若師得果，不能淹貫，而唯顯通，求法弟子從何得聞？聞既無得，憑何作意？意且誤作，安能勝解？若唯儀式，色見聲求，尚行邪道，衣冠優孟，寧容相應？是故《法苑義林》引《十輪經》雲：若無初三沙門，必不得已污道中求，其有破戒而不壞見者，親近承事聽聞法要，若破見必丘誑惑有情，令生惡見，師及弟子俱斷善根，當墮地獄。如是死尸脹爛臭，若與交游共住同事，臭穢熏染，失聖法財。壞戒有見，因得續戒，善根既斷，戒亦隨無，故唯知見是天人師。

此中教者，《妙法蓮華》：諸佛世尊，大事因緣，出現于世，開示悟入，佛之知見。《大涅槃經?四》：諸佛所師，所謂法也。《瑜伽師地》，說有三師，亦主知見：第一大師，所謂如來立聖教者，開許製止一切應作不應作故；其二紹師，第一弟子如彼尊者舍利子等，傳聖教者；其三襲師，謂軌范師若親教師，若同法中能令開悟、能令憶念隨聖教者。紹師、襲師，時時教授教誡轉故，當知三師能說傳說及隨說故。

師以知見為體，理亦如是，教亦如是。淪知見，求以是資，教以是師。是故《顯揚聖教》成就十事，名說法師：一者、解了法義，六法十義善解了故；二者、能廣宣

說，多聞聞持，其聞積集故；三者、具足無畏，法不傾動，複何所畏，于刹帝利大眾等中，聲不嘶破，汗不流腋，念無忘故；四者、言詞善巧，語工圓滿，八分成就故；五者、法隨法行，不唯聽聞語言為極故；六者、威儀具足，說正法時，手足不亂故；八者、勇猛精進，聞未聞法，常樂不疲故；九者、說法無厭，常為四眾，廣長宣說故；十、具足忍力，訶責輕蔑，不報不戚故。若為師者，具有知見，能如《顯揚》十事而行，則能使人踴躍歡喜，則能使人有所悔悟，則能使人當下發心，則能使人即贖慧命。

師道四

師體曰慧，所謂知見。師道曰悲，所謂為人之學，充人之量，天地合其德，日月合其明，四時合其序，鬼神合其吉凶。天地不隅，日月無依，四時不拘，鬼神無私，合天之人，複禮克己。是故學亦是為人之學，教亦是為人之教，師亦是為人之師。是故教人，《大學》曰：古之欲明明德于天下者，教人為仁之方曰：己欲立而立人，己欲達而達人，一言而可以終身行之，曰其恕乎？己所不欲，弗施于人。孔家師道有如此者。

胎、卵、濕、化，色、想、有無及與俱非，我皆令入無余涅而滅度之，無或人、我、眾生、壽者，盡未來際，利樂有情。發心以前，舉足下足，當愿眾生；發心以後，展轉善根，回向眾生。必使眾生無慳無貪，必使眾生慈悲喜舍，必使眾生佛之知見，必使眾生放大光明。眾生廣大至何境界，修証淺深至何位次，眾生盡佛已乃是佛，眾生是棄是為自棄。是故種姓初殖止是眾生，極果終圓止是眾生。三世諸佛，為師之道，有如此者。

道之不明也，自私自利以為學，攘奪壓迫以為政，而其所以為師者，解惑授業而已。有何道之能傳？而其所以為業者，衣食住為業，發展維持強權為業，物質為業，人生日用支配為業。而其所以解惑者，解其業所不通而已。今夫數十周寒暑，數千年史事，數萬裡方軌，數千百群團體，誠不足宥人之思，充人之量。天地之大也，人猶有所憾，孔家此言，何曾六合以外置而不議者哉？因果範圍伊誰能立，而必展轉根據不許超逾？以是而學，以是而教，盡大地人滔滔皆是。往哲有言：師道立則善人多，善人多則國理。蓋自自私自利之學興，攘奪壓迫之政行，而師道亡矣。

辟謬五

不得已而立教，不得已而製學，不得已而作師，皆非本然，無非方便。律不許說出家過，何以《涅槃經》維持比丘付諸國王、大臣、長者、居士？佛法寄于聲聞，何以《涅槃經》大經獨付囑諸菩薩？修行必離門+貴芮，何以《維摩詰經》：父母不許出家，發菩提心即是出家？羯磨凜遵無違，何以《善戒經》中：像前受戒，得果成佛，同歸一致？法通，

而窒之奈何；法廣大，而隘之奈何；法超，而範圍之奈何；法唯一不二，而歧之奈何；法有其意，而跡象求之奈何？非僧不許為師，非出家不許為僧，種種封畦，創為異議，執之不移，遂使大教日即式微凌夷，至于今日也。嗟乎冤哉！當揭至教，開示群迷。

一、唯許聲聞為僧，謬也。

《摩訶般若波羅蜜經》雲：我得阿耨多羅三藐三菩提時，以無量阿僧祇聲聞為僧。又雲：我當以無量阿僧祇菩薩摩訶薩為僧。龍樹《智論》釋雲：釋迦文尼佛、千二百五十比丘為僧，無別菩薩僧。彌勒菩薩、文殊師利菩薩等，以無別僧故，入聲聞僧中次第坐。有佛為一乘說法，純以菩薩為僧。有佛、聲聞、菩薩，雜以為僧，如阿彌陀佛國，菩薩僧多，聲聞僧少。按此經論，有菩薩僧，有聲聞僧，有聲聞、菩薩雜僧，非唯許聲聞為僧。釋迦會上，無別立菩薩僧，然次第入中坐，則亦僧類而已。又《首楞嚴》三卷，釋迦于一燈明國無有聲聞、辟支佛名，但有菩薩僧，是則釋迦會上唯聲聞僧，亦不可得而執矣。

二、居士非僧類，謬也。

《法苑義林章》有一類師，引《十輪經》：若有成就別解脫戒，真善異生，乃至具足世間正見，彼由記說變現力故，能廣為他宣說開示諸聖道法，名最下品示道沙門。而釋之雲：依彼經說，真善異生持別解脫戒，具足正見，說聖道法，名為示道，真實三寶通異生類。其有異乎此者，則駁之雲：內理無諍，外事和合，可名僧寶，設非沙門而住聖道，理無諍故，得名僧寶，與諸沙門種類同故，其非沙門，但住戒見，于理非和，雲何名僧？按此經論，居士雖非正僧，而得許為僧類，諸師皆同，但後師主得果居士，前師則主正見居士，稍有區別而已。然《涅槃》第六：聲聞之人雖有天眼，故名肉眼；學大乘者雖有肉眼，乃名佛眼。則知我佛所重，乃又在于正見也。正見所披，雖非無漏，隨順無漏，趨向無漏，是亦無漏。是故有人出世，具煩惱性，與四沙門果同列四人，佛勸迦葉，舍命供禮，見《大涅槃經》第六卷。

三、居士全俗，謬也。

異俗為乘，三乘者，菩薩、緣覺、聲聞也。在家居士授菩薩戒，發菩提心，六度四攝，雖非入地，稱菩薩乘。《報恩經》中：鹿女夫人、五百太子修道得果，不從師受，名為獨覺，有多同行，名為部行，如上二界六欲天等，二果四果無出家像，此為居士稱獨覺乘。《雜阿含經》三十三：在家得三果。《優婆塞戒經》：優婆塞得三果。《俱舍》：雜心比丘尼得二果，四眾得四沙門果，然值無佛世，亦在家得四果。《俱舍》二十三：預流至七，有逢無佛法時，彼在居家，得阿羅漢果；既得果已，必不住家，法爾自得必丘形相。《大智度論》四卷：四眾盡漏通名聲聞，此為居士稱聲聞乘。按此經論，大小俱許在家三乘，豈其披剃缺緣，但認跡形，屏為全

俗？

四、居士非福田，謬也。

智者疏《梵網》第四十三：無慚受施戒，在家未當，田任未製。執不知權，遂謂居士絕對不田，不應化緣。然《首楞嚴經》，文殊答言：有十法行名為福田，如須菩提無諍三昧，為諸聲聞、辟支佛中第一福田；能十法行，佛菩薩中第一福田。《集一切福德三昧經》：若善男子、善女人，欲集一切諸福德者，當發無上正真道心，有初發菩提心者，則能得一切福德三昧。三法布施，四法布施，持百福相為大福田，養育一切諸眾生等。《法苑義林》：異生戒見，能生物利，是真福田，非僧寶攝，無聖道故，福田義廣，寶義局故。維摩居士，妙香世界分衛佛食，還作佛事。勝軍居士，德重智高，時人不敢斥尊，德號曰抱跋迦，此雲食邑，以其學業有余，理當食邑。按此經論，在家發菩提心，是大福田，在家戒見，亦真福田，在家弘法，理應得食，雲何居士不為福田、不應化緣？

五、在家無師範，謬也。

智者大師為護比丘住持，權說在家無師範義。若遂執為真實，則有自教相違過。《梵網》卷下，第十八無解作師戒、第四十揀擇受戒戒、第四十一為利作師戒，智者所疏，三眾在家無師範義，不為彼製。然義寂不許，俱據《纓絡》夫婦六親互相為師，並及其理，辨駁無余，著述具在，是故有過。晉譯《華嚴》、魏譯《十地經論》：菩薩常生是心，我當于一切眾生中為師為尊，而下文乃說若欲舍家雲雲。又說菩薩于一切眾生生師心、大師心，眾生常為無明所覆，我應令彼無障淨慧。《瑜伽師地》：善男子，善女人，乃于末劫濁世眾生發菩提心，令此有情隨學于我。《唯識述記》：世親時人有火辨者，形雖隱俗，而道高真侶，釋此本頌稱十論師，勝軍居士亦稱論師。按此經論，非唯比丘乃即稱師，居士雖賢必不可師。

六、白衣不當說法，謬也。

白衣高座，比丘下立，不合儀式。若非高座，雲何不可說法？釋迦會上，眾多在家宣助闡揚，佛時贊嘆，雲何白衣不當說法？王舍城中，陀婆羅善守十六而皆住家，毗耶離中寶積王子，瞻波國中星得長者子，舍婆提國導師居士，彌梯羅國那羅達婆羅門。是諸白衣，非為持一佛法輪故發無上心，乃至非為持不可說三千微塵佛法輪故發無上心，盡教一切十方眾生，說法無希望，巧說因緣法，無數億劫說法巧出。

《大智度論》歷歷詳敘，處處經中不少此類，皆足取據，雲何白衣不當說法？智者大師疏《梵網經》，于四十六說法不如法戒中言，在家不全為法主，止說一句一偈，不如法亦犯。諸不善讀，執而不通，謬倡[/言]言，在家白衣于法止說一句一偈，非為法主不可說法，三藏十二部遂錮一隅，漸積陵夷，誰之過歟？

七、在家不可閱戒，謬也。

《瑜伽師地論》四十，即《善戒經》、《地持論》同本，言或是在家或是出家，先于無上正等菩提發弘愿已，當審訪求同法菩薩羯磨受戒，如是菩薩，若在家品，若出家品，住律儀戒，有其四種他勝處法、四十三種有所違犯。其第二十五不許學小戒，若諸菩薩安住菩薩淨戒律儀，起如是見，立如是論，菩薩不應聽聲聞乘相應法教，不應受持，不應修學，菩薩何用于聲聞乘相應法教聽聞受持、精勤修學？是名有犯，有所違越，是染違犯。又第八戒，如薄伽梵于別解脫毗奈耶中，將護他故建立遮罪，製諸聲聞令不造作，菩薩于中應等修學無有差別。聖典煌煌，大應學小。奈何在家發菩提心受菩薩戒，不應詳閱比丘戒律？有古大德發如是論：在家閱戒，于小為犯。然若精熟用化有情，雖有違犯，淨而非染。如是清淨，犯亦無礙。是等圓通，最堪崇敬，吾于密部，亦如所雲。

八、比丘不可就居士學，謬也。

《瑜伽師地》八十九：複次，心清淨比丘有五種法，多有所作。一正教授，謂有三種正友所顯：一者大師，二者軌范尊重，三者同梵行者及住內法在家英睿，如是名為三種正友，諸有志者從彼應求積集善門真正教授。《華嚴?入法界品》：稱善知識比丘五人，尼一人，長者十一人，優婆夷四人，婆羅門二人，童子四人，童女二人，女二人，王二人，夫人一人，仙人一人，外道一人，船師一人，神十人，天一人，菩薩五人，一一請求，殷重授受；雲何比丘不可就居士求學？觀音六字大明傳于居士，舍利弗等不二法門聞于文殊及維摩詰，玄奘法師唯識法門，五天獨步，此土創垂；然其就學，乃在勝軍居士一年有余，載《慈恩傳》，可細披尋。雲何比丘逞其封固，棄甘露味，自絕生途？尚慎旃哉！慧命摧殘，何嗟及矣。

九、比丘絕對不禮拜，謬也。

《涅槃》第六，佛告迦葉，若有建立護持正法如是四人，當舍身命而供養之。即為說偈：有知法者若老若少，故應供養恭敬禮拜，猶如事火婆羅門等，亦如諸天奉事帝釋。迦葉問言：若護戒長宿從于年少，若護戒年少從破戒長，若出家人從在家人，禮則犯戒，不禮諸人，此偈虛妄。佛告迦葉：善男子，我為未來諸菩薩等學大乘者說如是偈，不為聲聞弟子說也。是故《華嚴?入法界品》：求菩薩行，不問僧俗，既聞法已，頭面禮足，繞無數匝，辭退南行。是故德光論師求法睹史，見彌勒尊非聲聞像，而不禮拜，終不得聞。比丘不拜天子，理也；比丘不拜善知識，非理也。必執一說而固守之，亦小乘人毫無悲心而已。

十、比丘不可與居士敘次，謬也。

《大智度論》：釋迦會上，不別立菩薩僧，菩薩入聲聞中次坐。《梵網》第三十八

乖尊卑次第戒，先受戒者在前坐，後受戒者次第而坐。義寂法師注敘三義：一、師但受菩薩戒為次第；二、師未受菩薩戒，比丘坐菩薩下，若受，比丘依舊夏，不依新定；三、師不問聲聞、菩薩差別，但先受戒，即在前坐，文殊、彌勒入聲聞眾次第坐故。然太賢謂和尚雲，據實菩薩雖是在家，坐于聲聞大僧之上，如《阿世王經》雲：文殊雲迦葉上坐以耆年故。（三義。）迦葉讓言：我等在後，菩薩尊故。一義。舍利弗雲：我等亦尊，已發無上心故。（二義。）迦葉雲：菩薩年尊，久發心故。（一義。）故文殊所將二千在家在前而坐，迦葉等五百聲聞在後而坐。又《阿世王經》：迦葉與五百比丘入城分衛過候文殊，文殊著衣，謂迦葉前行，我今從後；迦葉、文殊辨論要義，卒復文殊在前，諸在家菩薩隨中，聲聞悉從在後，便俱向道。按此經論，諸所爭者，在前在後而已，豈謂出家在家不可入中，不應敘次？

上來諸謬。就居士品邊合並而觀，非僧類，非三乘，非福田，非師範，不應說法，不應閱戒，乃至不可入比丘中行坐敘次。但應奉事唯謹，一如奴仆之事主人，壓迫不平等，乃至波及慧命。而為居士者，謙退又退，無所容于天地。嗟乎悲哉！情形若此，遑冀清超特達，行毗盧頂，干大丈夫不可思議、不可一世作佛大事！

就比丘品邊合並而觀，不廣就學，不拜善知識，不與人同群，間有參訪，如不得已，忍而獲求，行將速去，外順同行，中懷慢志。嗟乎諛哉！買菜乎，求益也；攫金乎，宋人之盜市也。佛法封于一隅，一隅又複自愚，顛慢日熾，知識日微，又烏能續法王事，作諸功德，盡未來際！迫不得已，發沉痛語，應亟醒迷，翻然易趣，不應生誤，謂虐謂鄙。

哀亡六

君所不臣于其臣者，當其為師則弗臣也。《大學》之禮，雖詔于天子無北面，釋奠于先聖先師天子北面拜。事師無犯無隱，左右就養無方，服勤至死，心喪三年。顏淵死，子曰：天喪予；車以為槨。子路死，子曰：天祝予；食遂廢醢。孔子歿，三年之外，門人治任將歸，相向而哭，皆失聲，子貢築場，獨居三年，然後歸。數千余年至于趙宋，楊時事程頤，入室，頤假寐，時侍移晷，門外雪深三尺矣。由是觀之，師之尊也，師弟之際，情之至也，義之盡也，骨肉之無逾也。以是嚴厲，以是精神，以是懇惓，雖造天地，鑄宇宙，不難也。

楚元王禮師設醴，王戊即位忘設焉，穆生退曰：王之意怠，不去將鉗我。已而申公白生果胥靡，衣赭衣，杵臼碓舂于市。嗟乎冤哉！師無其道，猴沐而冠，潮流所趨，又易以藝，梓匠輪輿，計功而食，販夫鬻婦之場，叫囂爭斗不止，陵夷至于今日也，尚何言哉，尚何言哉！

孔氏世間學，人道義。天地者人生之本也，先祖者人類之本也，君師者人治之本也。故禮有三本：上事天，下事地，尊先祖而隆君師。佛則不然。世、出世學不獨一

道，有色無色、有想無想、及與俱非，我皆令入無余涅槃而滅度之，故唯一本，謂天人師。慧命者，天地所不能生也。無漏者，先祖從無其類也。無礙者，君師所不能治也。從佛口生，從法化生，故止一師，非尋常師。斷臂焚身，無與其恩，繼志述事，乃稱佛子。故夫學人，止有誓愿，止有求善知識，止有念念眾生。阿耨多羅三藐三菩提心，師以是貽資，資復以此貽資。今也不然，師不必賢，弟不必學，唯衣食住以續以嗣，養父假子雲百世。大廈已傾，言亦曷濟，悠悠蒼天，奈之何哉！

支那內學院院訓釋釋悲訓第二

體相一

悲者，法爾如是，自然而具，現成不求，固有不後，盡人能由，而不知其所由。有悲者，有情；無悲者，頑冥不靈。有悲者，含識；無悲者，木石，無想外道無六識，不害心法長夜淪失。有悲者，有用；無悲者，無功德。有悲者，有生趣；無悲者，焦芽敗種，萬漑不殖。有悲者，不住涅槃；無悲者，沉空趣寂，斷滅而醒醉。法界之所呈，世界之所成，一悲之流行而已矣。智者隱也，悲者顯也。隱固須研索，研索而有得則樂。顯不待研索，証而得，不証而研索，終日睽隔。談虎而色變，固有異乎眾人之所畏者矣。請言其相：有悲惻，有悲切，有悲迫，有悲淒。

何謂悲惻？天氣上騰，地氣下降，天地不通，閉塞而成冬。疾雷動，震驚百裡，百谷草木皆甲坼，悲亦如是。一惻然，而天地萬物之情周洽旁皇，淪肌浹髓矣。足奚不語，頭奚不履，百骸五官各封其域，老死不往來，終古不相襲。然有脈絡，速于置郵，捷于響應。牽一發而全身動，針一孔而周身痛，病一目而充滿其身，若無所容，夫乃謂之一體一身一人。悲亦如是。父子不同財，夫婦兄弟分崩離析，何況路人異國？凶年飢人相食，何況禽犢？一惻然，而我人眾生痛痒休戚，咸歸一致，達乎百為，貫乎萬事。天地以合，日月以明，四時以序，星辰以行，江河以流，萬物以昌。蠕動，草木金石，有情無情，以順以祥。悲惻之為用也，豈不大哉！

何謂悲切？踴如儀，五月居廬，而不見其瘠；三視兄子疾，而帖然竟夕；禮非不善也，執之且益其慢也。心脾之痛，纏而愈纏，無隙而他容，無情而異用。如箭而的趨也，如錐而下入也，三軍環列而無視也，赴蹈湯火而不知也，故唯悲也，有是切也。《地藏本愿經》：婆羅門女以母崇邪，時已命終，悼必隨業。晝夜哀戀，遂賣家宅，廣興供養，禮覺華定自在王像，自傷悲念：佛一切智，今日若在，必告母所。垂泣纏戀，久不能已。忽聞空言：念爾逾常，告爾母處。女則舉身投撲，支節損折，蘇有覺。續聞空言：爾但返舍，端坐思惟覺華名號。女如教行，一日一夜，忽到業海，諗母出獄。此業海者，二事乃到：一者、菩薩悲力；二者、眾生業力。此之所謂切也。《大智度論》：阿育王弟韋陀輸王，王閻浮提，上妙五欲。七日過已，阿育問言：所樂暢不？答言：不見，不聞，不覺。何以故？旃陀羅日日振鈴，唱：七日過，汝當就死。我聞是聲，雖王閻浮，上妙五欲，憂苦深故，不聞不見不覺。此之所謂切也。

何謂悲迫？空之至也，大地平陸，不得不沉。大浸之稽天也，九州下民不得不墊。劫火之兆也，金石不得不流，土山不得不焦。大風之揚也，巨木百圍不得不于喁，海不得不飛，山不得不移。悲之迫也，身命不得不施，人我眾生不得不夷，大位大富貴不得不棄。境亦為之奪，人亦為之奪。世界三千，動起踴震吼擊，六種十八相震動。是故那羅延力不如業力，業力不如愿力；愿力能有威力，由于悲力。

何謂悲淒？與樂之謂慈，拔苦之謂悲。苦何為拔？淒之象不可一息留者也。萬物自由暢遂，由有生意，生由于緣，緣由于集，集由于相應不相違。需火而冰至，需水而熱至，需空而塞至，需明而暗至，需盛而衰至，需稱而譏至，生意索然而自由剝矣。萬緣相違乃至法界全違，斯苦之至矣。差重而極無間阿鼻，差輕而極天下不如意事，皆淒之象，一息而不可留者也。然而生意暢遂，集苦之媒，生必有死，黑暗其妹，光明其姊。是故菩薩知苦之來，得苦之實，亦以為至淒之象，一息而不可留者也。是故拔苦之道不曰生意，而曰平等平等，遍一切一味；不曰暢遂，而曰涅槃靜寂。

悲之流行也，孔家得其惻，墨家、道家得其切，唯淒與迫，誰亦不能得。兼之而大之，又複不可思議者，菩薩行也。悲之體相如是，一產生妙有至強有力之母而已矣。

悲然後有眾生，有眾生然後有阿耨多羅三藐三菩提心，有阿耨多羅三藐三菩提心然後有大乘，有大乘然後有六度四攝，有六度四攝然後有一切智智，有一切智智然後有諸所分別。如或不然，悲則無有，而諸所分別則無源之流也，無根之木也，無的之矢也，無果之芽也，禽犢之言也，兒戲之行也，君子不貴也，有心人之所傷也。是故如來，若有請問菩薩菩提誰所建立，皆正答言：菩薩菩提，悲所建立（《瑜伽》四十四）。是故菩提心為因，方便為究竟，而大悲為根本（《大日經》一卷）。是故大悲是一切諸佛菩薩功德之根本，是般若之母，諸佛祖母，菩薩以大悲得般若，以般若得作佛（《大智度論》二十）。

差量二

有血氣之屬必有知，有知之屬必有悲。大鳥獸喪其群匹，越月逾時，反巡過故鄉，翔回焉，鳴號焉，躑躅焉，踟躕焉，然後乃能去之。小者至于燕雀，猶有啁之頃焉，然後乃能去之。此悲之發乎鳥獸者也。喪群落魄，冤幽孤孽，親亡戚離，國隕家索，變徵風騷，天地暗色，此悲之發乎人者也。凡若此者，局于一身，止于當境，以悲還悲，隨順天然者是也。不局于一身，不止于當境，一身之外必及其他，當境之余乃有施設，匪獨陶寫，匪任喪頽，極其莊嚴，盡其神力，則出世聖人一絕大事。《三昧海經》：悲者見眾受苦，如箭入心，如破眼目，心極悲苦，遍體雨血，而欲拔之。如此悲者有百億門，廣說如大悲三昧。茲總略說，有三種悲，如《無盡意問經》：一、眾生緣悲；二、法緣悲；三、無緣悲。

眾生緣悲者，以悲相應，恚恨怨惱一切都無，廣大無量善修其心，遍滿四維上下十方世界眾生，名眾生緣。是等多在凡夫行處，或有學人漏未盡行。

法緣者，破我相一異，但因緣續，生諸苦蘊，其法原空，眾生不知而欲除苦，愍之令除，為俗法故，名為法緣。是等多在漏盡羅漢、辟支佛行。

無緣悲者，不住有、無為，不依過、現、未，心無所緣，緣自不實，眾生無知分別舍取，乃以智慧令知法相，是名無緣。

是等悲相，但諸佛有。如給貧人，有是三等財寶真珠，三緣差量應如是取。《大智度論》：四無量悲名小，十八不共法悲乃名大。余人心中悲名小，佛心中悲名大。菩薩之悲視佛為小，視二乘為大。小悲觀眾生種種身苦心苦，憐愍而已，不能令脫；大悲憐愍，而能令脫。遍滿十方三世乃至昆虫，悲徹骨髓，心不舍離，眾生墮惡道，一一代苦，得脫苦已，欲樂、禪樂，悉令滿足，比佛大悲，千萬分中不及其一。何以故？世間苦樂，欺誑不實，不離生死故。《智論》又言：大慈大悲，乃不應如迦旃延法分別求相。諸師取用迦旃延法分別顯示，不應信受。迦旃延言：大慈大悲一切智慧，是有漏法，系法世法，是事不爾。大慈大悲，是名一切佛法根本，雲何乃言是有漏法、系法世法？

雖有難言：佛法本乎悲，如蓮出淤泥。然無礙解智一切法淨，一切習盡，悲亦應淨。

雖有難言：慈悲不能離眾生想。然唯羅漢不得眾生相取相而生悲，佛不思議，不得眾生相不取而生悲。

雖有難言：無漏淨智不緣一切，唯有漏緣。然非佛說，迦旃延說，有漏緣假，無漏緣真，故唯無漏方緣一切。

略述經論，了然朗然，不俟疏釋。抉擇取最，循而行之，是在有智。

威力三上

天下非人情，逾常理，最不可索解者：舍身飼虎、大地震動二事。身至寶也，舍至輕也；虎至殘也，飼至奉也；輕其寶而奉于殘，惑之甚；絕誕，不可以訓。至堅者大地，至脆者震動，乃堅而脆用，地厚載物，藐焉一身，渾然中處，烏獲舉千鈞不能舉其身，一人發愿而大地震？絕誕，不可以訓。然而釋迦行之矣，然而行之而釋迦矣！其要奈何哉？曰：此大悲之威力也。常見者不知也，貳偷者不能也，無悲者不足與談也。然而有情多悲，愿與談舍身飼虎義。略舉十義：

一者、舍身飼虎義，是唯一義。殺身以成仁，舍生而取義，一舉以為重，萬退而為輕。若舉鴻毛，泰山可輕，若舉蟬翼，千鈞可輕。以珠彈雀，以子治味，以國、以頭顱、以名、以業博嬉，不問其誰何，然能趨于一。此之所謂一者、拔眾生苦而已矣。

二者、舍身飼虎義，是決定義。身者危脆，決定不可留，不舍于今必舍于後，不舍

于功德必舍于死魔。虎者有情，決定依食住，強時自飼，羸時他飼，有物物飼，無物身飼，物勢屈飼，菩薩宏愿飼。眾生苦決定拔，無漏無苦，涅槃無苦，無漏其軌，涅槃其鄉。先其煩惱，次其寂靜。

三者、舍身飼虎義，是至極義。施王位，施妻子，乃至施腦髓心脾，是為施輪之極，身以外無有加于其所愛也。與有德與旃陀羅，乃至與虎狼惡獸，是為受輪之極，虎以外無有加于其所不愛也。皮船渡海，沉于一孔；千仞之堤，潰于一蟻；建立者不留隙，君子無所不用其極。中庸者至善，至善者事理當然之極，曰擴充，曰致，曰建極。亦何嘗極端為害、模稜中庸哉？

四者、舍身飼虎義，是快足義。俠士復仇，所志遂，所求得，死而含笑。菩薩拔眾生苦，眾生苦拔而快，菩薩自不得不快；眾生快而足，菩薩之快自不得不足；菩薩無自樂，以他樂為自樂故。

五者、舍身飼虎義，是無礙義。計較一礙，躊躇一礙，恐怖一礙，我愛一礙，深惡一礙，他阻一礙，無助一礙，痴憊一礙；舍身飼虎，諸凡障礙，一切皆除。

六者、舍身飼虎義，是不撓義。勝己不撓，能忍不撓，且談能忍。大象入陣，直沖不縮，能忍鼓聲、螺聲、角聲、大叫喚聲，能忍寒熱、蚊虻、毒虫、風雨、飢渴，能忍鋒鏑、弓弩、箭、戟劍、刀，如是能忍，則為有力，超勝一切，則可以語舍身飼虎事。

七者、舍身飼虎義，是平等義。自他不等，人畜不等，恩殘不等，順逆不等，受拒不等，生死不等，有空不等；舍身飼虎，一切平等。

八者、舍身飼虎義，但顧自義。但顧自愿，不問福田不福田故。又但顧他義，但顧他苦，不問堪任不堪任故。

九者、舍身飼虎義，是驀直義。驀直是現量，是本真，非鹵莽，非滅裂。何以故？愿夙植故，悲所驅故，精審于他日故。

十者、舍身飼虎義，是習成義。其力已充，其念能舉，其行能致，不于一佛二佛乃至已曾供養百千萬億諸佛故。

略敘十義，舉之而無上，揮之而無旁，敵之而無當，對之而無將，任其所行，恣肆縱橫，威力之至，有如此哉？悲之至于舍身飼虎也，豈不威哉！有舍身飼虎之精神，然後乃有為人之學。舍身飼虎，陳義如是。大地震動，應續而談。

妙善唯識，了知大地震動義，是法爾義，非奇特義，見分挾相，識識交網，此一義

也。本乎斯義，則知自所于自能，為挾帶相分，大地必為之變易；此所于彼所，為階上相分，大地亦為之震動，成住壞空，唯心所現，心淨土淨，此一義也。本乎斯義，則知吾愿若滿，而應有大地必見創成；吾愿正發，而已有大地固應震動。

妙善唯識，奧義絡繹，不能備舉。但取足喻，威力之差：一者、無情、有情，有情刺激飛鳥哀鳴、大獸狂趨；無情刺激大地震動。二者、堅固，流行，流行感變天地昏黃，災雹冤霜；堅固感變大地震動。三者、全體、一分，一分暴露，鄧林旋沒，蘇迷裂帛；全體暴露，大地震動。威力至于大地震動，無論有情無情、堅固流行、全體一分，斯亦絕對決定之至者矣。大悲威力非獨二事，諸佛菩薩種種威力非獨大悲，不及其余，亦足以觀而請止。

威力三下

威力義略陳一二，威力事不應缺如。十二部經本事、本生，雖不勝詳，然應述略。發愿以後，悲為先驅，舍身有力。入地以還，悲則增上，眾生能等。故應多聞熏習，長養種姓，振起悲愿，自在縱橫。爰錄藏中十有二事：菩薩人中舍身四事，為畜舍身敘其三事，菩薩畜中舍身四事，菩薩忍辱敘其一事。舍身固難，忍辱波羅蜜實為最難。

乃往過去，羅國王持七日糧，微服孤行，避難鄰國。還複入宮，抱太子須提膝上，夫人怪王神情離喪。王曰：汝不知耶？羅大臣殺我父兄，深仇即至，速行鄰國。向鄰有二道，王初孤往擬七日道，三人荒迷，入十四日道。道迂遠險難，無水草，食盡，無可奈何。王不欲並死無益，設方便，拔刀趨夫人。太子謂王：何處有子啖于母肉？應以子肉濟父母命。然不可殺食，易腐臭耳，應日割三斤，二分父母，一分自支。肉且盡而道未達，又複淨括余殘，于是太子獨不得前。新肉香，蚊虫食遍體，太子忍楚，發聲誓愿：宿殃此盡，後不複造，今以此身供養父母，濟其所重，愿我生父母得十一福。又以余身施諸蚊虻，皆使飽滿，我作佛時，愿以法食除汝飢渴生死重病。發誓愿時，天地六種震動，日無精光，禽獸馳走，須彌山王踴沒低昂，忉利諸天皆亦大撼。帝釋下化師子虎狼，張目[*或]，騰吼而來。太子微聲而言：欲食便食，何為作態？帝釋謝解，而問其愿。太子答言：我亦不愿生天作梵，愿求無上正真之道，度脫一切眾生，假使熱鐵輪在我頂上旋，終不以此苦，退于無上道；所言不妄，身體如本，血反白乳。即時如言，潰身平複。此為菩薩人中，割肉救父母事。

乃往過去，賈客眾行，夜迷邪徑，無依無歸，誰與光明，若天若神。外道仙人，于空林大澤草庵中住，聞是悲喚，而作是言：若我不救，虎狼、獅子、大象、野牛，心惱彼聲，來奪彼命。遂報之言：汝等毋呼，須與光明。疾以氈衣纏裹兩臂，以油遍灌，以火然之，光明徹林。時彼賈客甚為希有，時彼仙人悲心轉增，乃大發愿，愿得阿耨多羅三藐三菩提時，邪道眾生為作法明示正道行。賈客天明趨視仙人，仙

人以淨施因緣故，兩臂平複，瘡癥都無。此為菩薩人中，焚臂救賈客事。

乃往過去，佛為大力國王，設大施會，金銀寶物，奴婢象馬，恣人須求。提婆達多時為帝釋，化婆羅門來破彼施，不乞余物，但乞身分。王知是事，語婆羅門：與汝身分，截取持去。婆羅門言：得無悔耶？王言：不悔，四方來集，悉應令足。婆羅門言：今我一人，尚不充足，何論四方？王欺人哉！王即以刀自割其臂，與婆羅門。當割臂時，心平無異。以能棄舍一切法故，臂自平複。于是調達福盡，應墮阿鼻。如來威神之力，調達第一不知恩義，臨獄聞言，痴人調達，嗔恚于佛，橫起殺業，今當墮于阿鼻地獄。即時大怖，深生親好，作大聲音：我今惟以骨肉，一心歸命于佛，心即得樂。以是因緣，調達出獄，得生人中，出家學道，得辟支佛，號曰骨髓。此為菩薩人中，割臂勝施障事。

乃往過去，不流沙城，飢饉疫行。時王亦病，夫人拔摩，因出祠天。時有產婦，飢虛欲死，念無余計，唯有啖兒。心極悲感，舉聲大哭。夫人過而聞聲，既傷慘切，就舍而求得其情，倍複悼愍。語彼婦言：莫殺其子，我到宮中，當送爾食。婦人答言：夫人尊貴，或複稽忘，我命呼吸不逾時節。于是夫人便取利刀，自割其乳。便自願言：今我以乳，持用布施，濟此危厄，不愿轉輪天帝魔梵，愿求無上正真之道，度脫一切眾生苦厄。即便持乳與彼婦人。適欲舉刀更割一乳，應時三千大千世界為大震動，諸天宮殿皆悉動搖，無數諸天虛空悲泣，淚如盛雨。天帝問愿，夫人即誓：今我所施功德審諦成正覺者，乳當如故。即時如言，乳處平複。此為菩薩人中割乳救啖兒事。

乃往過去，尸毗國王得歸命救護陀羅尼，精進慈悲，視一切眾生，如母愛子。時世無佛，釋提桓因處處問難，不得斷疑，憂傷愁煩，沉索而處。毗首羯磨告有尸毗不久作佛，二天遂下，欲觀其真。毗首變鴿，帝釋變鷹，鷹急逐鴿，鴿入王腋，舉身戰栗，動眼促聲。鷹在樹言：還我所受。尸毗抗言：我先受此，我初發意時，受一切眾生而欲度之。鷹言：我非一切耶，而奪我食？王言：相當給食。鷹言：須新殺熱肉。王念殺一與一，何如割肉相易。乃

股持與。鷹言：輕重勿欺。王言：便持稱來。以肉對鴿，轉展不準。王割二股、兩、兩髀、兩乳、頸脊，次第肉盡，鴿重肉輕。王雖潰血模糊，欲人觀觸，敕勿安幔，攀稱而上，肉盡筋斷，不能自製，上而還墮。乃自責言：汝當自堅，奈何迷悶，一切眾生憂苦大海，汝今一人誓欲渡盡，此苦甚少，地獄苦多，以此相比，于十六分猶不及一。汝今獲有智慧、精進、持戒、禪定，猶患此苦，何解獄中無智慧者？王更攀稱，語人扶上，即時天地六種震動，大海波揚，枯樹華生，天降香雨，天女歌詠，鷹鴿還形，至心歸命，偈贊菩薩必得成佛。王心不嗔，潰身平複。此為菩薩人中，割肉救鴿事。

乃往過去，王子三人，波羅、提婆及與薩，游賞山林。波羅心念：今日怵惕，將無及難。提婆心念：身無足吝，愛別離苦，更複前行。果遇母虎，產生七子，才經七

日，諸子圍繞，飢羸將死。波羅乃言：哀哉此虎，必啖其子。提婆乃言：倉猝無求，唯有舍身。婆羅複言：一切難舍，無過己身。薩乃言：當懷悲利濟，空百千生，爛棄何益。各起慈心，淒愴傷懷，熟視徘徊，久之而去。爾時薩便作是念：我舍身命，今正是時。觀身不堅，于我無益，如賊可懼。若舍此身，則舍無量癰疽惡疾，百千怖畏。是身唯有大小便利，如泡虫集，血脈筋骨，節節連持，甚堪厭棄。我今于日，當使此身修廣大業，于生死海作大舟航，棄舍沉淪，長夜出離。我今應求究竟涅、無上菩提，定慧熏修，福德嚴密，獲微妙身，成一切智，拔眾生苦，法樂無極。爾時薩大勇弘誓，悲心轉增。更慮兄懼，方便遣離。獨至虎所，脫衣竹上，委身臥就。慈悲威勢，虎無能為力。即上高山，投身于地，複為神仙接足無失。即起求刀，又不能得。乃設方便，干竹刺頸，血涌淋漓，徐近虎邊，虎遂得食。是時大地六種震動，如風激水，日無精明，如羅障，天雨華香，繽紛墮墜。父母二兄，哀慟逾常，收殘起塔。此為菩薩人中，舍身飼虎事。

乃往過去，寶燈焰佛時，有千童子發菩提心，死為千梵王。複因辟支佛足現文字十二因緣禪思証果，又發大愿作佛度人，過此辟支百千萬倍，死為千聖輪王。千聖輪王至是修施，天樂天女，國家王位，一切棄舍，入雪山學道。各立草庵，端坐思惟，發弘誓愿，當度一切而求無上。宿世報故，山神供果，五通騰虛，壽命一劫。時雪山中有大夜叉，身長四十裡，狗牙上出高八十裡，面十二眼，眼出迸血，光過銅，持劍持叉住聖王前。高聲唱言：我今大飢渴。千王施果，夜叉怒詈：我父夜叉啖人精氣，我母羅刹啖心飲血，速施心血來！千王躊躇，夜叉為之偈言：觀心無相，四大所成，一切悉舍，應菩薩行。時雪山中有婆羅門，名牢度跋提，與聞此偈，獨至其前，白夜叉言：唯愿大師為我說法，不惜心血。乃脫單衣敷為高座，請夜叉偈。夜叉偈言：求無上道，受割截苦，能忍如地，不見受者；心不悔吝，普濟飢渴，如救頭然，應菩薩行。牢度跋提聞已，踴躍歡喜，將出心血，持劍刺胸。地神止之。牢度偈言：幻焰隨滅，響已不更，四大五蘊，勢不久停，千萬億歲，未為法死，勿障勝慧，成佛度汝。于是以劍刺頸，施夜叉血，即複破胸，出心與之。是時天地大動，日失精光，無雲而雷，有五夜叉從四方來，競裂食之，食已叫躍空中，而告王言：誰能行施如牢度跋提，乃可成佛。千王怖退，夜叉又為之說偈，乃默然住。此為菩薩人中，出心飼夜叉事。

乃往過去，雪山王邊有五百群象，中一最大，體貌可愛，多力多智，以為其主。高山險難，惟有一道。爾時獵師見此象群，夜于險處，大作坑坎，朝遂驅逐，向坑陷之。象見大坑，徘徊無計。時大象王急極智生，舍身橫坑，趁力作橋，五百群象，大踏其脊，次第而過。最後力盡，有一未渡，勢將墮墜，急持忍痛，遂得安濟。象王心喜，作勢踴跳，入其群聚。此為菩薩畜中，舍身殉群事。

乃往過去，鹿百為群，隨逐美草，侵入人邑，國王出獵，遂各分迸。鹿母懷妊，飢疲失侶，遂生二子，瑩悻墮，悲鳴不已。獵師見而心喜。鹿乃稽首陳言：即生二子，朦朧始視，未知東西，乞假須臾，將至水草，使得生活，旋來就死，不失信誓。

獵師驚怪不許。鹿說偈言：不能林藪，入應死，何惜腥身，但憐二子，雖昧人義，奈何虛偽，恩放不還，罪甚五逆。獵師悚然，乃自嘆言：可以人而不如鹿乎？痴貪欺殘，胡乃若是！便前解放鹿。于是鹿母至其子前，低頭吟舐，示好水草，一悲一喜，而說偈言：努力自活，世無久合，誤墮獵手，應就屠割。即便棄子而去。二子鳴啼，戀慕追隨，頓地複起。母顧命言：母為母子並死，然子悲號，俱至所。獵師憩臥樹下，驚覺而起，感鹿篤信，志節丹誠，釋鹿母子，乃具以聞王。國人咸感，遂廢殺獵。此為菩薩畜中，舍身殉信事。

乃往過去，有古彌勒，以《大悲海雲經》教人作佛。有婆羅門聞經發愿，入山千年乞食誦經，一心除亂。時連雨不止，洪水暴漲，仙人不食七日。時彼林中，有五百白兔，中一兔王，哀念仙人命不久留，法幢將崩，法海將竭，當令久住，不惜身命。即告諸兔：一切諸行，皆悉無常，眾生愛身，空生空死，我今欲為一切眾生作大橋梁，令法久住，供養法師，汝等宜各隨喜。諸山樹神即為積薪，以火然之。兔王母子圍繞七匝，白仙人言：今我以身供養仁者，為法久住，令眾饒益。即別其子，今後汝可隨意水草，系心三寶。兔子跪言：如尊所說，無上大法欲供養者，我亦愿樂。子即投火，母隨而入。即時天地大動，色界以上皆雨天華，供養菩薩。菩薩肉熟，樹神白仙人食。仙人悲不能言，以所誦經置樹葉上，因發誓心：愿我世世常不啖肉，乃至成佛，製斷肉戒。作是語已，自投火坑，與兔並命。是時天地六種震動，天神力故，金光晃曜，照千國土，國人蒙此光者，皆發阿耨多羅三藐三菩提心。此為菩薩畜中，舍身殉法事。

乃往過去，菩薩獨行，時有惡獸來奪其命。臨命終時，心發大愿，愿此死後，于空林澤中作大畜身，諸來食我，令悉滿足。所以者何？是諸惡獸常食小虫，多起殺罪，飢虛不飽，甚可憐愍。菩薩乘愿即作大畜，如是展轉百千萬億那由他世，若以一劫，若減一劫，悲心拔濟，作畜施食。又嘗為魚十二由旬，屠十二年，濟世飢饉。此為菩薩畜中，舍身濟飢事。

乃往過去，忍力仙人，受如是法不生嗔恨。惡意弊魔，遣巧罵千人，前後圍繞，惡口鄙穢，苦切備至，止時亦罵，行時亦罵，到聚落亦罵，入聚落亦罵，食時亦罵，食已亦罵。如是從座起，從聚落出，還至林間樹下，一一皆罵，如是坐臥經行，息入息出，常隨逐罵，凡八萬四千歲。又仙人入聚落時，屎灌其頭，著鉢涂衣，糞埽洒其頂上。忍力仙人，終不嗔恨，終不退沒，終不自言我有何罪，亦複不以惡眼視魔。千人至是，知不可壞，殷重懺悔，發生道意。所以者何？菩薩自念：我常長夜于諸眾生如父母想，愍其孤窮無有財物，往來生死險難惡道，愚痴無智，常盲慧目，誰能示救？惟我一人。若有眾生，惡口罵我，苦切責我，嗔我打我，我終不報。我應常與一切眾生拔究竟苦，施畢竟樂。我不應與一切眾生毫發惱恨。是諸眾生誰能忍者？則惟我能。是故，我今應學眾生無上忍法。此為菩薩忍波羅蜜事。

功德四

悲以功德而大，功德以智而成。不作功德，無所用其一切智智；不有其悲，亦無所用其功德。本乎大悲，而因于菩提，竟于巧便。是故功德者，悲智之寄命，悲智之橐籥，而菩薩之所以為行也。菩薩功德攝于十度，而精進遍于一切，則九度者功德之用，而精進者又功德之體也。何為精進？相續增上，是為精進。難行苦行，遍一切行，不思議行，是為精進。日月以續而明，四時以續而成。涓涓之滴，續成江河。青青之茁，續成尋柯。悲悲不已，續成薩婆若。

夫凡聖同情，悲惻皆生。不續則凡，續則成聖。而法相不住，念念皆新，若必相續，非寄命于功德則不可能。功德不住，亦頓起頓滅，若必相續，非寄命于精進則不可能。牽引而生後，觸類而通旁，展轉而增上，功德以悲力而益彰，悲力以功德力而益壯。三千大千自界現象，自界莊嚴，自界光明，則亦功德之為用，而精進之為體故也。五希奇，五不希奇，五平等，五饒益，五報恩，五欣贊，五加行，五無量界。是四十法中，觀其難苦，觀其普遍，觀其超特，必有一物，是率是行。是使悲與功德，大莫與京，充量過量，則亦功德之為用，而精進之為體故也。

《攝大乘論》：何故聲聞乘中，不說賴耶？以彼聲聞，不于一切境處轉故，雖離此說，然智得成，菩薩一切境處轉故，若離此說，不能証得一切智智。是故唯識學者，大悲之作具。大悲行者，唯識之作業。聲聞無悲，不生功德，用不藉于唯識。大悲菩薩，功德業宏，唯識則証，一切智智則成。十二分教、四諦、四道理、三乘，是為四施設建立。智之能施設也，龜毛兔角而有用也，是智之極也。蘊界處諦，無礙依資，覺分止觀，緣起一切，是為十善巧分別。智之能善巧也，迷謬重障，莫予毒也，是智之極也。有施設善巧之知，為一切功德之作具，何法不續，何行難苦而不遍滿非不思議？則亦功德之為用，而精進之為體故也。

十王大業，智增菩薩，不作鐵輪，乃至初禪，唯四下天，變易生死。悲增菩薩，則初地鐵輪，十地四禪，七地以前，一向分斷。此猶可爾，畢竟闡提但問功德，不問証期，誰能承此無果之為？難之又難，有地藏菩薩，眾生入地獄無有窮已，地藏菩薩住彼地獄無有出時。此一功德也，菩薩摩訶薩精進之尤也，聞之而可作也。取淨妙土，攝調白人，功德嚴成，悲盡未來，一千四佛，悉亦如是。獨我本師釋迦牟尼，取不淨土，攝不淨人。此一功德也，如來世尊精進之尤也，聞之而可作也。

乃往過去，寶藏佛世，轉輪聖王為阿彌陀，其千太子，觀音勢至，文殊師利，金剛智慧，虛空印，虛空日光明，師香普賢諸菩薩等。佛入三昧，現多佛土，或淨或穢，令各愿取。是等菩薩，皆取淨妙，離五濁世，無聲聞眾。釋迦本師，時為大臣，見于諸人取淨攝白，五逆十惡，三有四流，不淨惡眾，諸佛淨界所不能容，罪積如山，擯集娑婆，無有救護。乃白佛言：我今心動，如緊樹葉，心大憂愁，身亦憔悴。此諸菩薩雖發大悲，不能取此五濁惡世，令彼眾生墮黑暗痴。我當于此娑婆賢劫，壽千歲時，行菩薩道，生大悲心，調此罪眾，頭目血肉，難苦行施。我行六度，三世諸佛所不能及，為仙為兔，而皆舍命以應求乞。自初發心，乃至涅槃，有聞我名

，怪未曾有，攝彼邪眾，為植善根，于十劫中入阿鼻獄，受無量苦，畜生餓鬼，貧窮下賤，一一莊嚴。于其中間，不愿生天受諸快樂，唯除一生兜率成佛。壽百二十時，世界粗弊，我于是時証無上道。三乘化小，苦行化外，他方惡眾，來生我國，等一度化。其有犯重，一念悔已，即為受記。其有怨賊，出佛身血，大悲梵音，而為說法。誓愿五百，一一成就。又複我之所証，施戒聞思，悉與地獄一切黑眾。若有聞法開釋，而業未盡，我為代受而令生人。愿令我身大如須彌，數如刹塵，所覺苦樂一如今身，以此身代十方刹塵阿鼻眾罪而久其苦。是愿若成，此會大眾，唯除如來，皆當涕泣，贊言善哉。說是語已，彌陀座起，悲泣滂沱，敬禮贊偈。觀音以下，一一如應。

菩薩四法懈怠：一者、取淨世界；二者、調白眾中施作佛事；三者、不說聲聞、辟支佛法；四者、壽命無量。如是菩薩非猛健丈夫，非深重大悲，非方便巧慧，非平等善心。譬如華田，是乃雜華，非分陀利。

菩薩四法精進：一者、取不淨界；二者、不淨人中施作佛事；三者、說三乘法；四者、壽命不長不短。如是菩薩是猛健丈夫，是深重大悲，是方便巧慧，是平等善心。譬如華田，是分陀利，非彼余華。

唯我本師釋迦牟尼，是大精進，非是其余。唯我本師三十二相，是流血成，非祥善成。梵牙索目，堅牢乞耳，蜜味索手，盧志乞足，尼乾索陰，又複乞皮。肉山臂燭，應飢渡厄。施目如恆沙，施血如海水，施肉如千須彌，施舌如大鐵圍。又複舍耳如純陀羅，舍鼻如毗富羅，舍齒如耆崛，所舍身皮，如三千大千所有地殼。唯我本師，于無佛世，粗惡語言，怖化眾生，是余業故，世界弊惡。惟我本師，于無佛世，作夜叉像，怖化眾生，是余業故，菩提樹下垂証覺時，天魔波旬擾亂侵壞。唯我本師，于無佛世，唯攝黑眾，他國來生得度因緣，是余業故，說法會上立聲聞僧。

起悲五

誰不有悲性，誰不欲起悲度眾，名字遠聞？然無方便，悲不得起。悲不得起，或怖自苦而為聲聞，或破自惑而成緣覺。是故直往菩薩起悲第一。起悲方便，第一中之第一：一、多聞；二、清淨；三、不離眾生；四、發愿布種；五、修慈滋潤；六、多作功德；七、觀眾生苦；八、觀眾生倒惑；九、取相作觀；十、習以成性。苟能如是十種方便殷重不已，悲念不生，如來世尊則為妄語。

雲何多聞而起悲耶？智由悲起，悲亦由智起。悲起之智，能自抉擇，加行、根本及與後得，遂爾次第而成。起悲之智，數他珍寶，七事四理，深信不誣，遂爾知見有力，觸感根心。是故必得多聞，而後知苦真實；知苦真實，而後不同苦役；不同苦役，而後能觀眾生役苦以起悲。必得多聞，而後知法真實；知法真實，而後不同法執；不同法執，而後能觀眾生執法以起悲。若不知苦真實，則又不能代眾受苦；不

能代眾受苦，雖或能悲，乃亦不能念念相續；不能念念相續，剎那已滅，烏得謂其真能起悲？若不知法真實，則事有觸而應悲者，由衷而出，不免為世俗附庸；非由衷出，不墮于口惠之隨風，即墮于感情之躁動。凡若此者，又烏得謂其真能起悲？

雲何清淨而起悲耶？五百鹽車截渡，渾濁喪真，滄浪之清，物來必鑒。久氛塵鏡，黑暗冥頑，不染一埃，空靈照燭。感觸捷應之機，捫則失用，淨則精通，理固然也。是故物至而悲起者，清淨無穢之心境也。《大寶積經》：如是大悲，由于不諂而得生起，譬如虛空永出離故。如是大悲，由于不誑而得生起，從增上意而出離故。如是大悲，非由詐妄而得發起，從如實道質直其心而出離故。如是大悲，由于不曲而得生起，極善安住無曲之心而出離故。如是大悲，由彼無有高怯下而得生起，一切有情高慢退屈善出離故。

雲何不離眾生而起悲耶？悲是能緣，眾生苦惑是為所緣。草木河山，騷士情人，因之而多感。羌無寄托，則秋風肅殺，或亦喜彼威剛；落日昏黃，時則賞其索寞。唯夫有情疾痛，相對黯然，蓋未有不悲從中來也。空山趺坐，飛鳥不聞，足音跫然，定中憎擾。肝膽楚越，人事迷茫，苦且不知，從何悲起！是故大乘大悲，當處人間塵坌門十貴鬧，然後乃得眾生業惑，情偽離奇，然後有動乎中，酸辛悲憤。奈何菩薩如彼聲聞，了自業緣，避人逃世？是故《大莊嚴論》：菩薩大悲，略以十種眾生而為境界。《菩薩藏經》：菩薩大悲，略以十六眾生而為所緣。

雲何發愿布種而起悲耶？行菩薩行，但是行愿，發愿為因，愿滿為果，因果不二，但是其事，不必事圓。是故不能起悲，但應悲愿。愿則易舉，德如毛故。愿不可毀，金剛不壞故。愿則能引，招同類故。愿則能續，恆長養故。愿則不斷，恆希望故。愿則能展，久具計故。愿則能赴，機相應故。愿則能任，力漸充故。是故不能起悲，但應悲愿。悲愿者何？不舍眾生而已。眾生與悲，如命與息，當愿眾生起悲第一。《華嚴淨行》，百四十一當愿眾生，愿在發心前。《纓絡本業》，有二十四當愿眾生，愿在發心後。佛前佛後皆普賢行，而皆行愿愿此眾生，愿此眾生大悲無已，盡未來際。

雲何修慈滋潤而起悲耶？取與舍對，樂與苦對，交相系屬，即交見栽培。與之以樂，不能不拔之于苦。悲為因緣，慈為增上，因緣增上，乃得成辦，法性自爾，智者能知。《大莊嚴論》：悲樹六事成，根出以慈潤，由有慈者見他苦已，生悲苦故。

雲何多作功德而起悲耶？菩薩功德，十波羅蜜：施度、忍度、力度，詳于威力；進度、智度，詳于功德；慧詳多聞；戒詳清淨；愿度詳愿；惟禪方便，須續而談。舍身代苦，若覺其難，即應退墮，但告奮勇，而難為繼。故有方便修三三昧，五蘊皆空，無愿，無作。此觀若成，能所俱寂，三輪清淨，得大涅槃。然三三昧若無方便，必乘果報生長壽夭，退失悲心，墮于小外。因悲而空，因空而悲，禪與方便，交相利用，有益無危。《大智度論》：大慈大悲，用方便力，不隨禪生，不隨無量生，

不隨四無色定生，在所有諸佛于中生。眾生著空墮大地獄，是故菩薩深入大悲，悲因緣故，得無量福德，生值諸佛，從一佛國至一佛國。是故大悲不妨實相，諸法實相不妨大悲。

雲何觀眾生苦而起悲耶？諸聖聲聞，苦諦現觀，証苦深遠，厭俱行心相續而轉，悲故微薄。菩薩正觀，墮百一十極大苦蘊，正熏心故，悲亦正強。是百一十應悉披陳。雲何是耶？一、流轉苦；二、欲痴苦；三、三苦；四、別離斷壞相續畢竟苦；五、貪嗔疑悔昏沉睡眠苦；六、因果財護無厭變壞苦；七、生老病死怨愛不得苦；八、寒熱飢渴、自逼他逼及不自在一類威儀苦；九、自他親財戒見無病現法後法一切衰損苦；十、食飲衣乘、莊嚴器物、香樂伎、照明給侍，一切乏匱苦；如是增數，有五十五。宿因、現緣，有一切二苦；長時猛利，雜類無間，有廣大四苦；獄鬼傍生，善趣所攝，有一切門四苦；他觸、自纏、現造、當趣、界不平等，有邪行五苦；父母、妻子、奴仆、朋友、財位、自身，一切流轉，有不定六苦；長壽、端正、多智、勝人、族富、大力、一切不得，有不隨欲七苦；妻子貪增、飢儉、怨敵、野難、屬他、根缺、擯殺、一切損惱，有違害八苦；壞時、盡時、老、病、死時、無利、無譽、有譏、希求一切必至，有隨逐九苦；無樂受因不斷結尋逼匱不平愛壞粗重，有一切十苦；如是增數，複五十五。此百一十，是菩薩行悲所緣境。緣此境故，悲不生起，是為木石，非有情類。

雲何觀眾生倒惑而起悲耶？如來大悲三十二種救護眾生，眾生于法發生顛倒有二十四，又于有情發生迷惑而有其八，如來一一觀諸眾生而起大悲、而為說法，菩薩大悲，依此修習而得生起。雲何然耶？一切法無我、人、眾生、壽者，而眾生以為有，菩薩于此而起大悲。一切法無體無住，無執藏主宰事物我所，而眾生以為有，菩薩于此而起大悲。一切法無生無滅無垢，離三毒，無來去，無造作論戲，而眾生以為有，菩薩于此而起大悲。一切法空、無相、無愿，緣生靜寂，而眾生以為不然，菩薩于此而起大悲。是謂觀諸眾生于法顛倒有二十四，而起大悲。世間眾生，諍論嗔恨，倒見邪行，饕餮互陵，為妻子役，惡友近習，邪命自活，居家濁穢，墮小舍智，菩薩于此而起大悲。是謂觀諸眾生于有情迷有其八事，而起大悲。菩薩若能如此修習，大悲熏熾，則為已入阿跋致。

雲何取相作觀而起悲耶？《大智度論》：菩薩學悲無量時，先應發愿，愿諸眾生拔種種苦，取拔苦人相，攝心入禪，自諸親族至十方界。取相作觀，雖近小定，然入觀根本，一主厭棄，一主拔濟，所趣自不相淆，方便不妨一致。

雲何習以成性而起悲耶？酒嗜痴癖，吾生以爾為命，人之所惡，彼之所好。中有開導，臨事不造。法性自爾，悲亦何獨不然？從他苦生悲，從悲生自苦，從苦拔他苦，從拔他生樂。夫至于樂，則成癖成嗜，非此不適。是故信行位怖苦，未見自他等，未觸如實苦，習而未性故。淨心位怖苦，已見人畜等，已觸如實苦，習已成性故。銅鐘感應，天下易事，無過成性，菩薩念哉。

勸學六

人于獸，獸于禽，禽于余動物，遞嬗遷流之跡，彰彰不誣。日月星辰，山岳江河，草木礦石，遞嬗遷流之跡，彰彰不誣。物本天然，無所得而畸輕畸重。宇宙之壞及與不壞，既無所容其心；人物之安及與不安，亦無所先天下。浪漫支離，浮萍無與。如是之學，古史有之，天下多趨之。取天下之物，率天下之人，平之衡之，作之驅之。養其欲樂，使不得失所，製其品類，使不得絕足而馳。鰓鰓焉慮，孜孜矻矻，群分焉而治。古史有之，天下多趨之。二者之學，世之所謂極純而至要者也。世俗之道，是則然矣。

雖然，君子有究竟之學。何以必須宇宙，何以必須山河大地、人物動植？此一理也，研之乎未也。何因而忽有宇宙，何因而忽有山河大地、人物動植？此一理也，研之乎未也。宇宙何為不憚煩如是，山河大地、人物動植何為不憚煩如是？此一理也，研之乎未也。燭照洞然，徹終徹始，置之不理。徒跡其已然，破碎支離，煩于一隅，以統大全，以縱橫學，君子謂其細已甚，甚足悲也。故事之起，環蹟無緒，物境之變，不可思議。治之所生，亂之所始，救其所救，又救救者，世界殆盡而滋救不已。非謂其不成也，物以治物，性自爾也。亂不遏止，甚足悲也。是故君子有為人之學，悲乎眾生不得無余涅槃是也。學悲有十勝利，應作而起：

一者、法界同體。悲惻不雲乎？一惻然而天地萬物之情，周洽旁皇，淪肌浹髓。法界繁蹟，剎剎塵塵，然無大小內外，無分量古今，一舉而悉舉，一沉而悉沉，勝妙一毫端，寶王十方建。

二者、于事易舉。《瑜伽師地論》：菩薩以所修悲熏修心故，于內外事無有少分而不能舍，無戒律儀而不能學，無他怨害而不能忍，無有精進而不能起，無有靜慮而不能証，無有妙慧而不能入。

三者、群生知己。他心宿命，修習其通，無逾徑熱。觀苦既久，洞徑靡遺。身受者難言，而旁觀者隱挾。苦雖未拔，而有知者，則感泣涕零矣。

四者、祥光安隱。鵠入舍利弗影，戰栗不已，入佛光中，回翔自在。獸觀獵師，頂有血輪，身生奇具，遂爾覓觝。修悲既久，充實盎然，應有祥光，飲人無量。

五者、坦無城府。言涉吞吐，行經幾曲，是為有覆。有覆者，惑之本，害之最獨。然實不得已，懼虧而留步，常時快足，既無為難，沖懷而出，豈不善哉！

六者、偷性滅盡。絕望者不偷，無委者不偷，救火追亡不偷，舉重若輕不偷，悲之所至，如聞涂毒鼓，必死無疑故也。

七者、無不平等。但惻隱故，不擇而加故，自然無有強弱、高卑、隆殺、貴賤故。

八者、與智無二。離悲之智曰小智，離智之悲曰外悲。既不可說分別為智，即不可說愛勝為悲。具虛靈故，具不昧故，皆所同故。

九者、容易得通。《大智度論》：入悲三昧，現在得五功德，入火不燒，中毒不死，兵刃不傷，終不橫死，善神擁護。

十者、大雄無畏。師子不欺，香象澈底，行之既久，必坐菩提。作猛健大丈夫，誰懷斯志？

漸之姊淑，二十歸于鄧，未逾年而寡。鄧有兄無賴，家破，姊大歸侍母。訓溱弟、琳侄、格兒蒙，因以為蒙師者若而年，得資治翁姑喪如儀。鄧兄有子，又無賴，撫之而逃亡，乃子其族兒名拱璧者，教而婚之。初，鄧幼，與予同學。歲暮過其家，鄧兄呼舅，予駭奔詢母，則正于是時許鄧不誣，無奈何也。予一兄三姊，骨肉凡五，婚姻皆以幼，皆草草定，又不出彈丸小城。嫂及諸姊以故寡，又貧，霾陰悍鷙之氣充于庭，無寧日矣。姊有德，包荒左右焉，又不惜其資，家人安之。不幸母死，不得已舉家入山，趨空門倚佛，霾陰悍鷙之氣充于山，無寧時矣。女蘭，有知，愿隨父。予入隴數月，返金陵而蘭死，年十七耳。姊哀而聚寧數年。兒東，泯斃，姊哀而聚寧一年。今複可得而聚哉？姊既皈佛，作功德，格兒奉以資，施支那內學院。住宜黃龍泉，請藏，作藏經樓。工興，露督而疾作，庸醫投涼劑。予年來窘，不能如所須。道梗，藥與資不達。其家時怨逼，百方違緣，而姊已矣。寒假，作《院訓釋》文，《釋悲》已半，正月三日凶問至，心痛不自持，已輟。然無益，吾何以將吾姊，應續作以回向。乃秘之，製之，振之。胸煎熱，頭涔涔目眩，身寒噤如瘡，數數不自持，複數數自責，今幸粗率成，實不能再作也。自今以往，吾悲愿：念念愿眾生，念念拔眾生；本師所為，吾悉愿為；悉以回向吾姊。又愿讀吾文而怛然者，拔一切苦厄，而先拔吾姊也。

民國丁卯上元日。

（原載《內學》第三輯，收入《歐陽競無先生內外學》第一冊）

支那內學院院訓釋釋教訓第三

導引一

証智無戲論，佛境菩薩行，此之所謂教。

何謂無戲論耶？無著釋龍樹八不偈雲：非滅不滅，非生不生。應知諸句皆如是說。不可說此法非滅故名不滅，世諦不異第一義諦，一相無相故。亦不可說此法無滅故名不滅，非滅中復有滅故，涅槃無體不得遮生遮滅故。蓋非滅不滅雲者，說滅戲論也，說不滅亦戲論也。根本此事非談生滅，而以生滅作此事談者。反覆轉展皆戲論也，是故非之、不之也。《般若經》雲：菩薩安住諸法無自性中，觀蘊、處、界，乃至觀一切智智，若常無常，若寂不寂，皆戲論也。念諦應知斷証修，戲論也。念靜慮覺分乃至一切智智應修應証，亦戲論也。應觀種種不可戲論，故不應戲論。戲論是三界二障之所自出，不其戲論，則正性離生之所從入也。

何謂佛境耶？不其戲論，非一切法斷滅無有，而內証聖智之異其所依也。《般若經》雲：愚夫異生所執，非一切如是有故，如無所有如是而有。又雲：如如來如實通達生相法如是而有也。能証乎是，是為証智。証智所緣，是為佛境，法界真如是也。畢竟空也，一切智智也，無余涅槃也，第一義諦也，一乘道也，無學也，無位也，頓証也，一也。

未得証智，以生滅心隨順佛境，趣向佛境，臨入佛境。《般若經》雲：初學菩薩，若欲疾証一切智智，于善知識所，能聞廣略教相，受持、讀誦、思惟、觀察，令心、心所于所緣相皆不複轉。又雲：從初發心至坐道場，無容橫起諸余作意，唯常安住一切智智相應作意，令心、心所于境不轉。又雲：于諸法中不作二想，名無上菩提修菩薩行，思惟在一切智智。一切智智者，無性為性，法界為相，所緣亦無性，行相亦寂靜，正念而增上是也。

發心作佛，念念是佛。而不然者，二想雜想，間斷不續，又烏能佛境為主，戲論為客哉？而不然者，學四諦則落聲聞乘，學十二因緣則落緣覺乘，學六度萬行則落菩薩乘，空則惡取于空，有則非善巧乎有，各端其極，水火不融。如來所愿，顧若是哉？唯有一乘道，無二亦無三，于無性無動，于智智不轉。以談瑜伽則離言自性，以談般若則是法平等，以談涅槃則佛性中道。萬派千流匯歸瀛渤，無不同此法界流，無不同歸一法界。若其發慮，則所向有殊，所施各異，說相說性，說常無常，釋迦說法四十九年，何嘗自語相違？是則相反無不相成，是則匯流無如趣一。

何謂菩薩行耶？本性空也，二取空也，三自性也，道相智也，無住涅槃也，二諦也，三乘也，行、引、修也，漸次之歷位也，分証也，一也。既佛境矣，而菩薩行何耶？不得已之作也，自然之趨勢也，巧便之施設也。不能用頓，則方使用漸，三智三

漸次，三阿僧祇劫必能頓証；處夢謂經年，悟乃須臾頃，亦無漸之非頓而已矣。不能用圓，則方便用分，菩提分法滿即菩提，以法學法界，複以法界學一切法；以法學無所得，複以無所得學一切法，積土成山，積水成淵，亦無分之非圓而已。不能遍一切一味，則方便用通，一攝一切，一入一切，則一法成佛；一切攝一切，一切入一切，則法法成佛；無住涅槃觀空不証，川納眾流，海納百川，亦無通之非遍而已矣。是故行三自性于畢竟空，大悲度情有依能遍也。行道相智于一切智智，行無住于無余，無窮無盡而無遺也。行俗諦于第一義，熟情嚴土，後得智圓也。行三乘于一乘，行分証及行、引、修于果境，徑無不通，無礙自在也。

是故無佛境，則漸不能頓，分不能圓，通不能遍。滯于一隅，朝宗無期也。是故無菩薩行，不能用漸而頓，不能用分而圓，不能用通而遍，彼岸天涯，無航可渡也。是故僻執久行者，破碎支離，磨磚作鏡；高談一乘者，憑虛凌駕，娛樂乾城；皆以不得方便善巧故也。《般若》雲：菩薩不從佛及善友，聞說殊勝方便善巧，雖親近諸佛、種諸善根、承事善友，而不能得一切智智。是故方便為究竟也。是故新學菩薩于最初學極不可忽者，方便善巧是也。是故佛境菩薩行合，而後為教也。

釋義二

將欲釋佛境菩薩行至義，必先明不可思議三事，三事既明，義乃有據，不蹈虛臆。

一、真妄主客事。《勝經》言：此自性清淨如來藏，而客塵煩惱上煩惱所染，不思議如來境界，有二法難可了知，謂自性清淨心難可了知，彼心為煩惱所染亦難可了知。據此，則真與妄法並時發現也，非止一真更無有妄也，非妄滅然後有真也。《楞伽經》雲：諸有妄法，聖人亦現，然不顛倒，妄法是常相不異故，心意識轉，即說此妄名為真如，若無如來藏名藏識者，則無生滅，然諸凡夫及以聖人悉有生滅。

《解深密經》雲：如實了知離言法性，于有無為決定無實，然有分別所起行相，猶如幻狀迷惑覺慧，不如所見堅固執著謂為諦實，彼于後時不須觀察。此則說妄非為無有，而不執也。然《密嚴經》雲：賴耶與能熏及諸心法等染淨諸種子，雖同住無染。又雲：藏識與七俱，體性而無染。此與《勝》說染不同者何耶？據《辯中邊論》，如水界、金、空。則此染者真妄不離，是故雲染；非同世說和合一味，是故非染。此中辨析，厥有二義：一者、涅槃唯真無妄，不與生滅相應故。無余涅槃無損惱寂滅中無邊功德，如如不動，其一分現前者，皆由先時菩薩愿力發起而來。譬如滅定，由先加力出起游行。是故說真如緣起者，乃邪說也。一真法界，諸佛自証理同不異，謂之為一。而言別有一境眾其一心，亦邪說也。二者、菩提真妄不離，與生滅相應故。生滅相應，八識遂變根身、器界、心及心所，名之曰藏。依藏淨種曰如來藏，依藏染種曰阿賴耶。同一八識，增立九識，亦瞽說也。

二、智如非一非異事。以法言非一。《楞伽》、《密嚴》俱稱五法。《密嚴》雲：法性名如如，善觀名正智。《楞伽》雲：真實究竟，自性可得，是如如相，不生分

別，入自証處，是名正智是也。以義言非二。《般若》雲：變化與空，如是二法非合非散，此二俱以空空故空，不應分別是空是化。若以生滅言，又非是一。智與生滅相應是化，如不與生滅相合非化。《般若》雲：真如名為無生無諍，如實知見諸法不生。諸法雖生，真如不動，真如雖生諸法，而真如不生，是名法身。其言真如雖生諸法者，依于真如而有一切法生，非真如生一切法也，法若即如，法尚不生，何況真如而有生法？如智既分，明與無明，義自相對。《密嚴》雲：法理相應，明了能見，說為正智。《般若》雲：于無所有不能了達，說為無明是也。若無明對如，則體用不分，法相淆亂，不可為教。

三、法法成佛事。《般若》雲：諸菩薩摩訶薩于諸行相狀，能正顯發道相智者，遍于如是諸行相狀，皆現等覺。與《華嚴》位位成佛義無差別。蓋般若學蘊、處、界空，以自相智入正性離生矣，複回而觀蘊、處、界空，業學行三漸次而修六度六隨念，乃至一切善法。是故一入一切，一切入于一切，金剛道後菩薩佛等，而無間行仍稱菩薩，不必但三昧証空稱佛也。所以必法法成佛者，《般若》中有三義：一、令有情法無倒解；二、知有情意樂隨眠為作樂利，遮障示修；三、知有情諸根勝劣，于所說法終不唐捐。三事既明，乃釋至義。

佛境，畢竟空；菩薩行，則本性空、二取空。雲何本性空耶？龍樹有言：畢竟空者，無有遺余；本性空者，本來常爾。畢竟空者，三世清淨；本性空者，但因緣和合，無有實性。畢竟空者，是其深空；本性空者，是中道空。畢竟空者，一切佛行；本性空者，菩薩所行。本性有理破不心沒，是故新學菩薩無不取用于本性空，為驚怖空而設方便故也。《般若》雲：非別實有不空涅，然我為新學菩薩說涅非化。善現問：雲何方便教誡教授新學菩薩，令知諸法自性常空？佛告善現：豈一切法先有後無，而不常空？然一切法先既非有，後亦非無，自性常空，不應驚怖。應如是令知諸法自性常空。

雲何二取空耶？為導俗故，為導俗以趣空故。導俗趣空，立依他如幻；如幻更執，遂生二取為遍計執；如幻自然，即二取空為圓成實；是為無住異門說三自性。此三自性皆心境上事，皆相用邊事，但有此施設事、緣生事、實相事，非如幻上更有自性事。是導俗以二空，繩非蛇而所空，麻非繩而能空；豈增語以三性，更八不而增名，複九喻而增相？是故龍樹為取真而無性，此之無性但無增語，非性全無，以有實性曰無性性。無著為導俗而自性，此之自性但有此事，非主宰有，以無主宰曰性無性。大士婆心，各以方便異門詮空，使人明了。奚必舍義，別滯于文，法苑長悲，執競千古？

佛境，一切智智；菩薩行，則道相智。一切智智何以為佛境耶？一切智智有二相：一、寂滅相，謂一切法皆同一相，寂滅相也；二、遍知相，謂諸行相狀，能表諸法，如實遍知也。菩提涅，是稱為佛，佛之知見，一切智智是也。佛之知見依于為境，則無性為性，法界為相。無性為性者，所緣亦無性，行相亦寂靜，增上于正念也。

。法界為相者，法即法界，法界即法，學法界于法，學法于法界也。

道相智何以為菩薩行耶？能往一切智智為道。道相智者，賅用三智以為其相，行至于一切智智是也。三智者，小果蘊、處、界為一切智，極果一乘畢竟空為一切智智，自果發心至証覺為道相智。發心至証覺有二事：一、諸道般若，統攝三智，法法成佛；二、無相般若，不住有相，除遣一切。自始至竟，念念菩提，曰菩提道。被大功德鎧，任不思議事，曰菩薩道。境以佛道，為頓而總；行以自道，為漸而分，曰菩薩行。行乎自道，曰菩薩行行于道相智也。行相紛繁，漸分為四：曰地前，地上，地滿，地竟。

地前行者：植基在一心，得道在善友。植基在一心者，思惟一切智智念念不忘，死急事來都應遣去，深信成種乃可為基。經所謂圓滿無性為佛，漸証無性為聖，深信無性為賢善士也。經又言：行、引、修三慧，以般若力，破蘊令空是涅槃相，出定住情還念寂相，悟一切空，地前行慧也。不可說有無，言語道斷，則初地引慧。入甚深禪，複以般若破禪與禪緣，又地地修慧也。得道在善友者，與人巧便，方為善友。巧便雲者，非諸善根，非諸善法，而佛之知見。親近諸佛，承事善友，種諸善根，而未得聞殊勝方便，終不能得一切智智。初發心人，于佛聖賢及正知處多聞聞持，應深作意。既得巧便，不其戲論，于聲聞道遍學滿已，即以自乘，由三三昧而入正性離生。是之謂地前行。

地上行者：一用小道，二用極道，三用自道。遍學八地，勝智超入，複由諸道漸次修証一切智智。聲聞果向，斷智即菩薩忍，熟情嚴土，不離一切相故。如是馴至八地，則一切智盡，梵行已立，不受後有，是為一用小道。一攝一切，一入一切，菩薩為欲圓滿布施，即于布施中攝受一切而行布施，由此因緣而無二想。一切入攝，與佛無二，故雲成佛，是為二用極道。初地至六，配修六度，是有三要。一切智智相應作意也。無實成轉滅入諸法相，無所作能入諸行相也。泯有無想即是順忍，亦是修道，亦是現觀，得自在轉得受記忍，雖得勝果而不取証也。馴盡六地，即出世間，即為無相。七地無相尚有功用，馴七地盡無功用矣，是為三用自道。是之謂地上行。

地滿行者：熟情嚴土，神通大用也。無量無邊，幾佛功德，入大地獄，事十方佛，割濟旁生，饒益餓鬼，燒殿警天，世、出世間，法施微妙，有如是希奇。一法成佛一入一切，法法成佛一切入于一切，雖一切一切而法未盡，尚見行修，故名為行，亦名為漸。菩薩十度，前六自分，後四增勝，方便增施，愿增精進，力增禪定，慧增般若。以有增進，方能廣大威德，入佛法身，富樂莊嚴，不沉湎于尼夜摩性。是之謂地滿行。

地竟行者，菩薩行圓滿時，斷一切習，覺一切相，得一切智，幾與佛齊，為究竟行。道相智至此，舉足下足皆如來行，為究竟行。佛與菩薩性本無異，但位不同。金

剛道後解脫道生，一刹那頃即成正覺。此刹那頃，出時稱佛，入刹那時，猶稱菩薩行。由本性空而畢竟空，一切一切，已能頓現阿耨多羅三藐三菩提，無須分法，是之謂地竟行。

四行分布，析佛無遺。求總于分，得頓以漸，諸有智者，譬喻而明。水大周世間，誠不可思議。然設方便，積集觀全。小德歷遍川流，汪洋窮于瀛渤，豈其大量絕無方便推測而知歟？又如帝京千裡而遙，神通如壯士，屈伸臂間即至。未得通人，率履周行，夕露晨霜，時哉不失，豈其佳地達競無期歟？

佛境，無余涅槃；菩薩行，則無住涅槃。無余涅槃者，涅槃寂滅，無余則二寂滅：一、寂靜寂滅，解脫身能得；一、無損惱寂滅，無量無數廣大甚深，非得法身不能顯現。人惡空無，難語寂滅，迫不得已，略譬萬一。中夜中天，一輪孤月，萬籟俱寂，玉宇無雲，寂照河沙，無品不淨。當此時也，方寸翕然，誰不樂寂，而況乎大道非色，絕對非喻者哉？是則無余至亟，而菩薩無住，何耶？直追在佛，誠懼落于聲聞。力進在學，又恐湫于無為。故于無余入游觀定，非得少為足、証而長居。涅槃八相：盡、善、真、實、常、我、樂、淨。聲聞唯六：以其得解脫身，盡、善同佛；不得法身，不真不實。以其得無漏聖道，安樂清淨；不得般若，無我無常。雲何為常？有佛無佛，法性常住，法住刊量，入大定窟而非入滅，是故為常。釋迦牟尼，于娑婆國舍一根身，于一燈明入一器界，出沒隱現而非涅槃，是故為常。雲何為我？大我有八自在：一、一身多身；二、一微塵身滿三千界；三、滿身過沙界而無障礙；四、一心不動令眾有心；五、一根知六；六、以無所得而得涅槃；七、說一偈義長劫不窮；八、虛空不現令一切見。恣肆淋漓，縱心所欲。若不如此，不能盡未來際、作大功德于無邊也。是故非僅解脫涅槃，而三德涅槃。無住者，必得般若、法身，入一乘道，而無住于解脫涅槃也。八地幾滅，以佛呵斥而圓滿其行。聲聞趣寂，佛惡焦敗而禁人與俱。是故經言：觀空不証，箭箭注也。此之謂菩薩行也。

佛境，第一義諦；菩薩行，則二諦。無著釋龍樹論：若說二諦，此如是說，不異世諦，而更別有第一義諦，以一相故謂無相故。以如是義，《中論》偈言：諸佛依二諦，為眾生說法，一以世俗諦，二第一義諦；若人不知此，二諦之義者，彼于佛深法，則不知真諦。以無自體如，本性空如，此則是諦；一相無相，于此不破，據此而談，諦非無俗，但唯一相，俗不離真。不二法門，離言默契，曰第一義諦。眾生不知第一義空，方便說教，令俗易了，故曰俗諦。第一義諦但緣總相，俗諦為眾分別令知。是則無言無別之真，是佛境；言說分別之俗，是菩薩行也。是則總非一合相，應具多分，說真中有俗。分出于總相，無非是總，說俗中有真也。是則三科四諦，無不依于法界真如，而皆是真；三科四諦，于依他上二空圓成，而皆是俗也。是則真不自真，待俗故真，即前三真亦說為俗。俗不自俗，待真故俗，即後三俗亦名為真也。說真說俗，為依他故，為立教故。佛言：心性本淨，而有客塵，是為依他。若破依他：一、惡取空；二、撥無俗諦；三、撥無染淨；四、無後得智；五、

無立教地；過失無邊，戕賊胡底，夫安可哉？是故立四真諦：一、三科；二、四諦；三、二空；四、一真。立四俗諦：一、瓶盆，瓶盆遍計從能詮說諦；二、三科，緣起實有；三、四諦，為安立諦；四、二空，非安立諦。

佛境，一乘；菩薩行，則三乘。射人先馬，擒賊先王，止有此乘，無二無三，直趨所的，毫不人情，是謂一乘法門。說一乘法，今舉七教：一、《般若》，以無所有破執一三，即畢竟空義。二、《密嚴》，賴耶勝教，內証聖智義。三、《楞伽》，能取所取空，俗諦空義。四、《勝》，說第一義，為法身義。五、《法華》，佛之知見，一切智智義。六、《大法鼓》，如來解脫，則解脫義。七、《大涅槃》，無上醍醐，是佛性義。種種所說，詮各不同，而皆一味。一味于佛境而已。

今涅槃學，教敘《涅槃》。

經雲：是經三大義：如來常住，一切眾生皆有佛性，《大般涅槃》說一乘法。以說一乘法故，信則龍女頓成，謗則善星生陷。不可思議，以譬而明。譬如大海眾寶蘊藏故，譬如須彌山眾藥根本故，譬如虛空一切住處故，譬如猛風無能系縛故，譬如金剛無能破壞故，譬如恆沙無能算數故，譬如帝幢法網無邊故，譬如商主趣涅槃城故，譬如導師引商入海故，譬如日月頓破幽冥故。是應剝皮為紙，刺血為墨，以髓為水，析骨為筆，書寫如是《大涅槃》。雪山半偈，布施身命，以我熱血，供彼夜叉。而況全經，汪洋曲盡，不可思議者哉？多生難聞，唯此佛境。

是則直趣一乘可矣，而又說菩薩行，而舉三乘何耶？是有五義，豈容矛盾。一、甚深義；二、廣大義；三、眾生根器義；四、出生義；五、緣助義。一一應以經詳。

一、甚深者：經雲：大海八不思議，深而無底。或說不得菩提不轉法輪。或說常，或說無常。或說一乘，或說三乘。是故甚深。

二、廣大者：經雲：大海八不思議，眾寶所藏。三十七品，聖梵天行，諸善方便，眾生佛性，三乘及佛乘功德，六度與無量定慧，蓄蘊難測，其無津涯。又雲：海受眾水，三乘如來所入之處，名大涅槃。三三昧，四禪，八背舍，八勝處，十一切處，隨能攝取如是無量諸善法者，名大涅槃。又雲：聽《大涅槃》，斷一切疑，知法知義。

三、眾生根器者：經為聲聞、緣覺，方便說三。而乘唯是一，教則有三；教唯是一，乘則有三；頓漸二家，諍論不解。以吾觀之，但文字障，義則無殊。乘為行具，乘而行之，以達菩提。教為導引，引而導之，以証正覺。其為循境而行，以期成佛，一而已矣。故雖唯賜白牛，而一雨普被，諸草各別。化城使息，慰彼疲勞。故雖分談五姓，而姓以習成，但種非性；小能回大，不以格繩。一乘刊定，三乘朝宗。斯無不同，中間小異，何足紛紜。

四、出生義，經雲：從牛出乳，從乳出酪，從酪出酥，從生酥出熟酥，從熟酥出醍醐，醍醐最上。佛亦如是，從佛出于十二部經，從十二部經出修多羅，從修多羅出《方等經》，從《方等經》出《般若波羅蜜》，從《般若波羅蜜》出《大涅槃經》，猶如醍醐。雖非生因，而是所出。以出為生，故經又雲：因乳生酪，因酪生酥，因生酥得熟酥，因熟酥得醍醐。

五、緣助義：涅槃不從作因有，從了因有。了因即是緣因。眾生為正因，如乳生酪，六波羅蜜為緣因，如軟酥等。然三十七品、六波羅蜜，雖是了因，但涅槃

因。無量阿僧祇助菩提法，乃得名為大涅槃

因。是故經言：師子大王，安處岩穴，四足據地，晨朝出穴，頻伸欠，四向顧望，發聲震吼。為眾生、為破邪、為小悔、為四部不畏，從聖行、梵行、天行窟宅頻伸而出，觀益眾生決定而說，十住菩薩能修三行則師子吼。三行者：五行中三菩薩自乘。五行前一為病行，為聲聞行；五行後一為嬰兒行，佛與菩薩相共所行。夫道相智者，攝小賅佛，不局于自，全體而行，為菩薩行行于五行者也。病行，在蘊、處、界；聖行，在戒定慧；梵行，慈悲喜舍；天行，十波羅蜜；嬰兒行者，不能來去語言，不知苦樂晝夜父母，不能造作大小諸事，未知正語，但能婆，楊葉而止其啼而已。能行五行，乃得十德。何謂十德？一者、知法義，斷疑曲，了三句；二者、得通自在，聞見知勝；三者、舍闡提慈，得如來慈；四者、不逸成佛，福田淨土，滅余斷緣，淨身無相，離怨離惑；五者、根具不邊地，天愛宿命智；六者、金剛三昧，破一切法；七者、友及三慧，涅槃近因；八者、遠離蘊見，念定菩提，四梵一道，心慧解脫；九者、信直持戒，近友多聞；十者、覺分入寂，說經示性。十德雖非得究竟果，自位圓滿，而得勝進。亦庶乎其不差矣！

說教三

畢竟空義，無所雲教。而眾生不知，方便大悲，教乃權立。是故染淨之謂教，是為教中之義。是故五法、三自性、八識、二無我之謂教，是為教中之法。今所詳說，說取舍義，說唯識、唯智、涅槃之學。其五法三性，識及無我，如是諸法，適于其中隨宜而說，不復更詳。舍染取淨，詮以三德涅槃。則舍染義為解脫義，離二障空二取，因之有唯識學。以舍染而取淨義，為般若義，不戲論觀實相，因之有唯智學。取淨義為法身義，染亦是淨，無非中道，因之有涅槃學。

唯識學雲何舍染耶？染生于虛妄分別，若不成立虛妄分別，則系縛解脫即應皆無。如是便成撥無雜染及清淨失。無修無對治，無教無出期，遍此一法界，皆波旬勢力。是故立量：虛妄分別有，許滅解脫故。謂滅此亂識上二取，得二空所顯真解脫故。虛妄分別性是依他，成立依他，舍染取淨，教然後立。依他起上，二取是無，是遍計執，猶般若之不其戲論也。依他起上，二空是實，是圓成實，猶涅槃之常、樂、我、淨也。而皆在依他上顯者，三性不離唯識，三界心、心所是虛妄分別故也。

法真而妄立何耶？此法爾如是也。妄中唯有空，于空亦有妄，《中邊》所談也。似色相續染為依故，若不爾者，非義起義倒不得有，即二障清淨俱不得有，《攝論》所談也。自性清淨心煩惱所染，難可了知也。然《中邊》雲：先染後淨，二差別相，是客非主。又雲：雖先染後淨，而非轉變成無常失，如水界、金、空，出離客塵，非性轉變也。

唯識學染如何舍染耶？一、多聞熏習，如理作意。等流無漏，聞思所出，仗真實依，為引發因，十法行句，于斯為重也。二、對治，貪觀不淨，嗔觀慈悲，痴觀緣起，慢則析根，疑複數息。三、伏斷，煩惱見伏在于地前，斷則見道；煩惱修伏，入地乃盡，斷必金剛。所知見伏在于地前，斷則見道；所知修伏，十地乃盡，斷于地漸，于金剛頓。四、離言自性無分別智，起八分別，出生三事，妄依緣事，及見慢事，貪嗔痴事。破遍計執，破惡取空，唯有平等遠離分別，最勝空性廣大勝能。五、四尋四實，尋思在暖頂位，如實在忍法位，必名義空自性差別空，然後入地生如來家。六、善巧相應，三科善巧，乃能馭俗，如是六善巧，十善巧，開合隨情。七、後得智圓，生攝地行究竟瑜伽，圓滿菩提皆後智事，方愿力智，輔助六度，遍周法界，亦後智事。八、轉識成智，修十波羅蜜，斷十地粗重，証十種真如，得二法轉依。無住涅槃四智心品應詳其事。如是八義，為唯識學染得舍事。

唯智學雲何以舍染而取淨耶？無義，不義，非義，是舍染義；不異義，即義，平等義，是取淨義。觀一切法自相皆空，無實、無成、無轉、無滅，入諸法相，知一切法無作、無能，入諸行相義。增長覺分熟情嚴土義。以無所得為方便而求一切智智義。實相相應平等平等義。是為舍染而取淨義。既非為舍染，又非唯取淨，則如來藏事應辯而明。一切染淨法種蘊八識中，名曰藏識。闡賴耶義者，曰無漏寄賴耶中轉。闡如來藏義者，曰煩惱客塵纏于藏識。實則染淨諸種子，其聚于藏識中也。種聚于一處，而《楞伽》曰：如來藏藏識者，是淨種所依。《密嚴》雲：如來清淨藏，和合于習氣，變現周世間，與無漏相應，兩諸功德法，是也。唯識稱阿賴耶藏識者，能藏，所藏，我愛執藏，是染種所依。《密嚴經》說：變色翳見，生識作業，似色似我，無不依于賴耶而轉。《瑜伽》亦說本轉互生，是也。是則染淨有異，非識有異也。然賴耶詮種亦非唯染，唯識三性中談，分別緣所生，應知且說染分依他，淨分依他亦圓成故。是故《密嚴》以賴耶立教，曰賴耶即密嚴，曰如來清淨藏，世間阿賴耶，如金與指環，展轉無差別。蓋言淨藏賴耶，猶俗諦不異于真諦故也。隨緣不變，非是真如，是八淨識。《密嚴經》雲：識隨分別種，無思及分別。無處不周遍，見之謂流轉。不死亦不生，本非流轉法。賴耶本無過，過在于末那，無始戲論熏，變境彌世間，意執我我所，思量恆流轉，諸識類差別，各各了自境。賴耶為變熏，複增長余識，更互以為因，相續而轉生，常無有斷絕，是故應斷七。唯識對治斷，作意在御七纏縛。唯智迷悟斷，作意在八不隨緣。所趣不同故也。

唯智學何以染舍而淨取耶？一、歸依，通途為三，茲則取一。《涅槃》歸依佛性，《法華》歸依佛見，《密嚴》歸依密嚴，《勝》歸依法身。二、信，

佛體是信，皆有佛性，皆有佛體，皆得成佛，性自是佛，但無分別，一往直前。三、住，得無分別，支解不動。四、解行，聞法而覺悟，離文字分別，入三解脫門，是名為得悟。此聞法者，聞阿賴耶即如來藏之淨法也，唯識解行在一引發，唯智解行乃在一悟。五、法相善巧，色心不相應，有為與無為，皆是無分別，不同唯識證後得智。六、四諦，以四諦而得涅槃，非由苦集滅道諦，非由苦集滅道智，但由平等實性，即是涅槃，苦滅非壞，常住自性而已。七、定，一依無自性，從初發心，歷遍十地無有轉移。八、淨土，密嚴微妙善說賴耶，瑜伽所生勝于極樂。如是八義，為唯智學以舍而得取事。

涅槃學雲何取淨耶？取淨者，取于畢竟義也。畢竟義者，常、樂、我、淨之涅槃也。此常、樂、我、淨之涅槃，唯佛為能，而說一切有情皆有佛性則皆作佛，是為一乘法畢竟義。四十九年最後說者，眾生外道四倒，是故最初方便引導，說十二部經無常，而聲聞又四倒，是以最後開權顯實，說此一乘法《大涅槃經》常也。若使眾生早知畢竟空，聲聞能悟畢竟空，則早說一乘法常，不必最後說耳。說一乘法者，說眾生有佛性能得涅槃常也。若是，則佛性義應辯而詳。

成就恆沙佛法名為法身，即具足無邊佛法名為佛性。人有百體如佛法身，胎具人骸如眾佛性，唯見不見判顯不顯，是以異耳。此有法具，亦有人具。

法具者，無明有愛，中間生老病死之苦，是名中道，《寶積》亦說離二邊而處二邊之中，為中道也。以是故十二因緣名為佛性。佛性者，有因有因因，有果有果果，賅遍于一切。因是十二因緣，因因是觀緣智，果是菩提，果果是大涅槃。彼無明因行果，行因識果；則無明亦因，亦因因，識亦果，亦果果。以是十二因緣，不生不滅，非因非果，常恆無變，與佛性同，名為佛性。見一切空，不見一切不空，乃至見無我，不見為我者，不名中道。見空與不空，無常與常，苦之與樂，無我與我，一切平等，是第一義空，名為中道。煩惱即是菩提，香味無非法界，山河大地不現崎嶇，翠竹黃花盡成般若，此之謂畢竟義也。

人具者，上至後身菩薩，下至為一闍提，是為一切有情，佛說皆有佛性。闍提斷善，固無佛性，而言有者，世無真闍提，佛無決定法，此之謂畢竟義也。說畢竟義，尊極一乘，無別及二。是故乘急，戒亦可緩。能教是乘者，長宿于少年邊，護禁于破戒邊，出家于在家邊，皆如婆羅事火，天奉帝釋，恭敬禮拜，供養舍身。四相說口密般若，身密法身，意密解脫，伊字密藏。四依于昔，法不在人，故唯依法；四依于今，人乃有法，亦依法人。四諦則唯一真諦。四倒則常、樂、我、淨乃不為邪。歸依不二，中道無二，此之謂一乘畢竟義也。

涅槃學雲何取淨耶？見性而已矣。有眼見，有聞見，唯佛眼見，自初發心歷至九地皆為聞見，入地稍見而非了了，最勝微妙猶仗佛聞，故曰聞見。必如何而後見耶？亦戒定慧三學而已矣。

經雲：身戒心慧修而後見。若不修身，則不能觀無常怨害，入最初法門。若不修戒，善無梯 + 登，出生無地。若不修心，狂象無鉤，惡本不製。若不修慧，無明不壞，無漏安生，況能見性？唯見植基，如來于時丁寧重戒，曰持究竟戒，持菩薩戒，為正法戒，為眾生戒，定其三三昧戒，性自能持戒。雲何性自能持？持戒為心不悔故，不悔為愛樂故，愛樂為安穩故，安穩為禪定故，禪定為如實知見故，知見為生死過患故，過患為心不著故，不著為解脫故，解脫為大涅槃故，涅槃為常、樂、我、淨故，常、樂、我、淨為不生滅故，不生不滅為見佛性故。如是十三趣赴，由戒而定而慧，以達于見，皆自然得，法性爾故。是故性自能持。經又複雲：修定慧舍，得無相涅槃而能見性。定唯一境取色，慧則定中觀常無常，舍于定慧都不見相。

既重戒矣，又何為修定耶？能知五陰出沒相故也。曰五智三昧，無貪，無過，常念，身意專淨，因果俱樂。曰六事三昧，觀骨，觀慈，覺觀，觀生滅，觀十二緣，阿那波那。如是七覺分，八解脫，九次第定，十一切處。如是空三昧門，金剛三昧，首楞嚴定，無量百千均應修習。

雲何修慧？了知世、出世，總別破，四真諦，不逸莊嚴自在，惡果善根煩惱。

雲何修舍？定空，慧無愿，舍無相，無非詳說三三昧耳。

經又雲：修八聖道見性，讀經見性，十二部外聞《涅槃經》，雪山忍辱草不同。又雲：十法見無相涅槃而見性。信戒近友，寂靜精進，觀諦六念，軟語護法，給伴具慧。又雲：菩薩以十法稍稍見性。少欲知足，寂靜精進，止念定慧，解脫贊解，涅槃化生。如是諸義，為涅槃學取淨事。

上來舍染取淨，教中三學，分別而詳，實非圓相。然摩尼以方，各呈其色。水火非一，莫可聚談。既別不淆，便可總說。經雲伊字，離亦不得，合亦不得，縱亦不得，橫亦不得。一道清淨，離則二三。法相不亂，合相斯淆。一剎那事，縱亦三時。法無高下，橫則左右主中。經雲：伊字三點，並則不成，縱亦不成，別亦不成，解脫之法，亦非涅槃；如來之身，亦非涅槃；摩訶般若，亦非涅槃；三法各異，亦非涅槃。如是則必一法具三玄，一玄具三要。凡一法上，具性與相：法身為性，唯識為相，相相應于性，厥稱般若，此所謂一法具三玄也。如涅槃二邊，平等平等，無非中道。此之中道，瑜伽分別上非空非不空中道，般若因緣上空假中道，皆邊不執于一，乃玄則具于三。又涅槃寂滅，其寂靜寂滅者解脫，其無損惱寂滅者大悲般若也。如唯識二空所顯，二空則般若無所有，所顯則涅槃

無邊德。又唯識說二轉依，菩提是般若果，涅槃是法身果也。如般若實相方便，實相無戲論，則擇滅無為，方便法圓滿，則法身沙界。又般若如來藏，空如來藏則解脫，不空如來藏則法身也，此所謂一玄具三要也。解脫道生剎那証覺，一念般若相應即佛，佛藏出纏即是法身，豈有如來不通一切？夫明星徹悟，唯一毫端。此一毫端，在唯識家言是識，在般若家言是智，在涅槃家言是性。然極位了識，大覺稱智，唯

佛見性者。平等平等是佛境界，識智與性，不有一隅，不離一隅故也。譬如神珠，輝室止塵，百端妙用，而唯是懷中一粒。譬如朗月，遍照三千，陰晴圓缺，而止是中天一輪。作如是觀，或相契有期歟！

複次，般若唯是名，法相又稱相，相無名亦無，何處有分別？唯識唯智學，歸于無分別。法身無分別，直趣于智如。唯識立依他，般若遣遍計，法身即成實。八忌隨七緣，三學要在是，總之教肝髓，在一無分別。我有情理義，情為有主宰，龜毛兔角喻，無即說為無。理為寂滅本，燈滅爐猶存，有即說為有。有我無我二，中道如實說。經雲：如來有因緣，故說無我為我，而實無我。雖作是說，無有虛妄。有因緣故，說我為無我，而實有我。為世界故，雖說無我，而無虛妄。佛性無我，如來說我，以是常故。如來是我，而說無我，得自在故。

三昧四

參禪貴在死心，學佛要先肯死。肯死雲者，決定一往而已。是故三歸乃曰歸命，八念修于死想。若不如是，任爾六度萬行，如意隨心，三藏十二部，懸河舌辯，而一隙于幽隱，知見必留世間。則千仞之堤潰于一蟻，星星之火勢至焚天。若不如是，安能難行苦行，大作功德？舍身飼虎，割肉稱鷹，求得法而斷臂，求弘法而抉明，皆不能辦。為悅群情，見見心心，世無拔俗大夫雄。若能如是，則獨往獨來，縱橫上下，世無險魔難。徑路雖絕，而風雲可通。若能如是，則何玄不証？一乘畢竟空，涅槃一切智智，斯可問津。堂奧之基也，木之本、水之源也，烏可忽也。既植基本，禪乃可談。曰三十七菩提分三昧，曰三三昧，曰金剛三昧，曰一行三昧。為唯識、唯智及涅槃學，修是四三昧。若論禪定，百千億萬，無不俱修。

菩提分三昧者：菩提是宗，其總粹難。方便修分，有三十七事：曰四念處、四正勤、四如意足，為解脫分最初修事；曰五根、五力，為抉擇分事；曰七覺分，為見道分事；曰八正道，為修道分事。如是菩提分，能總得菩提，其基則在四念處，四事推之至極，則如來事矣。此無著《中邊》義也。龍樹亦言：三十七菩提分法至涅槃城，其根本在四念處也。《涅槃》亦雲：我說梵行是三十七助道之法，離三十七品不得三乘果，不証菩提，不見佛性。修集三十七品，入大涅槃、樂、我、淨。

四念處者：通言觀身不淨，觀受是苦，觀心無常，觀法無我是也。蓋有漏生死身，非常、樂、我、淨，而無常、苦、無我、不淨。無漏法身，即其無常、苦、無我、不淨，而得常、樂、我、淨也。小乘身處不淨五相，生處種子自性自相究竟，而詳于九想觀。小乘受處有漏皆苦，無漏不苦，心不著故，雖是無常，不生憂悲苦惱故，道諦攝故，不離三三昧十六聖行故。小乘心處過未心無，現心去疾不覺受樂，生滅如幻，念念不停無有住時，不得實相。小乘法處法識是心相，非神我相，心則顛倒，顛倒計我，何以不他身中啟我？小乘四念處，有性有共有緣，如〈千難品〉中

詳。小乘四念處三界俱有，其三十七品，初禪都具，未到除喜，二禪除行，中間三、四除喜與行，無色除喜行語業命，有頂除七覺分、八正道分，欲界亦然，此聲聞觀也。

摩訶衍身觀者：觀內身為行廁，緣成身車，識牛牽旋，是身無堅無常，相不可得，不覺無知，如牆壁瓦石，菩薩觀知是身非我身，非他身，不自在，是身身相空，妄緣所生，是身假有，業緣所屬，是身不合散來去生滅依倚，循身觀無我故空，空故無相，無相故無愿，緣合所生，緣亦無相，是為觀于實相。

摩訶衍受觀者：觀內受無來去，但妄想生屬先業緣，不在三世，觀知諸受不合散生滅入不生門，不生故無相，無相故不生，如是知己系心緣中，心不受著亦不依止，入空、無相、無愿三解脫門。

摩訶衍心觀者：觀內心三相無實，不在三世，不在內外中間，妄緣合生，外緣內想，強名為心。相不可得，無相無住；無生者，無使生者；無合散三際形對，無我無常無實。性不生滅，是靜，客塵相著名不淨。智者觀生滅不實，不分垢淨，而得清淨，不為塵染。

摩訶衍法觀者：法不在內外中間，不在三世，妄緣合生，無實無主，相不可得，無合無散，如空如幻，性淨不污，以無所有故，心、心所乃虛誑故。法非一異，緣生無性，是為實空，空故無相，無相故無愿，無愿故不見法生滅，入無生法忍門。此菩薩觀也。

更有大乘觀法。《大薩遮尼乾子經》：四念處有二義：初義、如般若；二義者、觀身念處是淨義邊，我今因不淨身，故得淨法功德身，得一切眾生樂見身。作是觀已，能得二行：一者無常，二者是常。觀一切眾生身，畢竟成就諸佛法身；以有法身，得平等心、無分別心，不起諸漏。觀受念處，眾生受苦而起悲心，眾生受樂而起慈心，不苦不樂而起舍心。觀心念處，觀于自身菩提之性不忘不失，正念不亂，如自性相，眾生亦爾；如自心空，眾生亦爾；如自心平等，眾生亦爾。觀法念處，不著常見，不著斷見，行中道見，以法眼觀，不著不失。

三三昧者。經言：菩薩以空無我行相攝心一趣，名空三昧；以寂滅相攝心一趣，名無相三昧；以苦無常行相攝心一趣，名無愿三昧。聲聞定多，常觀空門；菩薩慧多，常觀無愿；如來則定慧平等，常觀無相。又一相無相為空，無實成轉滅入諸法相為無相，無作無能入諸行相為無愿。經言：依此三門，能攝一切殊勝善法；離此三門，所應修學殊勝善法不得生長。能學如是三解脫門，亦能學真如法界三科、四諦、六波羅蜜、無量無邊一切佛法。以三三昧總攝一切妙善法故。龍樹亦言：唯佛一切智智，能達諸法實相，而菩薩以三三昧門，得實相慧，亦無所不通。

三三昧是實法，四念處是方便，行者自三十七品至涅槃城，從三三昧入涅槃門。夫無生法忍，必先以柔順忍而乃無弊，習定趨勢然也。六波羅蜜，般若主也，而必導以五度。三三昧般若也，而必導以三十七品。三十七品亦般若也，而必助以諸禪定法。龍樹有言：入三三昧有二種觀：一者得解觀，二者實觀。實觀者是三十七品。以實觀難得，次第說得解觀。欲界心散亂，當依上界禪定，四梵、八背舍、八勝處、九次第定、十一切處中，試心如御試馬，曲折隨意，然後入陣。得解觀中，心相柔軟，易得實觀，用是實觀，得入三涅槃門；一者空門，觀法我空，緣生無作者無受者；二者無相門，無有實法，但有其相，而男女相、一異相皆不可得；三者無作，既知無相，都無所作。三定是慧，而說三三昧者。定得實相，慧不從定來，則狂心發語，又三既三三昧，而同慧來者。定不獨生，力不獨作。三三昧如王，慧如大臣，君臣共營，行乃得成。空有二行，曰空無我。無相四行，盡滅妙離。無作十行，無常苦集，因緣生道，正與跡到。是三門，于四禪、未至、中間及三無色皆無漏性故，或系為有漏不系無漏故。初在欲界，成就其行，在色、無色。

若摩訶衍三三昧者，則不同小。小空生慢，學無相門，滅取空相。于無相中復生戲論，學無作門，不起三業，不求三界生身。大則三三昧是一法門，以行因緣說有三種。法空名空，空中不取相，是時空轉名無相。無相中不應作為，無相轉名無作。不得一時入城三門，直入事辦不須二門，通途更塞由他門入。小空緣苦諦攝五蘊，無相緣一法謂數緣盡，無作緣三諦攝五蘊。大則通緣諸法實相，以是三三昧觀諸世間，即是涅槃。佛或一時說于一門，或說三門。見多說空，緣生無性，無性故空，空故見滅。愛說無作，法無常苦，從因緣生，見已厭愛，即得入道。愛見等者，為說無相，男女等相無故斷愛，一異等相無故斷見。菩薩遍學知一切道，故說三門。《分別瑜伽論》：修瑜伽法不離三三昧，有教授二頌。菩薩于定位，觀影唯是心，義想既滅除，審觀唯自想，如是住內心，知所取非有，次能取亦無，後觸無所得。義想滅除為空門，所取非有為無相門，能取非有為無作門。《分別瑜伽》既不得來，修三三昧從《般若》說。又《大乘經莊嚴論》說五現觀伽他，如《攝論》引。

金剛三三昧者：最後最上三三昧也。念處為初，金剛為終，三三昧乃全。夫禍患生于七識，非三三昧不能屏除。四惑相應，無明住地，有履無記，日夜思量，起執計我，七識性也。唯識家言：金剛道後，執種盡淨，二障伏斷，至此乃圓。唯智家言：安住如幻五取蘊中，了知實相修金剛定，住此定中，除如來定一切三三昧具能入住，然一切界都無所得，超諸聲聞証入菩薩正性離生。涅槃家言：修大涅槃得金剛三三昧。譬如金剛，堅實無比，所擬之處，無不碎壞，而是金剛無有損折。無常無實，破散一切諸法，雖行六度，不見有一眾生。譬如金剛，寶中最勝，摧伏難伏，一切三三昧悉來歸屬。譬如金剛，淨見無礙，生滅出沒，如坐四衢，觀諸眾生去來坐臥。譬如金剛，摧破煩惱，終不生念我能壞結。譬如金剛，于一念中，變佛無量，斷沙界惑，一色現多，一音解普。是則研窮三學，金剛三三昧，為毀破七識而來。或阻七不擾，或安八不隨，或寂滅而靜，乃知金剛三三昧為窮源究委之大定也。得此三三昧，近佛乃能，隨順趣向，亦凡夫法，但知空門方便可修，不必定証實相也。無著《金剛論》：如畫

金剛形，初後闊，中則狹。是般若中狹者，謂淨心地。初後闊者，謂信行地，如來地也。《般若經》：行、引、修學，初以般若力破蘊令空，入寂相後出住六情，還念寂相知一切空，地前行慧如金剛初闊也。不可說有無，言語道斷，初地引慧如金剛中狹也。入甚深禪，又以般若破禪與禪緣，二地與七地以去，修慧如金剛後闊也。初中後三皆從事摧破，學一切法而學無相，除遣一切是學無相，不住有想是學除遣。是為能破。成實家言：金剛三昧，實唯一空。般若家言：金剛三昧，唯是實相。以一實相，遇法遇行，無不摧破。則修金剛三昧也已。

一行三昧者：菩提非智，煩惱非惑，而實相同。四諦非以諦証，非以智証，而平等得。第一義諦分別都空，一相無相是為定相。塵塵沙界，都現太平，一色一香，無非中道，不將迎于一法，亦不遠離于一法也。于此有疑：金剛三昧，破壞于一切，一行三昧，收容于一切，豈非相反，何可相成？然無疑也，皆無想也。說此無想法，是諸法除遣，即此無想法，亦諸法不背。但能無想，兀兀騰騰，不著一念，瀑流恆轉，不相隨，則破壞與收容，無相妨礙歟？于此又疑：四念處定為無常苦與無我空，而一相定則常、樂、我、淨，豈非相反，何可相成？然無疑也，皆實相也。有漏實相，無常苦無我空也；無漏實相，常、樂、我、淨也。一相實相，非常非無常，非凡外常，非聲聞無常也。解脫對治是謂非常，般若實相非常非無常，法身中道一切是常。三德一時，雲何相反而不相成？是之謂一行三昧也已。

複次，龍樹有言：小乘修定以定為近門，大乘反以戒慧為其近門。蓋言修定，不可執定于定也。數息觀、不淨觀者，最初修習，佛常為教，佛弟子舍利弗等亦以接群。龍樹有言：是二定者，誠甘露法門也。無著《六門教授習定論》，舉止舍亦至要也。

文字五

文字般若能爛，而後觀照般若不謬；觀照般若既習，而後實相般若相應。故文字之功，斯為至大。如來贊嘆月夜毗曇，佛弟子從事設界結集是也。文字之研，亦為最始，無著重多聞熏習，般若重十法句義是也。從十二部出修多羅，于是有大小通慧文字。從修多羅出方等經，從方等經出般若波羅蜜，于是有相性二慧文字。從般若波羅蜜出大涅槃，猶如醍醐，于是有究竟極慧文字。

通慧文字，諸學由來，舍此無基，故為俱舍立科。此菩薩行道相智中之一切智也。

二慧文字，因果差別，行乘兩輪，故為瑜伽立科，為般若立科。此菩薩行道相智中之自乘法也，此龍樹、無著學為菩薩行自分學也，此玄奘、羅什諸譯為菩薩行根本文字也。

極慧文字，江漢所趣，一切一味，故為涅槃立科。此菩薩行道相智中之一切智智也。

甚矣，畢竟空難知，如來垂跡，夫乃昌言，學者粗鈍，安可驟悉？然佛境菩薩行既已立教，如何佛境，如何菩薩行，不明極慧，一切懵然，自始至終都非全相，舉足下足滯于一隅。所謂媛媛姝姝，一先生談，烏足以談佛法也。

萬派朝宗，先須的認，峰非止境，愈擴愈弘。弗雲解耳，將以行証。弗雲初耳，種不可誣。是故四科文字，應須悉爛。初必分詳，繼應融貫。四科闡義，當于別明；四科讀法，應于今敘。

初、俱舍文字科。是科應分三段，以次研讀。初、有部、經部；次、《俱舍》、《正理》；後、《雜集》、《毗曇》。

且初、有部、經部者：五事分部，曰上座、大眾。大眾由《增一阿含》來，多大乘義，義必分別，如大中道，不執一隅。是故二百年間，即分九部，皆可謂之分別論。有部從《六足》而來，一味和合，三百年初，始有雪山上座。時分別論則勢極盛行，世友惡其不純，建立《發智》，號一切有。崇論如經，方之曰身，《六足》雖師，儕以為足。五百羅漢複為廣論，曰《毗婆沙》，敘一切異己，盡情斥毀，以定一尊。此雖武斷無情，而諸部凋傷，反因此而猶存梗概也。道非決定，心豈畦町，雖三百年犢子、正量相繼敦本，而化地、法藏極端相違，更出飲光，亦難阿順。迨四百年，經量部出，其所諍理，視化地之乖為尤烈也。經量部者，初為譬喻，不遵《發智》而《法句》是崇。童受著書，《喻》、《痴》，幾等莊嚴。阿梨跋摩，亦譬喻師，《成實》論義，多符一心也。由譬喻趣進經部，其譬喻之細心一心，同于《攝論》一類師者，難以自存。經部細微，隨界多界，救義以生。既足以破婆沙，又足以啟大乘。此真部執之最上者也。室利羅多無慚上座，經部毗婆沙惜未傳來。更有世親之師曰佛陀蜜，又有世親後出曰婆藪跋摩。作《四諦論》，粗細具詳。蓋始于《出曜經》，終于《四諦論》，研而有系，經部之說思過半矣。是為初段有部、經部也。（經部一段，采用呂秋一說十之八九。）

次《俱舍》、《正理》者：世親朋經部義，破有部執，學《婆沙》于迦濕彌羅，作《俱舍》于建陀羅國。新薩婆多眾賢崛起，救返有部，大破《俱舍》，作《顯宗論》及《正理論》。《顯宗》明目，《正理》破他。西域稱《俱舍》為聰明論，世親則稱《正理》為有思想而為命名曰《順正理》，一斥《雹論》，一雲《正理》，度何至哉！二論諍義，應值鑽研。奘師所聞西域眾說，均授普光，則《光記》其最也。圓暉、遁麟雖有精華，然順有部，不可訓矣。是為中段《俱舍》、《正理》也。

後《雜集》、《毗曇》者：《雜集》一分救《俱舍》，一分闡法相。其一分救《俱舍》有三義，曰：阿毗達磨，曰組織規模，曰隨順經部。

且初、阿毗達磨者：《俱舍》題名曰《阿毗達磨俱舍論》，《雜集》題名曰《大乘阿毗達磨雜集論》，均為阿毗達磨。以《雜集》一分闡述法相，別之曰大乘，以蘊

、處、界廣分別，有三十八種法門，均之曰阿毗達磨。《俱舍》之阿毗達磨，為世親小乘之終，《集論》之阿毗達磨，為無著大乘之始。無著《集論》，固自用阿毗達磨法門，以分別大乘法相也。至安慧《雜集》，則意取大乘法門，以救其阿毗達磨之《俱舍》矣。

組織規模者：安慧救《俱舍》而糅《雜集》，規模針對獨在《發智》。《發智》組式，法則為三科，修則為四諦，凡敘一法，而皆以攝相應成就法，立自簡他。《雜集》三科、四諦，正用《發智》法修，攝相應成就，亦用《發智》工具，但于各門，俱增大義數條而已。至于論品，則作論辯論悉詳，而于因明亦所不離，猶《解深密?成所作品》之用意也。

隨順經部者：此正營救《俱舍》之至意。《雜集》敷義，誠不若《唯識》微妙無疵，《唯識述記》辯論所在，亦不僅數條，披尋自了，不用贅談。《雜集》營救，姑敘三義：世親弟子營救《俱舍》，不獨《雜集》。《光記》所敘，皆從西域師來，最宜用意。

以是三段義，是故此科應讀《婆沙》、《六足》、《出曜》、《成實》及《四諦論》，而終之《正理》、《雜集》，《俱舍》之研，足殿小乘，而業告成。

次，瑜伽文字科。是科宗在舍染，《解深密經》說十一粗重故。宗在舍染，故先須讀《辯中邊論》。〈相〉、〈障〉、〈真實〉，以染為境；〈對治〉菩提分，舍染為行；〈分位〉、〈得果〉，不淨、淨不淨、清淨，五果、十果、三乘，通以擇滅為果也；獨提般若〈無上〉大乘，金剛十句，遠離二邊，為《中邊》立論，舍染而直証菩提也。《中邊》熟讀，此科得髓，乃足廣研。應分二門：唯識，法相。法相揉古，唯識創今。法相廣大，唯識精純。顧法相結局，亦必精微而歸諸唯識，故總曰唯識學。唯識學有二要：一匯小，溯部執溝澮入大乘江河，法來有自，法通無衰也。二匯大，統散漫奔流歸汪洋瀛渤，彼惡取空方廣道人無勢也。不研唯識，其心不細，易入歧途；其陋不除，易流伺，是故學佛入門，須始唯識。

唯識門者，始研《攝大乘論》，終讀《成唯識論》，中間開鑰，有《二十唯識》、《百法明門》。

《攝大乘論》，立染污末那，成藏種賴耶，是為創建，以是談〈依〉；三性緣起，以是談〈相〉；是為對小之境。無分別〈入〉、而〈因果〉、〈差別〉，十度、十地，依《般若》、《華嚴》；又三學增上，皆對小之行。〈斷〉從無住，〈智〉敘三身，又對小之果。古人著書樂說創立，而悉有《阿含》。《攝論》綱目十相，本《阿毗達磨經》；境、行、果三，摹《解深密經》是也。

《攝論》創初，持義未審，《成唯識》義，博大精微。此科大本，淵深挹注，在《

成唯識》，故讀斯《論》，應大研求。《論》分相、性、位三段：相以能變、所變、有支三性為詮；性以真如識性為詮；位以漸次得果為詮。其能變中，五教十理而立八，五教六理而立七，創而有因也。三性依他，以毗曇義敘也。其間種熏四分，三依四緣，義至多也。最初別破外小我法，學至博也。

此科創立於無著，而光大于世親。世親而後，繼續有陳那，而集成於護法。十大論師，難陀、親勝雖有別立，而勢甚微，唯獨安慧與護法義乖諍至多，厥後清辨亦與護法諍辯尤烈，非複聰慧夙習、陳義能微，而誰堪語是？後有法稱，其學不純，從其說者，種種過生。西域以是而止，東土因以開宗。

奘師學法相於戒賢，學唯識於勝軍。出其門者，厥有二派：一為窺基，百本疏主，現存《述記》、《樞要》、《別鈔》，輔以《法苑義林》而已。靈泰《疏鈔》，智周《演秘》，道邕《義蘊》，如理義演，皆此派附庸；而慧沼、慧日論《了義燈》，則此派捍城，陳述敵義，猶毗婆沙足存諸家梗概也。一為圓測，籍雖不多，視所對辯，亦知其略。泰賢《學記》，集敘多家，可當讀本。自此而後，微乎渺矣。陳那之《觀所緣緣》，掌中觀相，清辨之《掌珍》，鳳毛麟角，此方猶存，以研唯識，至足寶也。

法相門者，略於《雜集》，廣於《瑜伽師地》，中間《五蘊》、《莊嚴》，是其將伯。《雜集》三科四諦，攝相應成就，式雖小用而義則大糅。《瑜伽師地》五分十七地，汪洋廣博，法相之繁翳誰能並？〈本地分〉境攝九地，行攝六地，果攝二地；〈抉擇分〉則抉本精華而立新義，瑜伽自分盡于此矣；更解經儀，則曰〈釋分〉；釋名義，別曰〈異門〉；釋三藏三學要義，曰〈事分〉；又因論生論，而廣大之也。〈本地〉行六地中，菩薩學相最要，〈真實義〉外，在〈力種姓〉，《莊嚴》于是開一為六。《瑜伽》大悲，百十一苦所緣生起；《莊嚴》大悲，三十六偈相用分別。詳其異處，《瑜伽》糅古不盡，《莊嚴》又踵事增華。抉擇菩薩功德破惡取空，糅《寶積經》十六相義為教授資，引《解深密》全經不遺為研求依，此其心中心要中要也。若夫糅古，觀其所詳，則五分皆有，不獨一二。尋、伺三地，糅《緣起經》。〈三摩多〉，糅《出離經》、《離憂經》、《蕩塵經》、《靜慮經》、《三相思惟經》、《四檢行定經》、《四趣道經》、《四淨勝經》、《五支經》、《心清淨必丘思惟五相經》、《六出離戒經》、《六境不受想無想經》。〈思所成地〉，糅《諸伽陀經》。〈聲聞地〉，糅《師子吼經》、《普賢經》、《難陀經》、《七日經》。〈菩薩地〉，糅《轉有經》、《無盡意經》。此〈本地分〉所糅古也。〈抉擇?尋伺地〉，糅《出愛經》、《八苦經》、《三士經》。〈抉擇?三摩地〉，糅《身念處經》、《摩訶俱舍羅地因緣經》、《眠經》。〈抉擇?聲聞地〉，糅《月喻經》、《伐地迦經》、《乞食清淨經》。〈抉擇?菩薩地〉，糅《五種過惡經》、《尸羅迦經》。此〈抉擇分〉所糅古也。至若〈釋異門事〉，彼三分中多糅四《含》。糅古無邊，此唯大略。總之，不熟十二部，不足知《瑜伽》海若之弘；而不爛《瑜伽》，不足解十二部幽玄之妙。能容而後廣，多集而後大，枯守五分，有

十七地，而曰瑜伽師在是，吾不敢知也。

或曰：《瑜伽》百卷，多文從節，曷讀《顯揚》？然《顯揚》闡教，非節《瑜伽》。《瑜伽》糅古，《顯揚》又糅《瑜伽》。九事四淨義，勝抉擇義，則舍染取淨之所以立教。七種善巧，乃九事中泛應曲當之根。四無倒品，現觀、瑜伽及不思議，又九事中無邊功德之積。糅古立教，九事四相與勝抉擇，名之曰攝。創新樂說，所余八品，名之曰成。

以《中邊》始，以《顯揚》終，此所謂無著無上學也歟？

三，唯智文字科。是科宗在舍染而取淨。有漏種依淨藏，而七識執取賴耶。無漏種寄染藏，而八識隨緣末那。《密嚴》滅胎藏染生，斷我識害，則七不執取。《密嚴》標如來淨藏，悟無分別，則八不隨緣。實相般若，法法不其戲論，則七不執取。方便般若，念念一切智智，則八不隨緣。此拔本塞源之學，亦即舍染而取淨之教也。爛唯識後，繼之唯智。從事淨藏，不滯染藏。賴耶不隨緣，得舍染頓義，以是見佛慧之大也。是故學佛升進，應研唯智，龍樹學者，唯智之最上學也。

《龍樹傳》中，敘龍樹學，厥有四分：一者、《無畏論》十萬頌，《中論》及釋，學之宗主，義之精奧，悉于此詳，是為總《中論》。其支有三：抉二十七品之十二品為入門之徑，曰《十二門論》，補〈三相品〉中未盡義，曰《七十空論》，漢無藏有。闡〈觀緣品〉余義，曰《回諍論》，此一分說，是創立義，是精微義，義明中道，中道是二諦，而歸旨于一相無相。補《中論》缺使之大備者，其唯提婆乎？有四宗論而邊見可以包容，舉假實義而二諦更不落虛，其龍樹之三益者乎？四百論中之《百論》及《廣百論》，此土幸存矣，繼起有羅羅，釋八不義以常、樂、我、淨，贊般若義以二十二頌，亦足多也。釋《中論》有八，此土唯來其三。青日本《無畏疏》，是以極純，安慧、清辨如何可及？《般若燈論》，品品最後引大勇猛証畢竟空，余所不談，俗有真無之說因是以立，而大異于《中觀》正論。月稱之後，轉展互破，以是膠葛不寧，而《中論》學晦矣。清辨《中觀心論本釋》，《中觀攝義論》，亦彼破瑜伽正異說之書歟？八家之說，佛護、寂護略見引于《燈論》，唯然燈智不詳。

二者、《大智度論》，十萬頌，解《般若經》。《般若經》十六分，前五全敘，中五散出，後六分詮六度，而最後一分詮畢竟空。《智論》所釋，在前五之第二，析為五般若，曰：舍利弗、須菩提、信解、實相、方便。《智論》釋最初〈序品〉百一十法門，已得三十四卷，以後除經文二十七卷，唯三十九耳。什公雲：論十萬頌，若都詳釋，何止千卷？此方根劣，譯十之一，釋經之論，但順文解而已。然方便般若陳義絡繹，猶足資挹，而于《中論》實大有裨。如雲先說分別後致之空，如雲若不執取佛亦說四緣義，是其例也。若使全譯，所可取者，不更多歟？悲夫福薄，實無可言。此一分說，是糅古義，是廣大義，未見其繼，東土三論，亦不稱四，是

何故耶？

三者、《十住毗婆沙論》，五千頌，解《十地經》。今所譯存，但初、二地，已十七卷，若使全譯，無逾百卷，汪洋廣博，《智論》之倫。忍、進、止、觀，修習無路；方、愿、力、智，圓滿難知。應發大愿，繼述什公。

四者、《菩提資糧論》，五千頌，闡菩提分義。《資糧》其始，《中論》其至，《智論》、《婆沙》又複廣博。其斯為龍樹學也歟？

《密嚴》，是唯識、唯智之通經。詮五法、三自性、八識、二無我之為教，三界輪轉，源于賴耶，與唯識同。然獨尊如來藏，賴耶即密嚴，心境界非真，真為慧境界，悟無分別，生密嚴國，豈非與般若同歟？《密嚴》雲：《十地》、《華嚴》等，大樹與神通，《勝》及余經，皆從此經出，如是《密嚴經》，一切經中勝。據是，則《華嚴》、《勝》、《楞伽》，皆是通經也。《華嚴》為唯識六經之一，又與《般若》安住一切智智；世親注《十地》，龍樹釋《十住》，地前三方便，十地斷十障，漸次而行布，與唯識同。位位皆成佛，一切入一切，行布而圓融，與般若同。詮根本無所得，詳後得無邊行，總別同異成壞，妙義重重，唯識、唯智之通經決然矣。《勝》詮如來藏自性清淨心而為客塵所染，與唯識同。說滅諦常住，自性清淨離諸煩惱，與般若同。亦唯識、唯智之通經歟？《楞伽》與《密嚴》，皆以五法、三性、八識、無我為教，與唯識同。《楞伽》與《密嚴》，皆詮如來淨藏，與《般若》同。是不亦唯識、唯智之通經乎？

經固有通，學何必封？龍樹、無著，如車兩輪，慎毋惑解經家誤陷迷途可也。

四、涅槃文字科。此科以《大涅槃經》為大本經，說一乘，說常，說佛性。說一乘以《法華》為先導，諸說一乘，舉有七經，如先所說。四教醍醐，亦如先說。如來四十九年說無常義，臨入涅槃，乃說常義，開權顯實，法住是常，如來不滅。常是法身，樂是涅槃，淨是正法，而我則是佛。眾生雖未成佛，而有成佛之性，後必成佛。于是《大獅子吼》說眾生皆有佛性，以視《法華》開示悟入佛之知見，得一切智智，更別具以一義也。夫木有其本，然後扶蘇；人有其源，然後江海；人有佛性，然後成佛。是蓋與人以決定義，俾知作佛，更有依據，無所恐懼，斯乃不可不治之經歟？說法以《涅槃》最後，設教以《涅槃》究竟，研學以《涅槃》圓融，文字以《涅槃》美滿。是故學佛畢事，應治《涅槃》。

《涅槃》，遵據世親《涅槃論》，立四句義以讀經：起〈哀嘆品〉訖〈大眾所問〉，為法句；起〈現病品〉訖〈高貴德王〉，為法行句；〈獅子吼〉為法義句；〈迦葉〉、〈陳如〉為法用句。最初二品，敘當時事，非四句攝。

法句之法，即常、性、經三。雲何得長壽，凡二十三偈，作三十四問；佛就常、性、經三，深微奧義，一一酬答，則法句也。

法行，為五行十德，皆一乘之由來。葛藤庇本，勿傷于斧尋，天豈階升，而通于方便，則法行句也。

法義有二：一、明佛性，辯眼見、聞見；二、明涅槃，修道見性、讀經見性。佛性雖同，見不見異，而聖凡各別，則法義句也。

法用為：一、用根；二、用諍；三、用分別；四、用隨自說，皆如來境界，則法用句也。

此略提綱，若欲詳談，見諸別冊。此經以外，有諸附庸：曰《金光明經》，詳法身義；曰《大法鼓經》，詳如來解脫義；曰《大雲經》，詳法界義，詳四倒四不倒義。姑舉一二，以例其余。

《大涅槃經》有四大要：一、戒；二、定；三、修；四、三德相應。戒亦為涅槃，由戒而定而慧，以相應于寂滅。若非為涅槃，則戒可緩，經所謂乘急戒緩也，經所謂為取秘經、戒亦可犯也。定亦為涅槃，金剛三昧、首楞嚴三昧，入無余、入無相、入大定窟，若非為涅槃，則世界禪定、四禪三空，三界流轉，亦何所為？修亦為涅槃，五行十德，舉足下足，皆涅槃道。《無量義經》四諦十二緣，法猶是也，而義則大異于緣覺、聲聞。若非為涅槃，三學不出生死，亦何異牛狗炙身之苦，一類威儀之拘，邪執邊執之惑歟？三德相應，更為大般涅槃。《經》雲：解脫之法，亦非涅槃；如來之身，亦非涅槃；摩訶般若，亦非涅槃。解脫非涅槃者，聲聞無大悲，亦耽寂酒，必真如出所知障，大悲般若常為輔翼，必如來藏出纏，法身盡未來際作諸功德，乃大涅槃也。法身非涅槃者，佛常非入滅，佛我大自在，必悉佛境無過非尼夜摩性，又必知佛境証空為畢竟全空，乃大涅槃也。般若非涅槃者，有得即煩惱，有証非菩提，必觀縛解都無所得，又必本法界以學一切，乃大涅槃也。

諸學佛人，毋謂侈談凡非聖境，新學菩薩，文字窮源，不數年間，必知梗概。先得佛之知見，念念皆一切智智，則無論何科，所學歸極，滴滴赴壑，法法登峰，豈不懿歟？若不知通，昧于其的，任學何科，都墮隅負。大道自全，得少為足，又如之何其可哉？

複次，四科之外，為論議資，又必學習因明。此學必尊陳那，籍重《理門》，三十三過以研似立，十四類以研似破，皆《理門》所生也。學中藝伎，日研日精，後有

作者，必勝于前。月稱而還，應留意焉。

歐陽漸為其子格刻所作文，以抒沉痛，而度苦厄，計《釋教》一卷，連圈計字一萬九千六百八十三個，簽條尾葉，共支國幣一千一百九十元正。

中華民國卅（1941）年十二月支那內學院蜀院識

（選自《歐陽競無先生內外集》第一冊）

注：1926年，歐陽漸為支那內學院作為居士道場，立"師、悲、教、戒"四字院訓，"師、悲"著重對於人群社會的責任，"教、戒"強調學佛的理論與實踐。自次年始，陸續為院訓作《釋師》、《釋悲》、《釋教》，規劃辦學理念和治學方向。《釋師》、《釋悲》，發表于1927年出版的《內學》第三輯；《釋教》作于1941年，由支那內學院蜀院單篇印行。對"戒"的解釋，沒有完成。——編選者注

第三編 《佛典研究》

《瑜伽師地論》敘卷上

總略第一

敘曰：應學瑜伽學。瑜伽，梵語雲相應，雲何相應？相應者如如，相應者方便善巧，相應者菩提涅槃。學瑜伽學能自他利，曰瑜伽師。攝一切理盡，攝一切事盡，所依能持，其像如地，曰地論。非他師，非他論，依主釋，曰瑜伽師之地論。師攝論盡，論攝師盡，持業釋，曰瑜伽師即地論。將敘瑜伽，略舉四義：一曰五分以敘事，二曰十要以提綱，三曰十支以暢義，四曰十系以廣學，而以緒言終焉。

五分第二

且初、五分以敘事者：雲何《瑜伽》五分耶？三乘根本，有十七地以為宗要，攝文義盡，曰〈本地分〉；釋地中不盡要義，曰〈抉擇分〉；釋地中諸經說解儀則，曰〈釋分〉；釋地中諸經名義別異，曰〈異門分〉；釋地中三藏眾要事義，曰〈事分〉。初一是論，故稱《地論》，後四為釋，釋不名地，攝故名分。曰《瑜伽》五分。五分敘事雲何耶？曰：本論一分，以三相攝十七地；釋論四分，以重明攝本論及經。

雲何本論一分，以三相攝十七地耶？今且略舉其事。凡教所明，惟有三種，曰境、行、果，是稱三相，依境起行証果，如是而為教故。境攝九地：五識及意曰境體，一切皆以識為體故；尋、伺三地曰境相，上下粗細別故；等引及非有心無心曰境用，定散隱顯別故。行攝六地：聞、思、修三曰通行，三慧修行被一切故；聲聞、緣覺、菩薩曰別行，隨機修法成自乘故。果攝二地：有余、無余是曰通果，自性無住，別惟被大，此不詮別，惟普被故。是為略說十七地義。

次復廣說者，顯由五門，六識身轉，謂自性門、所依門、所緣門、助伴門、作業門。此作業一門，意地開十五勝相。此自性五門，色心所攝，意地則開十義。十五勝相者，始于分別所緣、審慮所緣，終于內分死生、外分成壞。成後諸法二十四類，諸如是等。十義者，色聚相應三世四相，四緣三性，增處釋名，善巧攝事。增處法差六百六十，諸如是等。法相無邊，一識呈現，豈其識外別有因緣？是為五識身地、意地，敘境體事。

顯由五門，三界法相，施設建立：一、界門，界地處所業報因果，以九門敘。二、相門，則釋尋、伺七相。三、如理作意門，善及福慧，求受正行，三乘資糧，以八相敘。四、不如理作意門，外道異論以十六敘。五、雜染門，煩惱及業以九門敘，生四門敘。是為尋、伺等三地，敘境相事。

又復應知：七與四十本末作意，明定方便；四相、三十二相，明定相貌；五蓋、食

非食，明定障礙對治。其前安立門，初禪五法，四禪十二支分及其別名，明靜慮義。其後經宗要門，明解脫、等持、等至義。如是說等引地。自性不定，有十二相，說非等引地。一、地門；二、心亂不亂門；三、生不生門；四、分位門；五、第一義門，如是說有心無心地。是為三摩多地、非三摩多地、有心無心地，敘境用事。

複次，于五明處聽受、憶誦、無倒解了，名聞所成地。內明四相，謂三藏等事、大小乘句四十五想、聖教等義、增十法門教應知處，醫方四巧，因明七事，聲明六相，工業十二，如是五明，世、出世間，法相事理，一切攝盡。菩薩利他，如車有輪，如舟有楫，是故應學。

于三種相，相應善巧，名思所成地：一、思性清淨，有其九相。二、思擇所知，相性有無，各得其五，于有知有，于無知無。三、思擇諸法，謂擇契經及與伽陀。勝義伽陀有四十四，明無我理；意趣伽陀有五十一，明三學義；體義伽陀有九十一，明法性別。如是三相，一切了義，抉擇無遺，是故應學。

于四處七支，相應善巧，名修所成地。生處無缺，為處所修；聞法圓滿，涅槃為首，熟解慧熟，為因緣修；修習對治，為瑜伽修；世、出世間一切種淨，為証果修。如是四處七支，廣聖教盡，除此更無若過若增，是故應學。是為聞、思、修三地，敘通行事。

聲聞地四持：初、種姓持，說其戒事；二、補特伽羅持，說三學依事；三、安立持，說止觀事；四、世、出世持，說定慧事。初、持三品。觀行所依，先須種姓，故先之于〈種姓〉。自性建立，相及有情，總略為一，名為種姓。聖道有種，方便趣求，故次之于〈趣入〉。正入二性、八建立，已入八相、四有情，總略為一，名為趣入。已入聖道，便出塵行，故次之于〈出離〉。三界世禪，離系解脫，二種離欲及其資糧，總略為一，名為出離。夫資糧者，自他圓滿，善法樂欲，戒根律儀，于食知量，寤瑜伽，正知而住，善友聞思，無障慧舍，沙門莊嚴。如是多義，戒學所攝。是為初持種姓瑜伽，說戒事。

次持、十七，約為三聚。初聚、為學，有其六事。能証出離二十八類，由十一義差別建立，如是說品類建立事。有分別、無分別、事邊際、所作成辦、五停心、五善巧、四禪、四諦，如是說所緣事。諦定神變，說教授事。三學三根，及三解脫，正說學事。十想對治，說隨順學法事。是為初聚六事。次聚、瑜伽，有其七事。四壞四力，作意依緣，學修及果，次第說七。是中有四想修，有三十七菩提分修，為瑜伽修，應勤修學。是為次聚七事。三聚、雜義，有其四事。如是三聚，諸多妙義，是為二持補特伽羅瑜伽，說三學依事。

三持、安立，則有五事。佛法鄭重，教學儀軌，如應作已，然後安立。安立五事者：一、儲定資糧；二、引定遠離；三、正說定相，止九住心、觀四種慧，三門六事

，九種加行，是為心一境性所說定相；四、止觀淨障；五、作意証定，取相得定。如是五事，鄭重安立，是為三持安立瑜伽，說止觀事。

已得作意瑜伽師，已入少分樂斷。或念世間趣，則以作意對治，離三界欲，八定、二定、五通，生處及相，一切有漏功德，次第修習，如是略為一事。或念出世趣，依四諦境，起七作意，乃至証得阿羅漢果。此七作意，分配五位：了相方便位，勝解善根位，遠離見道位，觀察、攝樂、加行、究竟則修道位，果則究竟位，如是略為一事。是為四持世、出世瑜伽，說定慧事。

聲聞三學：戒亦律儀，平等平等；定亦取相，平等平等；慧亦少分，平等平等。然對治適用，非論勝劣，平等非終，根本資始。大乘利他，無不應悉，本乘自利，不厭求詳。如是四持，說聲聞地。獨覺攝聲聞藏，此論簡略，惟說五相，今姑不敘。

菩薩地，三周明義，立為四持，開為十法，廣為二十七品。

初周十八品者：因持于果，前持于後，種姓為本，有大勢力，立〈種姓品〉，為種姓持。資糧具備，希望遂生，求果利他，自然欣愛，立〈發心品〉，為發心持。既發心已，方便求學，學相有三：曰所學處，曰如是學，曰能修學，立十六品，為菩提分持。曰所學處者：菩薩觀行，利他為本，故先之于〈自他利〉。行不孤起，必依于理，故次之于〈真實義〉。既証真實，遂有妙用，故次之于〈威力〉。威力何作？成熟自他，故次之于〈成熟〉。如是七法五品，說所學處。曰如是學者：菩薩欲于初所學處，精勤修學，先應發愿，愿是勝解，解已求法，自既得法，應為他說，說已自修，教授教誡，令他修斷，便能發起善身語意，為十力種子，名〈力種姓〉。如是一品，說如是學。曰能修學者：始于自分，中于勝進，終于得果。自分之初，修造自利，故先之于六度。自分之實，修造利他，故次之于〈攝事〉。勝進之初，行隨緣行，故次之于〈供養親近無量〉。勝進之實，行內証行，故次之于〈菩提分〉。因成言功，果滿稱得，故終之于〈功德〉。如是十品，說能修學。立是三學十六品，為菩提分持。是為初周十八品種姓持。

此周明十二住所行之法，詳前略後，詳因略果，是故名種姓持。〈種姓〉、〈發心〉及〈自他利〉，入道之基，勝仗基起，是故應學。〈真實義品〉，二智四實，中道義成，凡小偏空，如湯沃雪，論以是為宗，宗以是為依，是故應學。六度各九，〈菩提分〉中有十五行，曲暢其事，抉擇其義，殊勝殊勝，廣博難稽，是故應學。是故初周名種姓持。

二周四品者：種姓具備，菩薩相成，故先之于〈相〉。家及非家，五相依處，故次之于〈分〉。相分行法，從意樂起，故次之于〈增上意樂〉。行起于樂而依于位，故次之于〈位〉。是為次周四品發心持。

此周明十三住能行之法，修造功強，行用漸勝，隨彼前法，起此後修，故又名隨法持。始于具相，昌于意樂，歸于極住。哀愍愛語，勇猛惠施，《解深密經》，是為具相。七相憐愍，十五意樂，十事所行，是為意樂。種姓勝解，位在地前；極喜三學，有功用住，位至七地；無功無礙，最上最極，位為究竟，是為極住。是故次周名隨法持。世俗發心，位在初住；真証發心，位在初地。是故次周名發心持。

三周五品者：始于自分，中于勝進，終于得果。菩薩自分，利樂有情，不取涅槃，長輪生死，故先之于〈生〉。法爾趣生，法爾度眾，故次之于〈攝受〉。行必依地，自分階級，故次之于〈地〉。依地起行，始從勝進，終至究竟，行成熟行，故次之于〈行〉。大劫勤功，終不唐果，本心暢遂，建立攸成，故終之于〈建立〉。是為三周五品加行持。

此周約十三住為七地，重明因果，以鄰果因，詮極因果，故又名究竟持。無住功德，盡于未來，鄰果加行，與初周異，是故三周名加行持。

三持以外，更有四持，但敘品次，不別立文。如是說聲聞四持、菩薩四持，是為聲聞、獨覺、菩薩三地，敘別行事。

複次，有余依三相：一、地；二、寂靜；三、依；無余依三相：一、地；二、寂滅；三、異門。是為有余依、無余依地，敘通果事。以上三相六事，略為一處，是名本論一分，以三相攝十七地。

雲何釋論四分，以重明攝本論及經耶？重明攝論，惟此〈抉擇〉。重明及經，惟余三分。抉擇攝論者：初、抉境義。抉〈五識身地意地〉，略義十門，廣義六門。略義門中，因緣八相，分別五相，建立賴耶，大乘教明，唯識宗成。廣義門中，自性差別，次第依止，及與攝義，都為六聚，名十九義，色有十義，諦等五聚，如是種種，蘊善巧攝。界相等略，界義等廣，都十八義，界善巧攝。處攝六義。緣起五義。處非處四。義及教因廢立次第，次第之中作業假實，諸如是等八門分別，境無境等依處証得，攝食諸句六門分別。如是種種，根善巧攝。此六善巧，多門分次，中道教明，法相宗成。二宗事相，〈本地〉所略，〈抉擇〉所詳。〈抉擇〉于〈本〉，即彼前義攝入重明，為文攝文。前未明義，更複加詳，為文攝義。抉擇要義，勒不盡文，為義攝文。以抉擇智擇諸地異，為義攝義。是故治《瑜伽》者，二分合治，義始備悉。此廣略義，境中精要；菩薩地義，行中精要；是故古諸譯家，全論未暇，《決定藏論》、《地持善戒》，惟獨先行。抉〈尋伺三地〉，雜抉二門，正抉三門。抉〈三摩多地〉五門。抉〈非三摩多地〉，詳明十二能所對治。抉〈有心地〉，明能所依，及俱有依。抉〈無心地〉，心不生因，有其七種。是為抉擇境義。

次抉行義。抉〈聞所成地〉五門。抉〈思所成地〉，雜抉五門，正抉則有色、無色、有見、無見，是等廣辨二十九門。抉〈修所成地〉，明十六修義。如是為通行抉

擇。

抉〈聲聞地〉，總有三門。此初門中，五義通難，成無種姓，無姓決定，用義斯彰，亙古亙今，無邊無際，惟此用義，流轉不逾。律儀十三，雜六十四，皆此要義，是故應知。抉〈菩薩地〉，〈發心〉、〈二利〉，皆有抉擇。〈真實品〉中，約五事辨真實義，有十門、十二門；約三性辨真實義，有七門、九門、十一門。〈本地〉所略，〈抉擇〉所詳，中道義在，鄭重殷勤。〈威力〉、〈成熟〉、〈菩提〉、〈力種〉，六度覺分，亦有抉擇。〈功德品〉中，破惡取空，論不信大，無倒証法，殊勝証住，為初引導。《解深密經》，為後憑依。此與〈真實〉，惟此宗有。彼性此用，彼初此終，妙味醍醐，智者應學。〈住〉及〈建立〉，亦有抉擇。此外易明，不復再抉。釋《寶積經》，總十六相菩薩教授，于此綦詳。如是為別行抉擇，是為抉擇行義。

次抉果義，〈有余依無余依二地〉有十四門。是為抉擇果義。

如是抉義，一分所聚，是為本論余分，重明攝論。

三分及經者：初、〈攝釋分〉，有二義明：一、說法五分；二、解經六義。說法五分者：諸佛語言，九事所攝，依經造論，不離其則。諸說法師于諸聖教，先為自求，若文若義，次複為他，轉五種釋。又應勤求師德，十種安立自身。安立身已，處五大眾，以可喜樂八種言詞，為眾說法。又安處他，令住恭敬，無倒聽聞。又應先贊大師功德。若有具足如是五分說法者，即令自他樂利，得五勝利。又經中說：住學勝利，慧為上首；解脫堅固，念為增上；依彼五分，分分詮表，是為勝利。但此勝利，惟系聲聞，聲聞是佛隨順修學真實子故。解經六義者：遍知九事，伏惑趨善，如病行智，厭離解脫，我生已盡，諸如是等，是為初〈攝釋分〉。

次、〈攝異門分〉。獨抉經文，為〈攝釋分〉，並抉其義，是稱為門。門一攝多，又稱為異，曰〈異門分〉。白品四聚，師等八門，智等十五，如來等十，欲等九門。黑品一聚，生老死等有十一門。是為〈攝異門分〉。

三、〈攝事分〉。雲何為事？謂三藏事。初、契經事者，有二十四攝契經盡，且說其四：一者、諸佛語言，九事所攝，為四《阿含》展轉傳來，名事契經。二者、十二分教，除其方廣，名聲聞相應契經。三者、即方廣分，名大乘相應契經。四者、五犯聚過，百五十學，名別解脫契經。如是四經，抉擇其要，于未顯義，令極顯了，名摩[口*旦]理迦，謂之為擇，亦稱為攝。如是擇攝，厥有其七：一、行擇攝，行即是蘊，有其十聚九十八門。二、處擇攝，前有四聚三十六門，後亦四聚四十七門。三、四、五、六，緣起、食、諦及界擇攝，緣起四聚三十一門，食一聚六門，諦亦一聚十有二門，界則三聚二十七門，覺分十聚七十三門。綜而計之，三十七聚三百有二十門，群經要義，賅備無余，欲明經要，當于是處，綜核研求。是為初契經

事。

次、調伏事者，四種經外或《阿含》外，世尊所說別解脫經，廣作問答，展轉傳來，名毗奈耶摩[口*旦]理迦。今更擇攝，都為一聚，十有一門。是為次調伏事。

三、本母事者，對法能生余二要義，名為本母。先標名敘，後釋名辨，稱敘辨攝。此有一難：經律抉擇，即為論藏，更無別稱摩[口*旦]理迦。即有一釋：然因略攝，轉滅染淨，雜說法故，建立分別法相摩[口*旦]理迦。初略二門，流轉雜染二十二事，還滅清淨十有九事。後廣八門。如是一聚。又有六門，更十八門，如是一聚。是為次本母事。

如是所攝三藏諸事，是為〈攝事分〉。如是釋異及事，三分所聚，是為本論余分，重明攝經。

以上攝經及與攝論，略為四處，是名釋論四分，以重明攝本論及經。

十要第三

說五分已，次說十要。十要者：一、唯識義；二、法相義；三、平等殊勝義；四、相應義；五、依義；六、用義；七、漸義；八、無種姓義；九、異門義；十、依經義。

一、唯識義者：眾生執我，蘊、處、界三，方便解救，遂執法實，心外有境；救以二空，又復惡取；是故唯言遣心外有境，識言遣破有執之空，而存破空執之有，具此二義，立唯識宗。以有為空若無，以空為有亦去，証真觀位，非有非空。若執實有諸識可唯，亦是所執，長夜淪迷。然此宗義，雖對治二，而心外有境，趨重偏多。一切山河，相分現影，他心神變，並是疏緣；以心觀心，入無分別，乃是親緣。諸修唯識觀人，應知有漏諸相，皆依三性之所，悉轉八識之能。又復應知：多聞熏習，無漏種生，尋思意言，得如實智，歷次五位無功用行，而後金剛道盡，異熟皆空，唯識之果，于斯遂証。然此無分別義、後得並行，非唯根本，但任運緣說無分別。如是諸義，〈五識意地〉及諸〈抉擇〉，應善披尋。是為略說唯識義。

第二、法相義者：世尊于第三時，說顯了相，無上無容，則有遍計施設性、依他分別性、圓成真實性。復有五法：相、名、分別、正智、如如。論師據此，立非有非空中道義教，名法相宗。遍計是空而非是有，依、圓是有而非是空。依他攝四：相、名、分別及與正智，圓成攝一：所緣真如。是則詮表一切，皆屬依他。許有雜亂識，遂有如是事。所謂六善巧事，三雜染事，三界事，五位事，十度事，十地事，三十七菩提分事，二十七賢聖事，十八不共佛法事，諸如是事，無量無邊。然復應知：諸如是事，有而不真，惟是虛妄，猶如幻夢、光影、谷響；又復應知：諸如是

事，雖是虛妄，然有相在，而非是無。若能如是觀諸實相，能所二取，增損二見，自然消殞，于彼不轉。是故法爾塵刹，法爾寂靜，法爾功德，法爾涅槃。是故諸修法相觀人，莫不于法方便善巧。是故善巧義是般若義。如是諸義，〈菩薩地〉及諸〈抉擇〉，應善披尋。是為略說法相宗義。

復次于唯識、法相二宗，相對互觀，其義始顯。略有十義：一者、對治外小心外有境義，建立唯識義；對治初大惡取空義，建立法相義。二者、若欲造大乘法釋，應由三相而造：一、由說緣起；二、由說從緣所生法相；三、由說語義，是故由緣起義建立唯識義，由緣生義建立法相義。三者、觀行瑜伽歸無所得，境事瑜伽廣論性相，是故約觀心門建立唯識義，約教相門建立法相義。四者、八識能變，三性所變，是故能變義是唯識義，所變義是法相義。五者、有為、無為，一切諸法，約歸一識，所謂識自性故，識所緣故，識助伴故，識分位故，識清淨故；又，復以一識心開為萬法，所謂五蘊、十二處、十八界、二十二根、四諦等，是故約義是唯識義，開義是法相義。六者、精察唯識，才一識生，而自性、所依、所緣、助伴、作業五相、因果交相系屬，才一識生，四識互發；又復精察法相，雖萬法生，而各稱其位，法爾如幻，就彼如幻，任運善巧，宛若為一；是故開義是唯識義，約義是法相義。七者、了別義是唯識義，如如義是法相義。八者、理義是唯識義，事義是法相義。九者、流轉真如、實相真如、唯識真如義是唯識義，安立真如、邪行真如、清淨真如、正行真如義是法相義。十者、古阿毗達磨言境多標三法，今論言境，獨標五識身地、意地，是故今義是唯識義，古義是法相義。是為略說二宗互相為對義。

第三、平等殊勝義者：聲聞藏平等平等，菩薩藏殊勝殊勝。十一分教，聲聞契經，平等平等；方廣一分，大乘契經，殊勝殊勝。一涅槃，二染淨，三學，四諦、四念住，五停心，六善巧，七作意，八背舍、八支聖道，九事、九結、九遍知，十遍處、十無學支，十六行、十六心，二十八補特伽羅，三十七菩提分法，如是聖教，平等平等。一大悲，二障斷、二如理如量智，三無性、三自性，四攝法、四真實，五法、五明、五真實相，六度，七地，八識，九德大，十地，十三住，十五行，十八不共佛法，如是聖教，殊勝殊勝。律儀聚戒，禁防為體，平等平等。攝善法聚戒，饒益有情聚戒，四重四十三輕，勤勇為體，殊勝殊勝。下地修上地定，平等平等；出入生死長劫大定，殊勝殊勝。根本無分別般若波羅蜜，平等平等；後得有分別摩訶般若波羅蜜，殊勝殊勝。六度，平等平等；施等九門，廣大甚深，殊勝殊勝。平等平等，如地之有基；殊勝殊勝，如堵波之至頂。無基不始，無頂不極；無基不載，無頂不備。是故學必有根本，舍聲聞其誰與？學必有窮至，舍大乘其誰歸？教則惟一，初固平等平等，《瑜伽》聞、思、修三地是。乘則有三，後遂殊勝殊勝，《瑜伽》聲聞、緣覺、菩薩三地是。是為第三平等殊勝義。

第四、相應義者：依于等至，發起般若相應勝行，此之勝行，是大菩提最勝方便，故名瑜伽。一無分別，二不取相。一、無分別者：法與法空，不著有無戲論，名無分別。遍計相無，故法非有，彼假所依，其事容有，故法非無。遍計執相，空無所

顯，故法空非有，諸法無我，實有所顯，故法空非無。有即說有，無即說無，不著戲論，如如相應，名無分別。執遍計無，遺假事有，犯損減過。執有無外，更有一空，名無分別，犯增益過。諸無窮過，非無分別，固非瑜伽，亦非般若。二、不取相者，非不取于離言說相，取離言相慧到彼岸，如如相應，名不取相。若都無取，慧體且無，況到彼岸？如有過，非不取相，固非瑜伽，亦非般若。是故相應者如如，相應者方便善巧，相應者菩提涅槃。是故境相應者，如如六善巧，三雜染，七作意；行相應者，如如五明，三抉擇，十六修如如，九心，四慧，四諦，六度；果相應者，如如三身四智。是故有種姓者，各依自乘，如如出離生死，得出世果；無種姓者，依人天乘，如如脫離惡趣，得世間果。所知境，能知智，能知人，廣大普被，一切相應，名瑜伽師。是為第四相應義。

第五、依義者：一切生滅法，仗因托緣，而得生起，謂之為依。為彼仗托，有其四義，謂為所依：種現同時，即說因緣，有種子依；異種同時，說增上緣，有俱有依；現行易位，說等無間，有開導依；見相同時，說所緣緣，有境界依。更有異門，說十五依，攝因及緣，恐繁不述。一切情器，一切體業，一切染淨，各自種子，生不必一時，時不必一事，不有所依，間斷紛叢，從何安立？是故為有所依，建立阿賴耶教，披豁翳愆，如實稱量。然此賴耶，任運而轉，非若神我，主宰特殊，所依雖同，攝持大異，以是善巧，何須疑畏？如是說種子依義。

生種不從滅生，而依滅生；滅種不從生生，而依生生；用種不從體生，而依體生；無漏種不從有漏生，而依有漏而生；識種不從真如生，而依真如而生；識種不從根生，而依根生；造色不從大種生，而依大種而生；自種淨土不從他生，而依他生；聞種不從他音生，而依他音而生；滅、道種不從苦、集生，而依苦、集而生；行種不從無明生、乃至老死種不從生生，而依無明乃至依生而生。是故各自有種，是為不即，亦為不一；各有所依，是為不離，亦為不異；不即不離，不一不離，唯識義成，法相義立。一識之中，類類相依，是為一人俱有增上。多識之中，識識相依，是為自他俱有增上。方便善巧，無諸過患，以是因緣，唯識義成，法相義立。如是說俱有依義。

曠劫以前，一切種子，能生因性，無間傳來；曠劫以後，遇緣而生，善亦終古，惡亦終古；何以有漏忽生無漏，在潤生位善不善等，以何道理輪轉回環？若惟任運，終古不更；若有遷移，終須仗力。故有所依，剎那剎那，開前導後，依彼所依等無間緣，現行王、所、非色非他一類而轉，是故入聖超凡，此依是賴。如是說開導依義。

能緣見分，帶色等相，為所慮托，名所緣緣。帶有二義：挾帶，變帶。相有二義：體相，相狀。所緣二義：一親，二疏。挾帶體相，名親所緣，相分遍見，無別間隔，故得親名。有四句別：一、體挾體，為內二分，更互相緣；二、用挾用，心與心所，緣自相分；三、體挾用，自証緣見；四、用挾體，本智緣如。變帶相狀，名疏

所緣。托質（質即是識，實而非虛，心外無境，而不遮識）變相，質為相隔，故得疏名。八識則他質變自，他佛身土（八識因位托他本質，變自相分，果位他佛身土，皆有疏緣）。七識則有漏仗八，後得緣如（有漏七識無力，仗八變影，無漏七識，後得緣如，皆有疏緣）。六識則仗質為疏，不仗非疏。五識則未轉依位，依根互根（五識因位之各自依根，及其五根互用，皆有疏緣，果位則無）。又有異義。四句之中，心緣自相，非是挾帶。六識之內，不仗質緣，容變帶有。然姑勿論為帶決定，為相決定，見必帶相，為所緣緣是義決定。有相能緣，始為所緣，有體能生，始得為緣。相若離見，乃在識外，義不具兩，不具兩義，非所緣緣。陳那、護法樹義于前，玄奘大師立量于後。相不離見分，寄言簡過曰：真故，極成色，定不離眼識。相不能攝相，寄言簡過曰：自許初三攝，眼所不攝故。相不攝相，亦猶眼識，非眼根攝，曰：喻如眼識。以不離義，心外無境，決定決定。心外無境，心內有境，決定決定。依此境界，為所緣緣，能緣所緣，識相決定。如是說境界依義。

複次，有漏必生無漏，隨順依故。增上緣中，有隨順依，立引發因，謂三性種現，隨順同類勝法，便能引起同類勝行，引得無為妙法。如是所依，一切疑畏，豁然殆盡，踴躍稱心，曷其有極！是故此論，稱為《地論》，地者所依義故。是為第五依義。

第六、用義者：真如是體，體不生滅，無始種子，依不生滅，而起生滅，如實說相，一切是用。用有十義：一、種子義；二、對治義；三、破執義；四、如幻義；五、極微義；六、剎那義；七、集顯義；八、周遍義；九、無盡義；十、正智等義。諸有不知種子義者，或執實體，宰一切物；或執無用，一切皆空。實體是染，不可使淨；實體是淨，不可使染；染淨既虛，戲論何益？一切無用，一切無能，善既唐功，惡亦無報，因果既壞，聖教何施？若知種子用非是體，便息分別，如理思惟。熏習義是種子義，與彼諸法，俱生俱滅，而有能生因性，無間傳來，為後生因，是名熏習。雖無實物，而有氣分，氣分者，猶如雲起。雖無作用，而有功能，功能者，猶如輪風。雲幻生滅，剎那剎那，惟用如是，能有能無。風力廣大，排山振海，惟用如是，有大勢力。了是以為用，用乃無過，如是說種子義是用義。

漏、無漏種，勢用齊均，流轉還滅，兩敵不並，故對治義安立不搖。諸有不知對治義者，誤體為用，本來寂靜，自性涅槃，不知遍計空無，惟是體性，體性不二，故有是言。若此依他種既是有，勢用自二，故須對治，盡未來際無住涅槃。又復不知對治義者，總為一聚，無相觀空。殊不知無相有功用行，地居決定，八地以前，大有事在，非可廢棄，一蹴而幾。種雜而強，治須縝密。貪觀不淨，嗔觀慈悲，痴觀緣起，慢則析根，疑復數息，以楔出楔，方便多施，杯水車薪，猶虞難任，況復昧賊所在，漫曰討除，欺敗唐勞，嗟何能及！又復觀總無力，觀別斯神，別觀久成，總觀乃當。如觀無常，五蘊無常，剎那集顯，方稱現量，否則墮似，飲鴆可哀。是故知用義者，則知對治；知對治者，一切如理。然此對治，非斷煩惱，如斧斫木，因緣生法，猶如幻化，故不可斷。勝義諦中，諸法皆如，故無所斷。當知斷者，對治生

時，煩惱斷時，如稱低昂，如明破暗，解惑不俱，故說言斷。十地師，前後相資，一運相續；攝論師，集想修斷，能治所治，俱入過去；既昧三時，又昧種義，不足為訓，是故應辨。了是以為用，用乃無過，如是說對治義是用義。

無功用行，但是無執，非無相見。猿猱知佛心，佛體眾生意，十方如來，但是無執，非無遍計。是故執為眾生，執破為佛，破執為法，執之異名為我，破之異名曰用。了是以為用，用乃無過，如是說破執義是用義。

幻師通衢，變現象馬，有象馬相，無象馬體，是之謂幻。有即說有，緣生有境故，如幻有相，是為依他如幻。無即說無，緣生無自性故，如幻無體，是為遍計如幻。幻相之有，非真實有；幻體之無，為畢竟無；是為如幻三昧。諸所分別，諸所施設，諸所顯真，攝幻義盡，攝用義盡。了是以為用，用乃無過，如是說如幻義是用義。

諸識變時，隨量大小，頓現一相，非眾極微積聚而成，最後滅時，亦不至微中間滅盡。是故大乘，無實極微，但以慧思分析諸色，假立方便，法空觀成，非若外小，執為我體。了是以為用，用乃無過，如是說極微義是用義。

方量既空，時量亦破，是故三世都無，剎那義立。此剎那義非是動義，前不待後，此不至彼，才起即滅，相似隨轉，妄相宛然，不可窮詰。如有十五義成立其相，有九因成內十四相，有十四因成外十相，恐繁不述。觀剎那義者，不為時限，不為生惑，不蹈定相，不墮執迷，亦複不陷虛空。了是以為用，用乃無過，如是說剎那義是用義。

三世既空，剎那剎那，前後不續，誰複積字成文、聚想成義，是故集顯義立。諸字諸想，雖入過去，剎那滅無，而有熏習，作後引因，相應緣生，聚集顯現。此集顯義，推廣施設，有唯識三世義，法相三世義，神通三世義，識上功能影像相生，此實現念托過未種，變似而緣，妄謂三世，而實一識，是為唯識三世義。即現在種是現自相，亦即現種是過果相，是未因相，雖實一種，分別說三，是為法相三世義。禪定他心通，雖心上功能，而皆証解，無有非量，故與凡異，是為神通三世義。三世非有，諸法宛然，萬種無邊，剎那集顯。了是以為用，用乃無過，如是說集顯義是用義。

緣都未起，分別渾無，是為萬種一如。獨別緣生，無種不挾，是為各種周界。子微以上方足相傾，種且非微，烏容有礙？況此種遇緣，顯現差別，余種未遇，仍複一如。是故各種周界，水火相處而不侵；萬種一如，六根相依而錯用。了是以為用，用乃無過，如是說周遍義是用義。

既酬前果，即為後因，相引相牽，金剛後斷，有漏種隱，無漏種顯，彼去此來，無

窮無盡。了是以為用，用乃無過，如是說無盡義是用義。

正智是用，發菩提心成正等覺故。大悲是用，無住涅槃無邊功德故。方便是用，一切善巧故。了是以為用，用乃無過，如是說正智等義是用義。是為第六用義。

第七、漸義者：一、時；二、位；三、補特伽羅；四、六行伏惑；五、九品斷障；六、因果；七、行別；八、果別；九、無畏；十、能入。諸昧漸義而談頓証者，一切無有，是故有過。一、時者：謂三阿僧祇，一阿僧祇斷皮粗重，二阿僧祇斷肉粗重，三阿僧祇斷骨粗重。或以見道八地極果為差，或以十信見道修道為差。若無是時，無量障深，剎那頓斷，寧可為訓？是故有過。

二、位者：謂十三住。初、種姓住，亦為種姓地，亦為資糧位中順解脫分，亦為十信。次、勝解住，亦為勝解行地，亦為資糧位中順抉擇分，亦為加行位，亦為十住、十行、十回向。三、極喜住，亦為淨勝意樂地，亦為通達位，亦為十地中初地。四、增上戒住，增上心住，增上三慧住，無相有功用住，是等六住，亦為行正行地，亦為修習位，亦為十地中次第二地至七地。五、無相無功用住，亦為決定地，亦為修習位，亦為十地中八地。六、無礙解住，亦為決定行地，亦為修習位，亦為十地中九地。七、最上菩薩住，最極如來住，亦為究竟地，亦為究竟位，亦為十地中十地及等覺地、妙覺地。若無是位，一切佛法，信解行証，從何安立？安立都無，法何不滅？是故有過。

三、補特伽羅者：四惱、尋思、等分、薄塵，為七病行；聲聞、獨覺、菩薩，為三出離；未具資糧、已具資糧、已未具資糧，為三住持；法隨信行，法隨法行，為二加行；信解、見至，加行果；身証、慧、俱，修証果；向、四果，四沙門果；七返、家家，預流果；一間，一來果；中般、生般、無行、有行、上流，不還果；退、思、護、住、不動、堪達及不動法，阿羅漢果；是為二十八賢聖果。三界異生，學與無學，欲、色菩薩，欲界獨覺，不可思議如來，是為十三界有情。勝解行，增上意樂行，有相無相行，無功用行，是為五修行菩薩。若無如是補特伽羅，言說不易，得失無據，既違世間，亦常怖畏。是故有過。

四、六行伏惑者：苦、粗、障三，為無間道觀下斷惑；靜、妙、離三，為解脫道觀上証滅。二乘根鈍，斷証不融，行故資六。初劫菩薩，初資糧位，亦用伏惑。久修有力，不斷煩惱而生上界，方始不資。若無六行，惑何能伏？伏且不能，斷于何有？是故有過。

五、九品斷障者：三界九地，地各九品，品八十一。分別有斷無伏，俱生先伏後斷。斷分別二障，惟系六識，一心見道，唯一品斷，三心見道，則二品斷。斷俱生煩惱，其六識現行，地前漸伏，初地伏盡，種則金剛無間永斷；其七識現行，初地漸伏，七地伏盡，種則金剛無間頓斷。斷俱生所知，其六識現行，地前漸伏，八地永

斷，種則十地漸斷，金剛永斷；其七識現行，地地伏起，金剛加行永斷，種則金剛無間頓斷。一切習氣，地地漸斷。是則頓唯七種，余莫不漸，安有廢漸而可收功？九品不分，是故有過。

六、因果者：頓義是果義，漸義是因義。世第一法，一剎那間，頓入見道，是為一頓，然加行以前，有無量事。第八不動，剎那頓証無功用行，是為一頓，然不動以前，有無量事。金剛道後，一剎那間，頓入極果，是為一頓，然極果以前，有無量事。舉頓遺漸，是為談果迷因，有果無因，是為空華結撰。是故有過。

七、行別者：少時畢功之為頓，長劫修行之為漸。我說精進遍一切故，堅固熾然不思住故，久遠要期為一日故，無懈無勇心平等故，不貪不厭常如是故，是為行別。行別然後有得，否則怠懈不足言功。是故有過。

八、果別者：念念証極之謂頓，長劫闡提之為漸。淨障是業涅假名故，悲心勝故，証極亦功德不住故，八相成道為度生故，是為果別。果別然後無得，否則貪著不足言証。是故有過。

九、無畏者：難行苦行，施對治故；生死如幻，不取著故；攝持無漏種，緣至必生故；賴耶蘊染種，多生始盡故；熏習有力，勝愚迷故；是故無畏。無畏然後能漸，否則疑畏，進退無據，苦不勝言。是故有過。

十、能入者：受熏持種，無記性故，是故貴漸。隨喜功德，久而能成故，是故貴漸。彼有此種，驟隱不顯，久乃現故；彼有此種，勢盛不顯，殺乃現故，是故貴漸。否則機舛，不足言入。是故有過。是為第七漸義。

第八、無種姓義者：聲聞地五義建立，此複略為十解：一者、障蔽不顯，乃稱為無，粗重常有，種姓常無故。二者、有種姓是隨順密意說，無種姓則真實顯了說故。三者、此無種姓，為精進對治者立所對究竟說，非為怠惰對治者斷能對究竟說故。四者、有種姓是體，無種姓是用故。五者、建立自性涅之體，既依有種姓，即應建立無住涅之用，依無種姓故。六者、有對生死之無住涅，即應有對涅之無邊生死故。七者、既許雜亂性之有，即應許無漏種之無故。八者、有無盡功德之能，即應有無盡功德之所故。九者、有畢竟無障之佛，即應有畢竟有障之闡提故。十者、有聲聞趣寂，一分所知障之決定；即應有人天輪轉，全分出世障之決定故。是為第八無種性義。

第九、異門義者：宗經者，論異于經；解論者，釋殊于論。此宗著述，言人人殊，豈自教之相違，曷冰銷而杜謗？通斯疑難，應悉異門。妙理圓融，頓呈萬象，文字有矩，詮限一隅，是故尊聖、重教、契經，惟佛所宣；依理、廣文、論議，亦眾所說。世尊自廣分別諸法體相，于諸經典循環研核，名磨[口*旦]理迦；諸聖弟子，已

見聖跡，依自所証，無倒分別，亦名磨[口*旦]理迦，而皆為阿毗達磨。許佛滅後，三藏之內對法一藏，通弟子說故。若弟子造，非教藏攝，便聖教有限。若別異詮，非法義收，則妙理不周。是故此宗所述，多異少同，《瑜伽》五分，異門義立。然欲和會，亦非不能，隨順真實義邊，此彼義邊、能所義邊，派別雖差，朝宗則一，琴瑟非專，水火豈極？諸所詮義，恐繁不述。經論會違，詳異門義，見諸別冊，參考可資。是為第九異門義。

第十、詮經義者：一、宗經；二、釋經。一、宗經者：經中之經：《般若經》、《華嚴經》；經中之律：《瞿沙經》、《毗奈耶經》；經中之論：《阿毗達磨經》、《解深密經》，然抉擇〈菩薩地〉，引敘《深密》，一字無遺，是《解深密經》又宗中之特宗，抉擇中之最抉擇。三學俱多，唯素[口*旦]；戒定多者，屬毗奈耶；獨慧學多，對法藏攝。欲生正智，法隨法行，宜學對法；欲一總聚，多收散義，宜學對法，對法所重，雖及《達磨》，而最《深密》，以是因緣，《解深密經》智者應學。如是說宗經義。

二、釋經者：〈尋伺三地〉，釋《緣起經》；〈三摩多〉，釋《出離經》、《離憂經》、《六出離戒經》、《五支經》、《釋靜慮經》、《四檢行定經》、《六境不受想無想經》、《四趣道經》，《釋四淨勝經》、《心清淨 + 必芻思惟五相經》、《蕩塵經》、《三相思惟經》；〈思所成地〉，釋諸伽陀經；〈聲聞地〉，釋《師子吼經》、《普賢經》、《難陀經》、《七日經》；〈菩薩地〉，釋《轉有經》、《無盡意經》；〈抉尋伺地〉，釋《出愛經》、《八苦經》、《三士經》；〈抉三摩地〉，釋《身念處經》、《摩訶俱瑟恥羅經》、《法因緣經》、《眠經》；〈抉聲聞地〉，釋《月喻經》、《伐地迦經》、《乞食清淨經》；〈抉菩薩地〉，釋《五種過患經》、《尸落迦經》，釋《寶積經》；〈攝釋異門〉、〈攝事〉，多釋四《阿笈摩經》。是諸釋經，或釋數句，或釋數分，見諸明文，約略舉此。論諸所稱，雜釋余釋，賅攝經典，無量無邊，下士鈍根，難可稽考，望洋嗟若，我生不辰，所冀同心，廣挹甘露。如是說釋經義。是為第十詮經義。

以上十義，略舉其要，是為十要。若欲廣敘，為義葳蕤，恐厭繁文，此姑不述。

《瑜伽師地論》敘卷下

十支第四

說十要已，次說十支。十支者，如人有身，必有其足，乃稱六足，如木有本，必有其支，遂為十支。足以扶身，支以輔本。《發智》不詳，充于六足；《大論》不及，資于十支：一、《百法》；二、《五蘊》；三、《攝論》；四、《雜集》；五、《分別瑜伽》；六、《辯中邊》；七、《二十唯識》；八、《成唯識》；九、《莊嚴》；十、《顯揚》。

一、《百法明門論》者：略錄〈本地分〉中名數，而以一切法無我為宗。一切行無常，一切行苦，一切法無我，涅槃寂靜，四

陀南是稱法印。然無常故苦，苦故無我，無我即涅槃，法印雖四，宗趣唯一，故但說一。初地百法，二地千法，以次無邊，為一切法。然聞思教體，見道為極，略修增上，故但說百。〈攝事分〉中本母事，先略序事：一者、心事，二者、心所有事，三者、色事，四者、不相應行事，五者、無為事。然有其目，而缺別文，故複造論。自性、相應、所緣、分位、及與清淨，五惟一識，攝一切法，人、法無我，惟是識故，故屬唯識。是為《百法明門論》以一切法無我為宗義。

二、《五蘊論》者：略攝〈本地分〉中境事，而以無我唯法為宗。契經九事，首蘊、處、界，長夜淪迷，執一實我，世尊方便，俾認為法，是故十二分教，均以六善巧為宗。破一性我，說為積聚，而非是性，蘊且有五，而豈惟一？破受者我，但識生長，處且十二。破作者我，任運而持，無作用性，說名為界，而有十八。是故《百法》以識攝法，法亦是識；《五蘊》以蘊攝識，識亦是蘊。《百法》唯識，識即是性，但說名數；《五蘊》法相，相各有性，故詳說性。〈攝事分〉中，本母事後廣辯事，所治、能治有十四對，此論複次，略其所詳，故唯十二。是為《五蘊論》以無我唯法為宗義。

三、《攝大乘論》者：括《瑜伽》、《深密》法門，詮《阿毗達磨?攝大乘》一品宗要，而以簡小入地為宗。依正教文，一阿僧祇授《十地經》，世親証明得定，將入見修，聞《十地經》，涕淚悲泣，無著授此，俾之作釋，是故簡小入地，于此獨詳。佛由菩薩修道而成，菩薩多聞熏種而入，幸福無邊，逢茲妙典，一切且置，應此鑽研。一、華嚴教海，非此不入故。二、薄伽梵十殊勝語，因果始終，開示明白故。三、獨標所知，大所乘故，漏、無漏種，共此所依，舍對治外，無他謬巧故。四、建立賴耶為大王路，一切智智，大所乘故。五、攝三性于唯識，唯識妙義，此獨詳故。六、能入唯識，加行見道，為最近故，所入唯識，方廣十事、平等六度為因，增上六度為果故，如是能入、所入，詳詮入義，大所乘故。七、修道差別，法爾次第，初地為得，十地成辦，華嚴修因，正詮唯此，大所乘故。八、別顯六度，約立三學，三學增上，大所乘故。九、斷謂無住涅槃，大所乘故。十、智謂三身，大所

乘故。如是十義，顯示此論，為大王路，為燭幽炬，勝利無邊，不可說言，誰有智者，而不鑽研？

複次，十支之中，《攝論》最勝，《百法》、《五蘊》，略不及詳故；《雜集》、《法相》，博不及要故；《分別瑜伽》但釋止觀，六度三學，此獨詳故；《辯中邊論》明中道義，對惡取空，此明十地，正詮所修故，二種唯識，立破推廣，提挈綱領，此最宜故；《莊嚴》詮大，意在莊嚴，此論詮大，意獨在入故；《顯揚》詮教，意重聞思，此詮入地，意重修慧故；是為最勝，應此鑽研，是為《攝大乘論》以簡小入大為宗義。

四、《雜集論》者：括《瑜伽師地論》一切法門，集《阿毗達磨經》所有宗要，而以蘊、處、界三科為宗。一者、宗証據，《阿毗達磨》弘文未譯，然師子覺言本論依經，括義理盡，斯則就論討宗，即彼經要；基法師言此論初明三科，即以三科為宗，以是因緣，說宗証據。二者、宗體義，此論八品，先〈本事分〉，明三科體；後〈抉擇分〉，別三科義。境必有體，本其體曰〈三法〉，充其體曰〈攝〉，順其體曰〈相應〉，得其體曰〈成就〉。約前四品是三科體，為所觀法。依境起行，通行義抉〈諦〉，妙行義抉〈法〉，行必有果義抉〈得〉，慧解利他義抉〈論議〉。約後四品是三科義，為能觀法。以是因緣，說宗體義。三者、宗利益，善三科義，于一現境，隨其所樂，心易安定，于一切境，無不如量，正慧圓通，是為止觀利益。善三科義，思擇決定，于諸異論得無所畏，是為論議利益。《阿毗達磨》問答決義，是彼所事，故立〈論品〉，敘次篇終。以是因緣，說宗利益。四者、宗對治，或愚迷心，總執為我，以蘊對治，一為色法，三為心所，一為心王。或愚迷色，總執為我，以處對治，非色有二，色處有十。或迷心色，總執為我，以界對治，色界有十，心界有七，色心界一。上根聰利，但說于蘊，中根說處，下根說界。詳諸經論，有五善巧、六善巧、七善巧、十善巧之建立，此獨說三，根本立故。以是因緣，說宗對治。五、宗廣略，色識所攝，于蘊門中略而為一，于界處門廣開十七。受想行攝，法界法處略而為一，于蘊門中廣開為四。又蘊惟有為，界處及無為。能取所取，處惟顯生，界則及體，以是因緣，說宗廣略。

以上說宗，以下說義。六瑜伽法門，六善巧義，〈五識意地〉、〈本地〉、〈決擇〉，應知其相，《對法》括之，敘〈三法品〉建立門。有、非有等五十八門、〈思所成地〉、〈聲聞地〉，應知其相，《對法》括之，敘〈三法品〉六十義廣分別門。情、器雜染，〈意地〉、〈尋伺地〉應知其相；寂靜覺分，〈聲聞地〉應知其相，《對法》括之，敘〈諦品〉諸相法門。〈菩薩地〉所學法，《對法》括之，敘〈法品〉方廣十事門。〈菩薩地〉如是學，《對法》括之，敘〈得品〉現觀法門。〈菩薩地〉能修學，《對法》括之，敘〈得品〉補特伽羅門。因明詳于〈聞所成地〉，《對法》括之，敘〈論品〉諸相法門。以是因緣，說瑜伽法門。七、《瑜伽》異義，經論會違，詳陳可考，繁文不述，略舉方隅。色蘊廢立，色二十五，《瑜伽》減一。聲十有一，《瑜伽》二四。香六，《瑜伽》唯三。味十二，《瑜伽》唯九。

觸三十二，《瑜伽》二十。法處所攝色五，《瑜伽》或二，或三，或四。想蘊分六，《瑜伽》總二。行蘊心所本惑開十立五十五，《瑜伽》五三。不相應行立二十三，《瑜伽》二四。是為〈三法品〉中略舉廢立義。苦諦義二，《瑜伽》義五。集諦煩惱緣起惟三，《瑜伽》有六；煩惱差別立二十五，《瑜伽》二七；故思造業建立有五，《瑜伽》惟二。十八思斷業欲修九無間，此論斷三，《瑜伽》斷二。道諦九根，四受隨一，《瑜伽》無憂，惟三隨一。是為〈諦品〉中略舉廢立義。菩薩藏中，此論希法，說有其二，《瑜伽》、《方廣》，說惟其一。是為〈法品〉中略舉廢立義。以《雜集》之異《瑜伽》，顯《瑜伽》之殊《對法》，古學今學，源流可徵。以是因緣，說《瑜伽》異義。八、部執所歸，四《阿笈摩》屬〈本事分〉，《阿毗達磨》屬〈抉擇分〉。〈本事〉敘九事，〈抉擇〉故三科。〈本事〉轉諦輪，〈抉擇〉故觀諦。〈本事〉通三乘，〈抉擇〉故收小。是故《雜集》、《俱舍》，大小《對法》，約義多同。部執競興，《婆沙》溺實，蘊處唯假，經部義長。世親賓主抑揚，造《俱舍論》，其所樹義，若聚集因是假義，若無為不立蘊義，方諸《雜集》，種種不殊。《正理》一破，朋回有部；《雜集》一救，遂入大乘，眾流匯極，江漢朝宗。然此假實，厥惟六種：一、聚集為假，非聚則實。二、因于未來，名為假有，現見為實。三、果無其體，施設名假，有體為實。四、所行謝滅，唯念為假，現事為實。五、分位為假，自性為實。六、觀待為假，一切隨轉乃得為實，是六假實，大小共許，展轉立破，由粗入細，如量為至，法相所事。以是因緣，說部執所歸。九、異門說有，依他起性，執為遍計，不執圓成，是故假實有外立勝義有。識種為界，識生為處，處界是識，識如幻相，一切皆假，是故不獨蘊義假有為假，處界實有世俗為實，以如幻義，無不皆假。是為三法皆假，以異門義，說如幻有。是為人、法無我，遠離二邊，惟大獨有。以是因緣，說異門說有。十、眾義所聚，此論名集，諸聖所集，不獨無著；集諸經論，不獨《達磨》；無著《達磨》，稱舉其最。糝師子覺，安慧標"雜"。以是因緣，說眾義所聚。大哉此論，古今之異執，小大之通途，經論之雜糝，群聖之會萃，義廣而賅備，文約而整齊。汪若望洋，昭若揭日，誰有妙典，博大簡明一至于此？欲入教海，多聞聞持，大漠指南，不迷所向，以是因緣，智者應學。是為《雜集論》以三科為宗義。

五、《分別瑜伽論》者：弘文未譯，然無分別一心為止，有分別多心為觀，《深密經》中，〈分別瑜伽品〉說止觀義。《攝論》第六教授二頌，引論所說，皆止觀事。是為《分別瑜伽論》以止觀為宗義。

六、《辯中邊論》者：敘七品以成瑜伽法相，而以中道為宗。有虛妄分別乃有依他，有是依他乃契中道，契乎中道乃成法相，九相顯已，空性方談，此論宗法相，故先之于〈相〉。境體為相，境用為障，五障障，九結障，十因、三十七覺分、十度、十地障，種種所障，令智不起，豈其虛妄本性皆空？故次之于〈障〉。依境起行，觀十真實，唯識無相，一切如理，法相談相，一切如量，是故《瑜伽》、《中邊》俱詳真實，此有其十：初一能顯，謂三根本；次九所顯，謂三相四無倒、四諦二諦、二極成二障斷、五法攝三性、七真如、十善巧。如量觀行，必除我見，故次之

于〈真實〉。相行真實，障行對治。覺分修，三品修，大小別修，修生對治，非任運有，故次之于〈對治〉。久觀久修，必有深淺。于法差別有十八位及與三位，于有情別而有七位，故次之于〈分位〉。因行既圓，果始足感，五果十果，三乘通得，故次之于〈得果〉。通果平等，別果無上，故終之于〈無上乘〉。無上乘者，一、由十二最勝有十度作業；二、以三慧能觀思十度作意；三、以六無亂修止、十無倒修觀，金剛十句于此詳明；四、以十五邊義顯詮中道；五、以平等差別詮大小乘異，是為正行五相。次敘所緣，有十二相；次敘修証，有其十相。是謂無上乘諸相。此論七品，詮表法相，簡惡取空，中道權衡，邊執屏斥，文不他及，義亦精嚴，境、行、果三，章次賅備，為法相之要典，例《攝論》而堪弘。是為《辯中邊論》以中道為宗義。

七、《二十唯識論》者：釋七難以成瑜伽唯識，而以唯識無境為宗。一、釋四難，夢則時有一定、處有一定，作用能成。鬼則人不一定，而實無境。又以獄喻，四事皆成，而實無境。獄卒既非真實有情，亦非心外大色，更非造業在內、受果在外。受果非外者，教依識種密意說根，依識現相密意說塵。了知唯十二處都無有人，則人我執空。若能更知處唯是識，都無有法，法我執空。然法空密意遣遍計有，離言法性非撥為無。以是因緣，境無識有，唯識義成；以是因緣，非有分色，非極微非和合，非和集，識外俱非，成唯識義。二、釋所証現量難，同時意識雖是現量，一剎那後，起心分別証知此現，見既過去，色亦非今，証境分明，故非現量。非現量境，于理為無，以是因緣，成唯識義。三、釋不知難，夢境非有，覺而後知，大覺証真，方知唯識，凡夫不知，依聖言量，以是因緣，成唯識義。四、釋友教難，但詮心內自識所變，非遮心外他識有情，自他展轉互為增上，令各自識變自似相，既非外境而有外識，善巧無邊，成唯識義。五、釋夢無果報難，夢劣無果，覺勝致報，非由外境，唯識義成；六、釋意業無罪難，如鬼念力，令人得夢，彼識轉變，令此命斷，故無身語業而得其罪，意罪為大，唯識義成。七、釋他心智難，法執所蔽，他心如自，皆不如實，非若佛智離言稱量。由不如實似外境現，而實非境，以是因緣，成唯識義。如是七釋，唯識成立，妙義無邊，方隅略示。是為《二十唯識論》以無境唯識為宗義。

八、《成唯識論》者：廣詮《瑜伽》境體，而以識外無別實有為宗。《對法》廣詮法相，此論廣詮唯識，賅攝汪洋，堪稱兩大。然《對法》獨詮正義，而略別破；此論凡一樹義，正別俱詳，是故欲治此論，須分兩事：一、正義事，世親既釋《攝論》，抽所授義，別廣唯識，著述未終，而生睹史。十家造論，言人人殊，糅會貫通，獨宗護法，故護法義是正義。折中取舍，權定基師。或初無有義，理教極詳；後言有義，理教獨略；勝者在初。或前略後廣，而皆有義，勝者多後。或理教齊等，前後有義，取舍任情。如是披尋，護法余義亦為正義。二、別破事，外道九十六，大者十三，數論、勝論、聲論、明論、離系、邪命、順世、梵天，諸如是等，或譯專籍，或載剩文。小乘有部所系，由薩婆多而經部，而《正理》，而《成實》、《俱舍》等，余部所屬，若正量、大眾、一說、化地等，諸多部執，或詳專籍，或載

剩文。所破不明，能破不立，外小未晰，此論難通。無著濟龍樹之窮，護法糾清辨之失，安慧或朋清辨，難陀親而未精，是則大乘空宗，本宗諸德，皆所悉究，不厭求詳。

大哉此論！誠所難言，今姑逐文，約略其概。異生迷謬，執離心外另有實境，妄計二取，為真為實，大悲除執，說唯是識，是故最初，廣詮識相，即依他起。雖知此心虛妄顯現，而未了達真性是何，若未知真，烏能別妄，是故次初，明唯識性，即圓成實。入此唯識斷妄証真，非少修行可能圓滿，故次第三，明唯識位，即十三住。

且初、識相門，先明宗要，後廣識相。先明宗要者：離識而外，無別實人，識種與法，互熏習故，有憶識誦習。心、心所法，因緣力故，有造業受果。身心相續，煩惱厭患故，有生死涅槃。諸不如是，執有實我，種種安立，是故有過。離識而外，無別實法。色法之中，其有礙色者，識變似相為所緣緣，見托帶彼隨量頓生，本來虛脆，為破此粗色，假立彼極微。其表無表色者，以心為因，識變似手，轉趣余方，似有動作，假名身表。以心為因，識變似聲，生滅相續，似有表示，假名語表。依思或愿，善惡分位，假立無表。不相應行中，依彼諸法，可成分位假立成就；依彼身心相似差別，假立同分；依業引生識種功能住時決定，假立命根；依損心種及伏粗動分位差別，假立二定；依法因緣本無今有、暫有還無、表異無為，假立四相；依語聲分位差別，假立名句文身。無為法中，一、依識變假施設有；二、依法性假施設有。是則一真法界，有為、無為。一切皆假，唯是識變。諸不如是，執有法我種種安立，是故有過。然心、心所依他起故，亦如幻有，遣心外境，說唯有識，若執識實，亦如法我，是故有過。如是為明宗要。後、廣識相者：初、能變相；二、所變相；三、理教無難相。相十二門，自相因果所依所緣，行相相應五受三性，流轉伏斷及與界地。如是諸門，八識則以十門分別，七識九門，六識八門。賴耶、末那教理建立，依據《瑜伽》及與《攝論》而更加詳。賴耶五教：《對法》、《深密》、《楞伽》、《莊嚴》，四為大乘，《阿含》通小。賴耶十理：持種、執受、壽暖識三，受生命終，無心滅定，五義見于《瑜伽》；異熟、食體、趣生體、名色依、染淨依，五義見于《攝論》。賅攝廣備，惟此論明。末那二教：《楞伽》惟大，《解脫》通小。末那六理：不共無明，六識二緣，思量名意，二定無差，無想無染，我執不有，如是六義，亦《攝論》有。是為異熟、思量、了別三能變相。此三能變，變于見相，見為分別，是為能取；相為所別，是為所取；二取之外，無別實有，由教及理，十難發明，是為四分所變相。以分別不生難者，以緣生理解。四緣、十因、十五依，說緣義盡；生現、生種，說生義盡。以生死不相續難者，以業取習氣理解。習氣有三：名言、我執及與有支；有支十二：初二能引，次五所引，次三能生，後二所生，如是前後展轉不竭。以境無三自性無為難者，以性不離識解。虛空、擇、非擇七真如，六法五事，四真實四諦，三解脫二諦，凡聖智境，假實異不異，一切唯識，一切與三性攝故。以識有三無性無為難者，以佛密意說解。依三自性立三無性故。是為理教無難相。如是為廣識相。

次、識性門，如真如性，即唯識性。

後、識位門，五位修証，資糧、加行、通達、修習，及與究竟，文勢易了，此姑不述。

此論三分，成立唯識，是故說為《成唯識論》。是為《成唯識論》以識外無別實有宗義。

九、《莊嚴論》者：括《瑜伽》〈菩薩〉一地法門，而以莊嚴大乘為宗。三持十法，妙義難窮，更立伽陀，製為此論。法門雖一，詮表不同。或詳或略，或能或所，或相或義，或常或勝，參觀互察，義乃無遺。是故西域大小乘學，悉以此論為其根本，于此不通，未可弘法。此論以莊嚴大乘為宗者，一、序分莊嚴；二、菩提莊嚴；三、教授莊嚴；四、方便莊嚴；五、功德莊嚴。序分莊嚴者：大悲度生，立〈緣起品〉；八因証大，立〈成宗品〉；勸入勝義，立〈歸依品〉。《瑜伽》直敘本地，故從所略，此論意在莊嚴，故更加詳。是為第一序分莊嚴。菩提莊嚴者：二無姓三十二喻，〈種姓〉、〈發心〉，《瑜伽》所略，《莊嚴》獨詳；〈菩薩地〉所學處，其前四品能所分別，《瑜伽》說所，《莊嚴》說能；後〈菩提品〉，十四妙義，《瑜伽》所略，《莊嚴》獨詳。古稱此論微妙在是，比諸經論得未曾有。是為第二菩提莊嚴。三、教授莊嚴者：〈菩薩地〉所學法，《瑜伽》一品，《莊嚴》開六，《瑜伽》說所，莊嚴說能，《瑜伽》說相，莊嚴說義。趣入有基，七義〈明信〉；信必求法，十八義〈述求〉；求而弘之，十二義〈弘法〉；于此資深邀如來教，二十五義〈教授〉；見佛聞法從而思修，十一義〈隨修〉；修則業淨，四義〈業伴〉。此有六品，獨說教授莊嚴者，教前修感，前四惟感；教後起行，後一說行，正詮教授，唯此《莊嚴》。此之莊嚴，敘次有五：一者、信修劫滿，授《十地經》，聞慧得果故。二者、起心修住，蒙佛稱德，由聞入思故。三者、善根入地，作諸功德，由思入修故。四者、余地二智，轉依利生，修慧圓滿故。五者、因大教授，得大義利，勸入勝行故。是為第三教授莊嚴。第四、方便莊嚴者，菩薩地能修學，有三方便：六度、四攝為自分方便，《瑜伽》詳七，《莊嚴》略一；供養親近無量為勝進方便，《瑜伽》略一，《莊嚴》詳三，《瑜伽》大悲百十一苦所緣生起，《莊嚴》大悲三十六偈分別相用。菩提分品十五行為內証方便，《瑜伽》詳事，《莊嚴》詳義。三乘根本覺分為同，覺分根本念住為獨，十四勝修于此詳說。五十三義成立剎那，觀行無常此義賅備。是為第四方便莊嚴。功德莊嚴者，此之一品詳略均等，各隨所義異門詮次，此姑不述，是為初持功德隨法究竟，《瑜伽》詳九，《莊嚴》略二，是為二持、三持功德，是為第五功德莊嚴。是為《莊嚴論》以莊嚴大乘為宗義。

十、《顯揚論》者：錯綜《瑜伽地》要，而以顯教為宗。有染有淨，然後有教，以染淨事攝瑜伽地，〈攝事〉第一。既有教事，必有教義，〈攝淨義〉第二。教以四諦為根本，但是苦集而非是染，但是滅道而非是淨，染淨是假諦之為實，增諦而七

，〈成善巧〉第三。教以四法印為觀行，綜《瑜伽》義，詮染淨事，成〈無常〉、〈成苦〉、〈成空〉、〈成無性〉第四至第七。教為聞熏，必極見道，〈成現觀〉第八。現觀資糧，要先思議，〈成瑜伽〉第九。不可思議尤應遠離，〈成不思議〉第十。最勝十相，抉擇九事，成〈攝勝抉擇〉第十一。無著大悲，救惡取空，既請慈尊說瑜伽教，複為難持，約文標旨，說十一品，階梯已得，升進無難，踴躍歡喜，得未曾有。然有數義，此略抉擇：染淨為教，不稱染淨而稱攝事者，諸佛語言九事所攝，此之九事雖是異門，然不離事，故名攝事。《顯揚》九事攝《瑜伽》十七地者，初之五事攝《瑜伽》境，次之二事攝《瑜伽》行，後之二事攝《瑜伽》果，為詮染淨，錯綜地義，不以地名四 陀南不稱〈無我品〉，而稱〈無性品〉者，翻顯無性但為無我，非一切無生空屬空，法空無我，雖簡二乘，實詮法有。是為《顯揚論》以顯教為宗義。

複次，說十支次第。若以造論人分別，應先之于彌勒三論：廣大乘義，《莊嚴》應第一；觀唯識義，《分別瑜伽》應第二；成法相義，《中邊》應第三。次、無著三論：立唯識宗，《攝論》應第四；立法相宗，《集論》應第五；闡十二分教，《顯揚》應第六。次、世親四論：為唯識宗作開導依，《百法》應第七；為法相宗作開導依，《五蘊》應第八；為唯識宗作廣論，《二十頌》、《三十頌》應第九、第十。

若以讀論人方便，為二宗示階梯：應先之于《百法》、《五蘊》；為二宗示決擇：應次之于《攝論》、《集論》；為二宗示根據：應次之于《分別》、《瑜伽》、《辯中邊》；為二宗示廣義：應次之于兩《唯識》、一《雜集》；為二宗示別義：應終之于《莊嚴》、《顯揚》。《雜集》雖廣，附庸《集論》。《二十頌》易，亦可提先。是為讀論方便次第。

複次，說十支異名。《百法》名略陳名數；《五蘊》名粗陳體義；《雜集》名分別名數，廣陳體義；《莊嚴》名莊嚴體義；《顯揚》名總苞眾義；《攝論》名廣苞大義；《中邊》名摧邪顯中；《二十唯識》名摧破邪山；《三十唯識》名高建法幢；《分別瑜伽》名攝散歸觀。

十系第五

說十支已，次說十系。諸佛等流，依于言說，此土創教，是釋迦文，三藏十二部，結集賅全。然《解深密》說：佛一時中，惟為聲聞，以四諦相轉正法輪；于二時中，惟為大乘，依一切法無有自性，以隱密相轉正法輪；于三時中，普為諸乘，依一切法無自性性，以顯了相轉正法輪。第三時教，一雨普被，乘則有三，教唯是一。是故今所稟承，決擇最後，所遵經典，不濫他時。三時經中，其唯識六經同《瑜伽》外，《莊嚴》詮德，《密嚴》詮識，唯獨《楞伽》，所說具備。八識、二無我，已樹唯識之幟；五法、三自性，業開法相之門。十系所演，不出二宗，一脈相承，

可得而說。

一生補處，弘三時教，是為彌勒。佛說稱經，余惟稱論。彌勒五論，首是《瑜伽》，理無不窮，事無不盡，文無不釋，義無不詮，疑無不遣，執無不破，行無不修，果無不証。正為菩薩，令于諸乘境、行、果三，皆得善巧，勤修大行，証大菩提，廣為有情，常無倒說，兼為余乘，令依自法，修自分行，得自証果。大本既植，支義複提，顯立法相，說《中邊頌》；顯嚴大乘，說《莊嚴頌》；《分別瑜伽》，顯觀行說；《金剛般若》，顯實相說；五論立宗，罄無不盡。若空宗之有文殊，實此學稱為初祖。

部執竟興，眾生著有，龍樹破執，造《中論》等。無相教立，又複著空，是以無著上請慈尊，親說五論，下廣中道，特創二宗。創唯識宗，作《攝大乘》，傳于世親；創法相宗，作《集論本》，授師子覺；更依《大論》，約造《顯揚》，善誘眾生，聞熏聖教。若空教之尊龍樹，實此學奉為開宗。

世親菩薩，有部出家，廣造小論，聚精《俱舍》。糾彼所短，挾其所長，已匯群流，將親海若。是以聞《十地經》，悔罪改過，複于大乘，廣造宏文。受命最初，作《攝論釋》，匯義厥終，作《三十頌》。中間著述，廣博難稽，此土傳來二十五種。是故治世親學，應于大小乘跡，次第披尋，初應《俱舍》，後應《攝論》，二十五種《三十唯識》，一切應觀。然後開小入大，舍常取勝，于普被教，功不唐捐。雖《攝論》學猶有無性，然群奉世親謂為正派。彌勒、無著，作祖開宗，光大門庭，唯世親學，位雖未登地上，功實等于提婆。

世親而後，厥為陳那。有三妙論：一、《正理門論》，論軌論式，幽致未分，爰暨《理門》，重成規矩。古于能立，兼及宗等，此唯因喻。古于似立二十七過，理門增二猶多隱義，天主加四為三十三。然似破彈敵具十四類，理門義當前後超倫。二、《集量論》，唯識所變，古唯見、相，更立自証，三分義詳。三、《觀所緣緣論》，極微無相，和合無體，體相具周，方稱現量，現量之境，乃是唯識。止此三論，已飲甘露，況更搜羅，妙味何極？誠賢劫之一佛，奉《瑜伽》以周旋。

世親菩薩有兩派學，一、已竟義，匯小歸大，融兩《對法》，安慧所得；二、未竟義，推廣唯識，獨詮大乘，唯護法承。非護法義異于世親，實未竟學不同已竟。雖詮唯識，厥有十家，而能立義周，誰超護法？一者、本有新熏種，容具二義。二者、証自証分，四分成識義。三者、器界隨時變，根身各自變義。四者、無色界中，有定果色義。五者、依義，仗因托緣，而得生住，是名為依；決定有境為主，令心取自所緣，名為所依；種現相生，定非前後，為種子依；五具四種，六識唯二，七八互依，為俱有依；自類非異，開前導後，為開導依。六者、意緣藏識，見分非余義。七者、決定染心，與八隨惑相應而生義。（沉掉、不信、懈、放、忘、散，及不正知。）八者、無學無染，非無意依義。九者、人天為憂，而非尤重；鬼畜憂苦

，有純雜異；地獄純苦；三乘不攝，憂喜樂三，決非無記義。十者、六、七心品執我法者，是能遍計；心熏習力，所變二分從緣生，故名依他起，依斯執實有無一異，名所遍計義。諸所樹義，葳蕤紛淪，且舉方隅，說此十義。世親以後，唯此一人，誠日月之麗中天，堪以座于菩提樹下。

護法門人，勝友、智月及與勝子，都善唯識，複釋《瑜伽》八百余卷，今得一卷，依以指南。然戒賢樹義，獨超時輩，如說五蘊無常、善根觀心、總一相現，是共相境，非現量攝。見道觀心，有五無常，一心五解，稱自相境，方名現量。妙義弘文，惜不多見。彌勒、文殊，無著、龍樹，護法、清辨，戒賢、智光，兩兩對稱，是法標幟。垂老奇疾，不取涅槃，傳法奘師，有逾誠懇。奘師聽講《瑜伽》三遍，《顯揚》、《對法》、《正理》一遍，《因明》、《聲明》、《集量》三遍，《中》、《百》二論，亦複三遍，如是諸部，凡經五載。結西域之終，開東土之始，此學樞紐，是稱戒賢。

此土此學傳譯先聲，魏則佛陀扇多，隋則笈多行矩，但譯《攝論》，未可稱最。張大譯事，厥有三家：一、菩提留支；二、毗目智仙；三、真諦三藏。真諦揭典，十未譯一，要籍將全，盛弘《攝論》及與《俱舍》，然樹義多異，世親別支。《瑜伽》巨典，唯譯三卷，名《決定藏》，文多不暢。北涼、劉宋，《地持善戒》，譯亦不良，而使甘露無飲，大法久空，哀痛慷慨，沉淪曷極！有玄奘法師者，悲深愿切，誠重勞輕，絕漠萬裡，淹留羈滯，十有七年，文字語言，玄思奧義，頻于十死，擯于九難，而後《瑜伽》百卷，得真獲全。又譯場大德二十六人，綱羅奇傑曠世一時，誠所謂供養無量百千諸佛，機感奇緣，非稱苟簡。然奘師所譯，七十四部，千數百卷，視得梵本，九分惟一。奘師著述，獨存《唯識》一量，《會中論》、《製惡見論》，凡六千余頌，未留一字，最足憾者。經則《阿毗達磨》、《如來出現功德》，論則《分別瑜伽》、《集量》，小乘則經部《毗婆娑》，朝夕所資，輒不獲睹，旁徵博采，矧冀其余。古先哲言：東土多大乘根器。其諸必有豪傑，奮然崛興，繼奘師後。

奘門多才，太賢圓測，每樹異義，《深密》測《疏》，于今猶存。然、尚、光、基，稱四大乘，恍若什門睿、融、生、肇。尚佚籍，光記《俱舍》，堪表一宗。若夫群義發揮，要論都釋，百本之疏，猶存過半，惟我基師，恍惚如對。其糅厥古，先在《成唯識論》；其錄存師說，在《法苑義林》；其自所立教，大善因明，流通五姓，則在《因明大疏》、《法華玄贊》。《大論略纂》，尤萃精華，泱泱東海，貽我至寶，研尋有途，不其懿歟！

基師之後，慧沼、智周，承弘五姓，作《慧日論》，其《了義燈》、《演秘》，俱詮唯識，亦有精華，至夫《瑜伽》著述，一切蕩然，今所依倚，有道倫《記》，猶資探討，因流溯源。自是以來，微乎渺矣。

緒言第六

永明壽師，作《宗鏡錄》，詮次法相，雖無樹義，猶能詮釋，古典具在，依據不誣。元末籍亡，斯學沉響，明人壁造，勞而唐功。遂使數百余年，治此宗者，舍《相宗八要》、《唯識心要》以外，無別精研。支離破碎之談，戶牖一孔之見，有天地之大而不能知，有規矩之巧而弗獲用，惟望此而卻走，誰有事于《瑜伽》？

唯我親教深柳大師，天縱之資，一時崛起，道、咸之際，舉國沉迷，師以讀奇書，獲《起信》、《維摩》于皖肆，浸假搜羅，遂通三藏。由是發愿：愿法與劫齊，愿人都法獲。私家刻經，始于宋元之際本，次于明武陵方冊本，三于明清之際密嚴嘉興本。隨成隨毀，蕩然無存。師創金陵刻經處，繼第四之私藏，利有情以菩提。顧其所學，由《起信》而淨土，由淨土而《華嚴》。華嚴尊《疏鈔》，《疏鈔》以唯識釋義，由是暮年深探法相。初，于南條文雄氏得《因明大疏》、《成唯識述記》，次第刊行，未遂治刻《瑜伽》，僅成其半而慧日西淪。他日葉元問：《瑜伽師地論》後半若何？師對曰：以囑諸漸。數日寢疾，命三事，筆以告同人：一、繼刻《瑜伽》；二、作《釋摩訶衍論集注》；三、編《等不等觀雜錄》，複速成《大藏輯要》，附作提要，而陸續以成全藏。

今者，《等不等觀雜錄》由徐文蔚編成，《瑜伽》亦以機緣幸未辱命。然是《論》刻成，由終溯始，已閱二十寒暑。夫以無著請說之難、奘師傳譯之難、元明展轉刻而複毀之難，今者重刻又如是之難，敬恭作《敘》，以志其難。其難已往，由文字入實相，庶其無難。乃從而作偈，偈曰：

彌勒未下生，法已先得聞，

由聞而思修，三慧熏種成。

發心速入地，平等轉殊勝，

三學伏斷惑，轉依即証真，

要由有門入，必持攝大乘，

此學郁千載，其籍東海存。

讀已即宣告，依法不依人。

民國六年（1917）中秋，編者宜黃歐陽漸識于金陵刻經處

(選自《歐陽競無先生內外學》第三冊)

《大般若波羅蜜多經》敘卷一

敘曰：應學般若學。般若者，五度之目，萬行之鵠，三世諸佛之所自出。有母然後有子，有般若然後有世間人天、出世聖賢。般若者，智也；智也者，用也；用也者，以空為具，非以空為事也。是故空有二義：非義、不義、無義之空，空亦應空；如義、實義、涅槃義之空，空不必空。般若之相，無住涅槃；般若之行，瑜伽巧便；般若之至，無上菩提。是故應學般若學。以四門敘：一曰五周以敘事，二曰十事以抉擇，三曰諸經之所系，四曰諸家之所明，而以緒言終焉。注

五周敘事第一

曰五周以敘事者：《大般若》十六會，初有五會，義海全潮，有統有系。中有五會，河漢江淮，巨流時出。後有六會，六度各六，一度系屬。全豹窺觀，應于初五。初雖五分，文異義同。詳略文異，應為三類：初分為一類，文四百卷，是為極詳；四五為一類，但有四周，而缺方便，世稱小品《道行》四會是也，是為極略；二三為一類，具敘五周，而缺最後方便付囑，然秦譯詳，世稱大品《放光》、《光贊》二會是也，是為酌中，最便研讀。今循二會，按文提系，談五周敘事。

此經五周說般若也。以經名智慧，舍利弗智慧第一，故初周佛詔舍利弗談菩薩智慧，談菩薩二諦，是為最初舍利弗般若。般若多說空義，須菩提好深行空法，又慈念眾生，故次周佛詔須菩提談菩薩三解脫門，談摩訶衍摩訶薩，是為第二須菩提般若。《金剛能斷論》雲：欲令佛種不斷者，未成熟菩薩聞多福德于般若起信解，已成熟心入甚深義，已得不輕賤者修多功德不復退轉，已得淨心令大乘久住。本其意義讀索此經。佛以帝釋久聞能記，許與問論，而談般若福德，令初發心咸生信解，是為信解般若，亦為帝釋般若。佛于《中含》為彌勒授菩提記，又于此經為彌勒說菩薩行，菩薩行佛所行，得亦無得，令已成熟入深般若，是為入甚深般若，亦為彌勒般若。合上二事並為一談，應說為第三信解般若。龍樹《緣起論》：此經為說阿跋致相故，為說魔幻魔偽魔事故，為說當來世人供養般若因緣故，佛為顯示種種，令久修人功深不退。是為第四不退轉地般若，亦為實相般若。佛境而菩薩行，菩薩行者，妙于方便，境、行、果三，此周特勝：經之為摩訶衍，人之為摩訶薩，法之為大菩提，亦于此周闡發無余，是為第五究竟地般若，亦為方便般若。

舍利弗般若一

舍利弗般若者，般若是智慧，智慧一切相應，法中最勝，此經所明，是故應敘在經始。七事敘初，放光集眾，全經之所屬，亦此周之所系。如是說〈序品第一〉。

大乘義門，三性二諦。三性《楞伽》所詮，二諦則此經詳盡。三性二諦，名異義一，真攝遍、實，俗即依他，遍計簡盡，成實斯彰。曰不、曰非、曰無，顯第一義。

若說功德，則攝俗詮。夫能安住般若者，應以無所得方便，而學三乘無量無邊功德，非空之是歸而菩提是趣，舟車必用歷山川，是故佛為略敘應學聲聞十種、菩薩九種、如來十三種功德事。若欲成就世、出世無量無邊功德，當學般若波羅蜜。菩提不可至，求方便于空而可至，所謂功勛必賴經猷，作業必資作具，是故佛為略敘世德、佛德九十三種，皆須學于般若事。若能如是，諸天親供，梵行護成。全經之所屬，而此周之所系。如是說〈歡喜品第二〉。

大法既重揭示，行果應續而談。〈觀照品〉者，般若之行果相也。行有其二：曰無著行，曰相應行。果有其一：曰授記果。

初、無著行者，以二空故。不見人、法境，不見修般若行，由不見故，不生執著，是為能取空義。人自性空，法自性空，均空故不離不異，不異則無，無一切法相，無生滅染淨相，是為所取空義。所取空故，能取自空，能取空故，但有假名，如是而行，行故無著。是為菩薩般若，以無著故，聲聞但空般若所不能及；以無著故，悲心入空大作功德，聲聞不能；以無著故，行無所得而有方便，聲聞不能。

次、相應行者：一、與空相應；二、不見相應；三、互不相應。與空相應者：蘊、處、界諦支有無為，及與七空，與空相應，法空不二空中無法，應言與般若相應。不見相應者：不見六度三科覺分佛道三解三際諸法相應，不見一切智與如是諸法相應，不著有無倒解，不行諸有所為，如是相應，應言與般若相應，如是智慧，報得五利功不思議。互不相應者：法與法，法與法界，法界與空，三科四諦覺分佛道諸法與空，都不見其更互相應，應言與般若相應。如是相應空應第一，授記不墮嚴土証覺，而亦不見，是為最尊最勝畢竟清淨。此般若相應菩薩，有種種生相，三處來生佛處沒往，得妙方便，雖入靜慮而生佛世，為度有情，生欲界人天梵世睹史，游于一切諸佛國土。此般若相應菩薩，有種種行相，利根頓証，自在入定，三乘度人，速久成佛。為化有情淨業斷趣，一度上首，隨趣擇嚴，相好致愛根利不慢。以其所修不墮惡趣，常作輪王，不離十善，不起罪業。或復淨粗重業，淨菩提道，不著一切真趣菩提，成勝智，淨五眼，引六通。又復能以互融六度及與四攝，嚴淨一切智、一切相智道，而成正覺。菩薩如是功德，最上最妙。菩薩如是功德智慧，一切聲聞但空智慧所不能及。

授記果者：三百 必丘發無上心，佛記星劫作大幢相佛，六萬天子彌勒授記，一萬有情愿生淨土，佛記成佛號莊嚴王。若諸有情般若相應，命終往生，當生東方不動佛國。如是說〈觀照品第三〉。

般若行果，略說已竟。舍利弗與目犍連、須菩提、大迦葉、富樓那等，合掌同聲，以三十一種名號，稱揚贊嘆般若波羅蜜。稱是菩薩最尊最勝，具大勢力，能行無等等六度，疾証菩提，滿足功德，人天應禮。佛言如是。如是說〈無等等品第四〉。

舍利弗般若竟。

須菩提般若二

須菩提般若者：般若以空為用，用于功德。須菩提善空，故此有三門：初、字空般若門，中、字義般若門，後、廣字空般若門。

未談三門，先應有敘。佛和大眾度于一切，答舍利佛問，已放光明。更為余人，命須菩提說空教誡，放光集會。于時會中，那庾多眾，觀相發愿，已悟無生，佛記作佛號覺分華。是為此周開始序分，未入正宗所談三門。如是說〈舌根相品第五〉。

初、談字空般若門。是門亦三：曰字空，曰功德，曰三解。

字空者何耶？須菩提住空三昧，不見人、法，故一聞佛命教授菩薩，瞿然而驚：雲何菩薩？雲何般若？佛為述成，菩薩發心乃至佛道，皆畢竟空，都不可得，以如是教即般若教，即所命教菩薩之教，所謂我蘊、處、界、內身外事、三世諸佛皆不可得，譬如夢幻，法假、名假、方便假。不應以四倒三解、寂靜遠離雜染生滅而觀諸法。善達實相一切無著，便益六度入菩薩位。是為第一章，佛自教菩薩概略觀法。

如是空觀，人或猶豫，佛即反問須菩提：若法不空頗有，即離諸法，是菩薩不？頗有諸法，增語四倒三解寂靜遠離雜染生滅，是菩薩不？須菩提入深不疑，直答佛言：法性尚非有，即離增語更何可言？菩薩假人又何可言？佛贊：善哉！應如是學，非但菩薩見不可得，法界與法見亦不得。若入空中，外法不得，心猶可得，則便恐怖，都不可得，更何憂悔？是為第二章，佛命須菩提教誡菩薩概略觀法。如是說〈善現品第六〉。

功德者何耶？須菩提非惡取空，能作功德而善用其空，乃白佛言：若菩薩欲圓滿六度，當學般若；欲遍知三科、六大、十二支，當學般若；欲永斷三毒結纏等等，當學般若；欲修行禪空諸定、覺分佛道、如是等等、當學般若。初品廣談當學，此亦略說當學。初品欲得而贊，此已聞味而贊。無般若方便法愛頂墮，有二十空觀正性離生。如實知三科、六度、禪空無量不應執，如實知菩提心、無等等心、廣大心不應執。是心非心本性清淨，于一切法無異分別，蘊至菩提應知亦爾。舍利弗言：善哉！善現，離空解脫，涅槃無門，三乘習空，一切善巧。如是說〈入離生品第七〉。

三解者何耶？此三三昧，小以為住，大以為路；小以為証，大以為行；法一用異，說空是共義，亦是根本義。初、空解脫，三門詮敘：曰謙讓門，不住門，明體門。

謙讓門者：上品菩薩字不見，雲何能說法？此品菩薩字增減不知不得，說法我當有悔。菩薩般若，世法聖法，義無所有，名則無住，亦非不住，非住不住，人、法字

空，雲何教授教誡菩薩？複以異門破諸名字，所謂和合因緣，二名乃立，夢幻影響但誑耳目，若求一法，實詮二名，遍一切中無處可說，雲何教誡教授菩薩？于如是義不驚不怖，未得無生，而已証其阿跋致。

不住門者：法愛難遣，已說重說。法即空故，不應住色乃至菩提，若無善巧，執法住法，不能修滿成一切智。又複不應攝受色至菩提，本性空故，若能以空觀一切法心無所行，是則已得無所攝受三摩地門，作用無邊，聲聞不及。大乘經中種種說空，小乘經中亦種種說空，如勝軍梵志得隨信行，尚能于實相空中都無取舍，何況大乘辦一切業，不能于非相法中而無所著？

明體門者，審諦觀察：何是般若，何名般若，誰之般若，般若何用？于法無所有不可得中無可徵詰，般若乃至一切智智都無所有而不可得，由二十空故。若于空義不驚不怖，便于般若常不舍離。能如實知，法離自性，便于般若常不舍離。自性無性，性相互離，成一切智。無生無成，乃其所成，畢竟清淨，化生度情。如是說〈勝軍品第八〉。

次、無相解脫。空解脫門，名無所攝受三摩地；無相解脫門，名無所取著三摩地。行無巧便，是行其相，住想勝解，于法加行，不能解脫生老病死、憂悲苦惱，諸有所作，皆不得成。行有巧便，不行于相，倒與不倒，定及非定，寂靜佛道，及其非相，一切不行，法即是空，能成正覺，不取四句，不取不取，作用無邊，聲聞不共，雲何不証無上菩提？健行寶印百十五種及余無量諸三摩地，深入其中皆能証覺，不可執說般若是空、三昧分別，兩不相涉。定、慧與人，三無差別。菩薩入定時，不念証入，不作想解，皆無所有，一切不起，般若氣分，乃在其中。如是無得，是為正學。我及諸法是其無得，無得無為，名畢竟淨。如無所有如是而有，名為學法，愚不能了，名為無明。執著二邊，不離三界，不辦三乘，不信法空，不住六度，于一切法執著有性，是為不學般若，雲何能成正覺？必二十空無得方便，然後乃名正學般若。必學般若，然後乃成一切智智。如是說〈行相品第九〉。

次、無愿解脫。一切種智心定相求般若，是為有愿有縛。如幻三摩地，無愿解脫門。法即是幻，幻無染淨生滅，雲何能學般若、能成正覺？于蘊中想立假人、法。亦無染淨生滅，亦不學不成，菩薩若能如是修學，乃為能學般若、能成正覺。幻土五蘊，無性為性，二十空門，不可得故。此如幻三昧，新趣菩薩若有方便，善友攝持，不驚不怖；若無方便，惡魔侵害，有怖有驚。以應智智心，觀無常無我，苦空寂靜，相不可得，于諸聖道一切無著，名有方便。以無得方便，勸人趣菩提，名為善友。離智修法，有得有恃，名無方便。為說六度文頌者造，不為說知魔幻佛形種種嬈擾，令離六度，宣聲聞藏，汝無覺心不退証覺，一切不能，無我我所何用菩提？世無三乘，但樂聲聞，三解速証，涅槃樂易，舍身苦難，一切諸法實有可得，說如是事名為惡魔。如是說〈幻喻品第十〉。

中、談字義般若門。字空般若破假名字，字義般若不壞假名。非空即了，應續談義。作佛以菩薩始，菩薩以上首極，上首以大乘至，大乘以般若契。佛說法主，始說句義。子善現，智空第一，此經相應，次說句義。富樓那者，轉輪第一，轉大乘輪，于此特最，後說句義。是故此門有四：曰佛說兩句義，曰舍利弗、須菩提說摩訶薩句義，曰滿慈因摩訶薩轉摩訶衍義，曰摩訶衍即般若義。

佛說兩句義何耶？菩提薩，二既不生，句于其中，理亦無有，故無句義是菩薩句義。法說難會，喻說易明，十八種喻，喻句義無，非應不應，一相無相，當勤修學，應正覺知。于一切法皆非實有，所謂世善不善、有記無記、出世間法、有漏無漏、有為無為、共與不共、如是諸法，無二無動，是菩薩句義。如是諸法，無分別執著，是菩薩句義，當勤修學，應正覺知。摩訶薩者，三乘聖道，大有情眾，當為上首。由彼已發金剛喻心、勝心、大心、不傾動心、真樂利心，常于此法，愛樂欣喜，方便住空，修諸聖道，住金剛喻乃至虛空勝三摩地，決定決定，于大有情能為上首，如是說〈譬喻品第十一〉。

舍利弗、須菩提說摩訶薩句義何耶？舍利弗以巧便說法，令諸有情斷我斷常、蘊、處、界諦乃至涅槃轉法輪見，名摩訶薩。須菩提則以欲証菩提，發無上心、無等等心、不共聲聞心而不取著，異生、聖佛蘊、處、界諦乃至不共，一切不生，無漏平等。而有差別者，但隨俗施，非第一義。以斯義故名摩訶薩。如是說〈斷諸見品第十二〉。

滿慈因摩訶薩轉摩訶衍義何耶？是亦三段。

第一、滿慈以三事詮摩訶衍：曰被功德鎧，曰發趣大乘，曰乘大乘。

被功德鎧雲何？為一切有情修行六度，拔一切有情于菩提涅槃，令一切有情滿無邊聖德，都無選擇，亦無齊限。度各各別力小魔留，度度被六大軍海傾。又複與諸有情回向菩提，不取不得，不著禪定。摩訶薩名，遍十方界。

發趣大乘雲何？般舟為父，般若為母，一切聖法般若所攝，般若產生結胎禪定，此談發趣，應禪定始。菩薩修八禪空，起四無量，以無得方便，與諸有情回向菩提，複以一切智智相應作意，大悲為首，依禪空無量，修行六度，及修念住一切聖法，普為有情發趣大乘。摩訶薩名，遍十方界。如是說〈六到彼岸品第十三〉。

乘大乘雲何？以一切智智相應作意，大悲為首，無得為方便。雖乘六度而不得度輪，為遣修故修一切法，菩薩及法但有假名，施設言說不可得故。雖他方聞法，而無佛土想。雖應身隨順，而不離大乘。摩訶衍名，遍十方界。如是說〈乘大乘品第十四〉。

第二、佛與善現廣演三事。廣初一事，而有四義：一者、為有其能義，能六度、覺分、二十空門、十力、三智、化度放光如是等等；二者、為能如幻義，幻法無實，以是作大輪王六度教眾，于邪惡處示現同事，以是菩提作意，大悲為首，空為方便，普立有情于諸聖法而無所擇；三者、不被為被義，法相空故功德相空，為空而被鎧，人、法造作不可得故功德不可得，為不可得而被鎧；四者、無縛無解為被義，諸法本來無有，遠離寂靜，無生滅染淨，是故十喻三時、善世有漏、諸五蘊等，無縛無解，是故一切六度、二十空門、覺分、十力、菩薩行、一切智、真如、菩薩有為、無為，無縛無解。如是微妙，以無所得而為方便，應如實知，應勤修學，應熟其情，應嚴其土，常不遠離如是聖德，常作如是法事，是為被無縛無解大乘功德鎧。如是說〈無縛解品第十五〉。

廣次二事，而有五義：一者、大乘相。謂以一切智智相應作意，大悲為首，無得為方便，自行他行六波羅蜜，回向菩提，謂本性自爾，非常非壞二十空門，謂希有微妙一百十三勝三摩地。如是說〈三摩地品第十六〉。

又、大乘相者，無得為方便，修四念住至八聖道、三解、十一智、三根、三尋伺、十念、九次定、十力、四無畏、無礙不共、陀羅尼門。如是說〈念住品第十七〉。

二者、大乘發趣。修行六度，從一地趣一地，無所從來，亦無所趣，不恃不思維，而不見彼地，是為大乘發趣。初地十業，二地八業，三地五業，四地、五地皆為十業，六地六業而有二種，七地為業而有二十，八地、九地皆為四業，十地後業，與佛無別。如是說〈修治地品第十八〉。

三者、大乘出至。大乘從三界中出，至一切智智中住。然乘與智二，非應不應，一相無相，過未今時，何出何住？若令無相而有出住，是則法界空，乃至一切法空，亦應出住。然自性空而無出住，是故以世諦故而說出住，以無二方便故實無出住。

四者、大乘所住。諸法住處不可得故，大乘以無得為方便，都無所住。法界乃至無為自性空故，破有非住，世諦非不住，大乘以無二為方便，住無所住。

五者、誰乘是出？我乃至見者不可得，法界乃至無為不可得，非已得今得當得，畢竟淨故。大乘亦爾，無乘大乘而出住者。然無所得而為方便，乘于大乘，從三界生死中出，至一切智智中住，窮未來際利樂有情。如是說〈出住品第十九〉。

第三、佛成善現五贊：一者、超勝于一切。若三界乃至十八界，是真非妄，無異不倒，是實是諦，如所有性常恆無變，有實性者，若法界乃至轉法輪是為實有非非有者，則此大乘非尊勝上妙，不能超勝世間天人阿素洛等。以不然故，超勝于一切。如是說〈超勝品第二十〉。

二者、乘等于虛空。譬如虛空，東西南北、四維上下，皆不可得；又如虛空，長短高下、方圓邪正，皆不可得；有如是喻二十五事。三者、空普容有情。有情、虛空、大乘，三事遞無所有，三事遞無量無數無邊。有情、虛空、大乘、無量、無數、無邊，六事遞無所有，以無所有容無所有故。如是我乃至見者，六事遞無所有，如是我乃至見者遞至一切相智，又六事遞無所有。以是一切，皆無所有不可得，故說大乘普能容受無量無數無邊有情。四者、空無來去住。一切法無來去住，一切法本性真如，自性自相無來去住，若動若住不可得故，由此因緣，大乘無來去住可見，猶如虛空。五者、空無前中後三世，三世平等超出，菩薩、大乘諸如是等，一切皆空，空無差別之相，是故大乘于一切相，俱不可得。三世一切法空，空中空尚不可得，何況空中有三世一切法可得？三際法平等，平等中平等性尚不可得，何況平等中有三際法可得？三世諸佛，乘是大乘，得一切智。如是說〈無所有品第二十一〉。

摩訶衍即般若義，何耶？一切善法菩提分法，聲聞、獨覺、菩薩、如來諸出世法，無不攝入甚深般若，非應不應，一相無相。故說大乘于說般若，了無違越，乘于般若及于一切，都無有異，性無二故，名異義一故。如是說〈隨順品第二十二〉。

後、廣字空般若門。須菩提常樂說空，常以空門利益眾生。是故贊字義已，複廣字空。是門有二：曰無邊際，曰遠離。

無邊際何耶？初、以十二事廣人空；次、以觀法不生不二，廣法空。初、十二事者：一者、有情及法，無所有空，遠離無自性，無二無二處；是故三際菩薩，無所有不可得。二者、一切法性空，三際不可得，說如虛空，是故法無邊際，菩薩無邊際。三者、法非法；法非法性空；空中法非法，無所有不可得，是故即法、離法、無所有不可得；菩薩無所有不可得。四者、法法性空，法于法無所有不可得；是故于一切法，以種處時，求諸菩薩，不見無得，雲何令以般若教誡菩薩？五者、法非名，名非法，非合非散，性空假設，一切法名，唯客所攝，是故說諸菩薩但有假名，都無自性。六者、我至見者色及三乘，畢竟無所有不可得，雲何有生？是故我至見者，畢竟不生，但有假名，都無自性。七者、和合性空，法無合性；法自性盡，非常無去；法本性爾，非常不滅；是故亦說諸法畢竟不生，但有假名，都無自性。八者、一切諸法本性不生，非所作所起故，作者、起者不可得故，是故蘊乃至乘一切諸法，畢竟不生。九者、法本性空，不可施設生滅住異，是故說畢竟不生，則不名蘊乃至名乘。十者、畢竟不生即般若菩薩，菩薩般若即畢竟不生，無二無二處，是故說我豈能以畢竟不生般若，教誡畢竟不生菩薩？十一者、不見離畢竟不生有般若菩薩及一切法，般若菩薩一切法與畢竟不生無二無二處，是故說離畢竟不生亦無菩薩能行菩提。十二者、見法如幻現有無實，聞空生喜，是故說菩薩說不驚不怖能行般若。次、觀法不生不二者、菩薩觀察諸法，于法無受取住著，亦不施設為我者，不見法故。不見法者何？法性空無生滅故。法不生不滅即非法，以法與不生，無二無二處，非一二多別故。法不二即非法，法入無二法數。如是說〈無邊際品第二十

三〉。

遠離何耶？初、以異門廣不生不二；次、明淨菩提道。異門廣不生不二者：上破一異等生名無生，今破眼色有無等二名不二；上無生自相空，今不二是散空；以是異門故。雲何菩薩？勤求菩提，利樂有情，具如實見，遍知法相，而無所執，是名菩薩。雲何般若？有勝妙慧，遠有所離，遠有所到，是名般若。雲何觀察諸法？法非四倒三解寂靜遠離，非不四倒三解寂靜遠離，是名觀察。雲何法不生不滅即非法？法，法性空，性空中無生無滅，無一切法故。雲何法不二即非法？若法不二，非應不應，一相無相故。雲何法入無二法數？法不異無生，無生不異法故。

複次，菩薩觀察諸法，見法無生，畢竟淨故。此法不生，而能勤修得果，証覺轉輪者，非我于彼無生法中，見有六趣三乘，亦非菩薩見苦，起苦想而行苦，一切人、法皆不可得故。我不欲以生無生法有所証得，但隨俗設有得、有現觀、有三乘聖果、有業果熟染淨故。我不欲令未生已生生，自性空故。我不欲令生與不生生，生與不生，非應不應，一相無相故。如是于不生法，有樂辨說，亦非應不應，一相無相故。如是于不生法，起不生言，此法及言，亦無生義，能說所說及聽說者，亦無生義，本性空故。是故不著一切法，于法得自在，善能酬答，諸法性空，內外中間本無依故。淨菩提道者：菩薩修度，應淨諸法菩提道。若以世間有得修，是實不淨；能以出世空輪修，乃名清淨。淨道以無量功德聚成，無量功德聚以般若勢力成。所謂般若善法母，三乘從彼生，三乘人所住，三世佛所行。然菩薩聞般若，心不疑悶，于無所得住大悲作意，與諸異生，于如是住及此作意，等無差別。何以故？住及作意，與諸有情及一切法，皆非有無實，無自性空，遠離寂靜，無覺知故。善現說法已，佛贊：善哉！若欲說法，應如汝說；若學般若，應如汝學；隨汝說學，速証菩提，轉輪度眾。于時三千大千世界，十方世界同說般若，無數天人阿素洛等得無生忍，無邊有情發正覺心。如是說〈遠離品第二十四〉。

須菩提般若竟。

《大般若波羅蜜多經》敘卷二

信解般若三

信解般若者。《阿含》：帝釋是須陀洹，龍樹則謂是大菩薩，是為法位之始。《阿含》：彌勒授記補處，是為法位之終。位既始終，說亦始終，始修般若未成熟者，必使信解；既已成熟，求畢竟者，使入甚深。信解以歡福而起，入深以隨喜回向而大，以無相隨回而住。然龍樹有言：說功德故以白衣証。白衣帝釋大；說般若故以出家証，出家舍利弗、須菩提大。是故此周將談功德，子、善現以三解脫先談其體。帝釋諸天校量勝利，正談其用。然龍樹又言：佛命善現教誡教授，中間帝釋多說功德，彌勒順意，還欲返本深談般若。是故此周雖談功德，彌勒現時法會，演無相隨回，將來下生說無縛無解，皆以甚深法義，為已成熟者，繼功德而談故。應析此周為四大門：曰三解脫門，曰校量功德門，曰甚深義門，曰大贊嘆門。

曰三解脫門者：諸天集會，蔽于常光，暨乎會終，多門贊嘆，非正宗攝，終始宛然。

今談正宗。此周正宗，功德校量。誰之功德，三解之功德；誰與誰校量，三解與諸行校量。故應先談三解，後談功德校量。

如幻義是無愿義。然帝釋三問：何謂者問般若體，體是空解；應住者問深入究竟住，究竟住是無相解；應學者問初入方便行，方便行是無愿解。則又而空，而無相，然後乃能及于無愿。

體是空解者：唯利根人直聞頓悟，若欲普度鈍根，則教發一切智心。以無得方便，先于諸法思惟四事、八事、十四事，方于諸法思惟寂靜遠離，無生滅染淨作為。作如是觀，唯有諸法互潤增圓，計我、我所，菩提回向互不合得，如實都無，菩提回向心皆非心。心與非心，四句回向，都所不應，非心即是不可思議，不可思議即是非心，二俱無有，無所有中無回向義。心無自性，無回向心義。若作是觀，是謂菩薩般若波羅蜜。

究竟住是無相解者：法法空，人人空，無二無二處，應如是住。不應住法；不應住此是法；不應住法于常、樂、我、淨、寂靜遠離及彼皆非；不應住果于有為所顯、無為所顯；不應住沙門是福田、菩薩遞十地；不應住初發心已，念我當修、當圓、當証；已得修已，念我當遞証修滿；不應念我速成正覺，作諸功德；以如是住，有所得故。如來之心，于一切法都無所住，亦非不住。此應住不應住法，如幻如夢，汝等天子當何所解？此法法性亦非深妙，施設不及，文字皆離。如是說〈帝釋品第二十五〉。

方便行是無愿解者：畢竟深法無解非妙，說聽亦無，初入方便，茫乎無涯，諸天于是益疑：為何等有情，說何等法？善現乃言：為幻有情，說如幻法，設更有法勝涅槃者，我亦說為如幻如化。必四種人，乃堪信受：一、不退菩薩；二、愿滿羅漢；三、植眾德本；四、善友所攝。若有善友，凡初亦能，以如是人、法空不別，能信所信，都無顯示，是故能入。然復廣說三乘神通妙辯者，仍于一切法中，以無所得而為方便，由二十空故，如是說〈信受品第二十六〉。

無生義是空義。天喜般若，化華設供，善現心念：華非樹生。帝釋旋難：華既無生，不應計樹。善現反詰：既了無生，何華不華？帝遂折伏，問：但華無，諸法亦無？善現即言：一切不生，不生非法。善現不壞假名而說實相，法與所說俱無違順，是為善說無生義者。菩薩若知法但假名，不于法學。不見諸法可于中學。法法空故不見，不見故不學。不可法空，見于法空故。不可法空，于法空學。不于空學，方為空學。不于法空學，方為法空學。以無二為方便，于一切法學。無量不思議佛法，一切能學。不為法增減故學。不為攝受壞滅法故學。能所內外空故，不見有法可攝受壞滅，有人能攝受壞滅故，以不攝受壞滅方便，成一切智智，不見法生滅取舍染淨增減故，法性無有不可得故。

不即不離義是無相義。舍利子依持佛力，答帝：求般若當于善現說中求者，佛無依持，隨俗說有，是中非即非離此三，謂：一、無依持；二、無依持真如；三、無依持法性；而可得此三，謂：一、如來；二、如來真如；三、如來法性；又是中非即非離此三，謂：一、色等；二、色等真如；三、色法性；而可得此三，謂：一、如來；二、如來真如；三、如來法性；又三，于即離色等非應不應，謂：一、如來；二、如來真如；三、如來法性；非即與離，非應不應，無依為依，即其所依。復次，舍利子答帝：求般若，不應即法離法求者，般若于法于求，非應不應，一相無相。般若于法、于法真如、于法法性，固非所即，亦非所離。

善現說三解脫已。帝釋三贊之：般若波羅蜜，是大波羅蜜，是無量波羅蜜，是無邊波羅蜜。法已必贊，此經通義，如是三贊，後品綦詳，如是說〈散華品二十七〉。

曰功德校量門者：此門是此周正談，曰功德之談，曰校量之談。

功德之談有三：曰授記，曰現法勝利，曰現未勝利。

雲何授記？天贊善現：般若無得，而有三乘施設。佛因詳談，乘與聖行非即非離，有能無得而行聖行者，應禮如佛。我昔掩泥蓮供，聞妙然燈。方便為無，不離聖行，菩提授記，號釋迦牟尼。業已現前，佛宣般若，度無量眾。

雲何現法勝利？佛觀四眾，而命天帝：若諸天于此般若智心方便，行十法行，有四勝利，爾等應禮。以能三解故，魔不燒害；以能慈故，人非人等不能燒害；以能施

故，惡緣橫死，一切都無；以能空故，曠野險難，不驚毛豎。諸天酬佛。由是菩薩令世永離災兵惡趣，令世便有三乘聖法、三界豪貴、三寶福田，故應禮護，不令災侵。佛為校福，供一初發心勝無量聲聞，以佛不出聲聞故。如是說〈授記品第二十八〉。

雲何現未勝利？上說現法勝利已，帝贊希有，是能承事諸佛，十二圓滿，至無佛土，三乘度生。佛乃為帝說現未勝利。于此般若，行十法行，魔欲破法，適受其殃，拔眾淪迷，令修六度，當來不久，証覺轉輪，是為現未勝利。又魔但起心，反為所轉，莫耆威勢，驅去飢蛇，能滅諸見及諸法著，天護息災，佛被增善。自能離修，亦教他能。計念當來不行六度，不免卑劣，何況修圓，是為現未勝利。如是勝利，若無方便，行世六度，便起高心，不回種智。若複三輪體空，出世行度，高心乃伏，種智斯回，如是說〈攝受品第二十九〉。

校量之談有三：曰 堵波校，曰設利羅校，曰異門校。

堵波校者：初說勝利而校，中因實証旁及其余，後複續說勝利。初、說勝利而校者：一校，三贊，六勸。

行十法行，安樂無惱，戰陣不傷，毒害不及，隨所居處，人及非人，災橫病疫，一切都無，八部天龍，恭敬呵護。或書供養，或載身囊，吉祥安穩，尊重遺經，有如是勝利。夫悲深福眾，舍利斯留，作佛因緣，基于念處，三寶系世福田，何獨揖推深典？誠以種智相好，根本乃在遺經，般若菩提，根本非于遺體，是故莊嚴經典，起 堵波，二福校量，前多于後，是為一校。

然此三千，不能修道，少分住地，多退聲聞，般若不能，遑談余德？以無敬怡，福易而難，是故佛與帝天，為諸世間，歆動因緣，殷勤三贊：第一佛贊，第二帝贊，第三天贊。從一七寶，至三千大千，不及供經無量無邊，是為第一佛贊。恆沙有情，滿界經劫，起 堵波，不及行十法行供養寫經無邊無量。諸法總藏，三乘法印，除此般若，誰則能然？是為第二帝贊，如是說〈堵波品第三十〉。

帝非智人，或疑其說，佛亟印成，更為推演。如是說〈福生品第三十一〉。

第三天贊者：三千大千所有諸天，同聲白帝：是般若法，益天損魔，不斷寶種，獲聖果行，應于是經，受持讀誦，精勤修學，如理思惟，尊重贊嘆。是為三贊。

既因三贊，又複六勸。佛告帝釋，應十法行，無邊勝利：一、惡魔息爭；二、衰時心泰；三、經耳証覺，咒王攝遍，如月資星；四、毒病不傷，除先定業；五、官事不遣，王臣問訊；六、隨所生處，見佛聞法。故應行十法行，恭敬供養，是為六勸。如是說〈功德品第三十二〉。

中、因實証旁及其余者：一、談實証。于時會上，梵來求短魔軍奮威，帝誦深經，一時沒隱。般若威力，除暗發光，若有行人，應禮如佛。種智于般若求，般若亦于種智求，種智、般若，無二無二處。如是說〈外道品第三十三〉。

二、旁及其余。說此般若，與余五度，乃至不共，為尊為導。必回種智而修施等，乃名真學。必能方便無二無得，乃許能回。由般若能回種智，由種智令法究竟，般若與法，為所依止，為能建立故。

後、複續說勝利者：功德未已，應知即佛，殊勝五蘊，非聲聞能，以故種種勝利不可窮詰。以智智心無得方便，行十法行，天來受教，助力宣揚，為驅遮障，魔不成軍，難不勝立，常無驚怖。聖凡愛護，廣成眾德，降伏異冤。夫敬經護經，皆為有情，是以經處時有天來。宿業現輕，除茲無惱，香樂光明，足驗聖臨。故應經在七寶莊嚴。若複系想不移，寢應好夢，或見光明，或聞奧妙。此方他國，佛事紛綸。又複為佛悲護，身便心微，即但書嚴，亦勝嚴塔，是為說〈天來品三十四〉。

設利羅校者：佛設利羅以般若熏，乃能受供，帝答佛徵，于此二分，寧供深法。如實般若，不與種智，不舍雜染，不隨二行，一相無相，精勤修學，必証菩提。應禮深經，如凜帝座。誦憶契心，無諸怖異，相狀言說，一切都無，決不墮趣，及退聲聞。故設利羅校此寫經。寧供經卷，從一佛宣十二分教，乃至十方恆沙佛化，所有功德，與十法行平等無異。佛設利羅依于般若，如負債依王，逕直依王，寧依負債。又如神珠卻無量苦，是故足重。佛設利羅，般若熏故，聖法依故，是故亦重。供養《般若》，已見法身，亦為已供舍利色身，為見二身，應以有為、無為二種法性，修觀佛隨念。般若秘藏，皆由世俗，廣說三乘，是故應以般若為尊為導，修一切法圓滿。然施他校自福為多，已成佛來，還依而住，是等深義，如應須知。如是說〈設利羅品第三十五〉。

異門校者：先以行校。十善、八定及與五通。由瞻部洲至一切界，盡化有情，福校般若，遠非所及，般若秘藏，廣說無漏，如理思惟，攝一切法故。又複教他解義，勝自思惟，巧文開演，勝于實說。無得宣示，勝有所得；有得不圓，無得能滿；有得相似，無得方真。

後以果校。四沙門果，發心不退。直趣菩提，得不退轉，由瞻部洲至一切界，盡化有情，福校般若，遠非所及。又複教一人不退，勝瞻州趣覺；成一人拔眾，勝瞻州不退。藉所說法故，求速証覺故，大悲深切故。帝釋，佛聖弟子，利樂有情，應作事已，善現贊之。如是說〈經文品第三十六〉。

曰甚深義門者：一、彌勒表甚深，有無相隨回義；二、舍利弗、須菩提表甚深，有住義、引發義、信解義、清淨義。彌勒表甚深者：必入甚深，信解乃固。菩薩心緣，勝諸聲聞無邊勤勇。隨喜以勞力，回向以登極，巧便不可階，更複無相；無相者

，觀行之究竟也。是為彌勒所表甚深義。二乘為自，調伏涅槃；菩薩為他，隨喜回向。但是所取心，無是所緣事。既無其事，而非想倒、心倒、見倒者。久修菩薩非二不二、自相皆空，如實知心與所緣事盡滅離變，以無二心，俱時而起，能隨所隨、能向所向，皆不可得。而復有能回向菩提，故無三倒。新學菩薩，若得善友令入離生，或復未入令不離法，令不怖魔，令不離佛，聞如是教而不驚疑，隨其所修習，與其所普隨，皆共有情回向正覺而不起想，則亦不墮三倒。普隨者，全佛功德、全弟子德、全世界德，集合于一，而皆隨喜也。應如實知福離諸法，法離自性，一切無得，隨向菩提。若作是解，雖不取相而所作成。欲成所作，應學般若，如是而回，則為取相如雜毒食。如諸如來通達善根，有是性相而可隨喜，我亦隨喜；如諸如來通達福業，應以如是回向菩提，我亦回向。不墮三界，不攝三際，自性皆空，乃不雜毒。三千大千，十善四果，趣無上覺，福遜無著，隨喜回向，不可稱計。天贊佛贊，有得無得，長言校量。如是說〈隨喜回向品第三十七〉。

舍利弗表甚深者：彌勒隨回甚深，無量大利群生。子雖復漏盡寂離，而亦歡欣，多方贊嘆。贊已發問：為果而致修，應問所住；何因而得入，應問引發。得聞法已，應生信解；信解已生，畢竟清淨。是為舍利弗表甚深義住義者。一切聖法，般若所生，般若即佛。應住般若，如住大師；應禮般若，如禮大師。引發義者：五度生盲，般若前導。雖復互攝，能到智城，然具大力巧便速圓，應尊般若。不為引發一切諸法，是即名為引發般若，法無自性故。不與一切諸法和合，是即名為引發般若，法不可得故。遠離般若，有是二種：一、執與法合與不合；二、起是想無所有者，非實無堅，亦不自在。是故應信般若，不應信法。如是般若是大波羅蜜，于一切法，不作種種大小、集散、量與非量、廣狹、強弱。新學菩薩，于此不作，不隨四句，便真是行。人、法無生，般若無生，無性無有，空不可得，不可思議，無壞無知，力不成就，故說般若是大波羅蜜。如是說〈大師品第三十八〉。

信解義者：菩薩從于十方法會來生此間，多劫勤修，了知法純，無二無得，無見無聞，以是信解，生于久學。有初發心，能甚深法，亦能其余，常不離法，常不離佛。有多見佛，而修有相，由宿習力，聞說甚深，棄舍而去，以是信解，非于久修。棄法不聞，便生毀謗，墮入三塗，多劫多方，不能窮盡，其罪之重，重五無間，若悉形量，噴血命終。是等謗法，由有四緣：一、邪魔所扇；二、不解深理；三、受惡友攝；四、自高蔑彼。惡友斷慧，信解尤難。諸法甚深，無縛無解，無所有性以為自性，諸法清淨與果清淨、般若清淨、互攝清淨，無二無別，無壞無斷。惡友不淨，淨不相應，是故信解尤難。如是說〈地獄品第三十九〉。

清淨義者，是義四法明：曰畢竟淨，曰無執著，曰如虛空，曰偏十方三世佛說。畢竟淨者：自性清淨，入法初門，畢竟清淨，無余証得。舍利弗發希有心，說淨甚深，如是所說，有十二事。須菩提說我淨、法淨，如是所說，有其五事。佛過彼見淨無所著、淨體亦不著，曰畢淨竟。菩薩了畢竟淨，成道相智，法不知法住正定聚。無執著者：若有巧便，不轉二想，我能行証如是行証，達十八空，故無所執著。若

無巧便，起種種想，便知執著。應勸有情，忘其所能，自他無損，乃離執著。更有微細念取佛相、隨喜無漏、共向菩提，皆虛妄故，亦名執著。知法無証、無性、無作，遠離執著。無著般若，不可思議，離相不生，亦無造作，是故難了。如是說〈清淨品第四十〉。

如虛空者：虛空無著，若不行法，不行法倒、法滿、法執及與非倒、非滿、非執，是行般若。尚不見法，況倒滿執非倒滿執，是為無著。菩薩于此說與不說、修與不修，俱無增減，如空般若，而勤學不退，是為難事。又復為此如空有情修一切法，甚為希有，爾等諸天應深敬禮。然此般若雖非其有，而亦非無。應如虛空如是而學，應如虛空如是而護。知法如幻，而不執法是幻、由幻、屬幻、依幻。遍十方三世佛說者，諸天神力，遙見東方南西北方四維上下，皆說般若，善現上首，帝釋問難。佛智見後，慈氏下生，亦如是說，非倒不倒，非縛非脫，非過現未，証畢竟淨，說畢竟淨故。無生故法淨，法淨故般若淨。無生故虛空淨，虛空淨故般若淨。法與虛空，不可取故無染，無染故般若淨。一切法無生滅、染淨，畢竟淨故，般若清淨。

曰大贊嘆門者。善現贊嘆：行十法行，身泰天護，六齋日宣，諸天集聽，獲無量德。如是般若，解苦施樂，是大珍寶。如是般若，開示聖法，入位証真，名大寶藏。此大寶藏，不說少法生滅、染淨及與取舍，不說此法即是此法，名無所得大法寶藏。此大寶藏，不說妙法是能染污，亦無少法能染般若，名無染污大法寶藏。如是般若，有能善修，無相無慢，疾証菩提，般若于法不與不舍，有佛無佛，法性常住，而非有作。彼天唱言：轉第二輪者，而非轉輪。人、法般若，皆自性空，不為轉還出現斯世。然諸菩薩通達法空，而依般若証覺，轉輪度無量眾。雖証菩提，而無所証；雖轉法輪，而無所轉；雖度有情，而無所度。一切都無，標幟名言，皆不可得，是故般若名大波羅蜜。如是說〈無標幟品第四十一〉。

善現贊大波羅蜜已。遂以智慧入種種法門，如海無邊，縱言大贊：如是般若是無邊波羅蜜，如是般若是平等波羅蜜，以如是等波羅蜜多，遍贊般若。如是說〈不可得品第四十二〉。

三十一贊《舍利弗般若》竟。九十一贊《信解般若》竟。

實相般若四

實相般若者，《瑜伽?菩薩地?菩提分》持以三門敘：曰所學處，曰能學人，曰如是學，相應如理，曲盡其致。《般若》、《瑜伽》，等一以視，彼菩提分，此實相義，固應等一。是故此周三門讀文：曰所學處，曰能學人，曰如是學。

初、說所學處。體是所處，般若以用為體，生之謂用，子以母生，般若者，諸佛之

母也。學處正談，應談母生，然欲暢生，應祛留難，留難不來，應根信解。是故此門，雖為實相以談母生。而事以序從，應如是讀：初、信解，次、留難，後、母生。

且初、信解者：一周開始，或集眾放光，或贊德勸學。此談信解，帝釋、子俱贊久修，禮十法行。佛可其說，一切出生，唯般若能，若欲成就十種果行，當學般若波羅蜜多。是為序分勸學。

般若于法不住不習，可住可習不可得故。般若于法非住習非不住習，三際不可得故。甚深難測無量法，真如如是，般若如是，不行法如是，是行般若。法如是，非法故是，故信解極難，非于新學，乃在授記。牧野近都，無山近海，春華近果，孕重近孳，信解之人，受記近覺，未記近受。如來甚奇，攝受付囑，是諸菩薩四攝攝生，自修諸法，亦教他修，教沙門果而不自証。菩薩甚奇，成就圓滿大功德聚，法無性相，不作不轉，虛妄不實，無覺離我，修般若時，不見諸法增減是非三際三界。法不思議，如來所說不可思議。修般若時，于法不起若可思議、不思議想。是故信解極難，必久植善根，多事善友，法與相性不起分別，無異分別，以是諸法不思議故，乃稱久修，乃能信解。諸法甚深，如是般若極為甚深。能與有情一切法寶，如是般若是大寶聚。一切諸法各各清淨，如是般若是清淨聚。

次、留難者：一、現世不留難；二、當來不留難；三、廣敘留難事。現世不留難者：此會廣說，留難不生，現事現前，佛神力故，無價珍寶，留難必多，書寫修習，思惟宣說，疾馳盡力，竟于一年。十法行人，佛神力故，法爾令魔失留難力，護念是人識知，是人令作皆成。十法行人，已近正覺，深解般若，獲大財利，大果異熟，至不退地，不離聖法。

當來不留難者：佛出東方，雙樹滅後，般若至南，日月五星，從東而南、而西而北，般若流行，亦復如是。雪山冷故，藥能殺毒。由是北人信等五根柔軟，得勢多行般若，利根憶念，鈍根書寫。後五百歲，甚深經典于東北方大作佛事，諸佛贊嘆，諸魔不壞。是大乘人，發宏誓愿：現在過去，佛皆隨喜。信大、施大、根大、報大，回生佛土，時聞深法，度彼土眾。恆修六度，相應經典一切時得，無不得時。如是說〈東北方品第四十三〉。

廣敘留難事者：辯不應其說，度不圓其修，行事而解生，書誦殊無味，聽經作是念：我不得授記，經不說我名，及生處聚落，應棄舍而去，何用聽彼為是等迷惑人，減德獲罪障，修難行苦行，久乃複本德，當知是為魔事。複次，舍《般若》求余經，此有七喻：餓狗舍大家食，從仆隸覓；舍香象，求其蹄；舍大海，觀牛跡；舍帝釋宮，求日月居；舍輪王相，求小王威；舍百味食，求啖稗禾十弟；舍無價寶，取迦遮末尼；當知是為魔事。複次，書寫經卷時，起劣尋、伺而不書，非無性法能書無性，起無性想而不書，依經執文，依法非文，又執無文，國土親朋種種作意，當

知是為魔事。複次，行十法行時，為大名聞供養恭敬，俗典小經相應受學，當知是為魔事。如是說〈魔事品第四十四〉。

複次，有為諸法，緣合則生，行十法行，師弟同心，乃得成辦，敘四十四種兩不和不合，當知是為魔事。複次，魔作十必芻像，說有相法，勸沙門果，十法行時，有相似度、相似空、相似如、二乘典，當知是為魔事。複次，魔作十必芻像，說內外空，三十七品，三解脫門，令離正覺，威儀庠序，令深愛著，當知是為魔事。複次，魔現佛身，相好光明，現佛說法，十必芻圍繞，菩薩莊嚴，歆彼愿學。夫般若法中，法本無有而不可得，若法不得，眾亦不得，一切性空，亦何欣羨？當知是為魔事。瞻洲七寶，福薄難求，破十法行，亦雲福薄。痴人魔使，為惡友攝，自障障他，獲無量罪，法行既破，一切不圓。必得佛力，及不退菩薩力，加護是人，行十法行，乃無留難，成一切智。如是說〈兩不和不合品第四十五〉。

後、母生者：一處不容二事，已生不復更生，故欲其生，必契于空；而契于空，必為其生；但空焦冥，生空靈妙；實相是空，而寧說生？此母生門，兩周以示實相，兩處以明成辦。

初周示實相者：初，明子報母恩。佛法佛智，世間實相，般若母生，恩真罔極。十法行人，母命斯存。康樂長齡，除災卻病，擁護之摯，豈足言宣？以故留難不生，菩提速証。次，明母與子德。一、示人、法實相；二、示種種心行實相；三、示法法一相無相；皆明無所有不可得義。夫無所有不可得義者，產生之紀極，而萬行之所以成萬行，世界之所以成世界也。一、人、法實相者：五蘊本空。成壞生滅、斷續染淨、增減入出、際性界系，一切區分，俱非空法。甚深義中，人、法無有，施設亦無。都不示現，一切一切，般若尚空，況有示現？如是示世間人、法實相。二、心行實相者：佛如實知世界有情略心、散心、善惡無記心、有三毒心、離三毒心、廣心、大心、無量心、無見無對心、無色無見心。法性不可得，盡滅遠離，貪與非貪俱不可得，廣狹大小、量與無量亦不可得，皆無心相心不可得，以不可得知一切相。又複如實知出沒屈伸，皆依蘊現，依蘊執我常與無常、邊及無邊、命即離身、有與非有死後四句、如是示世間心行實相。三、法法一相者：如實知蘊戲論都無，蘊如即有情如，有情如即出沒屈伸如，出沒屈伸如又即蘊如，如是蘊如即處如，乃至即一切佛如。佛如、情如、法如，無二無二處，唯一真如，無容分別。如是示世間法法實相。是為般若佛母初周實相。如是說〈佛母品第四十六〉。

次周示實相者：佛談般若，或空或有，果報罪福，都無一定。不定幻相，微妙難知，諸天集會，散華頂禮而問定相。以是因緣，佛與善現，複明般若，示世實相。初則總談無相，後複別明實相。總談無相者：般若以三解為相，以無造作、生滅、染淨性相為相，以無依住、斷常、一異、去來為相。勝義則無，依俗設有，相與無相，互破互了，而皆不能。非法所作，不可言宣，無礙智轉，住如是相，為諸有情，分別開示各各法相。而如實覺此各各法相，都為無相。如是示總相無相。別明實相

，有其四類：一、以知恩報恩明。如來依法而住，贊嘆護持，知恩報恩。于一切時，乘如是乘，行如是道，無作無成，無生智轉，複能知此無轉因緣。是為示世實相，名如來母，能生如來。二、以不生為生明。一切諸法，空不自在，不堅無依，無生起知見。雖生佛示相，而無生無示，以不見法名示法相，由不緣法而生于識，名不見法。是為示世實相，名如來母，能生如來。三、以種種顯相明。顯一切法世間空相，佛以所顯，令諸有情受、想、思、了一切皆空。又複使佛，見不思議，遠離寂靜，諸空無我，種種各相。是為示世實相，名如來母，能生如來。四、以五事出現明：一、救拔有情大事；二、如來四性不思議事；三、非情界趣生所量不可稱量事；四、非情界趣生所知無數量事；五、非世間人、法所等無等等事。非獨四性，余法亦然，真法性中，心不可得。法性不可思議故，法不可施設思議不思議性。法相不可思議故無限量，無限量故不可得，不可得故法不可思議。以一切法不思議故，如來四法亦不思議；思議滅故，不可思議亦唯增語，有如虛空，悉廢窮詰。是為示世實相，名如來母，能生如來。說是法時，千百四眾心解眼，二千菩薩得無生忍，賢劫受記。如是說〈示相品第四十七〉。

法處明成辦者：般若何以五事出現？為能成辦一切一切故。事囑大臣，國王端拱，佛以三乘，付諸般若，般若于法，無執無取，成辦有余。不見諸法可執可取，由不見故不取，由不取故不執。佛亦不見如來覺法可執可取，般若亦不見如來覺法可執可取，是故修行般若，若能相應執取應無。如是說法處成辦。

行處明成辦者，是有四明：一、以三乘所依明。深法難知，解必証覺。聲聞但少分忍，一日思惟勝其長劫，然所差是福，而所業皆成。三乘都依各成其事，而于妙法無減無增。二、以生此聞法明。人中他方睹史天來，行十法行，成殊勝德。先世聞法，不問義趣，生此複聞，難可開悟。雖問義趣，不事精勤，生此開悟，而易退墮。是故甚知新趣大乘不十法行，不攝有情，不隨種切六度諸法，便不為護，大事不成，退聲聞地。如是說〈成辦品第四十八〉。

三、以五喻明：泛海有尸囊，必登彼岸；度曠有資糧，必至樂國；沒井有熟瓶，必食寒冽；載物而裝治，不喪資財；耄疾而扶持，必達所趣。攝受有般若，必証菩提。四、以我執明：修一切法而無巧便，著于三輪。我、我所執，恆相隨逐，長夜沉淪。法無如是能所，分別此彼岸岐，而故相逞必墮聲聞，難成正覺。若有善巧，一切反是，速証菩提。如是說〈船等喻品第四十九〉。

次、說能學人。小乾慧地，大乘發心，未得順忍，是為初業學人。小乘性地，大得順忍，是為信解學人。小乘見地，大無生忍，阿跋致，是為不退學人。

初業學人。先應近友：善友所教，教以無得方便，回向菩提，弗應取相。教以弗生貪愛，法性原空。後應發愿：幻夢像響光焰化城，雖達性空，而為世間得義利故，發趣無上正等菩提。為與世間饒益安樂濟拔歸依；為作世間舍宅洲渚日月燈明；為

作世間導師將師一切所趣；哀愍世間生死淪胥受無量苦；發趣正覺，隨其所應，精進熾然。如是說〈初業品第五十〉。

信解學人。先敘相貌：貪嗔痴毒，調伏遠離，乃至毒無，能生淨信，及于勝解。

次敘其行：一者、趣向一切智智，若能向智，則與有情為所歸趣。二者、擯度有情甲冑，若能人、法不見，畢竟空無，求智度情，非于少分，則能不墮聲聞劣地。三者、修除遣法，無能所處由，修虛空一切不實無所有、無攝受除遣，除遣于一切，是名修般若。四者、觀察不退菩薩，行法不執，非但恃他，而能自淨，不離六度，不舍菩提。五者、相續、隨順、趣向、臨入一切智智而行般若，虛空如幻，不行法而行。隨順向入，無能作所住，不可以一切法証，皆一真如，無二無別。如是說〈調伏貪等品第五十一〉。

後廣深義：一者、真如義。以三事明：一、法說甚深，般若即菩提，菩提于証無能所處時。虛空法界甚深，無生滅染淨甚深，有情命者蘊乃至智甚深，是故此法甚深。此甚深法于一切法而不取舍，惟世有情行于取舍，若為取舍所修不成。此甚深法于一切法而皆隨順，無礙無生亦無處所，空性平等，法無所得。二、是法皆如，善現隨如來生，善現與佛及與諸法同一真如，如無來去，無礙無作，一切一切，不二不別。三、法不即離，善現不由法如，不離法如，隨如來生。法與隨生，俱不可得。法尚不得，況如可得？二者、法同趣異義。三解脫門，修觀共相，離一切智而無巧便，便証實際墮于聲聞；不離智智巧便大悲，雖是觀空而能入位。大鳥無翅，必死瞻洲；不取相修，菩提決定。三者、信証難易義。應証諸法自相共相，乃獲菩提，而法則究竟淨空，証亦無能、所、處、時、由，難信難証。但能信証無能、所、處、時、由，即是信証無上正覺，法性修觀本不可得，則又易信易証趣覺而中道退屈，難信難証然即離法如，于無上菩提而無退屈，法如法界離法如法界，于無上菩提而無退屈，則又易信易証。都無退屈，乘應說一，不必說三。然法如既其都無，三一寧能定有？若信都無，便離退屈。四者、應住不應住義。欲速証覺，應審所住，于諸有情平等四梵心，謙直調柔心，利樂無礙心，親友師弟心，聖尊愍護心，無得三解心，以如是心與如是語，是所應住。翻對諸心及違所語，所不應住。一切聖法，自他修圓，應如是住。于法無礙，不可攝受，應如是住。說是住時，二千菩薩得無生忍。如是說〈真如品第五十二〉。

不退轉學人。先敘相貌，成就如是二十行狀相，知是不退轉菩薩，于人、法行而皆不著，于一切法轉而不住，不徇外道俗尚，不墮惡劣趣生，行十善六度，通十二部經，不疑深法，除蓋靜儀，內外身潔，三業亦淨，行杜多行，攝法歸性，惡魔化種種像來至其前，或以獄苦過退、或以文頌勸違、或以相似法迷，而皆不動，常不離教學，不隨魔事惡友境界而轉，堅勇如金剛，如是說〈不退轉品第五十三〉。

複次，成就十二行狀相，知是不退轉菩薩，不見少法而入無生忍，魔事種種不壞菩

提心，能入諸定而不受定果，不矜諸法，居家不染，金剛密護，不作下士邪命，不愛文藝外俗。複有二十細行，不樂眾事王事等。更有十一大行，不動魔言大乘非佛說等，護法不護財，得陀羅尼門。如是說〈轉不轉品等五十四〉。

次敘深義。一、顯涅槃義。三解、無生、涅槃

、真如、法界、法性，名甚深義，然深義增語，皆顯涅槃。涅槃與法，皆名甚深，法如深，故法名甚深，法如于法，非即非離故，法如名甚深。然佛甚奇，微妙方便，為不退菩薩遮遣諸法，顯示涅槃。若如教住，依般若學，善根無量，超劫無量，如多欲人念端嚴女，經一晝夜，熾注無邊。如是功德，為余供養寶乘，修度施眾，離深法修一切一切，布施回向，普緣回向，所有功德，鄔波殺曇不及其一，菩薩乘此道，疾至無上菩提故。二、顯空義，不可數在有無為中，名無數；三際不可量，名無量；邊際不可測，名無邊；一切法自性空，亦說無數無量無邊。如來巧便種種立名，皆共顯空，義無差別。三、明集証義，安住般若修行法時，不念增減，但唯名想，持此作意回向菩提，由此回向遂乃証覺。法如即覺，法無增減，如無增減，不離般若而住法如，不見增減，以此集德而証菩提。此集証義，有若然燈，非即離初後焰能使炷，而現見然燈實其炷；非即離初後心能証菩提，而修般若，漸集善根，菩提遂証。四、明心生滅真如義。心已滅不更生，已生定有滅，有滅定當滅。心住等如住，住不等如常，法如為甚深，如即離非心，心即離非如，如乃不見如。能如是行，為行般若，而都無行處，都無現行，都無行者，是勝義諦，不取不遣。菩薩住法相空中，為度群生，入三解脫，悲愿引逼，依以熟情。如是說〈甚深義品第五十五〉。

後敘其行。一、夢行。夢行三解，不可定言非益。若夢若覺，要有所緣，方起思業；要于見聞覺知諸法相中，有覺慧轉，方起染淨。雖業緣事空，而由自心取相分別，世俗施設得有所緣，故說思業由所緣起。夢修六度共向菩提，不可定言是實。彌勒言：能、所、處、時、由，不見有法可答、可記、可証，一切皆空，推徵無得。然菩薩善巧，行深般若，不生猶豫，我于菩提為得不得，但念我于菩提定當証得。如是說〈夢行品第五十六〉。

二、愿行。菩薩行深六度，見諸有情種種少福、種種疾苦，思維拔濟，作三十愿：我當勤修熟情嚴土，疾証菩提，我佛土中，得無如是種種少福、種種疾苦。菩薩由此，疾能証得一切智智。如是說〈愿品第五十七〉。

現見伽天女，佛前發愿，而得授記，未來星劫作金華佛，歿生東方不動佛國。伽天女久植德本，佛授記時，已發覺心。今不退轉。如是說〈伽天品第五十八〉。

三、不証行。習近三解、覺分、十力、不共，應觀法空，令心不亂。如實知法，而不作証。未入定時，系心于所緣，為學諸法，藉觀于空，非但為空而作其証；已入定時，則不系境，不退諸法，不証漏盡；成就如是微妙大智，住空覺分，乃至諸法

，乃至小果，今時應學，不應作証。壯士護險途，堅翅騰虛空，後箭射前枯，必至菩提中道不墜。不舍未脫有情而不証空，常樂觀察深法而不証空。應趣正覺，為諸有情，斷種種想執而不証空，雖未作証，亦不失法。應趣正覺，為諸有情，斷三四倒而不証空，諸德未滿而無愿定圓。應趣正覺，為諸有情，斷我法行而不証空，諸法未滿而空定圓。應趣正覺，為諸有情，斷諸相行而不証空，諸法未滿而無相定圓。若諸德圓而墮三界，無有是處。已善覺分而必及余，是不退相。如是說〈習近品第五十九〉。

四、無慢行。菩薩乃至夢中不樂凡小，見佛說法顯通，夢見可怖，思三界妄，夢見三涂，愿國無有，夢見火燒，愿滅即滅。誠誓拔苦，非人驅去，為無慢行。是不退相，若未學法，但發誠誓，魔驅非人，受欺而慢。或複受欺尊號虛名而慢，或複受欺相似遠離，但論境地不論業行而慢，如是慢人，外似善菩薩，內多煩惱，應離此患，求証菩提。求証菩提，應供知識。供知識者，三乘聖人，能說六度善士，是善知識，一切聖法，亦善知識。為師導明炬燈燭，為解覺智慧救護，為舍宅洲渚歸趣父母，一切諸佛由法生故。欲証菩提，熟情嚴土，當學三乘，四攝度生。

五、空離行。般若空離，諸法亦空離，而以有情執我，生死馳流，施設諸法，為染為淨，然行空離，不行諸法，能、所、處、時、由，不可得行，故能如是行，不為他伏，疾証菩提。能示有情，俾亦作意，所獲功德，供佛供乘，所不能及。不著四無量，六度大光明。雖未証覺，已到彼岸福田，雲何不堪受供？如覓失珠，恆時作意，不雜他念，雲何虛受信施？作意及法，雖性空離，而如實知如是空離，非誰所作，法爾常住，即為作意般若及一切智。如是空離，無增無減，能正通達，即為不離般若及一切智。般若即菩提，原非多一，此修彼証，曾無增減，不礙空離。

六、不行行。菩薩行般若，非即離般若空行，非即離般若行，非即離空行。非即離法行，非即離法空行。而能行般若者，不行為行，故不見有法行般若，不見般若是菩薩行，此不見法亦不可得。不可得法，無生無滅，即是菩薩無生法忍，不退授記，直証菩提。生與無生，如是四句，不得授記，法于能所皆不得故，如是分別，非般若行故。如是說〈增上慢品第六十〉。

後說如是學，應十解義，讀此長文，便得所學，不入歧途。十義者：一、不與聲聞同學；二、與住空為同學；三、非盡滅離斷學；四、性淨修淨學；五、愿樂隨喜學；六、幻心証幻法學；七、無所得行學；八、無分別學；九、行非堅實法學；十、修為佛所贊學。

一、不與聲聞同學者：帝贊十法行，乃至菩提不雜他念，廣大善根乃能成辦，初發一念相應智心，即勝三千十善四禪，況十法行？非但福勝，當作如來。非但勝小，亦勝無巧便修大乘功德與其般若。如是菩薩，不學聲聞，不為所伏。四王、妙時、樂化、大梵、光淨諸天，亦贊學大，莫作聲聞，如是學大，病不能侵，魔不能擾。

魔所擾者，先世疑謗，不聞解行，亦複毀他，多起諍斗。若謗授記，經劫補過，乃複本來；苟克度生，不必經劫。以是因緣，菩薩于聲聞不應交涉；設與交涉，不應共住；設與共住，不應與彼論議決擇。忿恚一起，所作俱崩。當與菩薩同乘一般，視如大師真善知識，如彼所學，我亦應學。彼雖雜染，不離種智，當于其中，每同其事。如是說〈同學品第六十一〉。

二、與住空為同學者：諸法法空，菩薩同性，住此中學，名為同學，由此同學，速証菩提。

三、非盡滅離斷學者：諸法真如，無盡無離，無滅無斷，不可作証。若于真如如是而學，是學一切智智。如是學時，是學諸法；學諸法時，是學一切智智。如是學時，至不退地，嚴土熟情，三轉十二輪，不墮于下劣。緣善而邪摧，巧定不長壽，十力四無畏，十八不共法，皆得于清淨。

四、性淨修淨學者：雖一切法本性清淨，而愚夫不知，為令其知，修一切法。如是學時，無邊佛法皆得清淨，令諸有情涅証得。如是巧便。終不發起煩惱法執俱行之心；如是巧便，含藏一切。以其威力，遂能攝持，增長引導。一切聖法無不隨從。能如是學。于諸有情最尊勝上。供三千界佛。不若十法行。故欲護眾放光。應學如是深法。雖攝聲聞功德。觀已超入離生。為世真實福田。疾証一切智智。然如是學時。不應作念此能、所、處、時、由。棄舍應舍，定証種智。如是說〈同性品第六十二〉。

五、愿樂隨喜學者：帝作是念：但修聖法，尚超有情，況証大覺？但能信解智智名字，尚獲勝利，況發心問經？即于佛前散華發愿：愿彼所求，三乘圓滿，愿彼哀眾，度生死輪。于初發心至一生系起隨喜心，大海知滴，其福難量，然不隨喜，禍亦不測，隨喜回向，護有天人，不隨不回，魔軍誰破？故應隨向無定即離。

六、幻心証幻法學者：菩提般若，一切智智，畢竟遠離，雖非遠離，能証遠離，而証無上菩提，非不依止甚深般若。是故菩薩以如幻心証如幻菩提，幻法不離于幻心故。

七、無所得行學者：菩薩難事，雖行深義，而于二乘能不作証。然所証法義，能、所、處、時、由，都不可得。無上菩提尚不可得。況所不証但是聲聞，是名菩薩無所得行。如是行時，不見諸相，不見我行，不見不行，不見般若是我所行，不見菩提是我所証，亦複不見証處時等。

八、無分別學者：行般若時，不作是念：我遠聲聞，而近菩提。般若于法，無愛無憎，一切分別，種種分別，周遍分別，皆無有故。欲有所為，而勤修習，既修習已，所業成辦，所作無別，甚深般若，法爾于法無分別故。非但般若，一切諸法皆無

分別，五趣聖者，無分別中依俗設施。非勝義有。十方三佛，一切諸佛，分別斷故。為度群生，可施設有種種差別。如是說〈無分別品第六十三〉。

九、行非堅實法學者：修行般若乃至一切，行非堅法，不行堅法，尚不見有非堅可得，況堅可得？不証實際，不墮聲聞，亦未為難，披甲度眾，令入涅槃，乃為希有。調伏有情，如調虛空，離故，空故，非堅實故，無所有故。被大悲甲，與虛空戰，有情空離，悲甲亦空離；有情非堅無有，悲甲亦非堅無有；調伏利樂諸有情事，亦複空離非堅無有，當知菩薩，亦複空離非堅無有。蘊至菩提一切法離，即有情離，即所修離，一切法皆非有故，遠離寂靜無生滅故。聞說般若不沉不沒，能如是行，諸天敬禮，諸佛護念，一切聖修速得圓滿，惡魔神力不能障礙。有二法魔不能障：一、觀諸法空；二、不舍有情；一、如說而行；二、諸佛所護。

十、修為佛所贊學者：修三解脫，為住般若，為疾証覺，為眾所依，十方如來，于彼菩薩名字功德，自然歡贊。如現佛贊，寶幢頂髻及不動佛所淨修菩薩，現十方佛亦贊其土淨修菩薩，當知菩薩，從初發心漸圓覺道，亦為十方諸佛之所共贊。隨不動佛寶幢頂髻所學而行，雖未授記，亦為佛贊。于諸法，于般若，于法畢竟空，寂靜遠離，虛空無所有，不自在堅實，能深信解。未得無生，亦為佛贊。于法空中，成佛度生，依俗設施，畢竟無有，無可驚疑。法性本空，空中無有，誰何驚悶？如是說〈堅非堅品第六十四〉。

三門敘已，應談流通：一、授記；二、付囑；三、起信。

授記者：帝非智人，儼與佛聖長言論議，一周已終，自籌恐誤，徵佛決疑。不退菩薩，漏盡聲聞，離欲人天，會中叢集，而獨問難，屬帝有學，豈盡法邊，佛故可之。隨流疾于行陸，阿難常與佛談，帝記強聞多，明了聞思，能與修慧，問難決疑，每蒙佛可，亦複何怪？最後顯義，般若妙法，原非但空，諸有所說，皆依三解，亦依聖法。然住法空，觀諸聖法，皆不可得，法尚不得，何況修人？住遠離寂靜住，住無所有無所得住，住三解脫住，比住般若住亦何能及？惟除如來，最勝妙上。天及比丘散華發愿，佛記星劫作散華佛。

二、付囑者：實相般若，大法根本，一周已終，燈應傳續。遂詔阿難：十法行人過去根深，今能辦事，欲証菩提，應學般若。我以般若付囑于汝，受持無失。他典忘失，其罪尚輕；般若忘失下至一句，獲罪無量。亦以六度，同時付囑，三世諸佛，六度出生，有能聞修，獲福無量，退墮聲聞，不証菩提，無有是處。

三、起信者：佛現通力，令眾皆見不動如來清淨法眾，旋複收通，妙境不見。莊嚴淨土，對非眼根，不藉佛通，見緣無有。然亦當知：諸法皆爾，法不行法，法不見法，法不知法，法不証法，性本遠離，皆如幻等。眾緣和合，相似有故，諸有欲取般若邊際，如愚取空。是故文句有量，義則無邊，當知般若，乃至種智，非三世盡

。佛示舌相，遍覆面輪，徵言無妄。複詔阿難：《般若經》中，廣說一切菩提分法及諸法相，三乘依學甚深般若，能入一切法相，能入一切文字，能入一切陀羅尼門，如是說〈實語品第六十五〉。

實相般若竟。

《大般若波羅蜜多經》敘卷三

方便般若五

一切智智，寂滅遍知，無性為性，法界為相。菩薩始終。一切智智，則所緣亦無性，行相亦寂靜，正念為增上。一篇之旨要在是也。方便般若者，大方廣義，妙圓義，究竟義，是方便義。此方便義，極大甚深，微妙殊勝，曰無所得而施設，曰佛境而菩薩行。假以名相而示以無相，導之善法而空其善法，是謂等所得而施設。畢竟空是佛境，而菩薩行本性空。一切智智是佛境，而菩薩行道相智。寂滅遍知，証而不動，是一切智智。而此道相智，性與佛同。顧金剛喻，定未至最後一剎那頃，猶無間行。是謂佛境而菩薩行。應知佛境菩薩行，以佛境同，道皆一乘，無高下可判。以菩薩行異，位設漸滿，有方便可談。行布而圓融，圓融而行布，乃其所以為方便義也。是故泥其行而誣其境，謗之曰別教。執其境而昧其行，假以為禪宗，皆非也。此方便般若，遵經略廣教相文，分兩周讀：初略，後廣。

初、略教相者。敘有四義：般若要，般若尊，般若相，般若學是也。初、明般若要。龍樹有言：般若為菩提因，菩提為般若果，治因于果，無二無別，皆虛空不可盡。然《大涅槃經》：有因有因因，有果有果果。因是十二緣，即中道不共妙觀。因因是觀緣智，即方便般若。果是菩提，果果是涅槃，即一切智智。是故証一切智智果，由能如實觀緣起因。如實觀緣起因，由能引發方便之因因。因因不發，果果不証。蓋以無所得為方便，相應回向一切智智，因在是，果亦在是故也。無所得者，即虛空不可盡也。以虛空不可盡觀一切法，便能引發般若；以虛空不可盡所引般若，如實觀十二緣起，便能六度互攝，圓滿菩提。如實觀者，不見一切法無因生滅，常不生滅，四倒不四倒，寂離不寂離。亦復不見所行及能見所行，並如是不見與斷習。異此如魔，焉得不苦？滿此如佛，烏得不証？相應回向一切智智者，即趣無盡也。無盡自無礙，無礙自無不攝。施攝余五，余五攝施，談度攝度，猶未一切攝于一切。是為略相。是為般若要。如是讀〈無盡品第六十六〉、〈相攝品第六十七〉。

二、明般若尊：一、以三事得善巧，久時多供滿根故；二、以十喻推般若，前九說般若特尊，五度臣屬，後一說法無能所，自性皆空；三、以般若能拔眾苦，雖無相用而修六度，速証菩提，是故說無上；四、般若拔苦，以無所得為方便，攝一切法，入一切智智，是故數數贊。

三、明般若相，是有七義：一、般若于法無取舍，謂不思惟法與法相及于所緣，以不思惟便增長善根，具足証智；以不思惟便無所得而不著。以不著而疾証菩提。二、般若無著故不住，並無著亦不著，以無自性可著故，便不遠離一切善法白法，便于攝受受記引發說示都不遠離，非種種過失如有所得。三、般若非于自性即離，而能不執引發自性。不觀四倒不四倒、寂離不寂離，而能引發六度乃至一切智智，住勝功德。四、般若所行一切法隨行，般若所至一切法隨至，能令一切法避險惡路，

至本所求。五、般若示道辦大事，何謂示道？能往一切智智為道，示令大眾疾証彼道。六、般若以法住為定量，令眾得利樂，示法所作事，而皆無所著，引眾趣菩提，而于諸法無生無滅。七、般若緣一切智智，以六度善根共眾回向，而後度圓証智，故應于度勿相舍離。一如實觀法非相應不相應；二不住法非法；三四攝攝情教令住度，是不舍離相貌。

四、明般若學，是有六義。初、勸學。般若于法得大自在，為一切法趣向門，備諸功德，魔外無能，又為諸佛常共護念，以其能修不可得故，能學無所學故。次、教相。欲得一切智智，于六度略廣教相，必須聽聞受持、讀誦通利、思惟觀察，令心所緣，皆不複轉。如實知一切法真如，無生滅住異而可施設，如實知實際而無法際，如實知法界如虛空，無障礙生滅斷續而可施設，如實知一切法以無自性不合不離。初修十地，皆于中學能多所作，是為略相。三、能入利根而等引，精勤而念慧，夫然後入。入而隨學，轉近智智，轉滅障魔。行修習不已，佛護福聚，住童真地，善入一切法行，善入一切法作意，善入一切法空，善入一切法事，皆三慧之所致。四、三慧。統菩薩行全體而分階級，為行、引、修。以般若力破蘊令空，為涅槃相，出住六情，還念寂相，知一切法空，地前行慧也。不可說有無，言語道斷，初地引慧也。入甚深禪，複以般若破禪與禪緣，二地或七地以去修慧也。秦譯三慧分釋，唐譯並一處談，行、引、修相，談以七事：初、一心，唯一作意，一切智智，心、心所法，于余不轉；二、不施設，知一切智智如真如、實際、法界、我界，一味無別，皆不可得，不可施設，即學不可得不施設。三、無所行，觀法自性空，以不增減不生滅學，不起作諸行若修若遣，般若菩薩行，與行者因及時處，皆不可得，始于法學無所得，即以無所得學一切法；四、平等，非有所得無所得為無所得，而有無平等為無所得，不著有得無得，從一地至一地漸次圓滿亦無所得，常挾一切法而亦不得；五、無為無作，般若不為一切法行，法無為無作，行亦無為無作，依俗除執，施三乘說；六、變化不住，一切智智無所住如變化，雖複無住而有去來，雖有去來而無真實，化人化法化佛化德，一切無別，由法性定量，作真淨福田。七、假名不壞，法性定量，不與法分而動壞法性，然隨俗除執，假說名相，誘悟平等。上來七事，詮行、引、修義，般若雖玄，而有津涯，循循可入。五、三智。善巧方便者，佛之知見，一切智智也。一切智智者：一、寂滅相，謂一切法皆同一相，寂滅相也；二、遍知相，謂諸行相狀，能表諸法如實遍知也。一乘寂滅，行佛不共智；蘊、處、界空，小乘共智；觀空不証，大乘共智。共不共雖殊，朝宗則一。隨順趣向，皆一乘道，聲聞斷惑，盡不盡別，體則不別。三乘無為，法空無際，不可語言，依俗施設。六、般若波羅蜜，般若是能到其極義，無少可得義，包含真如等義，一相無相義，生發引達義，自相空不可得不可壞義，應行無常等法義，不應行貪等及義非義義。法性于法無義非義故，無為于法非損益故，無為以不二方便得一切智智而不二不可得故，是故以無所得得無所得，般若與一切智智俱不可得故。如是讀〈巧便品第六十八〉。

後、廣教相者。此《般若經》，說法必贊嘆，或將欲說而贊嘆于先，或說已竟而贊

嘆于後，于後為深固大法，于先為歆動有情。贊難行，贊如佛，勸敬禮，較勝福，于此而敘。不得有情施設，而為有情求一切智智；不見有情施設，而為拔濟求善巧方便；譬如種樹于空，是以為難。法與有情，皆真如為定量，是故有此菩薩，乃有一切聖賢，乃有一切法，乃証一切智智，乃知勝根令入無余，是故如佛。受敬獲福，文顯不贅。如是讀〈樹喻品第六十九〉。

今談正義。學空非証空，由一一証分，成最後總証，曰道相智。發心至正覺，念念皆菩提，曰菩提道。被大功德鎧，任不思議事，曰菩薩道。境以佛道頓，行以自道漸，曰菩薩行。佛境菩薩行，分是佛境分，漸是佛境漸，舉足下足皆佛境界，雖分雖漸，實總實頓。佛不可得，菩薩行而得，此其所以方便也。菩薩行，以四行敘：曰初發心行，曰漸次行，曰圓滿行，曰究竟行。

曰初發心行者：法法成佛，必趣究竟，無中可止。假菩薩行，敘此初位，始于發心，止于正性離生。文三：一、思惟無性一切智智，于諸法不作二相；二、親近能巧便善友，而詮釋巧便；三、以無戲論，自道智入正性離生，而詮釋道相智。

一、思惟無性一切智智，于諸法行不作二相者。發心作佛，念不離佛，思惟在一切智智。一切智智者，無性為性，法界為相，所緣亦無性，行相亦寂靜，正念而增上。解了無性，斯為第一。此無性遍一切法，無和合自性，是故無性。三昧真如實際，法界為其自性，是故無性。雖知無性，而熟情嚴土；雖熟情嚴土，而達無性；是故善巧。無性則法離法性，于法無知，若有若無，為拔執故，但依俗說，俗不異真，能令了于非有非無，非使執于實有無相。于諸法不作二相者，既無上菩提以修行，則于諸法自無二相行。既知佛義菩提義，則于法起修，自都無所緣，都無益損、生滅、染淨，唯一佛相，証覺度生。如是攝受六度，漸証一切智智，恆時增長一切善法。

二、親近巧便善友，而詮釋巧便者。初發心人，從諸佛所或聖賢正知，多聞聞持，得陀羅尼，隨所生處，常不忘失，以善根力，常能熟情嚴土，是故欲証一切智智，除一心無二外，當親善友。如是讀〈菩薩行品第七十〉。

夫巧便者，非諸善法，非諸善根，而佛之知見。故雖親近諸佛，種諸善根，承事善友，而未得聞殊勝方便，終不能得一切智智。雲何方便？修諸法時，以一切智智相應作意，無實、無成、無轉、無滅入諸法相，無作、無能入諸行相，恆時增長覺分善根，觀一切法自性皆空，雖得勝果而不取証。以是六度諸定菩提分法，入正性離生，名無生法忍。証入菩薩不退轉地，得受記忍。圓滿情土，漸次証得一切智智。如是名為方便善巧。以勿希果報故。如是讀〈親近品第七十一〉。

三、以無戲論，自道智入正性離生，而詮釋道相智者。菩薩不証小果，于無性自性無動，于一切法無戲論。離有得有現觀四句戲論，離四倒非四倒、寂離非寂離戲論

，離種種分別應修諸法戲論，離有無四句能所處時皆不可得戲論，如是菩薩以無戲論入正性離生。複次，菩薩入乘，非由小道，非由極道，然于聲聞諸道遍學滿已，即由自道而入自乘。小道內外空，佛道畢竟空，自道則無性自性空。由正性離生，至金剛定最後剎那，為菩薩自乘。遍學八地，勝智超入。複由諸道，漸次修証一切智智。聲聞果向斷智即菩薩忍，熟情嚴土不離一切相故。如是菩薩以道相智，入正性離生。

道相智以二事詮釋：一、諸道般若；二、無相般若。雲何諸道般若？諸行狀相能顯道相，菩薩于彼皆現等覺，是為法法成佛。所以必法法成佛者：一、令有情法無倒解；二、知有情意樂隨眠為作樂利，惡道遮障，善法因果，示道修習，而得究竟；三、知有情諸根勝劣，于所說法終不唐捐。如來功德，菩薩行者，但總別異，而體性則同。雲何無相般若？非合非散，無色見對，一相無相，是故法不取法，菩提分法不取菩提，一切智智應可受用，聖法毗奈耶一法不取。然彼有情不解法空，令正解生，權依俗說，勝義無相，毫不動搖。是故學一切法，非學有相，而學無相，除遣一切，是學無想，不住有想，是學除遣。想有為二，想空不二。行而佛境，法法成佛；佛境而行，除遣無相，是為道相。如是讀〈遍學品第七十二〉。

曰漸次行者：由信念無性，漸次圓滿無性是也。龍樹有言：諸法雖空，而能起四禪神通，是大菩薩近佛者所行。新學菩薩，六度、六念，柔軟行易，不生邪見。是以業學行三，先粗後細，先易後難，漸漸次第，名曰漸次業學行三，釋施慧戒或戒定慧。自初發心至金剛定，修菩提道，莫不由是。然依位言，自正性離生而阿跋致，始名入位。無性未圓，自非極地。今說漸次，先談其極，後說其初。先談其極者，達一切法無性為性，亦無有想，亦無無想，當知即是菩薩順忍，亦是修道，亦是現觀。達一切法無性為性，得自在轉，如來自述往昔修度，四禪五通，一切平等，剎那相應，証得菩提。謂諦無相，無相亦無，功德微妙，以化群生，是蓋以無性入禪，以無性神通妙用，以無性菩提具足，以無性三聚益情，有如是自在轉。後說其初者，圓滿無性為佛，漸証無性為聖，深信無性為賢善士。深信証果不証無性是一無性常存，遂發菩提心，念為有情普証涅槃，漸次業學行三，而修六度及一切善法。雲何修度？四事五蘊超入離生，熟情嚴土証覺度生，而都無所得，是為修六度。無念無思惟，業學行三，無性為性，是為修六隨念。複以業學行三，無性為性，修十八空等一切善法，而于其中心皆不轉。夫無性雲者，法無性中，有性無性，皆不可得，非一切法皆應是無，此義不可不深長思也。夫漸修充實，頓然後生，猶之信滿，然後心發，資非殊勝，造極循梯，化魯成奇，是何方便？故施漸次，佛慧第一，此義不可不深長思也。如是讀〈漸次品第七十三〉。

曰圓滿行者：八地菩薩，已得無性，當証涅槃，然未圓滿。諸佛救護，俾不入滅，修圓滿行。圓滿行者，非唯一入一切，乃一切入于一切。顧圓修未極，雖一切入于一切，猶稱漸行，而又非頓，以一切入于一切行也。其頓以一切入一切者，則究竟行中、金剛定後、無間行垂盡時也。一法成佛，一入一切；法法成佛，一切入一切；

此雖法法成佛，而法猶未盡，尚見行修，是故雲漸。無相之入是一切入，一心具現，一相具現，眾相具現，是為所入。善達無相，住本性空，是謂能入。熟情嚴土現通，是為滿入。如是圓滿，以三段讀：一、所入一切；二、能入一切；三、滿入一切。

所入一切者，是有三義：一心現具，一相現具，眾相現具是也。雲何一心現具耶？無所得即得、即現觀、即菩提，以不壞法界故。無所得得地，得無生忍，得異熟生，神通六度，熟情嚴土，果德無盡。無所得，無差別，而為有得離染說別。無所得不得一切，而起一切。龍樹有言：初發心菩薩，著有無心重，漸漸次第行，今時有無心，悉舍無障礙，能一念中行。雲何一念中行？法以般若滿，是故一心現起，即能攝受。菩薩為欲圓滿布施，即于布施中攝受一切而行布施，由此因緣而無二想。如是乃至為欲圓滿如來相好，即于如來相好中攝受一切而引相好，由此因緣而無二想。菩薩以是住無漏心，行一切法而無二想。菩薩以是修行六度：施則不見諸法，不見無漏，並亦不見一切佛法；戒則清淨無著，而方便引通；忍則伏嗔恚忍，起無生法忍，而神通自在；進則常圓佛法，常淨佛土，而都無所得；定則無間如電聖正金剛三摩地具，雖知幻化，而乘悲愿，雖乘悲愿，而無所得；慧則不見諸法成就生滅、益損、集離，由信而行，行而異熟。隨攝隨意，一切異熟，是此行殊異。如是讀〈無相品第七十四〉。

雲何一相現具耶？無相雖同，能具為異。前說一心攝具，今說一相攝具。龍樹有言：無相無別，已雖不分，其余聖人，觀知不爽。夢響影像，陽焰幻化，五取蘊中，無相行度，一切善法，剎那相應，與前無異。但明無差，義應細味。如是讀〈無雜品第七十五〉。

雲何眾相現具耶？一、希奇；二、說法。菩薩住畢竟空、無際空，化眾執于無相，非以無相立一切法差別。化離我我所，化了如夢無自性，化了無一切法，化離無中妄生有想，化了法性從緣生。善巧神力，直化成佛，雖無性為性，自性皆空，而能安立種種眾相，無雜說法。種種眾相，甚希奇有。隨應攝眾，平生普施，入大地獄，事十方佛，割濟旁生，饒益餓鬼，燒殿警天，有如是希奇。四攝財施，又複法施，施世間法不淨、數息、四禪、五通等，施出世法三十七菩提分、三解脫門乃至八十隨好等，有如是希奇。其說法者，畢竟空、無際空，超諸字無得，而說無所說。化佛所化，雖不別不壞，而令眾住地，雖人、法無得，而令離妄無縛無脫。以無得方便，住一切法中如實修遣，如實說示，真如實際無轉無越。如是讀〈眾德相品第七十六〉。

二、能入一切地者，以二義敘：善達無相，住本性空是已。善達無相者，龍樹有言：唯佛一切智智，能達諸法實相，余人通達，不能究竟。然菩薩知三解脫門，得實智慧，無所不通。都無所行，如化無事。以他不達，已則能達，化彼名相，令住無相，漏即無漏，皆一無相。學五取蘊如實而知所相皆妄，生滅無由，真如同性。以

學一切，莫不如是。複次，菩薩知法即法界，法界即法，學一切法于法界，學法界于一切法，無名相中，方便為眾，寄名相說，自他俱行，行于一切。如是讀〈善達品第七十七〉。

住本性空者：實際為量，非度有情于實際，乃度實際于實際。初以德誘，後以空彈，安立有情于實際中，而能不壞實際之相。本性空者，為諸佛眼，名曰法住，然與畢竟空別。龍樹有言：畢竟空者，無有遺余；本性空者，本來常爾。畢竟空者，三世清淨；本性空者，但因緣和合，無有實性。畢竟空者，是甚深空；本性空者，是中道空。畢竟空者，一切佛行；本性空者，菩薩所行。本性空有理，破而心不沒，以是道相智，都用本性空。住本性空，正為有情，說本性空，以此無倒，拔彼有倒，非為菩提求于菩提，為本性空求于菩提。法即本性空，本性空即法，不壞義行，不取舍行，無行處行，久修令滿行，般若方便大菩提行。如是讀〈實際品第七十八〉。

三、滿入一切法者：成熟有情，嚴淨佛土，廣大神通，圓滿時事，三者悉備，極境斯至。菩薩修菩提道，圓滿証覺，用方便善巧：一、于法不得不離；二、不合不散；三、不取無障；四、有情不知本性空、自相空，空性常住，菩薩依俗立幻師，說六度，出生死，令証覺。以如是被功德鎧，行大菩提，熟情嚴土。雲何以六度成熟有情耶？此篇說度，發現五處相攝略相，以一攝五。廣相發心，法相行相，皆空為基。漸次正修，四行五蘊。無相無雜，一念具六，一相具六。是皆詳于自習。成熟有情，則詳于教授教誡。教授布施：一、示本性空，勝義無所得；二、令修勝除執，法施利他；三、以布施修行余法。以如是大菩提道成熟有情，一一廣說如此布施。如是讀〈無闕品第七十九〉。

雲何嚴淨佛土耶？龍樹有言：六度是初發心道，三十七品但求涅槃，十八空法但求佛道。唯道相智是菩薩道，總一切法是菩薩道故。修菩薩道：一、知自性空不執，而亦教他不執；二、知自性空無所住，但住菩提；三、為有情起菩提道，而菩提即道，不由他得；修道未圓，不稱已得，為近已得，嚴淨佛土。雲何嚴淨？先淨三業粗重，複淨一切粗重，行布施諸法以為回向。于一切行已發深大誓愿，愿行圓滿，已所化諸有情，往生而法樂。又複應修殊勝淨土，眾生聞是名，于菩提不退，邪見受劇苦，度彼受法樂，但不起疑惑，定証覺無遺。如是讀〈道士品第八十〉。

雲何廣大神通耶？自初發心至最後有，住菩薩正定，不墮惡趣，然說本生，由故思愿，多趣惡道。受白象身慈忍賊怨，獨覺、聲聞無如是事。菩薩熟情，多受旁生而不染過。為求菩提，一切應滿，空攝一切，引發神通，眼、耳、神、心、宿住、漏盡，作一切佛事。如是讀〈正定品第八十一〉。

曰究竟行者：菩薩行圓滿時，覺一切相，得一切智，斷一切習，幾與佛齊，為究竟行。道相智至此，舉足下足，皆如來境，為究竟行。世第一法，一剎那頃初地見道

，金剛道後，一剎那頃証無上覺。然未歷一剎那，有行住向果別，非性有別，而位自別。如來畢竟空，菩薩本性空；如來不動，菩薩無間行平等行。于此究竟，亦于此差別。菩薩為諸有情，昧自性空，建立四諦，而得涅槃，非由苦集滅道諦，非由苦集滅道智，但由般若，了達四諦平等實性，即是涅槃，即是真如，性相常住，無失無壞，名四諦平等性。菩薩如實見空，以奢摩他解悟諦理，無性為性，行于一切，亦以無性救度有情，依俗說法。如是讀〈佛法品第八十二〉。

愚夫不了聖法毗奈耶為其說法，無毛端真實，夢鏡響焰，影幻化城，畢竟空故。如是讀〈無事品第八十三〉。

勝義如實，為平等性，敘以七義：一、法非染淨，說一切法平等性為淨，是依俗非勝。二、法如夢幻，一切修行思惟造作，于証大果無資助用，然不圓滿，不能嚴土熟情，雖修圓滿，而如實知法，皆如夢乃至如城。三、不可取法不証不可取法，然令眾離倒安置無想甘露，是依俗非勝。四、佛証覺時，說証為得，是依俗非勝。五、有無戲論非平等性，都無有性，亦無無性，亦不可說是平等性，除平等性離一切法又互不可得，如是說法境空。佛即平等性，凡聖與法，一相無相，都無差別，非平等性是所行境，如是說行境空。六、三寶無差，皆平等性，然佛不建立，眾則不能，佛雖建立，于平等性中能無所動。七、相異性亦應異，然空性中，一切異相，皆不可得，法平等性，非即離于凡聖，非即離于一切，非有為、無為，有無互離，互不可得，是依俗非勝。總之，勝義離言，處乎中道，此平等性即是勝義，非即業離業，非離有離無，而有無平等，此其所以不動勝義行菩薩行。如是讀〈實說品第八十四〉。

本性空中雖無所動，而令有情遠離妄想。變化之法為化，離想之法為空，畢竟空中無二事可得。諸法皆化，化無不空，此本性空其性常空，菩提涅槃皆畢竟空，但為新學說涅槃非化。是故佛境為畢竟空，說本性空為菩薩行，先既非有，後亦非無，本性常空，不應驚怖。如是應知諸菩薩行在道相智，在本性空。如是讀〈空性品第八十五〉。

方便般若竟。

《大般若波羅蜜多經》敘卷四

十義抉擇第二

十義抉擇者：一、龍樹無著學；二、唯智；三、悲；四、定；五、三解脫；六、福；七、十法行；八、觀行；九、文字；十、經卷。

龍樹、無著學者，應以十事敘：一、非空非不空宗；二、二諦；三、識；四、涅槃；五、十喻九喻；六、摩訶衍；七、毗曇；八、般若即瑜伽；九、法性即法相；十、其余。

一、非空非不空宗者：龍樹《中論》，無著《辯中邊論》，若初得聞，入道有門，應以《中邊》最初一頌，詮釋《中論》中道義頌，而後非空非不空義。兩聖一宗，非各別輪，曰龍樹空、曰無著有。"虛妄分別有"者，釋"眾因緣生法"句也；"于此二都無，此中唯有空"者，釋"我說即是空"句也；"于彼亦有此"者，釋"亦為是假名"句也；"故說一切法、非空非不空、有無及有故、是則契中道"者，釋"亦為中道義"句也。空為一邊，假為一邊，合空及假，中道圓成。但空非空，空空乃空；假以濟空，乃為空空；空空之空，乃為中道；是故即空即假即中。其義則是，其文不明。為是但空，為是空空，不能索解，但為詮義，非是釋文。龍樹空空，非初句空，乃末句中，釋以無著，文始不淆。文字般若，聞、思所入，不可疏略，自誤誤人。複次，"亦為中道義"句，徵考梵文及西藏文，應作"是為中道義"。即空亦假，是稱中道，中道為宗，意始明顯。秦譯此頌因緣即空、亦假、亦中，文似標空，非是尊中，實亦未善。既稱《中論》，崇乃在中。《十八空論》分析諸空，崇始在空。《十二門論》錄《中論》空，示入道門，名標為門。《中論》所詮，道賅全體，義破執邊，法爾標中。法爾標中，不應趣空。龍樹學宗，非唯一空。《智論》、《中論》取証甚繁，此姑不述。

二、二諦者：世人常言龍樹二諦，俗有真無；無著二諦，俗無真有。此應分別各指所之，不應字異判義非同。本無其事，愚執橫生，在俗亦無，何況真諦？龍樹真無，無著亦無。唯識所謂真如，亦是假施設名，理非倒妄，故名真如，豈離色心有實常法？不墮斷滅，妙有超然，無著真有，亦龍樹有。《智論》所謂因緣人等，第一義無，世界故有；如如法性，世界故無，第一義有。龍樹俗有，依他起有。若遍計俗，龍樹亦無。《智論》所謂譬如有乳，色香味觸因緣故有；若乳實無，因緣亦無；因緣實有，乳亦應有；非如一人二頭三手，但有假名。故知龍樹唯有因緣俗，遍計俗亦無。兩聖三性，初無少異，假名不壞，執相則無；緣生是有，自性則無；空顯是有，別實則無。

三、識者：諸法所緣，唯識所現，無著本此，立唯有識。六識而外，以有根故，別立末那；以有依故，別立賴耶。然龍樹以來，已漸發明，創非無著。《智論》三六

，意有二種：一者、念念滅；二者、心相續。諸心名為一意，是故依意而生識。九十六外道，不說依意生識，但以依神為本。既說諸心名為一意，應是所依，不循故六，而別立七。《攝論》亦說意有二種：一、無間滅；二、染污意。亦非執六，皆別精研而有所立。若夫賴耶，義見《中論》：雖空亦不斷，雖有亦不常，業果報不失，是名佛所說。不斷相續，不常相似，相似相續，持而不失，非阿賴耶，誰有此義？《智論》三八：諸法畢竟空，而亦不斷滅，生死雖相續，而亦不是常，無量大劫作業因緣，雖已過去能生果報，而不斷滅。是為佛法微妙難知，但破倒邪，不破後世。賴耶奧義更覺昭明，誰謂龍樹不闡唯識？

四、涅槃者：無余涅槃賢聖所歸，而《智論》往生不破後世。引《中論》頌，一切諸法實，一切法虛妄，諸法實亦虛，非實亦非虛，涅槃為真，世間亦真，涅槃無別，小異不可得。是則龍樹涅槃不墮空無，《瑜伽?本地》，無余涅槃三相、四寂，施設安立，並非法外別實有法名曰涅槃，是則無著涅槃不墮實有。

五、十喻、九喻者：《智論》十喻，解一切法空。龍樹自談，以易解空喻難解空，以心不著解心著處。若復著空，著此十喻，應更為說其法門。不著空者，但破眾有，非詮眾無。金剛九喻，喻九種正智。無著自談，由九智觀境，于有為事中，獲無垢自在。空即無垢，不著即自在。龍樹、無著，無二無別。初敘十喻，次敘九喻。雲何龍樹十喻耶？如幻，無明法爾，雖無根本，而可見聞。如焰，邪憶念風，生男女相。如水中月，靜水無明，吾我慢現。如虛空，遠視疑色，法我本空。如響，機關木人，語言觸臍。如乾闥婆城，非獨身無眾緣，亦無如夢，眠中給使，覺笑痴愚。如影，可見難捉，業相無實。如鏡中像，因緣生相，非自他共作。如化，生住滅無，能令眾惑。雲何無著九喻耶？見如夜星，沒于慧日。所緣如翳，發團妄現。識界如燈，焰焰不竭。居處如幻，器世假形。身如朝露，須臾不停。受用如泡，水滴風成。過事如夢，因憶生境。現事如電，剎那已滅。未事如雲，識種潛伏。

六、摩訶衍者：大乘深經，非佛所說，非弟子說。此句出《大般若經》四百四十九，謂是魔言，不足置辨。然闡揚光大，應賴後人。大乘之興，始于龍樹，昌于無著。龍樹大作，《摩訶衍論》，有十萬偈，備譯其文，千有余卷，簡略隨情，為今《智論》。大乘即般若，經言無二見隨順品，《智論》而外，無別有論，名《釋摩訶衍》。對小宏大。一一法門，條分縷別，應細披尋。無著大乘瑜伽而外，《攝論》談唯識，《集論》談法相，《顯揚》宏大教，而莊嚴大乘又特製論，名為《莊嚴》。初〈成宗品〉，成立大乘真是佛說，有其八因，與入大乘出過之詳，堪稱能立。至其義蘊，亦應對小一一法門，抉尋論議。

七、毗曇者：龍樹有言，諸佛二種說法，先分別諸法，後說畢竟空。龍樹又言：智者入三種法門，說有說無，知皆是實。一、勒門，二、毗曇門，三、空門。勒三十八萬言，初門隨相，次門對治，今已不見。毗曇有三：一即勒；二為身義，即《發智》乾度；三六分，即《六身足》。《舍利弗毗曇》犢子所宗，與迦旃延勒

南天所行，皆佛在時作，皆龍樹所從。唯獨《發智》是其所破，《智論》明文，不一而足。若夫無著，對於有部，無不破辟。《顯揚》第四：佛說事攝，由三種經，一、增上經《舍利弗說》；二、廣群經，即《品類足》；三、集異門經，即《集異門足》。大與小義，遞進關係，分別法相，初應明小。明小有門，証于龍樹、無著，應先熟《品類足》、《法蘊足》、《舍利弗毗曇》。

八、般若即瑜伽者：《顯揚》十七：依止三摩鉢底，發起般若波羅蜜瑜伽勝行，即此正慧，能到彼岸，是大菩提最勝方便，故名瑜伽。而般若若有方便，相應無礙。此義《智論》屢屢發明，不煩細述。

九、法性即法相者：一、標，《智論》三三：法相即是法性，無生際即是實際；《智論》十六：性名實相，法名般若。二、文字，《大品》第一：欲得知法如法相；《大般若》四百一則雲：如如法性。《攝論》三性，嘗稱三相、三義，法有實相，亦名法相，實相法相，義即法性。無性為性，是為法性；一相無相，亦為法相。固不可說無相之法非是法性，即不可說無性之法非是法相。証諸《智論》，此義實繁，此姑不述。

十、其余者：法相家言，法相不可亂，目挾耳種而聽非目能聽，耳挾目種而視非耳能視。而《智論》十二：比丘入禪，能令大木作地，木中有地分故。十毛中有十八空相，觀之便空。唯識家言，死此生彼，中必有依，故有中陰。而《智論》十二，說有中陰，識緣名色，此識是中陰識。唯識對小，有不共無明，在相應外。而《智論》十五，無明遍在一切諸使中，而別有不共無明。唯識緣起，精論四緣。《中論》雖破四緣，而《智論》三二，佛說四緣，以少智人著于四緣而生邪論，為破彼著，非破四緣。更有多義，以類而推，不遑細述。

唯智者：法相常住，法界如化，了了分明，而無所著，是為般若。無能逃于法相，無不在此法界，故曰唯智。處非處善巧，是為般若。無有是處，斯有是處，攝一切盡，故曰唯智。無般若乃無修無佛無施設，則無世間人天、出世聖賢，諸有所作一切不成，故曰唯智。般若為大事、不可思議事、不可稱量事、無數量事、無等等事，出現世間。是故欲學般若，應學聲聞十種，菩薩九種，如來十三種功德事。而欲學世德、佛德九十三種事，則又必須學于般若。學般若知空，知空乃有方便，必有方便，然後乃能學于一切。是故不學一切，無所用其般若；而不學般若，則又無能馭于一切；故曰唯智。龍樹有言：菩薩從初發心求一切種智，于其中間知諸法實相慧，是般若波羅密。諸法實相者，境也；求智修知者，行也；得智証知者，果也。而《瑜伽師地》三科界系判列于境，三慧三乘判列于行，二種涅槃判列于果；唯識家言，攝歸一識。此智彼識，兩唯寧合！然非違背，唯識唯智各詳所之，初無或異。識乃詳于辨境，智乃詳于談行。識為心王，智即心所。識以一蘊攝法五蘊，智則一度攝行六度。識必分別各法，智則咸趣總相。識是平闡染淨，智則無漏趣歸。識唯專攝大器，智亦普被三乘。初不背于唯識，故曰唯智。無行而行，無成而成，唯智

為能。所謂第一義不可說，而能以俗說。不可以般若離証菩提離，而以幻証幻得無上菩提，非不依止般若。如燈焰炷，非即離初後心能証菩提，而修般若，漸集善根，菩提遂証。凡諸所談，無智不能，故曰唯智。

悲者：龍樹有言：大悲是一切功德之本，般若之母，諸佛之祖母。若無大悲，必無般若。欲崇般若，須先重悲。悲之體相，悲之差量，悲之威力，悲之功德，起悲勸悲，見于他處，此姑不談，而談必須。悲然後有眾生；悲然後有俗諦；悲然後有方便；悲然後求一切智智；悲然後能為無知眾生說法令知；悲然後有摩訶衍；悲然後能被大功德鎧，發趣大乘，乘是大乘；悲然後能入于三涂，無善不具，為大白象，為十二由旬大魚；悲然後能往生事佛，不住長壽，不墮味禪；悲然後能觀空不証，箭箭拄；悲然後能施設三乘，容攝聲聞。是故述大乘相，無不皆言以一切智智相應作意，大悲為上首，無所得為方便。

定者：龍樹有言：佛以般若為母，般舟三昧為父。般舟三昧能攝亂心，令智慧成，故以為父。般舟三昧有斯二義：一、攝亂心；二、見諸佛。勿念一切憎愛得失寒熱飢渴，但一等念十方諸佛悉現在前，得是三昧，佛悉前立，是則名為般舟三昧。希有微妙，勝三摩地百一十三，若能一心，皆與般若相應無失。唯獨般舟，定力而外，益以佛力，成智去礙，勝利兼賅，故獨趨重。般若本宗，念佛往生，以視通途，法門蓋異，盍略談之。一者、為成般若而設方便，非如淨宗以淨為主。二者、悲為上首，為護不失，非如淨宗厭此欣彼。三者、正度眾生懼或間斷。非如淨宗聞法以後方始廣濟。四者、懼墮空禪，防生長壽，非如淨宗容有既生長邊地。五者、方在于東，不在于西。六者、國住不動，非住極樂。七者、主事阿，非事彌陀。八者、自他業淨乃能土淨，六度離粗，自他俱淨，自他回向，非如淨宗重于治自、略于為他。九者、發宏誓愿，國土大眾行十八空，如是真如四諦，乃至菩提一切法門等皆誓愿，非如淨宗但愿往生。十者、行不動行，學寶幢學，得能一念般若相應，即可往生，非如淨宗但專念佛、不在般若。

三解脫者：龍樹有言：行四念處等道，到涅槃城，城有三門，曰：空、無相、無作。空門二行，無相四行，無作十行。毗曇緣諦于蘊，或一或三，摩訶衍中唯是一法，緣諸法實相。法雖是一，義別說三。若入空門，不取空相，不須余二；取則除相入無相門；又著空相，生諸戲論，除此戲論入無作門。或複見多入空，愛多無作，愛見相等入無相門。又複空門是般若體，初方便行應無作門，入究竟住應無相門。無所有，不可得，不見不行，無性為性，如是等類，屬空門攝。非即非離，不著不執，非住非不住，不取不舍，不遣不壞，無二無二處，如是等類，無相門收。如幻如化，無知無想，無修無証，如是等類，攝屬無作。一切佛法皆由三解而得增長，除是三解，更無其余依彼能學無量法門。此雖小法，而用無邊，非與小同一無方便。此空法門，詳其功德，窮劫不盡，姑以十談：一者能容，譬如虛空，量不可測。二者攝受，譬如虛空，不拒諸相。三者圓滿，譬如虛空，眾德普遍。四者能生，譬如虛空，緣起幻化。五者無盡，譬如虛空，無三際三界。六者無障，譬如虛空，各各

互入。七者無礙，譬如虛空，自在流行。八者清淨，譬如虛空，畢竟無染。九者甚深，譬如虛空，非一異即離而能成事。十者廣大，譬如虛空，法如平等。空能有此無量無邊一切功德，是故一切智智相應作意，大悲為上首，而用無所得為方便，無不可為，無不得成。小唯趣寂，大惡取空，塊然不靈，蕩然多過，止感空之為害，豈知空之為用？般若大智，智于巧便，善用其空而已矣！

福者：《解深密經》：當知初三，增上戒攝，靜慮心攝，般若慧攝。慧為智慧資糧，戒則福德資糧，精進靜慮，遍于一切。定能攝亂，令智慧成；勤能發生，令智浸盛；故皆稱福。福于智慧，佑順資益，雖非因緣而，是增上。無五波羅密，唯是般若，力即綿微，不能廣大，便墮聲聞，非摩訶衍。帝釋諸天，瞻洲福大，許與彌勒、子、善現咸同論議。《般若》全經，每一論竟，較量福德。供養三寶，財施、法施，萬行普施，數由一起，乃至一洲，三千大千，十方世界，較行般若自修他修，千分萬分優波尼殺曇分而不及一。其福無量，研究其極，極于作佛，佛無上福，無等等福。略談修福，有十勝利：一、卻魔；二、佛護；三、資具如意；四、多緣輳合，所作皆成；五、多緣增益，所作圓滿；六、其心柔軟，豫悅自足；七、易遠過失；八、易引生慧；九、易得涅槃；十、速証無上菩提。無翊我慧，而鄙彼福。若無福人，智必不成，舉念千歧，崩壞虧實，今古悠哉，冤慟何及！

十法行者：書寫、供養、施他、諦聽、披讀、受持、演說、諷誦，如是八行，屬三慧聞。思維屬思，修習屬修，修由于思，思由于聞，聞由得供大善知識。甚深《般若》，經典名字，得經于耳，已曾供養萬億諸佛為其攝受，況十法行，況能信解不驚不怖？諸信解人，必久修行。若能供友得友攝受，未久亦信。出世淨種從何所生？應正答言：從淨界等流聞熏習生。法性常住，異生昧然，佛巧施設，而有妙用為般若波羅蜜。是故非聞，烏乎能成？佛僧是友，法亦是友。香華供資《般若》深經，亦為供友。循而讀之，故克有聞。聞而發心，信解順忍，遂得無生阿跋致，因果差別，直証菩提。

觀行者：一者、破壞觀。經言：應觀色乃至識凋落故、破壞離散故、不自在故、不堅實故、性屬虛偽故，而行般若。應觀如虛空空，而引般若。應破壞諸法，而修般若。是為破壞觀。二者、不壞觀。一切諸法畢竟清淨，湛然無動，無染淨顛倒，無得無現觀，不受增減，不可破壞。又複應觀，若佛出世、若不出世，諸法法爾，皆入法界無差別相。善非善法，記無記法，世、出世法，漏、無漏法，為無為法，無不皆入無相、無為、性空法界。以是觀行，學一切法差別而不壞法界，是為不壞觀。

文字者：修文字般若，龍樹有言：先分別諸法，後入畢竟空。然又有言：若無般若，入毗曇門則墮有中，入此空門則墮無中。般若智慧，方便究竟，了了言空，方便亦言無我。是故毗曇門邊，讀《六足舍利弗》；空無我邊，讀龍樹、無著廣深諸論。以是二邊，糅合于一，一一各各法都善巧，而後總觀，貫通豁然。《智論》品初

各法善巧，多詳行法；《雜集》諸論各法善巧，多詳境事。更複結集充類盡義，廣挹經論文字功成。向者有志，集大乘大法義，蹉跎蹉跎乃到于今。是書若竟，自謂雅頌得所，禮樂燦然矣。

經卷者：《般若》前五會，多至四百余卷，少唯十卷，為是事異，為是文異？應正答言：固是文異，非是義異。都集一會，都聽圓音，都各有記，都記有別。或複遞傳，視根鈍利，授略與詳，結集羅存，。遂有五分。或複傳譯，所據傳本，文又有異，故雖一會，詳略又判。于何徵之？《智論》五四：此中都說十二入乃至六種亦應如是，訶十八界亦應具說，而缺如者，誦者妄失。乃校唐譯，蘊、處、界等，卻都無略，更尋初會，反複周詳。又《智論》六七：部黨經卷，有多有少，有上中下《光贊》、《放光》、《道行》。此言部黨，明明說為一事；此言多少，明明說為異文。複次，于一會中賅攝事廣，此事彼事都在一會。又一事中賅攝時久，前坐後坐，並談一事。《智論》四十：是事非一日一坐說。又《論》五十：是摩訶般若波羅蜜，有十萬偈三百二十萬言，與四《阿含》等，非一坐說盡，此蓋獨指初會四百詳文，而言非一坐說。又《論》七九，言說章句，卷數有量，如《小品》、《放光》、《光贊》，《般若》經卷有量，般若義無量，是則明明經卷為一，又明明義複為一。五會義同，但文字異，既確証解。然其詳略，皆以法相或陳或概，更非其余。凡言一義，統貫一切，舉一反三，都如是會。是諸名相，以境、行、果，攝屬三聚，應得而談。五蘊六處十八界，地水火風空識，四緣十二支，攝屬于境。六度十八空，真如七勝義，三十七覺分，四諦八解九次第，八勝十遍處，陀羅尼門三摩地門，十地五眼六通，十力四無畏，四梵四無礙，十八不共法，三十二相八十隨好，無忘恆舍，一切智道相智一切相智，攝屬于行。預流、一來、不還、羅漢、獨覺、菩薩行、無上正等菩提，攝屬于果。境通染淨，行通三乘，果亦三乘。或境言法相，行言行相。以是而談，不覺文繁。

諸經所系第三

般若空通小乘，智圓佛果，無有一法非般若成，即無一義非般若立。但是經論，即是般若，姑略談經，以十而敘：一、《華嚴》；二、《法華》；三、《涅槃》；四、《深密》；五、《楞伽》；六、《阿毗達磨》；七、《菩薩藏》；八、《大日》；九、《彌陀》；十、《阿含》。

《般若》、《華嚴》，摩訶衍中堪稱兩大。龍樹是基，汪洋恣肆。《般若》接小，《華嚴》充大，唯此略異，余無不同。《華嚴》轉展回向，轉展善根，入地周圓，遂不可測。《般若》隨喜回向，妙于無相，無相無量，遂亦不窮。《華嚴》一切攝入一切，《般若》萬行攝入六度，一度一行，亦複攝萬。《華嚴》三世、三界，融通無礙；《般若》時、方悉空；初無少滯。《華嚴》因果十波羅蜜，《般若》雖複以六攝十，而詳談方便亦敘十度。《華嚴》差別住行向地。《般若》約三，發心信解阿跋致圓滿菩提。《華嚴》入住，百四十一當愿眾生，是稱淨行。《般若》自初

發心至正等覺，為眾生故專心系念一切智智，更無其余。《華嚴》梵行不舍眾生，了知如化，觀法不二，一切現前，初發心時即等正覺，明諸十法得無盡藏，隨其所應而能說法。《般若》雖必久修而後信解，然得友教即悟無生，圓滿一切，直証菩提，轉大法輪。《華嚴》入地，十種功德不可思議。《般若》三昧百有十三，微妙圓通，深不可測。《華嚴》十忍，宛然《般若》，二諦不礙方便用空，請一敘述：聲忍、順忍，說十法行；無生法忍，說三三昧；雖度群生，法界平等，雖不取著，大悲轉輪，說如幻忍；無有實事，但隨世說，說如焰忍；非生非滅，而有示現，說如夢忍；名句演法，法性不違，說如響忍；無二法中，分別二相，說如影忍；了世、出世不離不住說，如化忍；無礙無邊，能持能顯，說如空忍。宛然《般若》，宛然華嚴。若昧產生，而談《般若》；若昧無得，而講《華嚴》。故自分河，遂成敵對，龍樹宏大，最初一人，如十八部，但諍到今，烏在其能含弘光大也哉！

《法華》方便，以一乘道，分別說三。開權顯實，無二無三，乘唯以一。《般若》真諦，尚無一乘，何況二三？方便談俗，妙善設施，初非離一。《法華》：佛為大事因緣出現于世，開示悟入佛之知見。佛之知見，唯《般若》能，能與般若一念相應，一色一香無非中道，無不皆頓，無不皆圓。不可強判，因其用空，謂三乘通；因其六度，謂大乘別。

《涅槃》顯實，破斥非常，而談其常，是絕對常。《般若》謂法與生滅合，無不如化；不合非化，是即涅槃。《涅槃》佛性通一闡提，《般若》敝魔亦能歸化。本來寂靜自性涅槃，煩惱菩提平等無二，如是妙義，兩經胥明。性必須見三學得寂，修一切德，圓一切智，如是實行，兩經不廢。

《深密》全經，列《瑜伽?抉擇》，因類推義，可表《瑜伽》。《深密》勝義無自性，即《般若》真如；《深密》依他因緣性，即《般若》俗有。《瑜伽》大論，正為菩薩令于諸乘境、行、果三皆得善巧，勤修大行，証大菩提。廣為有情常無倒說，兼為余乘令依自法、修自分行、得自証果。《般若》妙法，亦顯大乘，亦被小凡，攝一切智及道相智、一切種智，以廣其行。海若汪洋，都憑巧便，初非《瑜伽》唯因緣有，亦非《般若》唯實相空。

一切唯有識，詳分緣起。一切自心所現，總觀現相。《楞伽》宗義，略異《唯識》而合《般若》。《般若》亦以一如實相，觀一切現相。色即是空，非心外境，《楞伽》離四句，絕百非，超一切量，宛然《般若》。無所得中，無二無別，誰能差別。

《阿毗達磨經》，此方未至。然無著《集論》，謂集彼經以為宗要。則知彼經必分別法相，相應善巧。龍樹《般若》，先分別法，後畢竟空。依是法行，資鏡彼經，必能如理，契般若旨。

《菩薩藏經》，菩薩信解十不思議，佛為開示菩薩大道，所謂四無量心、六波羅蜜、四種攝法，發愿久行，即得受記。此與《般若》次第盡同。《菩薩藏經》，詮敘《般若》純方便義。無盡慧相六十六句，趣入多聞四十一種，以十法行起于正行，一相無相，如理作意。然後乃能修行般若，得十善巧。蘊界處諦，四無礙解，四依福智，覺分緣起，為無為法，此十善巧，一言一字皆無邊慧。應與五周方便八門及余隨應，參觀讀誦。然後乃能恍然了然廣大波羅蜜，甚深波羅蜜，無量無邊波羅蜜，般若波羅蜜。

《大日》住心，菩提心為因，大悲為根本，方便為究竟。何謂菩提心？心、空、菩提，三無差別，如實知自心，自心尋求一切智智。越世妄執百六十心，出世心生，為初發心。觀蘊能所皆離法性，超一劫行。觀蘊賴耶法性不生，超二劫行。不思議十心無邊智生，超三劫行。即身是佛。此等悲為根本，方便波羅蜜滿足。方便善妙，在能施設建立；一切顯聖行，依染差別施設建立；一切曼荼羅，依淨差別施設建立；唯空無礙，乃能施設建立。是則名為方便般若。修五無畏，由善身無我至一切法空。修十緣生句幻焰夢月，城響泡影，空華火輪，本無所得，趣無所得，雲何而非實相般若？《大般若經》第十會〈般若理趣〉說十四法門，真言要義，息災增益，降伏愛敬，賅攝罄盡。所謂般若理趣法門是菩薩句義，經十六菩薩生，得執金剛性。二、依遍照如來相，說四種現等覺法門，雖造重業，超越惡趣。三、依調伏惡法釋迦相，說平等普勝法門，常生善趣受勝妙樂。四、依性淨如來相，說觀自在智印清淨法門，蓮花不染習菩薩行。五、依三界勝主如來相，說灌頂智藏法門，信解受持，滿無邊行。六、依佛印秘密如來相，說智印金剛法門，一切成辦福智圓滿。七、依無戲論如來相，說轉字法門，于一切法得無礙智。八、依諸佛輪攝如來相，說入平等性法門，善能悟入諸平等性。九、依供養器田如來相，說供養無上法門，速得圓滿諸菩薩行。十、依善調伏如來相，說智蜜調伏有情法門，現世怨敵皆起慈心。十一、依善建立如來相，說一切法最勝法門，通達平等，于諸有情，心無掛礙。十二、依住持藏法如來相，說有情住持遍滿勝藏法門，則能通達勝藏法性。十三、依究竟無邊如來相，說住持法義法義平等金剛法門，障悉消除，得執金剛性。十四、複依遍照如來相，說大樂金剛不空神咒金剛法門，消除業障，總持不忘。兩界頓漸，兩界性修，無不根據《般若》，相應《瑜伽》，無二無別。略敘胎藏，其金剛界，以此類談，此姑從略。

一心不亂，十六觀行，四十八愿，《彌陀》妙典與《般若》合。其或稍異，見上《般舟》，此姑不述。大小溝通，使世易入，唯有《般若》。接洽《阿含》，茲略舉例。如《大空經》，但內外空，更極推廣，大乘十八。《增一阿含》慈五功德，大乘轉增三十二悲。諸如是推，不遑細述。

諸家所明第四

吾今而後，恍然豁然，般若波羅蜜即摩訶衍，廣大無邊用如是空故。摩訶衍即般若

波羅蜜，施設建立非空不能故。不可但空而談般若，一相無相故。不可離空而談大乘，畢竟清淨故。五竺聖言，有文有徵，福德匪淺，讀之無忽。一、彌勒《現觀莊嚴論》；二、龍樹《智論?緣起論》；三、無著《金剛般若論》；四、羅羅《贊般若偈》；五、陳那《圓集要義論》。

彌勒《現觀莊嚴論》，品分為八，頌則二百七十有二，梵文、番文，都可按索彌勒五論。一談般若，應即此論。弁《大品》首，應是懸談。經義汪洋，如頓裘領。讀《瑜伽?抉擇》，應推而知。先佛之經，後佛之論，不啻一人，既示弘文，人又複作釋。譯學綦切，以是怦怦。

《摩訶衍論》，是為《智論》。譬如卜居，《中論》瞻宇，《智論》繞舍；譬如行路，《中論》載途，《智論》邁遠。南針老馬，《中論》、《中邊》；極深研幾，《瑜伽》、《智論》。賴有《智論》，汪洋《般若》乃得津涯；賴有《智論》，淵深《般若》乃能汲綆。《智論》開卷，有〈緣起論〉，引中之引，應抉而談。論揭經事，有二十二：一、為彌勒說菩薩行；二、為菩薩增念佛三昧；三、初受天請，轉本愿深輪；四、為斷眾疑，說摩訶經；五、為拔沒邪，放光說實；六、為斷嫉謗，說深罪福；七、為令信受，言我是大師；八、為令歡喜，開藏恣取；九、為久結使，作大醫王；十、為斷常見，言身不思議；十一、拔苦樂邊，令入中道；十二、生身、法身，供同報別；十三、說阿跋致相；十四、說魔事；十五、授三乘人記；十六、說第一義悉檀；十七、為梵志生信；十八、說法實相；十九、說無諍處；二十、說非三法門；二十一、異門說四念處等；二十二、異門說五蘊等。

無著《金剛能斷論》，七種句義，般若成立。一、善攝受付囑菩薩是種性不斷句。二、應如是住、應如是降伏其心、是發起行相句。三、行所住處句，共十八種，次詮全文，信解行地有其十六：一、發心，滅度無邊而無四相；二、波羅蜜行，于法無住福不思量；三、欲得色身，相皆虛妄，見相非相；四、欲得法身，言說如筏，証得無定，福德無邊；五、離障礙，開為十二：一、得勝無慢；二、不離佛出時；三、愿淨佛土；四、成熟眾生；五、離外散亂；六、破色身行；七、供給如來；八、遠權味懈；九、苦忍；十、離寂靜味；十一、遠離喜動；十二、離無教授。自樂阿蘭那行至然燈授記，中間配文，姑不贅述。淨心地有其一種。人身長大，說証道義。如來地有其一種。自莊嚴佛土至經末說偈，六種具足，國土、智淨、福自在、身、語、心，應如次配。四、對治句。五、不失句。六、地句。七、立名句。抉擇文義，非詮文次。

羅羅《贊般若偈》，《智論》十八引二十頌。雖非全文，而得略義。二十攝四，不嫌贅累。實法言思斷，淨心無戲染，般若涅槃，是三相為一。佛母眾祖母，隨眾種種名，日出朝露，愚怖智歡喜。不著無去來，無得亦不見，般若見不見，皆縛皆解脫。如幻三乘得，世俗假名說。不取亦無壞。誰能贊其德。

陳那《圓集要義論》，五十六頌，三寶尊菩薩，長行詳釋，撮攝《小品》，義固無違。樂讀簡文，初熟此論，即讀四分，亦飲甘露，亦蠡重洋。論為六義：一、依止，憑佛神力，善現教誡。二、作用，佛智增上，發起說法。三、事業，除遣十種分別散亂法，次第分別十六種空。四、相，書寫起疑即為魔相，不退轉相是菩薩相五罪，作障謗法毒想，三皆墮獄。六、稱贊，施滿三千七寶，若持般若，其福勝彼。事業一義，正宗要義，應詳述敘：一、說世俗五蘊，遣無相分別散亂；二、人、法不見得，遣有相分別散亂；三、色與性無取，遣俱相分別散亂；四、空性離故，所作如幻故，果棄如夢故，遣毀謗分別散亂；五、色空即非色，遣一性分別散亂；六、空不異彼色，遣種種性分別散亂；七、唯名無自性，遣自性分別散亂；八、自共色性空，不生亦不滅，遣差別分別散亂；九、聲與義非合，遣如名于義分別散亂；十、名亦無所有，遣如義于名分別散亂。無著《集論》，亦有詳文，陳那淵源，學者多據。《般若》啟鑰，在斯論歟！

緒言第五

樊師譯《大般若經》六百卷成，嘆言：此經東土有緣，傳譯乃能成事。文不倬闕，解行浸滋。乃藕益葛[鼎*彗]，辛苦唐勞，余無聞焉爾，何哉？龍樹、無著學不興，文汪洋而阻，義幽玄而益阻，斯安足怪？經言：善男子于深般若，若欲書持讀誦演說，乃至一歲必令總了。所以者何？甚深般若波羅蜜，大寶神珠多諸障礙，文阻也。讀誦厭繁，品品皆空，不得滋味，當知是為魔事，義阻也。積劫孤露，有筏思航。民國紀元前，曾誓于佛，誦《般若》日一卷，六百日結愿，不數卷而廢然。十二年秋，兒東溺吳淞，大發愿：蘭兒死，弘《瑜伽》；東兒死，宏《般若》，讀《大品》于其柩旁一過，如焚而止。日月逾邁，剎那至十六年，姊淑凶問又至矣。骨肉五人，歸然子存，念朝露之溘至也。汲汲治《般若》，熟之，複之于《智論》一年。春，正月既望，耦庚死于滬。大恐，閉關作序，迄于今四月七日成。明日佛誕，有莫之為而為、莫之致而致者歟？予治此經，三弛三振。親愛之兒、之姊、之從者，不啻死喪之威以刺之，夫然後僅乃有成，難哉！志欲讀者無難，全牛一目，提綱析節，循經約文，一效龍樹釋經之意，遂不覺其詞之長，三萬數千余言也。耦庚，聶氏，滇人，年三十三，從予游垂八年，能唯識法相學，作《雜含蘊誦略釋》。有奇疾，不永年，吾獨何能無慟？慟之不如其益之，乃有斯作也。悲夫！

民國十七年（1928）佛誕前一日歐陽漸敘于支那內學院注

（原載《內學》第四輯，其中第一、第五兩部分，經修改後收入《歐陽競無先生內外學》第二冊）

《藏要》第一輯敘

十一經三律十一論總

一、《大般若經?第二分》

二、《大般若經?第五分》

三、《華嚴經》

四、《楞伽經》

五、《大般涅槃經》

六、《解深密經》

七、《菩薩藏經》

八、《勝經》

九、《無量壽經》

十、《法華經》

十一、《雜阿含經》

十二、《瑜伽?菩薩戒本》、《羯磨》

十三、《十誦戒本》、《羯磨》

十四、《善見律毗婆沙?敘》

十五、《中論》

十六、《辯中邊論》

十七、《大智度論》

十八、《瑜伽師地論》

十九、《集論》

二十、《攝大乘論》

二十一、《二十唯識論》

二十二、《成唯識論》

二十三、《因明正理門論》

二十四、《品類足論》

二十五、《異部宗輪論》

菩薩藏中、聲聞藏中之經律論，西土此方著述，既挾其要分為六輯以為《藏要》。又挾經律論最要者為第一輯，是為要中之要，猶咒中之心中心也。可以便讀，可以知概。凡二十五種，經十一，律三，論十一。經十一者：菩薩舉十，聲聞舉一。菩薩乘有正軌，有便道。乘乎正軌，又有不易之則，曰境、行、果，依此挾擇，而得四經：一曰《大般若經》，二曰《華嚴經》，行菩薩乘有不易之則，一曰因果、二曰差別：因果者，運用之妙，《般若》盡之；差別者，境界不同，《華嚴》盡之；故《般若》、《華嚴》者，菩薩正軌之行也。三曰《楞伽經》，古學一百八句，一切自心所現，今學五法、三自性、八識、二無我，知法、知義，于此廣博，故《楞伽經》者，菩薩正軌之境也。四曰《大涅槃經》，我皆令入涅槃而滅度之，此佛出世大事因緣，對機則四邬陀南，畢竟則常、樂、我、淨，見性而已，又多乎哉？是故《大涅槃經》者，菩薩正軌之果也。《解深密經》，境、行、果三，都約其要。《菩薩藏經》，但約行中因果差別。《勝》明識，屬隸《楞伽》。《無量壽經》，是方便道；《法華》則經中之揭橥者也。聲聞舉一，曰《雜阿含》，佛言諸佛世尊具大智力，總攝諸法，安處四種邬陀南中，輾轉傳來，是名《阿含》，傳此四句，是名《阿含》，《瑜伽》五分，釋《雜含》多，大小溝通，《阿含》亦大故也。

律三者、《地持善戒》，譯非全文，是故戒本羯磨，應挾《瑜伽》為大乘律。北方小戒，論其圓通，《僧祇》為最；究其嚴密，《十誦》為尤，《四分》、《五分》及迦葉維，嚴不及《十誦》，通不及《僧祇》，是故戒本羯磨，唯獨取于《十誦》。南方小戒，此土傳來，但見《善見律》，錄序而已。

論十一者、摩訶衍義，創始于龍樹，充量于無著。合之則相圓，分之則義窒，豈空有之或異，實偏依之各詳。《中論》談遍計空，《辯中邊論》談依他有，中之義備也。《大智度論》，釋經論中詳一切法，而詳于對小；《瑜伽師地論》，宗經論中詳一切法，而詳于自大。龍樹毗曇為《智論》，無著毗曇為《集論》，是則乘之事

備也。唯識為入道之體，《攝論》創始於其先，《二十唯識》、《成唯識論》昌於其後。因明為揀外之用，而《理門論》者，則又基本之作也。毗曇多種，六《足》為精，《集論》為大乘毗曇之終，《品類足論》為小乘毗曇之始，龍樹、無著皆所宗矣。其餘部執，則《異部宗輪論》亦足知概。

此《藏要》第一輯總略如是也。至於二十五種法義，其亦各有略說，各隨其品目而發，分之弁各種之首，合之為提要之匯焉。

（選自1929年8月支那內學院校刊《藏要》第一輯）

《藏要》第二輯敘

八經六律十三論總

- 一、《佛母寶德藏經》
- 二、《能斷金剛經》
- 三、《華嚴?十回向品》
- 四、《涅槃?師子吼品》
- 五、《無盡意經》
- 六、《維摩詰經》
- 七、《長阿含經?第一分》
- 八、《法句經》
- 九、《四分戒本》
- 十、《五分戒本》
- 十一、《解脫戒經》
- 十二、《有部戒經》
- 十三、《僧祇戒本》
- 十四、《薩婆多部律攝》
- 十五、《十二門論》
- 十六、《百論》
- 十七、《廣百論本》
- 十八、《中觀釋論》

十九、《寶性論》

二十、《瑜伽?抉擇分?五識意地》

二十一、《莊嚴經論》

二十二、《觀所緣論釋》

二十三、《佛地經論》

二十四、《因明入論》

二十五、《菩提行經》

二十六、《成實論》

二十七、《俱舍論》

《藏要》二輯，舉經律論二十七種，仍本一輯主旨繼續而營者也。般若道場，聞者記錄或廣或略，或以長行，或以偈頌。一輯于長行略廣，五分中撮其大凡；二輯則舉《寶德藏經》三十二品偈頌。讀者若先頌後長行，此經猶前陀南；若先長行後頌，此經則後陀南也。《心經》談空三昧，是舍利子般若類；《金剛》談無相三昧，是須菩提般若類也。一輯舉《華嚴》根本為〈十地〉，二輯舉《華嚴》臨入為〈十向〉，小大、自他、理事，無不資力回向以為轉移也。一輯《涅槃》，舉〈迦葉〉法用；二輯《涅槃》，舉〈師吼〉法義，用以示善巧義以示切要也。《般若》以殊特義，說行中因果義；《無盡意經》則以平等義，說行中因果義也。又《般若》、《華嚴》諸經，以殊特義說境、行、果義；而《維摩詰經》，亦以平等義說境、行、果義也。方便利他，真俗神通，行菩薩行，見十方佛。世俗以之為神奇，大道以之為通途也。《雜含》五誦，深于談禪；《長含》四分，詳于破執。一輯、二輯，都舉其初而已。《法句經》者，要偈多存，古經猶聚，誠根據之有由，而小藏之精要歟！上來輯經，大舉其六，小舉其二，凡八種也。

此方律籍，可稱該備，正量未來，而有明了，一輯所舉，《十誦》、《善見》而已。二輯則法藏之《四分》、化地之《五分》、飲光之《解脫》、有部之《戒經》、大眾之《僧祇》，無不次第舉其戒本，而使八家部執，詳略異同，比例研求，堪資取舍，則戒學之大營也。複舉有部《律攝》，以四句頌攝戒多事，複敘戒文隨事分釋。文則視廣律為簡，義則較廣律為繁。研戒之初，莫此為便，又戒學之切要也。上來輯律，凡六種也。

龍樹《中論》，大小染淨，三科十二支，二取二空，賅攝于四百四十六偈，闡揚空義，汪大哉，而無以示入德之門，于是抉擇《中論》，約為十二以示之門。初三因緣觀空，次三相觀空，次二生滅變異觀空，後四因果、作者、時、生以觀空是也。提婆推演《中論》，作瑜伽行四百頌，未能全來，所來者《百論》十品，罪福、神我、一、異、情、塵、因、果、常、空而已。又《廣百論》八品，常、我、時、見、根、邊、相、誠，為四百頌之後二百頌而已。然外內之論義，既已詳盡，《中論》之法門，亦複增多。談空之義，至矣極矣！雖然，教誡弟子毋惡取空，當留意也。詮釋《中論》，此土唯三。青目既舉于前，安慧當續于後，故繼于《中觀釋論》也。《寶性論》者，依《陀羅尼自在王經》，以七金剛句攝一切佛法。《自在王經》與《大涅槃經》，均說一切眾生皆有佛性。菩提功德，利眾生業，皆所以見性。三寶一歸，但指不同，初無歧異。然所謂一切空者，見性涅槃是也。上來五論，皆龍樹學也。一輯舉菩薩行，二輯舉菩薩境。五識意地抉擇，則唯識了義境也。《莊嚴》與《菩薩地》諸品，名同而義別，西域不爛不能弘法，蓋菩薩行之推廣談，與菩薩地功用無或殊也。《觀所緣》，則唯識相分自內而已。此宗談果，莫詳于《佛地論》。四智心品為用，清淨法界為體，菩提、涅槃二轉依義，體用須明也。一輯《門論》，談因明原理。二輯《入論》，談因明作法而已。上來五論，皆無著學也。《菩提行經》者，抉集群經，贊發菩提心，修行六度，回向眾生，非龍樹所作，而談空義大破瑜伽，倘亦龍樹學歟？小趣大者，《成實》入《般若》之半途，《俱舍》造《瑜伽》之中路。欲探大乘由來，二論誠不可不讀也。上來三論，皆系于龍樹、無著學也。總論所輯，凡十三也。

要之，此二十七種經律論，約略而談，經之所的，無非般若、瑜伽法門；論之所趣，無非龍樹、無著之學；而律則八家所立，罄無不宜；大道正軌，誠在于斯，老馬示途，誠慰飢渴，世有智者，行遠升高，其必以是輯作厥權輿歟？

（選自民國1935年10月支那內學院校刊《藏要》第二輯）

《維摩詰所說經》 敘

佛國品第一

方便品第二

弟子品第三

菩薩品第四

問疾品第五

不思議品第六

觀眾生品第七

佛道品第八

入不二法門品第九

香積佛品第十

菩薩行品第十一

見阿 佛品第十二

法供養品第十三

囑累品第十四

《維摩詰經》者，乃正法之常軌，大道之通途，世所稱常識是也。于此能爛，可以共學，此猶不達，凡小盲魔，終古無見天日之期，亦大可哀也已。讀是經者，應先判文，次後抉義。

最初序分為〈佛國品第一〉，最後流通為〈法供養品第十三〉、〈囑累品第十四〉，是三易明，今且勿論，論正宗分。

正宗十一品，境居其九，行果各一。境居其九者、菩薩以自他利為境，而先利他，其能利者，方便是也。密談方便而總敘，為〈方便品第二〉。密談方便而別敘，敘其昔之化小，為〈弟子品第三〉；敘其昔之化大，為〈菩薩品第四〉；敘其今之普化，為〈問疾品第五〉。顯示方便，俾得親証而易趣入，為〈不思議品第六〉。其所利者，眾生是也，為〈觀眾生品第七〉。菩薩利他，亦以自利，以俗諦事自利，為〈佛道品第八〉；以真諦理自利，為〈入不二法門品第九〉。別利敘已，繼以總談，為〈香積佛品第十〉。行果各一者、行為〈菩薩行品第十一〉，果為〈見阿佛品第十二〉。

其文如是，其事則文殊問疾，維摩顯通；須彌得座，演不思議法門；香國得食，作

無文字佛事；大士聞盡無盡法以去，維摩取妙喜世界以來；自始至終，無非現通；是故《維摩詰經》又名《不可思議解脫法門經》也。夫游于方之內者，數十寒暑，數十品類，千年歷史，萬裡區宇，展轉相律，不出其域，維彼覺人，超量過量，出乎其方，是故世、出世間，一切離異，不可以世規出世，不可求出世于世，是則欲知法義、先求常識者，舍《維摩詰經》何由哉？

《維摩經》義，姑以十談：一者、神通義。本自無封，烏得有通？惟世間有封之實，斯菩薩有通之名，蓋惟示以本然之義，救其不自然之封而已。封者，小不可容大，而維摩丈室容三萬二千師子座，謂之為通。封者，堅不可入堅，而妙喜國土接入娑婆世界，謂之為通。封者，男不可女，女不可男，而舍利弗作天女形，天女象易舍利弗身，謂之為通。封者，天樞地維不可移易，而解脫人斷取佛刹如陶家輪，謂之為通。雖今時地球星球之說但自繞動，且非赤手斷取，而猶以為誕也。故夫封者，不可以理喻，徵之以通，然後乃信。然無通也，一切有為，夢幻泡影。夢本無稽，幻原不礙，泡唯是假，影自重重。世界虛妄，但有名言，都無實事。知其無實事，雲何有封？又焉往而不通哉？是故學佛，應知宇宙人生，無非幻化，法無定相，無不皆通。

二者、究竟義。經言方便為究竟，《法華方便品》：開示悟入佛之知見，為一切智智；此經〈方便品〉：厭離色身，求樂法身，從無量功德而生。無量功德即一切智智，以三身言，應是報、化，而言法身從功德生，何耶？法身是體，報、化是用，即用以顯體，就能顯而談所顯故也。諸佛得果，曰二轉依，從無漏種起一切有為，而生四智，曰菩提所生得。清淨法界，一切功德所依，佛、眾共有而寂滅無為，要須菩提然後乃顯，曰涅槃所顯得。合能顯所顯，言四涅槃：自性涅槃是體所顯，其三涅槃是用能顯；有余、無余曰彼果斷，以解脫用而顯體也，《般若》所詮：我皆令入無余涅槃而滅度之，是也；無住涅槃曰彼果智，以功德用而顯體也，《瑜伽》所詮：轉依成滿，入大涅槃，是也。凡此斷智二用，皆為顯現自性清淨之體而發也。無用談體，是為凌駕自欺；無體談用，不墮于焦芽敗類，即墮于蒼莽無歸也。《大涅槃經》：一切眾生皆有佛性，要藉修習，然後乃見，是故眾生雖有法身，要藉有為發生四智，然後乃顯；是故經言法身從無量功德所生也，即能顯而談所顯故也。是故學佛，應先發阿耨多羅三藐三菩提心，六度萬行，成等正覺，而得涅槃。

三者、平等義。佛為增上慢人，說離淫怒癡為解脫耳；若無增上慢者，佛說淫怒癡即是解脫，此以不增談平等也。菩薩觀法，不見有法非菩提因，煩惱幻化，無處隱藏，無有聚集，法無二性，如煩惱性即菩提性，此以不二談平等也。又複諸法但有名字，無決定性，有二比丘犯律疑悔，阿世王大逆恐怖，為說真相都已拔除，此以不定談平等也。物性平等，法爾本然，對治但遏流，平等乃清源也。得是平等，縱橫自在，入不思議法門。不知平等，我見須彌，長夜淪迷，無有出期。塵沙翳目，玉屑障視，等無有異。是故學佛，應知諸法差別，本無所有，遍一切一味。

四者、圓滿義。諸佛依二諦，為眾生說法，般若真實義，瑜伽方便道，如車具兩輪，所謂因緣法，即空即假名，分別中有空，空中有分別，是則契中道也。此經三十二通達佛道以說俗，而如來種為污下所生；三十一不二法門以說真，而無表無示遂爾默然。此經演一切法，先破後陳：先破以詮真，後陳以詮俗。先破來相見相，而後陳其問疾辨論。先破床座，而後陳其須彌燈王八萬四千由旬師子之座。先破雜食，而後陳其香積法食。先破沒生，而後陳其妙喜之沒、堪忍之生。此經演盡無盡法，不住無為契世俗諦，不盡有為契第一義諦，此其所謂圓滿中道義也。是故學佛，應以龍樹、無著並為一談，爭相爭空，為不解事。

五者、大悲為人義。菩薩觀于眾生，如幻如化，如空中鳥跡，而眾生自不謂然，孰是實有，菩薩因此而起大悲。大悲切至，譬如一子，子病母病；如是眾生有病，菩薩亦病。作大醫王，多方療治，于是有為人之學，建立以為大乘。生心動念，舉足下足，皆是眾生；六度三學，四梵五明，皆為眾生；毫發善根，回向實際，回向菩提，而皆回向眾生。眾生有苦，我代其受；眾生有虧，我給其求。為眾生故，十王大業，入生死海；為眾生故，示行煩惱，長劫闡提；為眾生故，游于十方，隨機度化。若問菩提，久稽一切智智；若談解脫，發趣大般涅槃；此豈悲心微薄，但自清淨之所樂為者哉？大悲所激奮者然也，故曰大悲為根本也。然佛世尊是菩薩成，非聲聞得。是故學佛，須觀滄海，莫貪牛跡；應圖烈日，勿務螢光。

六者、破執義：對破，壞破，雙徵破，實事破。何謂對破？在家發心，即是出家；觀罪性空，即是奉律；道法而現凡夫事，即是宴坐；離緣舍見，即是智慧。又複陰無所起，即是苦；究竟無有，即是空；于我無我不二，即是無我；本無所滅，即是寂滅。何謂壞破？以五逆相解脫，墮六師所墮，同惑離淨，謗毀三寶，不到彼岸，終不滅度。何謂雙徵破？受記為過去耶、未來耶、現在耶？為如生耶、為如滅耶？天眼所見，為作相耶、無作相耶？何謂實事破？華著比丘身，移比丘以女身，施比丘以魔女。惟執之者憑空膠固，遂破之者險誕離奇，純任精神，羌無跡象。若能不驚、不怖、不畏，而執破矣！世有眾生，然後有佛；眾生有執，然後有法；岸到筏銷，執破法舍，直下本來，有何事哉！是故學佛，須知有八萬四千煩惱，乃有八萬四千法門，釋迦四十九年，何嘗說于一字？

七者、苦切義。有苦切之言，有苦切之事。雲何苦切之言？猿猴跳梁，種種製御，然後馴習，象馬[*]，楚毒徹骨，然後調伏；剛強難化眾生，苦切之言，然後入律。是故教言是三涂八難，是十惡六蔽，是礙無礙、罪無罪、漏無漏，如是種種等。雲何苦切之事？難行苦行，須過量精神，然此精神，非安平有，而逼迫有。不可思議解脫菩薩，或作雪山夜叉，為說半偈，須食熱血，逼而出之，令行堅固；或作乞者，從乞頭目髓腦、妻子城邑，逼而出之，令行堅固。蓋四攝之愛語、同事，先以欲鉤牽也，此經之苦切語、苦切事者，後置之于道也。是故學佛，須知是大丈夫事，非愛人以姑息，不謂菩薩行非人情。

八者、佛事無定義。此方教體，文字語言；他方佛刹，則不盡然。或以光明；或以化人；或以菩提樹；或以佛衣服臥具、園林台觀、及以佛身相好、虛空而作佛事；又或以夢幻影響、鏡像水月而作佛事；又或以淨土寂淨，無說無示、無作無為而作佛事。而于此方教外別傳，亦複拈華豎指，瞬目揚眉，顧鑒而嘆，正不獨維摩香飯為非常可怪事、惟一僅有之佛事也。諸佛威儀，無非佛事，即八萬四千煩惱，佛亦以此而作佛事。是故學佛，須是直探龍驪，觸處皆能悟入。

九者、游諸佛刹義。維摩從妙喜沒而來生此，文殊游于無量阿僧祇國，蓋是大士事佛，意生化身，來往自如，與輪回異。若夫維摩入定，令所化人自識宿命，殖眾德本，即時豁然，還得本心，則是分段生死，喪其憶力，入輪回趣。夫命終蛻脫，依一微塵，為中有身，緣至入胎，獨入不迷，是生天趣；入住不迷，聲聞生世；惟夫大乘，入住出三，畢竟朗然；惟夫凡夫，入住出三，畢竟迷悶。昧其實歷之本事，而憑臆妄之推測，撥無三世充塞仁義，至可哀已！夫業取習氣，異熟相續，理至切也，習氣所嗜，各從其類，勢至順也。吉乘人天，凶入三涂，殘忍自虐，盜竊化鼠，乖氣所兆，人死為羊，和氣發生，羊死為人，皆其自嗜，又何怪哉？是故學佛，不可有常見，不可有斷見，充人之量，窮天地，亙萬古，未有其極，而以數十寒暑自拘哉？

十者、居士說法義。諸佛立法，視機深淺，初無一定。有以菩薩為僧，有以聲聞為僧，有以菩薩、聲聞雜而為僧。釋迦于此土以聲聞為僧，文殊、彌勒入聲聞僧中次第而坐。而于一燈明國，但有菩薩僧，無聲聞僧。若夫說法，則夜叉、羅刹，且得敷坐，授一四句偈。末世無知，乃倡[/言]言：居士非僧類，無師範，不可說法，遂使大道唯屬聲聞，佛廣流通而故縮塞，豈不悲哉！《維摩詰所說經》，與佛說某經某經，名稱一致，但理不誣，世尊佛弟子等，四眾等，有何別哉？是故學佛，要會其通，不可僻執，局于形跡。

上來十義，略談常識，昧茲常識，或為無慧，誑罔迷盲，傾倒神秘，不通一隙；或為邪慧，宇宙人生，世見陷阱，正見不生。長夜漫漫，何時旦歟？若能熟讀此經，常識自足，而後深入諸門，讀《大般若經》入般若門，讀《華嚴經》入普賢門，讀《楞伽》、《深密》諸經入瑜伽門，讀《大涅槃經》入涅槃門，然後融會貫通，知釋迦一代大乘之教。

（選自民國1935年10月支那內學院校刊《藏要》第二輯第五種，參校《歐陽競無先生內外學》第六冊《藏要經敘》本）

贈友《藏要》

啟者：

智超三有，悲徹萬靈，宇宙人生，學其所必須者，其唯佛典乎！擷葉梵于五天，譯師時出；涌思潮于六代，哲匠浸滋。顧瓊瑰盈庭，從無收拾。遂亂流四下，不得津涯，學者苦之。竊以為整理之道，厥有三端：

第一、學忌凌蕪，應本西竺論說，編成一系。

第二、法有真面，應將異文異譯，刊定一尊。

第三、讀有方便，應將凡書文義，提要鉤玄。

循茲三事，訂為一書，名曰《藏要》。至德要道之所在也。分為三輯，輯數十種。茲其一種，敬奉台端。伏愿賜以南針，指其紕繆，婆心所至，法味斯腴。並懇珠玉，隨同發九天之咳唾，遂使琳琅普雨，充十界之飢虛。

（選自《歐陽競無先生內外學》第十六冊《競無小品》）

支那內學院經版圖書展覽緣起

立國在端始，滅虜以全力。晉始之東也，有聞雞起舞之精神；南朝馴至隋唐，國威振于殊俗。宋始之南也，趙構愚痴，貪位忘讎，寡廉鮮恥，民亦浸浸無氣，遂使大好河山淪于夷狄。明始之東奔西突也，諸王非其君，弘光、永歷之間又無其臣，民亦胥漸泯昏，遂使夷虜入關，數百載恣睢中原。

前車若此，今日何如？今之遷蜀也，非安之也，圖抗戰也，空前未有也。敵軍勝人以猛烈之器，今之抗戰堅決長持，勝人以不受爾汝之氣。以器勝人者，將驕民怨，崩潰可期；以氣勝人者，嘗膽臥薪，精神無敵。是則今日入蜀，已端其始也。雖然，氣之于人也，必充滿于一身，全其體而無或虧缺，而後可作也。民各安其位，盡量發揮。譬如人身，農若筋骨，工為體膚，商猶脈絡，士其精魂。所以使一身部位盡量無虧以作其氣者，則政府之責也。有力以資無力，有能以教無能，俾皆有獨到之精神，蓬勃郁蒸，夫然後可以救亡，可以圖存。

予，士也。予之所事，承先待後之事也。釋迦以至道救世，承其後者事乃在于流通。迦葉、阿難，結集流通；龍樹、無著，闡發流通；羅什、玄奘，翻譯流通。自宋開寶雕版于益州，至予師楊仁山先生刻藏于金陵，為刊刻流通。先生之徂西也，付囑于予曰："我會上爾至，爾會上我來，刻藏之事，其繼續之。"予小子頓首稽首，敬以將命，夙夜不敢康。師創金陵刻經處五十余年，予繼支那內學院二十余年，合揚州磚橋一部分之版，殆將萬卷。今之展覽，僅支那內學院一部分，十之一二耳。夫以近八十年之經營，垂一萬卷之鉛槧，灰飛煙滅，未悉存亡，所留貽于此者，僅十百之于一二，甚可哀也。然此一二，從猛火烈焰中破空而來，剝之至極，碩果不食，亦可幸也。若據此燼余盡量發揮，充碩果之精神，馴至扶蘇蔽虧日月，不又可慶乎？

履端于始，以作氣也。樹之風聲，以致遠也。暴露于人，以求助也。此予今日展覽之意也。予何以盡量發揮以充其獨到之精神耶？予宜黃人也，宜黃有儒者曰譚綸，明嘉隆時巡撫閩浙，石十垂十慮拔擢，得俞大猷與戚繼光而大破倭酋。予不能執干戈衛社稷如譚襄敏，然友如陳銘樞，子如歐陽格。有執干戈衛社稷之責者，未嘗不嚴夷夏之義而勸以大無畏之精神。若夫以繼往開來之事共建邦家之基，住寧二十五年不出戶庭，蛩巨不離有呂秋一，《藏要》成，教義明，圖書聚，修綆得。今則《藏要》圖書亦如經版，痛什百之存一二也，然猶有存也。內院之友散而之四方，若錫予、十力、幼南、叔吉、質夫、漢章，無論矣！其在于蜀，明精研，化中勤說，士篤護，文通、文畦、衡如、東明、芸生，質直之倫，雖致力未專，頗能直趨王路，為斯事輔。今將棲息江津，甄延英俊，講學以刻經，以續古之人，此則精神之所在也。大力菩薩助予無力，堪能大士教我不能，予垂七十，愿敬以從事。

(1938年1月)

(選自《內學雜著》上，《歐陽競無先生內外學》第十一冊)

《經論斷章讀》敘

法海難言，汪洋淵懿。學者嘗以易解文字囑請抉擇，而苦無專籍。因思方便，于諸經論節取雜集，期不背乎《般若》、《瑜伽》，以應其求。凡十五章，名之曰《經論斷章讀》。《左傳》賦詩斷章，予取所求，蓋斯意也。

舍生死身而取法身，猶儒者義利之辨，入德之門，如是讀《維摩》之〈方便〉、《密嚴》之〈胎藏生〉二品。

如何能舍生死身，以解空法故，如是讀《智論》十喻。不能倏然與空相應，方便先觀無常，數息以定心，不淨以入境。龍樹稱法中甘露門也，如是讀《般若》念住品。定根于戒而成于慧，最初三皈，念佛、法、僧；三學之戒，念戒、舍、天；定，念息、死；如是讀《智論》八念。

三學之慧，般若真諦，瑜伽俗諦，如是讀《大般若》空性品、《智論》般若波羅蜜、《瑜伽》勝義伽他。

實相為無上菩提，方便為一切種智，佛之知見，方便為究竟，如是讀《法華》方便品。一乘絕唱，在不舍離一切眾生，一百四十一當愿眾生，信行位也；觀察身語意業，佛法僧戒皆不可得，而勤修十智，住位行也；皆地前行也，如是讀《華嚴》〈淨行品〉、〈梵行品〉。

地上菩薩，自在無礙行，如是讀《華嚴》十忍品。佛前佛後，皆本一行，如是讀《華嚴》普賢行愿品。

學佛所在，在決定死心，如是讀《金光明》舍身飼虎故事。學佛所忌，忌決定死法，如是讀《大涅槃》阿闍世王故事。探驪取珠，掃賊殄渠，何駭怪之有，何不可思議之有！？

民國二十八年（1939）歐陽漸敘于江津支那內學院蜀院

（選自《歐陽競無先生內外學》第二十二冊）

精刻大藏經緣起

緣起說三事：一、刻藏拔苦痛以慰忠魂；二、刻藏整至教以永慧命；三、刻藏辦法。

一、刻藏拔苦痛以慰忠魂

抗戰三年余，忠魂數百萬，國家獲無疆之福，死士受無限之悲。報功者報功矣，而飲痛者仍痛。是知報功不若安慰，安慰不若超拔，超拔不若作佛事，作佛事不若刻大藏經。空寂悲智回向感應，六妙義門佛歸極門。佛在屬佛，佛滅屬法。神識不滅，忠魂必在天地間，而法之有寂，周遍法界無所不至，如許忠魂必皆遇于寂中也。夢幻泡影，有何苦痛？執之則苦，舍之痛除，而法之有空，誠真解脫門甘露味，受縛忠魂必脫然于空中也。不可思議是之謂智。化苦為甘轉痛為猗，一剎那間事，忠魂得此無不拔也。懇到逾恆是之謂悲，凡痛代受，為苦作替，有依者不迫，忠魂得此無不拔也。因緣增上回此為彼是為回向，忠因有三，佛法增七，何礙區區苦痛，忠魂得此必能拔也。毫厘不爽，謂之感應，典籍熏名字，誦讀而聖賢，聖賢而太平，功德如是大，受福如是大，如是大福生，如是大苦滅。經雲：讀一四句偈，勝于恆河沙數供養布施，故必刻藏乃慰忠魂。周公植璧秉圭，身代武王之死，翊日王瘳。精誠所至，自拔幽冥，但問關切忠魂誠不誠耳！世有大悲菩薩，必能作此功德事。

二、刻藏整至教以永慧命

《涅槃》遺囑，以教戒為師，佛在師佛，佛滅師法。阿難、帝須，先後結集；龍樹、無著，空有周圓；玄奘、鳩摩，譯傳獨邁。于是而此方教法甘露味真，誠哉！藏之為藏國魂民命之所系也。顧何以遍施法界慈雲悲雨，而貪心殺氣反熾全球？又何以十二部經獅吼雷音，而無畏精神翻滋門十塌茸？復何以恆河沙界身命布施，而賣國自肥甘心狗彘？則以藏貌雖存，藏真早喪。一喪于金沙雜聚，而魚目混珠；二喪于浩渺無津，而久隳簡陋；三喪于義深文澀，而屏棄誰披？經律論撰，但日增加，宋元明清，從無整理。嗟乎！瓊瑰雖備，棄不莊嚴；海藏空羅，任其潰壅。遂使既得金而反礦，久握珠而還貧。教不能行，藏不能讀，藥不能醫，豈不冤哉！故茲之刻藏，整理為宗，以為是先務之急也。整理應分三事：一、刪蕪；二、嚴部；三、考訂。譬彼六經，刪削繁蕪僅存三百，《詩》然後興。《尚書》二九、《春秋》十一，亦以辨今古文之真偽，簡百二國之不修也，故刪蕪第一。譬彼六經，辨方分職、吉凶異時，《禮》然後立，故嚴部第二。譬彼六經，參互考訂，雅頌得所，《樂》然後成，故考訂第三。《詩》興《禮》立《樂》成，然後傳道來世，藏亦何獨不然歟？

第一、刪蕪者：一、刪著述。法自西來，寶蘊譯本。疏剔演繹，著述乃增。若談單

譯，經二千三十六，律五百二十九，論一千三百一，加密七百八十四，不過四千六百五十卷耳。益以重譯，亦不過六千。若合著述，則萬猶不啻。一經演注數十萬言，一先生談動逾百萬，學網尚昧，教網先纏。本為病除，又增藥魅。蓬山遙遠，更隔萬重。冤何可言？急刪第一。刪之雲者，正藏崇譯，著述人續，仿《四庫》例，著錄刻全文，存目但評判。余付藏外，任世浮沉。二、削疑偽。疑偽之來源于學謬，由學謬而譯謬，由譯謬而造作謬。為欲傳謬，迫而造據，是以疑偽經論葳蕤紛綸，戕慧命、暗天日、賊聖教，不可長也。此方謬種，源于菩提流支，移譯既乖，創宗複誤。布

既廣，開導獨先，六朝隋唐承流奉化，于今為烈，誰撒樊籬，猶可縱歟？

第二、嚴部者：經律論三，通遵結集，于中分部，則未精嚴。說圓首《華嚴》，談空首《般若》，既非結集源流，亦無聖量根據。今謂之嚴者，遵《瑜伽師地》五分、《攝大乘》三類，經立部六、律一、論二故也。經立部六：遵《瑜伽?本事分》，立寶積部。大乘本事應雲方等，然方等遍于六部，不可本事既為通門，又與抉擇分司別部。今標寶積，同最初四大之一，同各部首冠經名，既通門不淆于別部，亦本事實現于方等。遵《瑜伽?抉擇分》，立楞伽部、般若部、華嚴部、涅槃部，此之四部又遵《攝論》境、行、果三類，分別次第。《攝論?所知相》，境也，《楞伽》，古學一百八句，今學五法、三自性、八識、二無我句，于九事所攝中為古開今括，皆諸佛立教、法相所存，謂之境也。《攝論》〈彼入因果分〉、〈彼修差別分〉，行也，《般若》十度為因果行，《華嚴》十地為差別行，謂之為行也。《攝論》〈彼果斷分〉、〈彼果智分〉，果也，《涅槃》解脫相應為果斷，《般若》法身相應為果智，謂之為果也。遵《瑜伽?攝事分》，立阿含部，無量佛說輾轉傳來，名曰《阿含》，《瑜伽》通法，不局聲聞，〈攝事分〉之事，《阿含》之事，無所歧于行處緣起食諦界與菩提分法故也。律遵《攝論》，大應攝小，但更增上，大戒列前，小律隨後，以是為一而已。論遵《攝論》，大自小來，部執轉舍，圓法轉成，亦但為輾轉增上耳，故亦宗經釋經大前小後，以是為二而已。又遵《瑜伽?攝釋分》，立釋經論；亦遵《智度》毗曇、毗勒，立宗經論也。遵《瑜伽?攝異門分》，收秘密門；教外別傳古入雜藏，今亦異門例存，但為方便，不廁正宗。

第三考訂者：一、闡明譯本獨有精神，譯人學說主之。二、力保譯文真蘆面目，薈求舊鈔，采取初刻，參酌章疏主之。三、發揚吾國殊特文學，刊定句讀、條析章段主之。

三、刻藏辦法

一、藏本方式，用木版刻，大小遵金陵方冊本而統一之，分合流通各視其便。二、編校方面，分三期進行：初期編校稿本，次期編刻並進，三期專事校版。三、刻板方面，亦分三期：初期訓練帶徒，次期分局帶徒，三期各局進行。四、用費方面，以六千卷計，每卷照現在價算約

元正，總計需款

元。用途以十之八用于刻版上，以十之二用于編校上。若有不敷，臨時籌補。五以十年葺事。

（1940年5月）

（選自《內學雜著》上，《歐陽競無先生內外學》第十一冊）

第四編 《論佛學書》

《心經》讀

此文從《舍利子般若》抉出，旨要唯是表第一義諦，更無其余。如《十二門論》，抉《中論》十二義，示空三昧，入涅槃門，旨要唯是一空義也。又如咒之有中心。十六分六百卷如咒，《心經》寥寥幾句如咒心。故不讀六百卷，不足以讀寥寥幾句；而不讀寥寥幾句，又不足以讀六百卷也。

觀自在菩薩，行深般若波羅蜜多時，照見五蘊皆空，度一切苦厄。

此總攝也。諸佛說法，莫不在第一義諦，第一義諦攝佛法盡，不但《般若》十六分及《心經》全義。《般若》表勝諦，三科、三乘畢竟空，勝諦一味平等，而無所得故。《瑜伽》詮法相，三科、三乘如幻有，法相萬別千差，而不可亂故。然以真入俗，而俗必歸真。以自體言雖不一，而以相應言仍不二，故說第一義攝聖法盡也。

《深密》說勝義諦遍一切一味，一相無相，一味平等故也。所謂《心經》全義者，"皆空"之謂境，"行深般若"之謂行，"照見皆空"之謂果也。

雲何"皆空"之謂境耶？皆空之境，菩薩自性空究極即畢竟空，遍一切一味佛境也。經言：一切如來皆用諸法真如不虛妄性、不變異性，顯了諸菩薩行諸佛正覺。又言：如來如實証知真如無二，如來真如即五蘊真如，一切真如皆不相離，非一非異，無盡無二，亦無二分不可分別。又言：般若為不可思議，乃至無等等事，出現世間，諸法無自性、無限量，亦不可思議，乃至無等等。故雲遍一切一味，故雲皆空也。

雲何"行深般若"之謂行耶？般若者，龍樹謂是觀實相慧。涅槃為實相，觀慧則相應涅槃也。深般若者，經言：色亦甚深，真如甚深故，若處無色，名色甚深。又言：色無盡，故真如無盡，色與真如無差別故。是則深般若，唯一真如，更無其余也。行深般若者，觀慧相應涅槃，行即相應觀慧，相應之謂行也。龍樹謂：如弟不違師，是名相應，隨其觀慧，能得能成，不增不減，是名相應。雖滅觀法，而智力故，無所不能，無所不觀，不墮二邊，是名相應。如是相應，稽諸經言，有十四義，可得而陳：

原夫無余涅槃，厥有二相：寂靜寂滅相，為畢竟空，為無所得，為義甚深，在十四相應中為離得行；無損惱寂滅相，為一切智智，為遍一切一味，為義廣大，在十四相應中為圓証行。離得行者，般若畢竟離，菩提亦畢竟離，離法不得離法，而得菩提，又非不依止般若。此類相應，以不生不滅故有畢竟空行，甚深相應義處為空、無相、無愿乃至涅槃增語所顯處，法不行法，法不見法，法不知法，法不証法是也。如有夢業不著行，業以所緣起，覺增夢亦增，以是諸著一掃而空之。如有不行行，不見般若，及空能所行法，複不得不見，入無生法忍。如有不分別行，第一義諦都無分別，虛空幻土，機關化作，有何難易？又此類相應，以不垢不淨故，有遠

離行，就眾流轉，施設染淨，菩薩明本性皆空，視一切法無所有故。又此類相應，以不增不減故，有隨喜回向行，法不相知相到，無自分勝進之殊，方便善巧，但有位異，而無義別，入以普賢，馴習勢厚，迫近而幾，所謂初發心即等正覺，所謂菩薩行行于佛境也，此行為入道之大要也。如有初後不即離行，如燈炷，實不即離于初後。如有心如不即離行，心不住生滅而住真如，雖異常住，而心如互不即離。上來九行，若能相應，為可稱為無所得行也。

複次，圓証行者，佛証真如至極圓滿，又複無相，故學一切智智，必于一切有情我皆滅度而學，念念不離圓証為佛境，以修一切為菩薩行。此類相應，有依空起愿行，獸賊飢疾，久劫諸畏，不唯不怖，乃更發愿，愿我眾生無此大苦。此類相應，有不遣行，勝義諦相，取行壞遣一切俱非，將欲証大之圓滿，豈猶墮小之斷修？此類相應，有不証行，菩薩先念為學觀空，非証觀空，念已而入，心雖一往，自不取証，是故菩薩道相智行，須先發無上菩提心，乃能觀空不証，箭箭注，發心勢用，達于無表，力能無量，鄭重初機，是亦何可忽于佛境哉，一切智智不嫻，空談發菩提心哉？此類相應，有不慢行，學佛大魔，乃在一慢，應問余友，菩提分法以何方便而不作証？菩薩雖在夢中，不著三界、二乘，雖除災作佛事，而等若空無。上來五行，若能相應，為能遍一切一味行也。

夫十四相應，括為甚深、廣大二義。而此二義，又非二事：探量之本廣大，不離甚深；充本之量甚深，不離廣大。是則觀察一切法空，而不舍離一切眾生，不可作二者得兼，而原是一事。是則無所得、遍一切一味，不可歧二，亦原是一事。聲聞不能畢竟空，不能一切智智也。菩薩行相應行，一念起時，周遍法界，所言周遍法界者，空智皆周法界也。一切佛法在一毫端上，念念相續，不息不休，精積力久，吞鐵渾侖。故唯求佛，于如是相應行而可忽諸？

雲何"照見皆空"之為果耶？不見五蘊，照見皆空，是也。五蘊以何不見？不緣故不見，不緣諸法而起識故。以何不緣？不住色，不學色，不觀色，所緣無相，非色變礙相，非受領納相，非想取像相，非行造作相，非識了別相，故雲不見。不見，則一切法無所得也。皆空以何照見？一切眾生皆有佛性，不見故凡夫，見故証菩提。一切有情，等有真如，不見故流轉，見故証涅槃。彼經眼見，此經照見，皆親緣現見，非比量見，內証聖智，普發現于一真法界，盡未來際，無有止息，故雲照見。照見則遍一切一味也。經言：遮遣五蘊，顯示涅槃，不見則遮遣，照見則顯示也。然無所得、遍一味，原非二事，有佛無佛，諸法常住，心性本淨。凡夫無明，俾障正智，不得緣如；諸佛証覺，譬日當空，纖毫照徹；菩薩無所得，如月如鏡，亦能照了也。般若能現世間實相，行相應于般若時，亦現世間實相，故雲照見也。

"度一切苦厄"者，余依有苦，纏眠皆苦。上自地盡，下至情盡，莫不皆苦，故雲一切。幽冥異路，水火異勢，義利異趣，色空異事，然于一切力能皆同。是故度一切苦厄，須遍一切一味也。經言：自証等覺，施設正教，度眾沉迷。一切如來莫不以

度苦為事。

舍利子，色不異空，空不異色，色即是空，空即是色。受、想、行、識，亦復如是。

此引申也。引申遍一切一味義也。"色不異空"者，空無自性，色亦無自性，色空真如，無二無別故。如是應談中道義。無明有愛中間，生老病死之苦，是名中道，十二因緣，不如聲聞執為無常，非因非果、常恆無變故。常與無常，不能具說，墮邊非中故。"空不異色"者，經言：有為、無為，平等法性，說名勝義；非離有為，別有勝義諦。如是應談如幻義。經言：是諸幻法，聖人亦現，但不執著。又言：聖以離言假立名相，如幻眾事迷惑眼慧，不如所見堅執諦實，彼于後時不須觀察。

"色即是空"者，煩惱即菩提，生死即涅槃也。"空即是色"者，經言：幻與有情及一切法乃至涅槃，設過涅槃，無二無別，皆不可得、不可說故。又言：變化與空，此二俱以空空故空，畢竟空中，非有空、化二事可得。

舍利子，是諸法空相，不生不滅，不垢不淨，不增不減。

此引申也。引申無所得義也。"不生不滅"者，無著釋龍樹八不偈雲：非滅不滅，非生不生，應知諸句皆如是說。不可說此法非滅，故名不滅，世諦不異第一義，一相無相故，無自體如本性空，如此則是諦，若人不知此二諦之義者，彼于佛深法，則不知真實。是則諦不可異，而說有方便，應善讀龍樹妙偈，偈雲：諸佛依二諦，為眾生說法，一以世俗諦，二第一義諦。亦不可說無滅，故名不滅，經言：一切諸法無始來滅，本性不生，無有自體。不得于無自體中遮生遮滅，不得于無自體中而說貪欲陰盡、更不復生是名涅槃，不得滅復有滅、不生更有不生。是則所言不生不滅者，遮遣五蘊也。為顯示涅槃，而遮遣五蘊也。涅槃空中，不得生滅、垢淨、增減相也。

是故空中無色，無受、想、行、識，無眼、耳、鼻、舌、身、意，無色、聲、香、味、觸、法，無眼界乃至無意識界，無無明亦無無明盡，乃至無老死亦無老死盡。無苦、集、滅、道，無智亦無得。

此承上義而言也。三界心、心所，是虛妄分別生滅也，執障而流轉，對治而還滅垢淨也，我慢有所得，變壞而退墮增減也。空相不動，說何生滅？空相平等，說何垢淨？經言：菩薩為有情昧空說諦，而得涅槃，不由諦智，但是平等，亦復說何增減？經言：是法平等，無有高下。是故無世間三科法，無出世間三乘法，是名無所得。經言：異生所執法，非如有故，于無所有而有，為無所有不可得。于五蘊無所有不可得，乃于一切智智畢竟空義，遍一切一味義也。

"無智亦無得"者，龍樹無漏八智，為智；自須陀洹聖道乃至佛道，為得。

以無所得故，菩提薩

，依般若波羅蜜多故，心無掛礙。無掛礙故，無有恐怖，遠離顛倒夢想，究竟涅槃。

此引申也。引申照見皆空之果，而先之菩薩行、涅槃果也。涅槃性空，般若無所得，由行而引，言語道斷，空相所緣，空智能緣，以入初地，是為相應涅槃。以無所得而求一切智智，非一法成佛而乃即止，必法法成佛，一切入一切，一切攝一切，眾德具現，大施方便，是為無住涅槃。菩薩行圓滿時，覺一切相，得一切智，斷一切習，幾與佛齊，舉足下足，皆如來境，已能遍一切一味，是為究竟涅槃。

"心無掛礙"、"無有恐怖"、"遠離顛倒"者，已入初地，已能不見五蘊，雖未圓滿，有何掛礙耶？經言：平等性中，所有不活畏、惡名畏、死畏、惡道畏、大眾威德畏，皆悉永離。更有進者，菩薩聞甚深微妙難信解義，不驚，不怖，不畏，已得不退轉地故。此不退轉，亦名無生法忍，亦名正性離生，自初地以至八地，皆得此名，初不退墮外小，八不退失佛地故。居不退位，受記作佛，有何恐怖耶？菩薩知法即法界，法界即法，學一切法于法界，學法界于一切法，體亦無所得，用亦無所得，常、樂、我、淨，無常與苦，無我不淨，適應中道，有何倒想之不離耶？

複次，未入地前，未得無所得，最初行菩薩行者，必研一切智乃至一切智智，而知佛境。既知此已，發心作佛，念念不離佛，思惟唯一切智智，而于諸法不作二想。一切智智，無性為性，法界為相，如是所緣，亦無性行相，亦寂靜正念而增上，解了無性，斯為第一。菩薩亦行聲聞三十七品，欲至涅槃城故；亦行三三昧，欲入涅槃門故。如是學聲聞一切智已，即以自乘道相智，入正性離生。雲何自乘？圓滿無性為佛，漸証無性為聖，深信無性為賢善士。深信証果不証無性是一，遂發菩提心，直趣無所得，複以無所得，圓滿諸修証，是為自乘也。是則未入地前，不異一切智；已至地極，不異一切智智；正在地上，漸修圓証，普學一切智及一切智智。大智而大愿，大愿而大悲，大悲而大行，一地趣一地，是為道相智自乘也。

三世諸佛，依般若波羅蜜多故，得阿耨多羅三藐三菩提。

此承上義引申，而次之佛行菩提果也。龍樹：菩提為般若果，般若為菩提因。是則圓滿大般若名大菩提，大菩提以相應大涅槃而生，大涅槃以相應大菩提而顯。是故轉依非一，而不可為二。不二轉依，故大涅槃應談三德。解脫道生，剎那証覺，一念般若相應即佛，佛藏出纏即是法身。德雖雲三，一毫端現，故此談大菩提果，即已賅談大涅槃果也。

龍樹又言：菩提名佛智慧，薩婆若名佛一切智慧。十智為菩提，十一智為薩婆若。佛之知見，是一切智智，諸佛皆以觀慧，相應無所得實相，而得一切智智總相，故

雲得阿耨多羅三藐三菩提也。

故知般若波羅蜜多，是大神咒，是大明咒，是無上咒，是無等等咒，能除一切苦，真實不虛。

此流通分也。經言般若最尊最勝，故《般若經》凡說一義竟，均備極尊重贊嘆。如舍利子說般若空竟，以三十一種名號，稱揚贊嘆般若波羅蜜。如《信解般若》說空相竟，贊功德勝利，設利羅較福種種，不容具舉。然般若出現世間，皆為除世間一切苦，皆為作世間宅舍洲渚故。能除一切苦，唯有第一義諦遍一切一味故，遮遣五蘊虛妄，顯示涅槃真實，然後能遍一切一味故。以此因緣，說遍一切一味，是心中心也。

故說般若波羅蜜多咒，即說咒曰：揭諦，揭諦，波羅揭諦，波羅僧揭諦，菩提薩婆訶。

咒以固之，又以標之。揭諦，度也。波羅蜜多，到彼岸也。僧，眾也。菩提，果也。薩婆訶，成就也。

應為之說曰：度，度，度到彼岸，度一切眾到彼岸，証菩提果，事成就也！

（1942年）

（選自《歐陽競無先生內外學》第九冊）

注《大般若波羅蜜多經敘》，原文四卷，三萬余言，作于民國十七年（一九二八年），全文發表于《內學》第四輯。共分五門：一、五周以敘事，選篇幅適中之《大品般若經》，分舍利弗、須菩提、信解、實相、方便等五類般若概述（以上為卷一至卷三）；二、十義以抉擇；三、諸經之所系；四、諸家之所明；五、緒言（以上為卷四）。歐陽漸一九四一年自編《歐陽內外集》時，刪削二、三、四門，收入集中的為經過修訂的〈五周以敘事第一〉和〈緒言第五〉。本文選依《歐陽先生內外集》本，收入第一、五門，並參校《內學》本；依《內學》本，收入第二、三、四門。——選編者注

注《歐陽競無先生內外學》第二冊在自敘之後，增補如下一段文字："此敘原有五段：一、五周敘事；二、十事抉擇；三、諸經所系；四、諸家所明；五、緒言。今除一段讀文及緒言外，二、三、四段一概刪削。又，《方便般若》原多紕繆，今悉改換。蓋佛境菩薩行、道相智精義，全在方便般若，今而後提出也。（民國三十年六月識）"

與章行嚴書

行嚴先生無恙耶！嘗于報紙觀見行事翊翊有生氣，凋瘵之國，若都如此，外侮內爭其不可以熄乎！武人利器殺一團，辯士政策殺一國，學說潛勢殺天下萬世，使人樂耽狂死而不悟，進化論是矣！（門人景昌極評進化論生命及道德文頗切。）甲午以還，奔走淒惶，無所托足，石埭楊居士講究竟學于寧，乃與桂伯華諸人相率以事之，不仕不葷，絕男女之欲，悉力精研者二十年，而後豁然淹貫，講學育才，將以移易乎天下萬世，此支那內學院之由來也。別調孤彈，宗教則屏為世學，世學又屏為宗教，春糧且不能宿，蓋垂青者寡矣。十二年秋，公會與太炎、印泉、右任諸公，謀所以十次內院者于滬商人，而無效，公與印泉頗悶損。今者時機大至，公為天下教宗，乃作支那內學院非宗教性質、是講學機關之文，將用以釋群疑，呈請左右，必為宣傳。嗚呼！如先生者，可謂上不負國，下不負友者歟！天下誰不竭誠盡忠，獻芹奉曝者，而況于漸乎！謹先陳支那內學院性質四條外，將一及乎教育之精神肝髓。

所稱支那內學院性質者何耶？一、所學之目的：求得如鏡之智，照一切事物能究竟，即用為拯拔群眾苦迷之器具，而天下皆脫苦解迷。

宗教有悲無智，科哲學有智無悲，佛法則悲智雙運。然其悲亦非宗教之悲，以宗教悲人不為善而生天堂，佛法則悲人不証不生不滅、平等自由之理。又其智亦非科哲學之智，科學因果律展轉比量，不能超量，物理推至原子電子而術窮；哲學之知識，或謂出先天，然不明先天為何物，或謂由經驗，然何以突有經驗，更何以歷久長存？以故事物窮研，每難結果。佛法鏡智但是現量，一剎那間如物而量，不用比証；一剎那間現前明了，不藉先天，現成即是，不用經驗。以是佛法能得究竟。夫現量者，術語名無漏種發現，與常人日用行習思想邏輯之有漏種發現者，截然兩物。是故，佛法非宗教非科哲學，而別為一學也。

二、求學之方法：假聖言量為比量，多聞熏習，如理作意，以引生其他日之無漏。由聖言渾涵中推闡以極其致，詳前所略，厘前所雜，或疏失之糾修，或他義之資助，以期思想之大發達。

聖言量者，非宗教之教條，但有服從而無探討，實若因明之因喻，幾何之公理也。宗教有結論無研究，哲學有研究無結論，佛法則于結論後而大加研究以極其趣，非待研究而希得其結論。是故，佛法于宗教哲學外，而別為一學也。

三、現得之學理：一、群眾三苦熾然，而後學興，一切所學，為他而學。二、唯識、法相學是兩種學，法相廣于唯識，非一慈恩宗所可概。三、法性、法相是一種學，教止是談法相，龍樹、無著，實無性、相之分。四、教以法義為通途，無大小乘之畛域。五、教無進化之理，而有遞嬗之跡。六、理非佛說盡，而必從法印而生。

七、世所棄幻相是真相，世所執實相是空相，道在空其所實而真其所幻。八、一切法相體用因果，法爾如是。九、法相不可亂，六根互用以耳為見者，耳中具眼種，耳帶之發現，而實眼見。十、三性是一物，無別實物，但是緣起，故明依他起用義而法界立。十一、不立無漏種說心性自生自滅者，墮外道說。十二、唯識學有今學、古學之異。十三、今古學同尊無著、世親之籍，而傳本各異，奘師承今學，譯名潤文，但存今學傳本之精，以西藏異譯勘無著、世親原文，而古學傳本之精時見。十四、古以無不屬識為唯，今以無不離識為唯。十五、古唯受用緣起，今創自性緣起。十六、能緣挾帶所緣而起，古學就所緣種邊曰真如緣起，今學就因緣種邊曰正智緣起。十七、真如緣起說無漏則通，說一切不通。十八、諸行剎那頓起頓滅。十九、一切有情各自識變，各一宇宙。二十、各變宇宙，互不相礙，光光相網。

略述二十理，恐繁且止，而皆術語，不能詳析。他日內院學理書成，將以呈公，藉餉國人。此二十條中，一至六為總得之理，七至十為法相之理，十一至終為唯識之理。其古今傳本之異，法相亦然。

佛法之晦，一晦于望風下拜之佛徒，有精理而不研，妄自蹈于一般迷信之臼；二晦于迷信科哲之學者，有精理而不研，妄自屏之門牆之外。若能研法相學，則無所謂宗教之神秘；若能研唯識學，則無所謂宗教之迷信感情。其精深有據，足以破侗支離；其超活如量，足以藥方隅固執。用科哲學之因果理智以為治，而所趣不同。是故，佛法于宗教科哲學外，別為一學也。

四、現學之科目；一、唯識學；二、法相學；三、因明學；四、印度哲學；五、印度歷史學；六、佛法律學；七、佛法心學；八、佛法美術學；九、梵藏英日文學；十、中國古文學。

心理學有與唯識意識中之一部分相似者，物理學有與唯識色法中一部分相似者，哲學有與唯識中多數部分相似者。然唯識學之因果緣依伴業所及，一物之起，實繁有緒，單純粗率，決不能同。因明之三十三過十四類，以視近時邏輯學亦然。印度無史，依經比附，全賴佛徒。世史一任其殘，斯科乃不稱學。大乘之律，舍跡誅心，參其用意，足濟世間法律之窮，如何非學！化腐為新，轉凡成聖，全恃觀力，豈有神奇？萬變唯心，組成緒統，如何非學！美術者，適當其可之象征也。思想高邁，構結遂神，此中雕塑畫像，獨非學乎？周秦邃籍，毫不問津，內典深文，烏容涉逕？風騷雅頌已不敵呵呀呢嗎之聲久矣，留此餽羊，忍雲非學！

所稱教育神髓者何耶？從民之欲望，趨時之潮流，始事而兆亂者，不得辭其過。然烏頭以治風，水來而土掩，因應複因應，亦複何時已乎！夫事有似迂而實神者，端本澄源之謂，游刃于虛之謂也。教育不以興國為的，而以民能充其所以為人之量為的。國可亡，天下不可亡，明不可失其所以為人耳。夫人也者，仁也，克己之謂仁，無我之謂仁。生心動念，唯知有己，非人也；舉足下足，環顧皆人，人也。為仁

之方曰：己欲立而立人，己才有其欲，而立之見為事實者即在乎人，孔子之教育也。

今天下何能之不有？而朝野上下，賢否智愚，第一拳拳止知有己而不負責，豈獨武人？夫亦焉往而不滅亡者哉！事已無可奈何，以故不得不創菩薩以他為自之教育。無言之教，不行而至，華周、杞梁之妻，善哭其夫而變國俗。陽明而後，誰其繼者？以故須複宋明講學精神之教育，搗虛以實，去囂以朴，專門之學愈簡愈精，一藝一材必充其量。苟能分門別類，無學而不踐其實，而所謂虛驕夸誕之士氣，能長存而不變者，未之有也。以故，須趨重學術團體之教育。

漸愚，止足知此，唯公裁之。

（1925年）八月十五日，自南京支那內學院發。

（選自《內學雜著》卷下，《歐陽競無先生內外學》第十二冊）

覆陳伯嚴書

承詢漸身體學術，敢悉備陳，為長者告。漸雖年未及老，而精力已衰，夜多溺、多夢。食飽夢，盛怒夢，勞思夢，大聲讀書夢，作文夢。夢高險或幽深。已三年，醫皆不知症。細審察久久，是丹田冷，以手溫之，夢即止。節勞平氣，夢亦止。然不能斷病根。建侯示服天生磺，謂應助真陽，服之效。入冬又將服高參，看是如何也。死亦尋常事耳。若天假以年，所愿略輯，則心更帖然。任運而已，可必乎哉？

夫所謂愿者：《大藏提要》、《晚年定論》，二書而已。《提要》分兩段：前考據，后義理。考據段，書之真偽，譯善、版善，必求精審以餉學者，此一段事，千年以來，已無作者矣。義理段，則文之脈絡，科判本以銷文，反因藥而加病，今須廢科判法，以文法敘次，敘次已，應抉擇經義。談到經義，千年以來更蕪穢不治。第一、分部不確當；第二、各溺其所宗而誣概全局；第三、敷淺泛濫充棟汗牛，乃無一紙切當示要之論。今須革弊興利，成一不刊之典籍，斯誠非易易矣。前段以囑秋逸，后段漸勉為之。好在諸大部經論如《般若》、《華嚴》、《瑜伽》、《涅槃》等，數十年來已整理有緒，今所增益補治者，中部、小部居多，完成或不大困也。《提要》成，然后溫讀一過，會通融冶為晚年論定之作。此作以簡為主，如周子《通書》例，數十條而已。

兩書成，束書不讀，修觀實相以俟死。大約五年可矣。雖則雲然，能保人事無障礙耶？此學術之大概，唯長者教之。

（1934年10月27日）

（選自《內學雜著》卷下，《歐陽竟無先生內外學》第十二冊）

覆魏斯逸書

三十余年，得公賜書，無任愉快。顧賜在二月朔，而覆乃在五月下弦者，講學之說，不容不慎也。且有須俟數文脫稿後意乃得達者，最要是《大密嚴經敘》文，乃漸晚年論定之學說。文成而清明節近，歸宜黃修先人墓。十有八年，一親鄉裡，傷心慘目，亂後子遺。知政少年不識疾苦為何物，兆鄉民打死科長之變，于是有致熊天翼書。回支那內學院，作《夏聲說》，應粵友《夏聲》發刊詞，寄去而胡展堂死矣。然講學不可以已，作《孔佛》，昨成，而今覆書。是以若是遲遲也。

來書不識太玄能得昌黎、涑水尊許與否。世叔直探孔子者也，玄何足雲？有堪千古者在，尊許與否又何足恤？誠學之士，與之談佛易契，與之談儒亦入也。耳入之傳，儒難與之徵信，佛亦資之稗販耳。經藏充汗，佛之幸亦儒之幸，是說也，識超宋明，千載希聲，小儒封錮，烏足語是，而世叔尚矣！

至謂漸以之無不利，置正直而談因果，毋乃逕庭。漸之學佛，與他人異。我母艱苦，世叔所知。病魔生死，儒既無術應我推求，歸根結蒂之終，下手入門之始，亦五裡墮霧仿佛依稀。乃于我母謝去之一時，功名富貴，飲食男女，一刀割斷，廁足桑門，四方求師友聞道，轉展難償，甚矣其苦也。三十年讀書，求諸西方古人，乃沛然有以啟我。家不幸，女蘭，十七，從予學于金陵，予以刻經事入隴，歸則夭歿。中夜號慟，既已無可奈何，乃發憤讀書，數數達旦。于是《瑜伽》明，唯識學豁然。乃有滇游，四方之士日至。子震元，英邁有志，又游泳斃，發憤讀《般若》，讀《華嚴》，讀《涅槃》，次第洞然。馴而至于近年，融會貫通，初無疑義，乃有論定學說。一知半解，誠有以窺見而不謬者在也。返而讀孔子書，誠有與宋明諸君子墮封錮之說者異也。此則是漸學佛之明效大驗者，彰彰在也。

元年客北平，與蒯若木、章太炎、李正剛、孫少侯及其他多人談，有舉佛義陋程朱義者。太炎曰：誠是，然程朱是自義，今乃借義。須知古人智予而不可慢也。予應之曰：誠是，吾智不及程朱，吾福勝程朱，乃有佛義而可借也。抑今思之，程朱何嘗無福？若使啟其封錮，豐其注，以聖人之書疏聖人之書，其不勝于諸賢之凡情世智說經萬萬歟？以宋明諸賢聰明研得，其不勝于下走劣陋研得萬萬歟？而不能然，徒失于封錮，可慨也夫！此吾所以佩世叔之識高千古也。研得幾何，何以教我也。

今世唯物學行，階級資產萬力摧破，乃並批判及孔。孔子真髓至理，不昭白于天下，腐爛陳言，苟且談之，其何以應海潮罡颶之趨勢？念先疇之吠畝，又何以播厥百谷于天下歟！

（1936年5月21日）

（選自《內學雜著》卷下，《歐陽競無先生內外學》第十二冊）

答熊子真書

子真來函，三性之說，將依、圓析成一片說去，一方是恆常，一方是生滅，反求諸心，無論如何，總覺其不可通。非敢有立異之私也，亦求其安于心而已雲雲。此依凡夫妄心，而批評神聖立教。不得已之悲，而不能已之于言。

聖教既于《般若》談二諦，而複于《瑜伽》談三性，以建立其兩輪者何耶？是有二義：一、圓滿詳盡，祛除險墮義；二、舍染趣淨，闡揚聖教，簡別魔外義。二諦簡無以顯有，三性更簡有中生滅虛妄之有，而顯有中涅

真實之有。二諦之俗諦，即三性之依他，既稱為諦，妄有非無。《涅?四諦品》：不倒為諦，顛倒為四。據此則知俗而不諦，遍計無也；俗諦依他，非即無也。談二諦而不談依他者何耶？二諦直捷明體，不暇詳用，但俗之俱非，即真之頓顯，因此而知彼頓之為超悟境界也。然略依他之有，利根超悟無論矣。鈍不超悟，必墮惡取空，或別有所墮。馴至于是，一唯我執，上不知世尊，下不容論難，淪墮之險，可勝言哉！談依他之有，則由用以顯體。體既藉顯，用亦得盡其能。所謂漸義，由節節相應而圓滿相應，更何所墮歟？

魔佛異，外內異，實染淨義異。教之所以為教者，染淨義也，舍染取淨義也。趣向生滅之謂染，趣向涅之謂淨，染之為流轉，淨之為還滅，皆用中事。二諦直捷取體，一切皆淨，更不舉染，故略依他。三性則盡量詮用，必染淨雙談，故依他獨詳。然淨依他亦名圓成實，言與圓成實之為圓成實義，各有異門，兩不相涉。成實之圓，真如遍于一切也；依他之圓，勝用周遍耳。成實之實，諸法實性也；依他之實，離倒非染耳。至于成之為義，成實則不生滅體常也，依他則舍染取淨，舍有漏之不究竟，取無漏之究竟，如是之為成耳。由趣向而臨入，由臨入而現証，現証之正智緣如時，無術分指若者是智、若者是如，是故智如雖非是一，至此而不可分二。

以不可分二故，而密意說常耳。是則，依他之常，趣向畢竟之常，仍說涅常，非說菩提常也。此有三義：一、舉果談因義，舉畢竟之後果，談必竟之起因故；二、將能作所義，將能智之緣如，作所如之融智故；三、概全說分義，此須喻明。喻如百步穿楊，楊喻涅常，步喻生滅無常，所發之矢經歷步步，而注射直趨于楊。夫此注射直趨步步無常，卻步步不落于無常，且步步迫近于常；以所穿之畢竟是常，即可謂能穿之步步是常。此一段義，應參《大般若經?二分?空性品》始明也。是則淨分依他，亦為圓成實者，菩提是也。境無識亦無，藤知如蛇知，生滅之染，教所舍也。諸佛如來，勸一切眾生發菩提心，示由菩提用顯涅體，教所取也。是則三性談依他，建立舍染取淨之教也。

于此生疑，不探經論，唯憑妄心，倉卒斷言，無有是處。非愚則妄，雲何而不速即淪墮！雪山一偈，教之策源也；《涅》一經，教之竟委也。偈說諸行無常，是故流行不可說常；《涅》說佛性為我，是

故不可說即流行即主宰。佛如是，孔亦何獨不然？《大學》知止，知《涅槃》常之為止也；《中庸》改而止，改去汝生滅無常之止，而趣向汝涅槃常之止也。此亦教之趣向畢竟而舍染取淨之旨也。孔書處處，無非示人于流行用中，而求其所依之體。月往則日來，日往則月來，欲人知感之無心耳。逝者如斯，不舍晝夜，欲人知循循然之相應于寂耳。言有宗，事有君，易有太極，宗也君也；是生兩儀，兩儀生四象，四象生八卦，八卦定吉凶，吉凶生大業，言也事也。天命之謂性，命而必系于天，亦猶依他之淨也。維天之命，即上天之載也，于穆不已，即無聲無臭也，亦猶淨依他之相應于寂滅寂靜也。與寂相應，不可說天命是生滅；畢竟空中天命仍在，不可說天命即寂滅。謂之為主宰者，指所應之寂也，其能應之寂，但如心所相應于心王亦稱為心，而密意說言謂為主宰也。豈即流行即主宰哉？不然，夫獨非以無常為常，而不可通哉！

五法、三自性、八識、二無我，釋迦一代設教，具有深意。五不可四，洵智如于一；三不可二，撥依他于無。智如洵一，如不獨尊；如不獨尊，趣歸無路，行果大亂，學何可為？依他既無，染于何托？無托何舍，無舍何取？一任流轉，而無還滅，教何所施？滅教禍世，無有窮極，可勝痛哉！

（1937年4月2日）

（選自《內學雜著》卷下，《歐陽競無先生內外學》第十二冊）

覆歐陽浚明書

來函謂《法相辭典·敘》惹起糾紛雲雲，甚矣，愛我之甚，敢不如教，上追無諍！顧此次《敘》末寄感，亦實是萬不得已之苦衷。在我輩歸依三寶，法將大混，教岌岌危，明見及此，烏能已已？

何謂法混教危耶？文殊弘二諦，而彌勒別弘三性者：一以求真，一以去妄故也。求真在辨別偽無，知一切執無，則知一法界有，故其工夫在悟入，般若之教如是也。去妄在扶根株，在傾勢用，必染種上中下轉弱，方淨種下中上轉強，故其工夫在對治，瑜伽之教如是也。對治者，如水對火，必皆有其物。若一虛一實，亦何對之足雲？是故貪觀不淨，嗔觀慈悲，痴觀緣起，慢則析根，疑則數息，所謂初步五停心也。進則三十七菩提分至涅槃城，三三昧入涅槃門，此平等通行之對治也。四無量柔心，進而十度、十地，而菩提得涅槃果，此大乘無上之對治也。

如稱兩頭，低昂平等，如谷久儲，朽無生用，是為染去，豈一言染，則謂之無？若虛妄分別無，則亦安用對治？對治不必用，止談悟入，則教之曲折繁重，豈非多事？如是則戒、定、慧三學可不重矣！世尊涅槃，垂淚殷囑，于戒特重，顧何為哉？與戒同囑，是謂為教，又何為哉？大乘不食肉，比丘不開淫戒，而今有別說而可相違，其源皆由不知虛妄分別有，不知有之勢用剛強，非戒嚴、教嚴，三僧祇劫一息不苟對治發生，不足為勝。不知虛妄分別有，而以為無，一切犯戒，可易引生，並視為不足危懼，幾何而不戒絕教滅，而末日時至耶？

吾誠哀懼，而不得已于言。若正法未闡，吾儕應急起直追，昌言正論，此責非複漸一人之責也。

（1938年9月30日）

（選自《內學雜著》卷下，《歐陽競無先生內外學》第十二冊）

答陳真如書（二則）

答陳真如書

前數日，冶公寄到弟覆十力書數紙，以為此不過尋常辨論之文，托便寄閱，邀共欣賞已耳，非商量大事、懇求真知灼見以圖歸根結蒂者，故例置答。今得親函，有惶恐求責，使知實踐不濫議論之辭，並希得覆。是則非尋常辯論之作，而唯一大事之舉，又安得不答？直心是道場，不直則道不見。弟覆十力書時，試檢其時是何心境，若有一毫求勝之心，豈唯應師友呵斥？若真是商量大事，駁斥背教之談，則彼被駁者應如何感激涕零、恩同罔極！而翻事呵斥，以塞人口，是何異周厲王殺人以弭謗，告子不動心冥然罔覺悍然不顧己耶？！明辨以篤行，但有道理，雖佛亦許質難糾繩。講學而呵責辨論之人，吾未之前聞也。既已辨論，而複求師友呵斥，吾亦未之前聞也。

玩十力之辭，以推十力之意，蓋謂殺人須從咽喉上著刀，說食豈能即飽，固亦自具苦衷，而亦豈容抹殺。所可咎者，自既未得真甘露味飫人飢虛，而徒跡襲宗門掃蕩一切之陋習、宋儒鞭辟為己之僻執，遂乃孤明自許，縱橫恣睢，好作一往之辭，墮入謗十二部經、謗般若波羅蜜而不自覺。其罪伊何？寧不省惕耶！真如據教駁斥，固無不合，然亦只破得十力掃教而不爛教之愆，並不知其立宗而不成宗之謬。又所談無所有不可得無念為念諸端，則不知境界不諳法門，侗顚預，離題太遠，誠可呵責。乃正襟令顏莊重發語大聲判告曰：十力、真如，不知佛之宗趣唯一是無余涅槃，不知佛之法門八萬四千，自發心以至正覺，節節境界，節節行持，節節殊異，而非以一法門概也。

無余涅槃為根本涅槃。所謂涅槃無體，寂滅寂靜，畢竟空是也；所謂一真法界，一切所依是也。此畢竟空人人皆具而不能顯，謂之自性涅槃。胎卵濕生、情與無情乃至俱非，我皆令入無余涅槃而滅度之。我皆令入，則盡未來際作諸功德以充其量，是故不入涅槃，謂之無住涅槃。無住涅槃為勝進涅槃，為大涅槃，而其根本仍無余涅槃也。無余猶俗言質量，無住猶俗言數量也。小乘解脫，雖不若大乘法身數量圓滿，然不能因數量不滿，遂並略棄解脫質量亦不談也。

顧何以勸示發心動言三藐三菩提耶？涅槃

所顯得，菩提則所生得。生得一分菩提，即顯得一分涅槃，涅槃必待菩提而顯，故必發菩提以顯之。作用在菩提，歸趣仍在涅槃也。《大涅槃經》雲：菩提為果，涅槃為果果是也。涅槃待菩提顯，而大涅槃又必待大乘大般若顯、一乘大方便顯。發心在無上菩提，充量在一切智智是也。菩提之謂智，智是無分別，必得與涅槃相應，乃能無分別，乃可謂之智。智亦是無漏，必正智緣如，與涅槃相應時，乃能無漏，乃可謂之智。智亦是般若，龍樹雲菩提是般若之果，般若是菩提之

因；又雲能觀實相慧，謂為般若波羅蜜，實相是涅槃，慧觀實相即與涅槃相應，乃稱般若，乃可謂之智。智亦是觀緣，《大涅槃經》雲：十二因緣為因，觀緣智為因因是也；《密嚴經》雲：非不見真如而能了諸行皆如幻事等，雖有而非真是也。了真乃知幻，即與涅槃相應乃能觀緣，乃可謂之智。是中如幻義皆屬菩提，非詮涅槃。《大般若經》四百七十八卷〈空性品〉：諸法乃至如來，永斷習氣，與生滅二相合者，亦皆是化；涅槃常空，不與生滅相合，非化；然變化與空，如是二法，非合非散；此二俱以空空，故空，不應分別是空是化。據空化不應分別義，則知五百五十六卷涅槃如幻者，是就無二無別說涅槃如幻，以皆不可得不可說故也，並非如幻義既屬菩提又屬涅槃也。法義不可限，法相仍不可亂也。

觀上菩提義、無分別義、無漏義、般若義、緣生義，皆必得涅槃相應義乃成立，是故佛之宗趣唯一，即無余涅槃是也。十力徒知佛門無住涅槃之數量，又錯讀孔書，遂乃附會支離，竊取雜揉孔、佛之似，而僻執其一途。既恐怖無余涅槃，而大本大源于以斷絕，無本之木如何生，無源之水如何長也？常、樂、我、淨仍不離無余涅槃，蓋不生不滅是常，大寂靜離鬧是樂，大牟尼名法是我，解脫是淨。十力乃雲止是自己分上事，究竟屬自己分上何等事耶？明德是無聲無臭，中是喜怒哀樂之未發，誠是體物之鬼神，易是無思無為寂然不動，此與無余涅槃皆有關係。《毛傳》解天命即是天道，得經文天之所以為天，包並天之體用全義。宋儒乃有流行命令偏解，而十力泥之。又拘解《系辭》生生之謂易之義，而不盡其妙。遂乃不知孔學根本于寂滅寂靜也，是則錯也。真如駁十力而不能道出種種，故曰十力、真如皆不知佛門宗趣唯一是無余涅槃者，此也。

宗趣唯一，法門無量，既曰無量，則各自有其境界。無所有不可得，無分別無心，皆般若所行地上菩薩境界，非地前境界也。毛道凡夫二取熾然，何論無所有不可得？一念無心入正性離生，初地菩薩尚入定無漏、出定有漏，而雲念念無心耶？《大密嚴經》：得無分別便入密嚴宮，密嚴是大明妙智之殊稱。《大般若經》佛告善現：汝以辨才，應為菩薩摩訶薩眾宣示般若波羅蜜多，六百卷《般若》皆為地上菩薩說法也。《智論》謂善現是大士示現于小位，又善現得無諍三昧樂說無相，樂說無相則所說詳盡佛獨加持，雖彌勒天王舍利弗等皆不得為教授教誡諸菩薩主，是之謂菩薩境界也。于此境界又足借徵無余涅槃唯一宗趣已。

唯一宗趣無余涅槃，是則徹上徹下、徹始徹終、須臾不離無余涅槃也。故般若為地上事，為根本智，相應涅槃矣，而三智所系，皆不離乎根本。隨順無漏，趣向無漏，臨入無漏，是亦無漏，是即所謂地前加行智，朝宗根本也。以無所得為方便而不舍離一切眾生，是即所謂地上根本智，固根本也。一切智智皆從般若而得生故，甚深般若復由一切智智而得有故，是即所謂地上最後後得智，得根本後以之用于世間，而仍是根本行也。

據是三智，有情成佛，凡有初中後三漸次。引生無漏為初漸次，由凡入地歷七方便，加行智境也。無相無功用住為中漸次，自初至八煩惱障盡，根本智境也。圓滿菩提為最後漸次，一切智智乃証極地，後得智境也。如是或談五行，或立五位，或開十三住，在何位住，即何境界，談何行法，不可誣也。故曰法門非一也，而皆以無余涅槃為宗趣也。吾輩皆毛道凡夫，當急求初漸次加行智境界法門，若侈談無所得，或竊取有所得，非方廣道人，即順世外道，于生死大事何曾涉著一毫，此可欺人或自欺耶？

念念無心，是無漏地上境界，凡夫有漏，從何覓得？然無路可通，而有方便，大智慧人苦心婆心貽我大寶，豈堪忽視？無漏則無心，有漏則有心，雖則有心，而心之內境有自証分，亦現量得。此之現量，世間現量，但能建在率爾墮心上，稍一剎那則尋求決定染淨與六識俱矣。發生六識之根，是四惑相應之末那，纏眠演繹，無可出期。若自証分則有漏中至善，久久緣習，忽無漏生，所謂徑路絕而風雲通也，此即隨順依處，依之立引發因，能引發無漏法也。諸修道人皆恃此心，而于宗門唯一取用。然此但說心用，而法門則仍有種種可談矣。

無所有不可得是無漏地上境界，凡夫有漏但是二取，然有方便可以趣入。其在無著《瑜伽》，有四尋思，得四如實智。依識有所得、境無所得生，而所取破，即得暖頂位；依境無所得、識無所得生，而能取破，即得忍及世第一位。世第一位，一剎那見道入地矣。其在龍樹中觀，初觀無常，馴習以後繼以觀空，所謂三十七菩提至涅槃城、三三昧入涅槃

門是也。初熟柔順忍，後得無生法忍，得無生法忍而入地矣。其在一乘《大涅槃》，由聖行三學，進梵行無量，復由梵行所修之舍為十八空，乃得天行，入地六度矣。其在《華嚴》，地前七方便異常明了，淨行修無我，梵行修無法無盡藏行而入地矣。三十七菩提分者，大小共由之路，瑜伽以之修對治，中觀以之修無常。雖三十七而根于四念住，雖四念住而要于循身觀。修循身觀者，初爛數息以定其心，繼爛不淨以入其境，數息不淨，龍樹謂此二觀法中真甘露門也。若欲直探般若，則亦必由三慧作意入門，而助伴于十法行句。凡此地前方便法門，任擇一途皆可入地，無容夸大鄙薄輕非。

宗趣唯一無余涅槃，法門則有三智三漸次。非惟佛法則然，孔學亦何獨不然！但讀《中庸》，二義明了：初段、"天命之謂性"至"萬物育焉"，統明宗趣唯一、法門三次。二段、"仲尼曰"至"唯聖者能之"，但明能中庸與不能。三段、"君子之道"至"治國其如示諸掌乎"，分明宗趣唯一。四段、"哀公問政"至"達天德者其孰能知之"，分明法門三次。五段"衣錦尚"至"無聲無臭至矣"，復明宗趣唯一。

文段既晰，可以談義。一段、《中庸》是素隱之書，素其隱于不睹不聞，則與無余涅槃相應，譬如獅子據得其窟，然後可以出而大吼，此之謂唯一宗趣。未發之中，天下大本，如根本智；發皆中節，中和位育，如後得智，此之謂法門三次。然天命之

性已示宗趣，率性修道已詳法門矣。一陰一陽之謂道，成之者性也，一陰一陽則無思無為與涅槃相應，天命即一陰一陽之天道也。自誠明謂之性，自明誠謂之教，非三漸次耶？三段、夫婦知能費也，聖人不知能隱也，般若無知無能也。天地之大費也，人有所憾隱也；大小費也，莫載莫破隱也；鳶飛魚躍費也，戾天于淵隱也；忠恕違道不遠無入而不自得，費而隱也；鬼神離軀殼而應于無余涅槃，得物之體而萬物無不育，學者如鬼神，初空其身繼空其心、心所，即立于無余涅槃地與鬼神同，體萬物而王天下，豈奇異事耶？君子之道，鬼神之為德，一本于無余涅槃而已矣。四段、不思而得，不勉而中，從容中道，誠也，聖人也，是即無所有不可得入地般若行也，則所謂根本智是也。其次致曲，可欲之謂善也，曲能有誠，有諸己之謂信也，誠則形形則著，充實之謂美也。著則明，充實而有光輝之謂大也，明則動，動則變，變則化，唯天下至誠為能化，大而化之之謂聖也。何謂化？轉有漏心、心所成無漏四智，異物曰變化也，則入地成聖矣，則所謂加行智是也。唯天下至誠為能盡其性乃至贊化育與天地參，先知如神，則聖而不可知之謂神也，則所謂後得智是也。此非三漸次而何？五段、入德而天下平皆歸乎隱微乃至無聲無臭，則又鄭重歸結于無余涅槃，唯一宗趣可以想矣。

熟讀《中庸》，乃知孔、佛一致，一致于無余涅槃、三智三漸次而已。自孟子外，宋明儒者誰足知孔？唯王陽明"無善無惡心之體、知善知惡是良知"，得有漏心之自証分。而轉有漏為無漏，隨順趣向于無余涅槃，何曾夢得；三漸次之後得智，更何足談？若其余諸儒，一言寂滅寂靜，即發生恐怖；恐怖不已，發生禁忌；禁忌不已，大肆謗毀。夫至謗毀而無漏途竭，輪轉三途豈有窮極？滅燈毒露慧命枯亡，痛寧已哉！至三漸次更不足論，明明二之中四之下也。神聖差等，經數可按，而曰非聖人之上又有一等神人，甘持世俗見解敢與經文相背也！陽明"堯舜萬鎰，孔子九千"，與經文"以予觀于夫子，賢于堯舜遠矣"相背，又何足與談十地差別、十王大業？

至極之果且盲不知，民亦何能得所歸宿？宋明諸儒不熄，孔子之道不著，邪說誣民充塞仁義，豈食人肉而已哉！如一闡提鏟無漏根，寧細事哉？敬告十力：萬萬不可舉宋明儒者以設教也。應知孔子之道晦數千年，當繼孟子後大啟昌明也。吾非敢鄙儒，躬行實踐，誰敢不敬？但不可以世間之賢，阻至極之路也。嗟乎悲哉，明死矣，曾聞何道，得個什麼？吾門諸子，其他且置，十力、真如皆行年五十，石火電光，其與幾何？商量大事，應如救火追亡，一切客氣悉皆屏棄。吾年七十，死亡更促，執筆答此，痛徹心脾。十力、真如：此豈求勝之書也哉！此豈求勝之書也哉！

十力原書雲：一念恆持不失自己，三藏十二部都如此得著落，否則都是戲論也。善學者于此把定，不要侈談無所得與涅槃如幻。《般若》六百卷，滿紙是無所得，學人實透般若，乃于無所得而無不真有得矣。真有得矣，必不漫言無所得也。涅槃只是常、樂、我、淨，此是自己分上事，自明自見雲雲。

（1939年7月10日）

再答陳真如書

得本月二十一日覆書，謂于我所答書，循環奉誦，繼以日夜，開示蒙昧，受恩無涯。曩學內院，粗知《瑜伽》，近讀《般若》，乃知無上法味，層出不窮，師所告誡，完全接受。惟十力我見極深，乃至與諸佛爭勝，師以至義對十力說，均非對症，此書永遠寶存，不復轉示十力雲雲。

從善之勇，服膺之摯，心境之光明，誰與吾子？此何如事，為己為人，不應如吾真如哉？今人談義，既非為己立足于心身性命之場，亦非為人取譬于欲立欲達之地。初無樹志凌霄，繼乃名利恭敬，而又益之以幾卷古書，幾條道理，烏得不我見如山，奚能倏爾崩角？三十六種外道，一與佛談，即盡棄所學，無論矣！老名士董羅石一見陽明，盡棄詩瓢，積縑表摯，豈復見于今日哉？十力究竟不算豪傑，雜毒已攻心矣，我亦奈之何哉，而亦烏足計哉？惟是此篇答書，吾並非止為真如、十力發表要義，吾實為盡天下人發表忠言。蓋發表之意有激于自身而出者，有激于唐宋諸儒而出者。

激于自身而出者：漸幼孤，庶出，母長年病。初習程朱，得鄉先生大譽，雖足樹立，而生死事不了。繼學陸王，雖較直截，而亦不了生死。母棄養，無奈何，吾友桂伯華導看《起信》、《楞嚴》，雖快然知生死由來，而豈知無余涅槃之說哉！于是年四十矣，究極所歸，學《唯識》、《瑜伽》而不能入。女蘭，年十七，隨予學于寧，予入隴而死，痛徹于心脾，中夜哀號而無可奈何，遂翻然求學，通宵達旦，鑽研《瑜伽》，于是《唯識》、《瑜伽》渙然冰解。四方之士畢至，真如、十力亦是結道義之交。于是年五十矣，又豈知無余涅槃之說哉！無端而東兒死，生世十九年耳，聰明而不祿，誠悼痛之，許一鳴同時死，黃樹因同年死，于是習《般若》，不能融貫。逾年而同懷姊死，又聶耦庚死，乃發憤治《智論》而《般若》爛習。雖得畢竟空義，猶未敢執無余涅槃以為宗趣也。進治《涅槃》，年已六十，作《涅槃敘》，苦不克就。乃避暑廬山，會散原至，留連數月，而《涅槃敘》竟，而後知無余涅槃之至足重矣。蓋九一八大水泛濫，東夷猖獗之時也。都城未陷，予于寧院五題講會，蒙文通、湯錫予二君主持之，大提特提無余涅槃唯一宗趣之義。會竟而七七事起，竟成寧院講學終結，豈細故哉？我皆令入無余涅槃而滅度之，初以為對小乘之說，繼但存疑，數年後，夫乃決知。誰都能有漸之長年，誰非出家而畢生如漸唯此一事？誰于諸宗作窮研融會，徵實以得南針？是故知無余涅槃唯一宗趣，不易易也！此所謂激于己而出者也。

韓愈文人，烏足知道，更何論清淨寂滅！村嫗唯計飽食昏睡，談何清廟明堂？宋人說理始《太極圖》，世俗根由且依稀仿佛，何論出世真詮，又何論涅槃寂滅？辟佛者極惡寂滅，仇而恨之，其非種者鋤而棄之。人謂大乘度人窮極六道，謗者則曰：雖則普渡有情，而所渡仍是寂滅，故佛異端耳。略談粗義，都譏禪學，試問禪何害于爾，而惡之拒之如是？皆盲昧之流，非惡寂滅，實惡斷滅，以斷滅為寂滅而惡之也。

。非惡禪，惡清談廢事，以清談廢事為禪而惡之也。說風是風，盲從不究，世皆敗壞，殃及學林，馴至于今，仍是張冠李戴。夫無余涅槃為何如事，天下陷溺為何如危，此烏可已已耶！此所謂激于唐宋諸儒而出者也。

來書請益：無余涅槃，幸加垂示。應重答之，諦聽無忽。無余涅槃者，寂滅之謂也。《瑜伽》說有二種寂滅：一者、寂靜寂滅。有《涅槃》說四寂靜：當來不生，而苦寂靜；三毒永斷，而煩惱寂靜；背惡習善，而不損人寂靜；見聞覺知，不憂不喜，而舍寂靜。今無余涅槃，增說亦四：無算數言說，而數教寂靜；無身，而一切依寂靜；無身生苦，而依依苦寂靜；不思未來苦生不生，而依依苦生疑慮寂靜。此以寂靜見寂滅者，依他惑盡之境界也。二者、無損惱寂滅。經說：比丘求寂滅，名真安樂住；又言：由實有無生、無為、無等生起，而有生、有為、有等生起，有永出離；世尊依此密意，說言甚深廣大、無量無數，是為寂滅。所具功德難了知故，名為甚深；極廣博故，名為廣大；無窮盡故，名為無量；有非有不可說，即蘊離蘊不可說，以無二故，不能以數說，名為無數；以其一向無垢，謂之為無損惱也。此以無損見寂滅者，圓成德備之境界也。《瑜伽論》言：依他起上無遍計執，便是圓成，是故依、圓皆寂滅也。亦可謂依他惑盡，略如《攝論》說彼果斷；圓成德備，略如《攝論》說彼果智也。不可說無住非無余、智則異寂，而不明相應義也。

無始時來，恆河沙數諸佛世尊，最崇最上，曰無余涅槃，釋迦說法四十九年，最終歸趣，亦大演涅槃。以是因緣，而後吾人飲甘露味于一切法海，若全襟驪珠在握，是故智者先務之急在《涅槃經》，豈不然歟！此經說三德：曰解脫德是體，曰法身德、般若德是相、用也。其宗趣有三：曰涅槃是常，解脫體也；曰一切眾生皆有佛性，曰一乘，《大涅槃經》見性成佛，法身、般若相、用也。是三德者，不即不離，不一不異，至微至妙，妙于相應。夫相應者，不可思議，法爾如是境界也。經言：我今當令一切眾生，及以我子四部之眾，悉皆安住秘密藏中；我亦復當安住是中，入于涅槃。何等名為秘密之藏？猶如：字三點，若並則不成伊，縱亦不成，別亦不得。解脫之法亦非涅槃，如來之身亦非涅槃，摩訶般若亦非涅槃，三法各異亦非涅槃。我今安住如是三法，為眾生故名入涅槃，如世伊字。細味經言，而知相應至妙之義，一語具三玄，一玄具三要是也。舉一涅槃而即具三德，一語具三玄也。舉一解脫，法身以充其量，般若以顯其德；舉一法身，清淨無垢本于解脫，功德無邊資于般若；舉一般若，因之為無分別起于解脫，果之為一切種智成于法身；則所謂一玄具三要是也。皆相應義也。並則一劃，縱則一貫，誰居左右，誰為始終？面目無序，君臣無位，淆混一團，法相亂三，是則即也，一也，有過也。別不具三，解脫則有小而無大，法身則詳增上而略本質，般若則明用而非詮體，非圓相也。異地而處，三法雖具，不相連屬，非妙相也。是則離也，異也，亦有過也。伊之三點，非並非縱，亦非別異，而仍三法。以法相談，則治而不亂；以至理談，則融洽無間；相應之妙如是哉！

是故，菩提、涅槃曰二轉依，此二皆以畢竟空而空，則無二無別，相應義則然也。寂則凝然不動，智則萬化皆通，無礙自在，相應義則然也。佛各具法身，而同一法界，亦相應義則然也。《起信論》開真如、生滅二門，而不立正智法，談者說同歸一法界，則止有一法界，其不明相應義，而過現重重，大都然也。無余涅槃既大小殊，其為異門亦大小異，解脫則同，法身、般若不同，所以異也。寂滅異門，小乘有八，斷與無欲、滅諦斷知、及沙門果有余、無余；大乘無量，略二十六，《瑜伽》說也。《涅槃》解脫一百余門，法身有四：常、樂、我、淨；然一百余門可攝于彼二十六門，彼二十六門可攝于此常、樂、我、淨四門。常、恆、久住、無變、有法，攝于常也；舍宅、洲渚、救護、歸依、及與所趣、安隱、淡泊、善事、吉祥，攝于樂也；或攝于我也；無轉、無垢、難見、甘露、無憂、無沒、無熾、無熱、無病、無動、乃至涅槃、永絕戲論，攝于淨也。常、樂、我、淨可攝于一。一之為歸，寂滅是也。諸行無常，寂滅為常也。生必滅故，寂滅為樂也。我得八自在，寂滅則我也。一法界清淨，寂滅則淨也。是則一百余門與二十六，常、樂、我、淨盡之矣。常、樂、我、淨，寂滅盡之矣。寂滅者，定境也，名大三昧深禪定窟，亦名無相三昧，無色聲香味觸生住男女十相，無色而住去來進止如是之義諸佛境界，非諸聲聞緣覺所知。此定境界猶如虛空不可壞滅，名涅槃界，亦名法界，如來出世，若不出世，此性當住，又名法住性、法界性、法尼夜摩性，若有此尼夜摩三摩地者，于諸有情心無顧戀証于涅槃，退轉諸佛法門，不得入于究竟之慧。是故菩薩舍而不証，近住而已。一切如來令從定起，超第八地乃至法雲，入佛內証作諸功德，如來變化所為事畢，然後住于真身隱而不現。此寂滅境，佛對小乘說為無色，對大乘說色，無余涅槃，非斷滅境，一真法界，清淨無垢而已。燈明滅盡，燈爐猶存；然木滅盡，灰質猶存；煩惱雖滅，法身常存；非胎藏生而微妙身，初地應寂能意生身，此之謂也。

《維摩詰經》舍生死而樂法身，從如是無量清淨功德，生如來身，是也。定慧相資，乃得生顯；慧從定生，不定無慧；定從慧顯，不慧無定；剎那相應，不可說二，而寂滅則一也。寂滅就用、就智、就慧相應邊言，亦名密嚴國，是內証聖智之所行，是大明妙智之殊稱。《密嚴經》言：此土最微妙，不假日月明，佛及諸菩薩，清淨光恆照，無有晝夜時，亦無老死患，殊勝密嚴宮。諸天所希慕。最上瑜伽者，地地而進修，其身常清淨，而生密嚴國，得解脫智慧如來微妙身。三德相應義，此亦如是雲。又雲：極樂非胎生，光淨悉瑜伽，若比于《密嚴》，百分不及一。

上來所談寂滅諸義，于無余涅槃已得其概。略說如是，若欲詳明，讀《大涅槃經》、《大密嚴經》。

（1939年7月30日）

（選自《內學雜著》卷下，《歐陽競無先生內外學》第十二冊）

與李正剛書

學問甚難，漸年七十，始幸溝通。原欲四大德親就商量，乃先弱一個，悼痛何如！即漸風燭余生，又豈能久住耶？正法須徹上徹下，融于一貫，不可遺棄何段。史實有窮源竟委之系屬，遺棄或疏略，皆不得教之翔實，即法不如實也。不可拘牽何段，各部皆與全體相關。摩尼寶珠不于一顯，水不能攝火，法各不相知。然段段義明，即全體畢露，一段而局，即本段亦非，拘牽或概簡，亦皆不得教之方便苦衷，亦法不如實也。自小乘經四《含》，論六《足》，各部執，而歸極于《俱舍》。如是中觀大般若四論，瑜伽六經十一論，如是而一乘三法，所謂經《涅槃》、《密嚴》。分為四段，段段精研以為教，不遺棄，不拘牽，徹上徹下，融于一貫，則漸意旨也。

近《答陳真如論學書》，揭出二語：宗趣唯一，無余涅槃；法門無邊，三智三漸次，可以知其概矣。悲夫，教之久晦于天壤也！既得其髓，寧皮相以貽人？今後著述編刻，敢輕率徇情？一息尚存，不容稍懈，敬為我知己告也。世人明白者少，惟公法中龍象，當必有以主持明白，不拘拘恂俗歟！明不明此義而遽淹逝。化中由明述意，未見信來，蓋以導俗繩眾為歸竟也。子真方將以其別裁大鳴于世，安所事此？故舊刊落，何論新知。已矣前途，潸焉出涕。明著述，我都不知，當視其可存則存。其《雜含經論》，雖本漸及秋一之義，猶須糾正也。

（1939年8月）

（選自《內學雜著》卷下，《歐陽競無先生內外學》第十二冊）

覆梅擷芸書（七則）

覆梅擷芸書一

連接二函，于菩提、般若義詳細明辨，可謂古之勤勇哲人。漸亦何知，但本聖言解析之而已，敬述如下：

來函問般若與菩提何分，般若是根本智，抑是五及五俱意識，又四真中之前二及率爾或至決定，或現量亦比量，皆是般若否？

答：自唐宋以後，說教多不嫻名相，所以紛紜難悉。龍樹《智論》，明明說觀實相慧是般若波羅蜜，是則非實相觀皆非般若也。實相者涅槃也，菩提，全體與涅槃相應也；除全體相應而相應者，般若也；是謂般若為行中相應，菩提為果中相應也。龍樹說世間現量如牛羊眼，非涅槃相應之現量，為有漏故也，有漏必流轉也。嗟乎！般若豈易言哉，必與真應，乃見道，入地稱修六度，然初地入定無漏，出定有漏，必六地滿盡、七地無相，方稱出世，自初至六配度以次，至是乃可雲般若耳。地前所修，隨順般若，趣向般若，臨入般若，權稱般若，非實般若也，非波羅蜜多也。般若既稱為觀實相慧，是為無漏行，如來盡未來際作諸功德，豈無所行哉？般若為佛後般若無漏行，在《華嚴》為佛後普賢行，佛與菩薩判之以位，豈判之以事哉？審此則一切所疑皆可解矣。

來函問：四智是般若，抑是菩提？

四智是般若上分析之相（依各識而分），般若是四智上發現之行。

來函：三德不說菩提，意涵般若中，或文字通用，否則依龍樹言，但有般若而無菩提矣！

答：菩提是果，般若是行，涅槃之解脫身，此一德大小相同，涅槃之法身是大牟尼，小不能與。所以不能與者，有菩提，無大菩提故也。大菩提以出纏真如為大悲般若常所輔翼，盡未來際作諸功德，如是而成，此所謂無住涅槃也。菩提者，佛之果名也；般若者，佛所以為佛之行也，即化身、報身之行也，即佛後之行也。三德以法身對解脫身言，而法身以般若現，法身即菩提也，法身亦佛之異名也，非不言菩提也。

來函問：觀緣智、十二緣、菩提、涅槃
四種名相解釋，藉明有因因、有因，有果、有果果之義？

答：觀緣智者，觀十二緣實相之觀慧也，即般若也。十二緣者，中道也，一色一香無非中道，煩惱即菩提也，十二緣實相是佛性，佛性猶胎中人，佛猶出胎人也。菩

提者，佛也，由佛性而佛，即胎中人而出胎也。涅槃者，法住也，清淨法界，一真法界也。此所以顯得，由菩提顯也，菩提則所生得也，成佛然後見性証真也。是故以智而得緣因，而後因成也。佛性而佛十二緣，而菩提，因果自然之理也。以生果顯究竟果，所謂以佛用得佛體也，所謂以果歸果也。略談數語，詳須多讀經論，《大智度論》是極要也。

（1941年12月6日）

覆梅擷芸書二

前覆書論般若義數條，想已寓目。今複得來書，問般若義數條，想見公用功至勤，研討深入，故又答之，幸察。

來書一問：般若為用，而言真如是般若，若般若為體，則無為法不應是用？二問：經既以真如為般若，相宗又以真如為圓成實，而經言般若非圓成實，何耶？三問：經言見聞嗅嘗無常癡箭，又言諸法空相，不生不滅、非染非淨，何耶？

一答：凡學須根本義明，本義不明，一切自礙。此有二義：一、二轉依非一非二義；二、舜若言是空而無，舜若多言是空性而有義。二轉依非一非二者、菩提與生滅合是用（化即是用），涅槃不與生滅合是體（非化即體），不能渾而為一法故，此化、空二法，莫不皆以空空而空，不能分其誰空誰化。蓋正智緣如時，能所相應非二相故，一相寂滅而無相故，此是〈空性品〉經義，請披讀其文而研之。般若是菩提因、觀實相慧，觀慧自是用，而非與體為一也。慧與寂應為智緣如，自不與體條然異而為二也，就慧義邊言為用，就應義邊言為體，所以文于各處不同也。

二答：三性是依他起上事，與依他異而為遍計，不與依他異為圓成，皆用邊事，三性不離唯識也，文既就般若相應義邊而言是真如，則非談觀慧用邊事，故言非圓成實也，唯識以用圓成為真如，亦其與體相應而已，故曰即是唯識性也。

三答：《心經》"五蘊皆空"、"是諸法空相"，此空是空性也，色空不異而即，則空相即法相，法相即空相，皆實相也，實相之色，不生不滅、不垢不淨，此空相是實有也，其非系非離系，亦如是也。非實相之色，空中無是色也，即見聞嗅嘗之色，無常癡箭，空中實相無是色也。此間《教訓釋》稿在証剛處，公可函索，是稿無義不陳，若得一讀，公自此諸義冰釋，無複疑問矣。然菩薩病為眾生病，或是後更多問，亦不可知。

（1941年12月19日）

覆梅擷芸書三

頃讀三日來論，敬悉一切，《院訓釋》已刻竣，前示加入之義，已加入呈覽。唯淨土義則無從加入，蓋與此文談佛境界、尚頓義不同，又與菩薩行由漸而頓義不同故也。唯智學染舍而取淨之第八淨土義，言瑜伽所生勝于極樂，已有他力意，但比較極樂之生為勝而已，故亦不必加也。若要另發揮一文，容俟他日為之。

第二函四問，如經論之問，透辟無倫，此是菩薩代眾生決隱析疑之作，豈真少讀書而幼稚者哉？今為答之。凡人情執，無義不求死式，而絕無虛靈空活之趣，故悟解不生，貫通無日矣。此有五義：

一、無余界非斷滅一切人境也，但微妙不可思議而已。所謂一真，所謂清淨，一切無少欠缺，故言二種寂滅：一、寂靜寂滅；二、無損惱寂滅。無損惱寂滅，則無邊功德具在也。

二、菩薩學時非証時，學時于無余界但游觀而不入住，証時則學滿而可入住。然亦入大定窟，而非入滅也。故菩薩無住，以學滿而証為止。佛無住，以証後相應先時菩薩發愿，今日遇緣發現以作功德為始也。

三、佛更不複志愿，志愿皆為菩薩時具足，滿足而後成佛。無為之狀，即為隱為不現。其作功德，皆應菩薩時志愿而已。化身報身不論矣，多寶塔中，涅槃佛說《法華》，即是此義。

四、常、樂、我、淨具攝三德。小德名解脫身，大德名法身。所以能法身，惟般若為能，故曰三德。涅槃八相中，聲聞但六。六即解脫身，不能真實，即不得法身；不能我、常，即不得般若。常，是法住；我，八自在，大作功德正是八自在威力也。

五、如如如如智不可言一言二。即空理與色法亦不可言一言二。般若言色即是空，空即是色亦然。總之，微妙境界，一切無缺，非一切斷滅也。

略陳五義，四問之疑不出乎是也。隱而不現，佛微妙身，眾障不相應不相見，說隱而不現，入大定窟無為自適，說隱而不現也。無余涅槃之色，即微妙色，如無色天之淚下如微雨也。法住之常，對斷滅或間斷說，非如執家說死常也。《內院雜刊》雲：如來變化至隱而不現，文引《密嚴》。此寂滅境至對大說色，引龍樹《智論》。

（1942年2月12日）

覆梅擷芸書四

問：《華嚴》"一切諸佛身、唯是一法身"半偈不明，疑是譯者之誤筆。

誠然誠然，藏中此種處甚多，明唯識者當能一一了然，故吾《院訓·釋教·研究文字》，最初在唯識宗也。欲詳半偈，當詳一法界，今釋之。出纏為法身，佛身者，即法身也，故凡諸佛身皆謂法身，淨業圓滿，等同不異。據不異言，謂一法身，非塵塵諸佛共一法身也。無法非空，豈猶有刊定一法為一法身哉？法在人為法身，法在法為法界，故名一法身，亦可名一法界也。諸佛各一法界，此之所謂諸佛非一佛也。諸佛同一法界，此之所謂法界不異，淨業如一也。法界無量無邊，周遍圓滿，必無不淨，故時須三僧祇，有情須皆作得度因緣，然後成佛，謂為法身，一切有情皆一法界中法故也。何謂一切有情皆吾一法界中法耶？托質變相，皆吾相分，一也；互為增上，二也；皆遍一切，光光相網，三也；故一切有情皆吾法界中法也。諸佛唯一法身，譬如同業眾生感報娑婆，皆網于一處，謂為一世界，其實皆無量無邊有情之無量無邊世界也。

（1942年2月22日）

覆梅擷芸書五

來函謂此次致恩洋信中，精義甚多，可否由公或令門摘出若干段，俾日後及現今十方得讀雲雲。敬遵所命，節各函義如下：

道之不明也，一、不明權實之法，而將權作實；二、不明總別之法，而得總或不得別、得別或不得總。由前而說，是為舍月觀指；由後而談，是為負固不服。欲道是明，焉能忽此，請略言之：慧日休光，部執競計，世友以諸部駁難而立有部，分別以有部執私而變經部，大乘龍樹始創空醫有，大乘無著復明有拯空，賢首、天台又以性相各詮一隅未能融貫，于是華嚴圓融、法華一乘之教出。諸宗林立，固自有其誰是誰非、誰正誰頗，今且不談。談凡立教者，皆自挾補偏救弊之意以俱來之旨。推其補救之跡，因彼而後有此，此雖成理，卒系于彼起，誰為崛起一峰插天天外飛來無因緣而契第一義，則皆非是，是故教外有宗不可謂全屬虛妄也。既非虛妄，不應毀棄，所不毀棄者，又非是便其悟貪其頓也，誠欲直握驪珠、破陣擒王，認實為實，不欲認權為實也！念念佛，法法佛，非教非禪，教之步步為營，宗之念念注的，誠欲其相成也，則所謂佛境而菩薩行也。徒知佛境，知總不得別，禪與天台方便入門之術覺非盡善；徒知菩薩行，知別不得總，則般若明義，雲何後世而增上慢哉？《瑜伽》立教，雲何後世而蹈入破碎支離哉？是故負固不服者大可慮也！

遍一切法皆是性，皆是相，性遍一切法故，有七真如；相遍一切法故，有真如相、法界相。不可分一切法中但因緣所生法為相，但無為法為性。性相二宗之名，為自來[/言]說所誤，今應矯正。

菩薩攝受有情為一體是也，而不達有情本來一體，則知其當然而不知其所以然。何謂所以然耶？大悲者，佛法根本也，若不從一法界出，有何交涉而謂之根本哉？菩

薩攝有情為一體固也，何以有情為有情、我為我，而談一體而能一體耶？又何以不相交涉，而談攝受而能攝受耶？必推至一切有情皆吾一法界中法，取懷而予，乃能一體，乃能攝受。是故不達有情本來一體，參理解義終未徹也。

立理事分別之說以判一切緣起。甚矣！言不可以若是其幾也。其所謂理，若何為理；其所謂事，若何為事：是不可以徹底明辯歟？一真法界理耶、事耶？豈不謂理，然大牟尼名法，牟尼理也，大牟尼則無量無邊功德事也。無余涅槃耶、事耶？豈不謂理涅槃是真如異名，然彌勒謂一寂靜寂滅，二無損惱寂滅；寂靜則理，無損惱則無量無邊功德之事。二轉依理耶、事耶？豈不涅槃理而菩提事，然〈空性品〉佛說：是二法皆以空空故空，不能說其誰化、誰為非化。第一義諦理耶、事耶？豈不是真諦理而俗諦事，然無著《順中論》說：不異世諦而更別有第一義諦，無自體如本性空如，此則是諦，一相所謂無相，真俗不分，理事可分乎？離言自性理耶、事耶？豈不離言是理，然〈真實品〉中明明說是事，又多義發明是理。色即是空，離言自性之色即是空性之空；空即是色，空性之空即是離言自性之色，色空可以理事判耶？是故空中無色，無言自性之色，豈無離言自性之色哉？若以理事立義以成宗，則真實投降台、賢。何也？天台說一念三千，賢首說理事無礙法界是也，爾以理事不亂說賴耶緣起，台、賢則以理事不礙說真如緣起，為有理事之立義，遂不能徒執不亂義而拒其不礙義故也。是故釋義不精，隨便立宗，未有不前門拒虎而後門進狼也。理事二義立宗，並不見《阿含》，惟憑臆見，臆見可為權度以衡人哉？又言執事為理，何以見染淨一如？豈不凡言一如，皆唯是理？然吾但聞說煩惱即菩提，未聞說煩惱之理即菩提之理，蓋離言自性之煩惱事，即離言自性之菩提事，事本幻而不實故也。若執死事是實，而又于死實事外，談非事是一如，事中之理乃一如，如此見解，真所謂墮五百劫野狐禪也。

談者問曰：此說理事立宗，適暗投台、賢固也，故真如緣起之說，台、賢誠不謬乎？

答：體用不分，烏乎不謬。

問：台、賢既謬，而理事又不可硬作分別，然則以何緣起？

答：以聖言量所說為緣起。《般若》說：與生滅相合為菩提，是化；不與生滅相合為涅槃，非化（說不與生滅合不合，不可說不生不滅合不合），是則為正智緣起。《楞伽》說：自心所現相續而生，生已即滅，名剎那法，如來藏名藏識，所與意識諸習氣，俱是剎那法，是則為賴耶緣起。正智緣起、賴耶緣起，持業釋也。緣起是正智、賴耶之相，正智、賴耶是緣起之名，有相有名，不可名先于事也。唯識家以其能變所變功能之相而立唯識之名，非持業釋如何？今之談學，每每執死成法，看不活動，如說緣起，必先立理事，又立非理而事，為緣起之因由，是以動輒皆過，則死法之為害也。是故應說生滅之為緣起，萬不可說非理而事之為緣起也。

四月九日來函，六月節錄以應。

(1942年6月)

覆梅擷芸書六

來書說一法界義，相宗、台、賢都少發揮，欲漸作專論或短文，此是至要法事，敢勿如命，但年來精力衰頹，著作須邏輯精詳，誠不能從事，短文亦所不能。無已，則在此覆函中略談數義：一、法界、法身別；二、如來藏與法身之性得、修得別；三、生因為正智緣起、緣因為真如緣而非起別。三義既明，足免法相淆亂之虞，聊以慰先生悲愿而已。

法界者，法謂一切有為、無為之聖法，一切聖法生長依因名界，則界即依止義。一切法實性、一切如來自體名界，則界即體性義。清淨無生滅，猶如虛空，具足功德，即涅，即真如。如來出世、若不出世，此性常住，諸佛有情平等共有，即法住，即法性。《佛地經》以虛空一喻解諸十難，至詳且盡也。

法身者，體依聚義，總說為身。體依義與清淨法界之界同，聚義則身所獨，即此身聚五法為性，兼攝四智心品，不僅與清淨法界同，二轉依果皆此攝，故《金光明》說如如如如智故，是則以聚義談身。三身無別，總名法身，若以體依義談身，則身有分別，自性身名法身，受用身、變化身不名法身。自性身者，《莊嚴》由依義、心義、業義說諸佛三身平等無別，《佛地》則說各有同異，雖法身共有無別，而就能証因仍有差別，《攝論》自性法身，依業同《莊嚴》，而無量現覺則同《佛地》，《金光明經》以多複次詮法身總義，至詳且盡也。法界、法身，一切眾生平等共有者，性有也，非修得也。修得則唯佛有，下續詳之。

如來藏者，聖教染淨所由立，而聖修所由出也。《勝經》：自性清淨如來藏，而客塵煩惱所染，此染之所由立也；七法剎那不住、不種眾苦，不得厭苦樂求涅，如來藏無前際不起不滅法種諸苦得厭苦樂求涅，此淨之所由立也；在纏為如來藏，出纏為法身，若于無量煩惱藏所纏如來藏不疑惑者，于出無量煩惱藏法身亦無疑惑，此則聖修所由出也；非壞法故名為苦滅，無始無作無起無盡離盡，常住自性清淨，離一切煩惱藏，此則性有；生佛不異，而其分位則有差別，法身為煩惱所纏、生滅流轉名眾生界，厭苦舍欲、于十波羅蜜八萬四千法門而求菩提說名菩薩，永除煩惱垢、清淨住法性、一切法自在說名如來應正等覺，此則修有生佛不同。

然修之雲者：無漏種子最初本有，蘊如來藏中；次則如來藏中種子發生現行，則見道生如來家；又次正修，于如來藏除染分証法身；終則修滿，金剛道後，異熟盡空，如來藏中無垢充塞，遂坐道場究竟修得，流轉凡夫又烏能有？如佛身之于佛性，一切眾生有佛性而非佛身者，佛性為煩惱所障，而不能眼見佛性也。法身之于如來

藏，一切眾生有如來藏而非法身者，如來藏為煩惱所纏，而不能修淨于如來藏也。是故學者不恃性得而重修得也，阿賴耶即如來藏，發揮舍染義說阿賴耶，發揮取淨義說如來藏也。

菩提所生得，涅槃所顯得。生是用能義，種子發生現行，皆用能邊事；顯是常住不動義，如燈顯物，非如功能漸漸生起事。性則終古是性，用則終古是用，既說緣起，便非常住，而又說常住生起，便自語相違。故說緣起者是正智邊事，非真如邊事。〈空性品〉說：化、空二法，皆以空空故空，不能辨別誰空誰化者，雖則均在空空中不容分別，而法法凝入，亦不容淆亂故也。

然見道必須二障全伏，相應涅槃，然後菩提種起發為現行者，何耶？獨頭菩提力能羸弱，不堪自起，須得涅槃強力，助之而起。亦如所雲慧由定生，定為慧助故也。涅槃雖非緣起生因，而是緣因。是故說緣起者，起則証智邊正因事，而緣亦真如邊助因事也。此義是靈泰義，柴師解正智緣如，挾帶體相為緣，是謂以能帶相，靈泰則說相亦帶能，譬如病夫無力自起，強者挾其兩腋而起之，譬如竹十卞袋不能自起，仗腰間帶，帶而起之，病夫竹十卞袋為智，強者腰間為如，如能助智而起也。諦審此義，是增上義，作意如理，因即采之，解決一切。

乃直判之曰：真如止可為智助緣，不可遂說真如緣起也。自如來藏中本有無漏種子發為見道現行，皆生起邊事，故可昌言正智緣起也。《起信論》所以種種墮過者，墮在不立正智以對無明也，故直揭之曰：正智不可不立也，五法也，二轉依也，聖教如是也。又直揭之曰：正智對無明，不可不立也。《大般若經》說：若于如是無所有法不能了達，說為無明；《密嚴經》說：法與理相應，明了能觀，見說為正智。是故所知障，無明也；發菩提心，去二障，正智也。而不立此，轉輾墮過，職是由歟？

染淨依于藏識，迷悟依于真如，染淨自是有漏種子、無漏種子也。如來藏之淨種、阿賴耶之染種，皆名藏識也，染出于無明，淨由于正智也；無明為迷，正智為悟，以迷悟而成種；而其所以迷悟者，則依于法界，仗法界力助之而起，是故因緣須仗增上也。是故學者須由多聞熏習而起，發心有四因、四緣、四力，而皆不遺增上也，是故無明、正智為對治事也。

此義易明，而人皆蔽。讀台、賢書，粗得智如不二，即說真如緣起，而不能辯其非是生因；固定唯識，執死智如不一，但見說一法界種種義，即斥為真如緣起邪說到來，而不能辯其非無緣因；是皆徐六擔版漢，不可與之談佛法，且終身墮五裡霧中而不求廓清之道，誠可哀也！

三身義，窺基說如《十地》、《金光明》、《楞伽》、《金剛》、《般若》、《涅槃

》、《勝》、《解深密》、《法華》、《無垢稱》等經，《瑜伽》、《攝大乘》、二《般若》、《對法》、《佛地》、《唯識》、《寶性》、《莊嚴》等論，《法華》、《無垢稱》等疏，廣辯其相。然于《不增不減》、《如來藏》等經，《法界無差別論》，《法苑義林章》，亦所當究。

(1942年4月23日)

覆梅擷芸書七

來書雲：《楞伽》、《維摩》于眾生如幻義雖詳，然未說眾生一體，發生大悲母乃大難，愿為詳說一切眾生一體義。承示如此，此之知見，非直探驪珠、問鼎輕重者，那能道得？蓋此一體義不明，伺者不得精微諦當，談圓頓義終屬支離，嚴界者不得廣大自然，行大士行終非親切，有鑒于此，徑情發問，是真度眾生者，是真探法界者，故應作答也。

所雲眾生一體者，諸佛以法界為自性身，則體者法界也，談實體于眾生，而無邊法界皆同一味，是為眾生一體。若是應談法界眾生義，此有四義：一者、法界系眾生界義，是一體義；二者、眾生界屬法界義，是一體義；三者、一體義，是增上義；四者、一體義，是畢竟空義。四義悉明，一體義晰，稟其然乎。

雲何法界系眾生界是一體義耶？《勝》說：如來藏是法界藏，一切眾生皆有如來藏。眾生如來藏于法界中，有是三法：一、依本際相應法界體，說眾生有自性清淨心；二、依本際煩惱所纏法界體，說眾生客塵所染自性清淨心；三、依未來際一切法、根本一切法備具平等法界體，說眾生即法界異名，是故眾生界是法界。《涅槃》說：一切眾生皆有佛性。佛性者，諸佛皆以此為性，即如來體性也；體性是法界，而在眾生身中，是故說眾生界是法界。《涅槃》又說：佛是有情成。凡是有情皆可作佛，一切眾生皆是有情，是故眾生界是法界。《瑜伽》說無余涅槃，其無損惱寂滅中，所有功德無量無數，難可了知。凡言功德，皆不離一切眾生，是故眾生界是法界。《唯識》說：大牟尼名法。法身之牟尼必大，大于作功德度眾生，是故眾生界是法界。均是法界眾生，雲何不為一體？

此其義不明，必舍眾生而求法界，但計法界清淨，契尼夜摩，何恤焦敗是嫌，沉湎永溺！如是非法身而解脫身，非大寂滅而寂靜寂滅，無上法王永無希望。無上法王者，一切眾生界所積而成也，法界無邊，眾生界即無邊，一切法界清淨周圓，一切眾生皆得滅度，然後大業咸熙，証等正覺，是故優鉢曇華時一出現，三阿僧祇倉卒難成也。鑒于此義，是故行菩薩行，念念法界而念念眾生。

雲何眾生界屬法界是一體義耶？《般若》以實際為刊量，經言：非度有情于實際，乃度實際于實際。是故菩薩觀滿法界眾生，實為觀滿眾生法界也。是故說法界是眾

生界。經雲：眾生眾生者，即非眾生，是名眾生。無著五例釋段段文，釋"即非眾生"句為安立第一義，第一義者，清淨法界是也。是故說法界是眾生界。經又言：胎卵濕化等滅度，實無一眾生得滅度者，眾生本無，實唯一法界是也。是故說法界是眾生界。眾生均是法界，雲何不為一體？

此其義不明，一者、必謂眾生實有、實度眾生，是則生實度實。雲何畢竟空義？唯畢竟空是佛境界，非畢竟空雲何為佛弟子？經言：若菩薩有眾生想者，即非菩薩，說非菩薩，則外魔也。《般若》以無所得為方便而求一切智智，又雲學法界于一切法、學一切法于法界，若修學菩薩最初不明無所得佛境，而惘惘然行一切法菩薩行，則功德愈弘大，有所得者亦必與俱弘大，又安所望于歸其有極？二者、必謂眾生與法界為二，是則眾生非法界中物，彼摩訶衍以他為自者，終不得解而疑無根，無根之修雖信不了，雖堅強不息，其後遇緣必仍退墮于聲聞小乘。又寂滅寂靜之法界如此，希奇勝赫之功德如彼，既不相融矣，則《華嚴》之舉足下足當愿眾生，《般若》之舉足下足求本性空，均無刹那互相容忍，何以聖教動稱不二法門？若知唯一法界，凡所修行非度一切眾生，乃圓滿于一法界，斯則一切無礙，冰釋渙然。

雲何一體義是增上義耶？《瑜伽》說阿賴耶相，謂賴耶亦是有情互起根本，一切有情相望，互為增上緣故，所以者何？無有有情與余有情互相見等時，不生苦樂等更相受用，由此道理，當知有情互為增上緣。《唯識》因緣不涉外境，而《瑜伽》增上相網如一，眾生所以一體也。眾生一體，于法界中，何獨非然？是故華嚴世界帝網重重，于一毛孔中容十方世界，將此都世界並碎為微塵，亦一一塵中又具無邊界。世界無增減，眾生無增減，夫然後廣大不可思議，則增上義之所致也。

此其義不明，一者方廣道人，說圓頓象，墮一合相，無所條理，無所解析，莽莽蒙蒙，幾何不類娑毗伽羅所談冥諦。二者因噎廢食，以執因緣，卻忘增上，但聞一體惶懼不安，豈知以一體義法乃廣大，以一體義眾乃親切，以法日廣智乃日增，以眾日親悲乃日熾，念念一體，悲智所系。此之所謂摩訶衍，非幾近于聲聞乘，《唯識》析義雖甚精微，而《瑜伽》行修卻獨廣大，行大士者，當一談增上義于《瑜伽》歟？

雲何一體義是畢竟空耶？諸佛是空，法界是空，一切法是空，一切眾生是空，空是實相，實相是刊量，故得畢竟空相應，去菩提不遠。來書所雲《楞伽》觀眾生如壁畫，《維摩》觀眾生如五大、六陰，而不說眾生一體，雲何起悲者？此正是說眾生畢竟實相，此正是說眾生以法界畢竟空為一體，此正是說無緣大悲之所由起。菩薩以實相為刊量，無念無依不在實相中，眾生是吾一體，一體空而不空，以是悲起；眾生同一法界，法界空而不空，以是悲起。《思益梵天經》雲：一切法無我、人、眾生、壽者，而眾生以為有，菩薩于此而起大悲；一切法無體、無住、無執藏主宰事物我所，而眾生以為有，菩薩于此而起大悲；一切法無生、無滅、無垢離三毒、無去來、無造作戲論，而眾生以為有，菩薩于此而起大悲；一切法空、無相、無愿

，緣生靜寂，而眾生以為不然，菩薩于此而起大悲。菩薩悲起而行修，諸佛悲起而立教，若眾生自知畢竟空，菩薩不必行修，佛固不必建立至教也。是悲切于一體，悲切于一體之人，不自知其實相空也。

此其義不明，則所起之悲皆不外世間相，皆有緣之悲。骨肉之痛，痛徹心脾，悲也，而非大悲也。觀一切眾生百一十苦而起悲，大悲也，而非究竟大悲也，皆不免有情緣與法緣也。夫有情與法緣皆非二空，異畢竟空義，君子不以為極至。《華嚴》：善財入彌勒樓閣，羨艷無邊功德，彌勒彈指，使其出定，示為夢境。《華嚴》敘述功德不可思議，而皆謂為夢現，則畢竟空義，無緣之悲之所生故也，斯乃所謂極至也。發智觀空，空應智徹，然後悲竟，是故根本大悲生于智，而增上大智生于悲。

四義如此，是則眾生一體是法界義，是畢竟空義，佛境在是，佛境菩薩行在是，先生以為何如？

（1942年5月19日）

（選自《內學雜著》卷下，《歐陽競無先生內外學》第十二冊）

第五編 《儒學通論》

夏聲說

人必有所以為人，然後能人，然後謂之曰人。人之所以為人者，惻隱、羞惡、是非之心是也。堂下穀觶，堂上不忍，況乎國將亡、族將滅、種將絕？痛之所不勝，不得不大聲疾呼，奔走號。大聲疾呼，奔走號，而後舉國震悚，萬眾一心，出其才力智能以自拯。蹴爾嗟來，寧死不屑，況乎謂他人君、他人父，妻子生命系其所屬？恥之所不堪，不得不雷聲獅吼，誅心褫魄。雷聲獅吼，誅心褫魄，而後大盜不能移國，神奸不能蠹國，強暴不能噬國。顛倒不平昭釋于路人，況乎周孔例桀跖、操檜儕曾史？傾天柱地維，溺人心于必死，忍之所不能，不得不直聲執言，日光明照。直聲執言，日光明照，而後莠不能亂苗，紫不能奪朱，鄉愿不能亂德。

本人之所以為人之心，以發其至大至剛至直于聲，稱之為夏聲。無惻隱之心，非人也；無羞惡之心，非人也；無是非之心，非人也；是則無人而無夏聲也。中國蠻貊之所之，舟車人力之所至，日月霜露之所被，吾夏聲一呼，宜乎盡人憤悱，而相應以起也。孔子之道不著，軻之死不得其傳，夏聲乃不得不發。夏聲者，孔子之中庸，孟子浩然之氣也。夏聲者，以一言之曰誠，以二言之曰中庸，以三言之曰直方大，以四言之曰浩然之氣，人之所以為人，其為物不二故也。

中庸何以是夏聲耶？君子之道費而隱，鬼神之德微之顯，合費隱微顯于一物，謂之為中庸，至真之物不可以費隱微顯囿也。民質之日用飲食，即包並乎知化窮神，天命之微妙玄通，無以異乎日月呈露。小以誠小，大以誠大，幽以誠幽，明以誠明，不誠無物，誠固物之終始者也。何謂終始？譬如車行，跬步其始，千裡其終，輪廓錐地，轉點轉積，以得一周，積周成裡，積裡成千，盈億累兆之周，而不能缺錐地之一點，缺一點于錐地，即不能成周成裡，其勢然也。參天贊地，點之至于千裡也，愚不肖知能，點之起于跬步也；受命製禮，點之至于千裡也，不睹不聞，點之起于跬步也。千裡之點即跬步之點，點固無殊也，舉費即舉隱也，舉微即舉顯也，費而不遺隱，微而不離顯也。真實周通是謂中庸，故曰夏聲為中庸也。是則直方大之夏聲，亦誠而已也。

今夫人心之奸偽，而無術以止之也，為之斗斛權衡以量之稱之，則並與斗斛權衡而竊之；為之符璽仁義以信之矯之，則並與符璽仁義而竊之。治老氏學者曰：掊斗折衡而民不爭，焚符破璽而民朴鄙，攘棄仁義而天下之德玄同矣！無為而自然，希夷微而一。此雖得中庸微之顯之理，而不得其費而隱之道。據未來將至之幾，而不順素位現在之誠。若是謂之希聲，異方直大之夏聲，包藏禍心者，又並此而竊之曰老成謀國，委曲以將事，于是鬼域充于朝野，國真無以為國矣！致用之所至，容或一相似，而以為大本大經者，則君子不由也。

國之瘠貧，民之寡恩，聞墨氏之風者，又作而起矣，節用短喪薄葬，裁物質之贏虧，以抑其性情之舒發。君子曰不然，誠不可戕賊，而均則無貧。兼相愛，交相利，

愛人者，人必從而愛之；利人者，人必從而利之。君子曰不然。吾誠于身而愛身，吾誠于人而愛人，若為人之愛我而兼愛人，則愛不誠，所為二本也。此亦異乎直方大之夏聲也，君子不由也。

君子之正人心也，必中庸是由，不誠無物，故君子貴誠。誠非第成己也，所以成物也，故至誠無息。誠則至矣，盡矣，蔑以加矣！請益，曰不息而已。不息則久而徵，博厚而高明。昭昭之天不息，而日月星辰以系；撮土之地不息，而華岳河海以置；卷石之小不息，而草木禽獸寶藏以聚；一勺之水不息，而蛟龍魚鱉以生，貨財以殖。天之所以為天，文王之所以為文，皆于此不息寓也，又何人心之不得其正哉！此不測之義然矣。

請舍不可思議，而証以目前淺義，亦無不效也，久于其道，天下化成故也。久則是非之大明也，神咒呼名，鬼域藏形，效一。久則識種之觸應也，人非一成善惡環生，效二。久則有徵之足信也，冰山非倚，金石足恃，效三。久則主客之勢移也，喻利拜金，聞義依心，效四。久則多寡之勢敵也，敵彼咻楚，丁寧鐘鼓，效五。久則環境之變遷也，素視琦寶，須臾弁髦，效六。久則仁義未嘗不利也，信遍國人，廣譽施身，效七。久則監偽之無終也，趙孟貴賤，董叔系援，效八。久則清議之不容也，落魄無歸，有無依，效九。久則垢穢之無傷也，四凶不，元愷迭出，效十。故曰君子正人心也，必中庸是由也，是則救人以夏聲，亦久于其道而已也。

古之所謂夏聲者，詩三百篇，聖賢發憤之所作，《節南山》以下諸詩是也。《孟子》七篇，則疾雷破山風震海，直方大之聲，振聾啟聵于末世，無以逾焉。勾踐滅吳精神，見于《吳語》、《越語》。《史》、《漢》之刺客游俠、黨錮獨行，凜凜有生氣。下而至于韓之文，杜甫、陸游之詩，辛棄疾之詞，史可法之疏，乃至忠肝義膽，片言舒郁，莫不皆夏聲之所寄。

夫夏聲者，人之所以為人之心，人莫不皆然，吾烏知今必異于古所雲？丁寧淳于振鐸，急起行之而已矣！

(1936)

(選自《孔學雜著》，收入《歐陽競無先生內外學》第十四冊)

孔佛

有體，有用，有依體之用，有用滿之體。宇宙萬有，群眾思慮，莫不依于一心。心必有其體而後可心，狀體之相貌，強而名之曰寂，非寂而誰足以當之？心必有其用而後能心，狀用之相貌，強而名之曰智，非智而誰有以能之？智非尋常分別之慧也，必有以見寂，而常與寂相應也。宇宙萬有，無非幻化，群眾思慮，莫非習成。于斯時也，幻有廓然，習思不起，一切皆空，身涉其境，謂之見寂；見寂而不住，百為萬事，以致其巧便之能，謂之為智。

此智與寂，須臾不離也，若須臾離，則邪見偏見，執斷執常，狂瞽異端，是非蜂起。須臾不離，則凡所為，叢脞而條理井然，權變而適當其可，大小內外，時措之宜，無不自得，寂靜而有為，有為而寂靜，斯謂之為應體之用。是用也，與體相依，而致力圖功，乃在于用。是故正名謂之為行。寂則有全體大寂，智則有一切智智。全體大寂盡人所有，聖亦不得而增，愚亦不得而減，障而不顯之謂凡，障淨全顯之謂聖。一切智智則非盡人有，所謂常人但有其種，種須發生，生充其量然後乃有。寂以智生而顯，智以障去而生，障以修積而淨。淨一分障，生一分智，顯一分寂。淨纖悉細障，生一切智智，顯全體大寂。寂固無為也，不生也，仗智之有為、智之發生以為顯也。

此寂與智，亦須臾不離也。若須臾離，則灰身滅智、沉空趣寂，但了一身，焉知大道？須臾不離，則觀一切無所有，而不舍離一切眾生，必使宇宙齊放光明，然後真身証住清淨，斯謂之為用滿之體。是體也，以用而顯，而目注心營，乃在于體，是故正名謂之為果。知行果之解義者，可以談孔、佛矣。

孔道，依體之用也，行也。天行健之謂性；君子法天，自強不息之謂道；天命不已，天之所以為天；文德之純，文之所以為文。子在川上曰：逝者如斯夫，不舍晝夜；健也，不息也，不已也，純也，不舍也，皆所以為行也。然君子素位而行，思不出位，位也者，中庸也，寂然不動之謂中，感而遂通天下之故之謂庸，知能大小、費顯、隱微不可得而限之，隨舉一隅，畢張全體，行然後可以素位。知如此之為中庸，然後可以入德。入德之初誠也，及其成功至誠也，無非誠也，誠固物之終始也，必極于鬼神不測、無聲無臭，是之謂見寂之智，是之謂應體之用。

佛法，依體之用，而用滿之體也，行而果也。二轉依之謂佛，空其所知之障，轉所依為智曰菩提；空其煩惱之障，轉所依為寂曰涅槃。有本來自性清淨涅槃，具諸功德無生無滅，湛若虛空，所謂全體大寂也，名之曰法身。有無余涅槃，煩惱既盡，依滅無余，由此而証得全體大寂也，名之曰解脫。有無住涅槃，無余無為，為令眾生皆入無余，則必有為，而于無為依而不住，所謂依寂之智也，名之曰般若。由般若而解脫，由解脫而法身，頓証之時，三德不分，故談果者，皆舉無余涅槃也。所謂有因有因因，有果有果果，菩提為果，涅槃為果果是也。証大涅槃則法界

清淨，法界一真，常我樂淨，安隱而住也。何謂常我樂淨耶？金剛不壞之謂常，得八自在、離系超然、不屬於他之謂我，非受非覺、上妙無倫寂滅之謂樂，無障無染、一味平等之謂淨。有如是不可思議之鄉，是故結愿在是，趣向在是，歸止究竟在是也。頓空其分別所生之二障，窺見真如，謂之見道。漸空其無始以來之二障，真如多分顯現，謂為修道。二障全空，真如出纏，頓証佛果，圓滿轉依，謂為究竟道。故曰依體之用，而用滿之體也。故曰行而果也。

上來所說孔、佛如此。知孔道之為行者說生生，生生，行也，非流轉于有漏，奔于習染也。知佛法之為果者說無生，無生，果也，非熏歇、燼滅、光沉、響絕之無也。淆孔于佛，壞無生義；淆佛于孔，壞生生義。知生生而無生，是依寂之智，則知行之相貌有如此也。知無生而無不生，是智顯之寂，則知果之相貌有如此也。佛與孔之所判者，判之于至不至、滿不滿也，其為當理，適義一也。

(1936)

(選自《孔學雜著》，收入《歐陽競無先生內外學》第十四冊)

孔佛概論之概論

佛學淵而廣，孔學簡而晦，概論所以需要也。顧概論亦難，今日且談概論中之概論。

毗盧遮那頂上行，六經皆我注腳，求人之所以為人斯已耳，何佛之學，何孔之學？然聖人先得我心之所同然者，求然之同故，佛須學，孔須學。孔學是菩薩分學，佛學則全部分學也。斯義亦據聖言量耳。知必以聖言為量，故不具四例，不可以為學。

一、不可以凡夫思想為基，而必以等流無漏為基也。有漏稱凡夫，雜故染故，無量劫來煩惱擾亂，識海汪洋，充滿其種。譬如讀書，豈能一字一字如定者數息終日不搖，處囊之錐東西突出，空中樓閣結撰奔馳，一息之條貫不能，萬裡之蛛絲安索？鹽車之渾水無靈，塵刹之根株何鑒？以如是雜染心判斷不可思議無上法門，而曰聖言之量不如我思之量也，天下有如是理耶？若夫聖言，則等流無漏也，從心所欲不逾矩也。畏天命，畏大人，畏聖人之言，君子有三畏；小人則不知天命而不畏也，狎大人，侮聖人之言，烏足以為學？

二、不可主觀，而必客觀也。主觀心實，客觀心虛；主觀有對，客觀無對；實故不入，虛故能入；有對故封拒，無對故到處皆學。主觀者先有結論，但采納以為敷佐，可利用則斷章節取，有何義之研討？客觀者先無結論，博學審問，慎思明辨，比較而擇善，舍己而從人。主觀有心，客觀無心。深山有寶，無心于寶者得之，故主觀不可以為學。

三、不可宥于世間見，而必超于不思議也。公孫宏曲學何世無論矣，子誠齊人，但知管、晏，且畏蒍蕢、皇，況秕糠堯、舜？是故順世外道，無當于理事。仲尼之徒，不道乎桓、文，蓋身在山中，不識匡廬真面，欲窮千裡，要知更上一層也。豪傑之士，舉足下足，自道場來，動念生心，無非尚友。臨濟觀佛有鼻有口，曰：我可作佛，他日竟作祖開宗。象山幼時思天際不得，讀古往今來，悟無窮無盡，遂為南宋大儒。一鄉之迷傾一國，一國之迷傾天下，天下盡迷，誰傾之哉？如有，必為聖人之志者，是必超于不可思議也。

四、不可以結論處置懷疑，而必以學問思辨解決懷疑也。天下有二種人：一盲從，蓋無知識不用思想者，此無論矣。二懷疑，是有知識能用思想者，學以是而入，亦以是而得也。疑必求析，若急于析，則稍相應，必作結論以是處置懷疑者，古之人、今之人，驅而內諸罟陷阱之中，蓋比比也。吾嘗終日而思矣，不如須臾之所學也。學不析則問，能問于不能，多問于寡，則無不可問矣。問而不析，又思，思日慎有矩有繩矣。思猶不析，則徹底而剖辨之，所謂明辨是也。分析必于極微，至教不可以人情也。以是而析疑，而疑可析，結論乃得焉。

四例既具，可學矣，可以談孔學、佛學概論矣。略舉四義而談：一、寂滅寂靜義；二、用依于體義；三、相應不二義；四、舍染取淨義。四義皆本諸二家之經，佛家則凡大乘經，除疑偽者皆是；孔家則性道如《中庸》、《大學》、《論語》、《周易》皆是，文章如《詩》、《書》、《三禮》、《春秋》皆是。

一、寂滅寂靜義。

自韓、歐諸文學家，誤解清淨寂滅以為消極無物、世界淪亡之義，于是千有余年讎棄根本，不識性命所歸，寧非冤痛！原夫宇宙人生，必有所依以為命者，此為依之物，舍寂之一字，誰堪其能？是則，寂之為本休，無可移易之理也。寂非無物也。寂滅寂靜，即是涅槃。燈滅爐存，垢盡衣存，煩惱滅除，一真清淨，所謂人欲淨盡，天理純全是也。欲明斯旨，佛家當讀《大涅槃經》、《瑜伽師地論·無余依地》也，孔家應讀《學》、《庸》、《周易》也。孔道概于《學》、《庸》，《大學》之道又綱領于"在止于至善"一句，至善即寂滅寂靜是也。何謂善？一陰一陽之謂道，繼之者善也，成之者性也。就相應寂滅而言謂之道，成是無欠謂之性，繼此不斷謂之善，道也、性也、善也，其極一也。善而曰至，何耶？天命之謂性，于穆不已之謂天，無聲臭之謂于穆。上天之載，無聲無臭，至矣！則至善之謂無聲臭也。至善為無聲臭，非寂滅寂靜而何耶？明其明德而在止至善，非歸極于寂滅寂靜而何耶？不知寂滅寂靜，是無本之學，何有于學，何有于佛學，何有于孔學？吾為揭櫫孔學、佛學之旨于經，而得二言焉。曰：古之欲明明德于天下者，我皆令入涅槃而滅度之。

二、用依于體義。

寂滅寂靜，常也，不生不滅也，真如也，涅槃也，體也；變生萬有，無常也，生滅也，正智也，菩提也，用也。體則終古不動，用則畢竟是動。動非凝然，非凝然者不為主宰，故動必依于不動，故用必依于體也。此依即依他起之依，依他有淨即菩提是，依他有染即無明十二因緣是。蓋用之為物，變動不居非守故，常幻化而幻化之，是曰菩提；幻化而真執之，是曰無明也；用之性質有如此也。是故說用依體可也，有去來故也；說體隨緣不可也，祖父從來不出門也。大衍之數五十，其用四十有九，余一不用也。不用者何也？與體相應也。何以必與體相應耶？蓋不用而後能生用，用根于不用，其用乃神。孔家肝髓，實在乎此。發而皆中節，根于未發之中；感而遂通天下之故，根于寂然不動；兩儀、四象、八卦，根于太極；皆是也。然此不用，非即是體。何也？仍是五十內之數，數之性質猶在也。凡孔家言性、言命、言天，皆依體之用也。易之道廣矣、備矣，而命名為易，易者，用也：曰交易，陰陽交而成卦也；曰變易，六爻發揮，惟變是適也；曰不易，與體相應，無思無為，而能冒天下之道，所謂生生之謂易是也。吾嘗有言：孔學依體之用也，佛學則依體之用而用滿之體也。

三、相應不二義。

用依于體，而用猶在，不可說一；明明相依，不可說二；是故闡《般若》義者曰不二法門，是故闡《瑜伽》義者曰相應善巧。既曰相依矣，相應于一處矣，無孤立之寂，亦無獨行之智，而言無余涅槃者，就寂而詮寂故也。獨陽不長，不可離陰而談陽也，而乾之為卦，六爻純陽，就陽而詮陽也；孤陰不生，詮坤亦爾也。是故談涅槃者須知三德，伊字三點，不縱不橫，不即不離，是涅槃也。唯有不二法門，唯有相應善巧之可談也。

四、舍染取淨義。

舍染取淨，立教之原，無著菩薩顯揚聖教，作《顯揚聖教論》，一部論旨，唯明是義而已。扶陽抑陰，孔學之教：陽，善也、淨也、君子也；陰，惡也、染也、小人也。扶抑即取舍，則孔亦舍染取淨也。《易》之、垢、復、剝、泰、否六卦，于義尤顯，比而觀之，可以知要。

，揚于王庭，孚號有厲。陰勢已微，猶揚猶號者，極其力而去之也。

垢，女壯，勿用取女。陰之初起，侈而言之曰壯，厲而禁之曰勿用也。

復，至日閉關，商旅不行，後不省方。養之令長如是。

剝，碩果不食。珍之護惜如是。

泰，小往大來，君子道長，小人道消。

否，大往小來，君子道消，小人道長。往來消長而判泰否，其義又如是。

了此四義，可知人之所以為人，天之所以為天，孔、佛為二，循序漸進，極深研幾，是在智者。

（選自支那內學院蜀院1941年刻《孔學雜著》，收入《歐陽競無先生內外學》第十四冊）

第六編 《儒典研究》

《論語十一篇讀》敘

佛學有結集，有毗曇，三藏浩汗，循其統緒而可讀。孔學無是，既扼秦火，又複年堙，于是老師宿儒，曾不能答具體之求，而世無真孔。世既不得真孔，尊亦何益于尊，謗亦烏乎雲謗？苟可取而利用，崇之如天，或不利于其私，墜之如淵，于孔何與哉！東海有聖人焉，此心同，此理同也；西海有聖人焉，此心同，此理同也。而愚者不然，曰此禪也、非聖也，死于門戶之拘，一任眾芳蕪穢，天下不知務者又如此也。嗚呼！孔學亡矣。若能精內典，爛般若，興晉以秦者，文武之道猶不盡墜于地歟？

般若直下明心，孔亦直下明心，蓋墨子短喪薄葬，一切由事起；孔子食旨不甘、聞樂不樂，一切由心起。直下明心，不愿乎外，是之謂一；無入而不自得焉，是之謂貫也。然因是而有疑意見之心直下危險者，而不知般若固自性離言，但行于義也，般若固無知也。般若離言行義，孔亦離言行義，所謂時行物生，天亦何言也。般若無知，孔亦無知，所謂問我空空，叩端而竭也。然因是而又有疑乎？純任天然墮落無事甲裡者，而不知般若固相似相續而不絕也。般若相似相續，孔亦相似相續，所謂逝者如斯，不舍晝夜也。于穆不已，天之所以為天；至誠無息，人之所以為人也。非盡心知性不足以知天，非知天之所以為天，不足以知人；非知人之所以為人，不足以知仁，仁者，人也，孔之所以為孔也。如是集《性天篇》而讀也。直下明心不由事起，故求仁得仁，無與于父命天倫，殷有三仁，無與于去奴與死，忠清難行而無與于仁，欲仁至仁而無與于遠。仁也，性天也，一也，然達于事，則分別非一也。事親，仁也；從兄，義也；知不去乎二者、智也；節文斯二者、禮也；樂斯二者、而烏可以已，樂也。義集而快足也，意誠而快足也，有諸己之謂信也，是則樂也者，信也。興詩立禮而成于樂也，知之好之不如其樂之也。是故孔顏之樂，豈吟風弄月以歸而倉卒可尋也？如是集《仁篇》而讀，集《禮篇》而讀，集《達道篇》而讀，集《為政篇》而讀也。直下明心有諸己而信，循至美大聖神而高堅前後不可為象，然有其方，則下學而上達是也。博文而約禮，文行而忠信，不息悠久則博大而高明，如是集《為學篇》而讀也。溫恭而安，悲愍而為，如是集《聖德篇》而讀也。始之集《勸學》、《君子小人篇》而讀，以定其趣也。終之集《群弟子》、《古今人篇》而讀，以博其義也。

孫輩讀經，苦無課本，類而聚之，曰《論語十一篇讀》也。倉卒應求，粗疏無當，若必組織成統緒談，須萃群經，大其結集，然後有濟。此儒者所有事也。嗚呼！先疇畎畝，蕪穢如斯，在我後之人，又安能忍與此終古哉！

民國二十年辛未（1931）十月歐陽漸敘于支那內學院

（選自《孔學雜著》，載《歐陽競無先生內外學》第十四冊）

《孟子十篇讀》敘

生孟子後二千余年，取其書而讀之。若周穆王游化人之居，光影所照，目眩不得視，音響所來，耳亂不能聽，何物聖言，奪人神識若是！蓋浩然之氣，盛大流行，窮天地亙萬古而常新者也。

浩然之氣集義所生，是故孔子言仁，孟子言義。羞惡之心之謂義，人能充無受爾汝之實，無所往而不為義。名節事極大，生死事極小。唯一義行，恣肆縱橫，舉之而無上，揮之而無旁，敵之而無當，至大至剛，何弱何強，天下若此，而可侮哉？生死事極大，名節事極小。轉移于時勢，有人而無己，偷習中于膏肓，無往而非畏葸，一卻一前，自伐自毀，輕河山于一擲，坐以待斃而已。均之為國也，擇術不可不慎也。

月征日邁，鏗而不舍于物質之有形，貨財而甲兵。月征日邁，鏗而不舍于道義之無形，磅礴而彌綸。其致力也平，其充分也等，固無足輕重于其間者矣。然而有形有律，受配于數常不能越量而非常，聽命于時勢不敢自主而超勢，倚物而後起，不能憑空而憤起，一機械之器而已矣。若夫無形，履虛若實，變動不居，匪守故常，不可思議，優敗而劣勝，甚險而至平，自倚于長城，其游于天之庭乎？是謀國之楨干也，奈何駭視扶蘇而忘其楨干乎？楨干先撥而扶蘇不害乎？利或時不利，義則無不利，吾故曰均之為國也，擇術不可不慎也。

今天下亡矣，橫議熾矣！有奮勇自拔者，彈之曰唱高調，而上達之機斬矣；有壞法逾閑者，護之曰私德不干涉，而下流之居保障矣。上之日偷日懦，而無所謂國矣；下之自衣自食，而無所謂國矣。

十

行，直不知人間有羞恥事矣！沉淵溺淖，至矣極矣！疾雷破山風振海，十日並出，金石流，土山焦，振聾聵于今日者，其唯《孟子》乎？

人之所以為人者，氣也，節也；國之所以為國者，民也；是三者、天下之大本也，如是讀《氣第一》、《士第二》、《民第三》。仲尼之徒，崇本而黜末，如是讀《義利王霸第四》。民往而歸之曰王，歸之于仁也，如是讀《仁政（上下）第五》。事親者仁之實也，孝弟者堯舜之道也，如是讀《孝弟第六》。父子主恩，君臣朋友以義合，如是讀《君臣朋友第七》。仁義根于學，乃所愿則學孔子也，孔子之學，誠而已矣，孟之學孔，易簡而快足是矣。性善也，義內也，四端固有，萬物皆備也，不慮而知、不學而能也，立乎其大，小不能奪也，人人親其親、長其長，而天下平也，凡若此者，易簡也。充其量也，盡其才也，盈科而後進，放乎四海也，自得居安左右逢源也，凡若此者快足也，如是讀《學第八》。孔子之學一貫，當下安心

，孺子入井之惻隱，即親死委壑之類也。墨子兼愛，二本而失本，孰不可忍也，如是讀《非彼第九》。有私淑艾者，如是讀《自宗第十》。

疾雷破山風振海，十日並出，金石流，土山焦，振聾聵于今日者，其唯孟子乎！

民國二十一年（1932）二月歐陽漸敘于支那內學院

（選自《四書讀》，《歐陽競無先生內外學》第二十六冊）

《中庸讀》敘

中庸，以一言之，曰誠；以二言之，曰中庸、曰中和、曰忠恕；以三言之，曰費而隱、曰微之顯。無所謂天地萬物、中外古今，止是一誠；無所謂天下國家、禮樂政刑，止是一誠；無所謂智愚、賢不肖、知能大小、曲直險夷，止是一誠。誠至，則生天、生地、生物不測；誠不至，則一切俱無。心非其心，境非其境，事非其事。以之為己，烏乎能存；以之為人，烏乎能信；以之為天下國家，與接為構，日以心斗，變態誰究，又烏乎能行？及其至也，不敢知其人，不足以為國，豈不哀哉！

誠者，物之終始，但喜怒哀樂未發之中，而天下之大本以立；但庸德庸言之行謹，而天下之達道以經綸。天下大本，非貫徹于無聲無臭、不睹不聞之無可貫徹，不足以立也；天下達道，非推極于繼志述事、參天贊地之無可推極，不足以經綸也。中庸之實，一曰費而隱，逆而窮其源也；一曰微之顯，順而竟其委也。不如是，不足盡終始之量也；不如是，不足盡中庸之量也。道通為一，非畛域，中即淵深，庸即高明，亦何怪哉？

道之不明也，一言中庸，而一切過不及之名、平常之名以至。何者過不及，何者平常？但是空言，都無實事。明明經釋"喜怒哀樂未發謂之中"，觀喜怒哀樂未發時氣象，即行實地，不勞揣摩。明明經文"庸德之行"，繼以"素位而行"，素患難，行患難，為人君止于仁，即庸德之行也。千有余年，後儒之說行而聖訓晦，名句之學徇而實事疏，否塞晦盲，釀為風俗，沉淵股，致死藐諸孤，精誠格鬼神，獨不利儒者之口。天下奇男子，行人所不能行，而不能以一盼。鄉黨自好者流，居之似忠信，行之似廉潔，全家保妻子，簞食豆羹見于色，又何恤乎邦之阨陞？黠者于是乘其弊，竊其器，以鉗製一世，而複任艱無伎，私熾無智。于是乎，日蹙國百裡，強者乃吞噬不已。揆厥病源，皆不識中庸之道之所致也，而豈細故哉？

或問：如子之言，中庸之道高深若此，聖人之事，常人烏能？

答曰：萬物皆備，四端固有，但是有心，皆是聖人；聖人與人同，人自異于聖，直下自承，念念悉誠，則亦博厚配地、高明配天而已。若本非聖，而求作聖，望空出華，寧非虛妄？！

又問：直下自承，心若不純，險不可言，敢鹵莽耶？

答曰：誠者自成也，待他而成，雜而不純；現成自成，焉得不純？不學而知，其良知也，何險之有？不此之恃，複何所恃？若他可恃，何必定此？惟其門外天涯，皆荊棘也。

又問：世態萬變，而獨一誠，迂不可行，不合世情，奈何？

答曰：至誠無息，不言而信，參前倚衡，夫然後行。誠為物體，情偽無物，無物必反，為時不遠。

又問：天下國家，萬幾叢脞，獨以一誠耶？

答曰：凡為天下國家，有九經；其所以行之者，一也。

又問：若是，則枯坐寂然，大道是禪，何須學耶？

答曰：禪亦須學，況此非禪。中庸有所以為中庸者，尊德性而道問學是也。為性而學，學以盡性，是宗旨也。認明宗旨，學問思辨大有事在。唯天下至誠，為能聰明睿知，足以有臨也；寬裕溫柔，足以有容也；發強剛毅，足以有執也；齊莊中正，足以有敬也；文理密察，足以有別也，然後溥博淵泉而時出之。誰謂是誠，而顧可以不學哉！

嗚呼！千有余年，中庸不明，人不務誠，失其本心，大義不行，浩然之氣不存，蓋已非複人間世矣。南渡君臣，偷安寡恥，河山恢復，初亦未始無心，但恨不能作氣。日月馬十馬十，安然無事，自有肺腸，俾虜卒狂，父母蒼天，人之無良。陸象山發憤，作《大人詩》曰：

從來膽大胸膈寬，

虎豹虬龍億萬千，

從頭收拾一口吞。

有時此輩未妥帖，

哮吼大嚼無豪全。

朝飲渤海水，暮宿昆侖巔，

連山以為琴，長河為之弦。

萬古不傳音，吾當為君宣。

嗟乎象山！天下大亂，孔學將亡，吾烏得其人，而旦暮遇之？

民國二十一年（1932）十月歐陽漸敘于支那內學院

（選自《歐陽競無先生內外學》第二十五冊）

《大學王注讀》敘

擅一世之雄者，以其能欺人也。雖然，人不可欺，自欺而已。自欺者無志，不圖勝事而甘劣跡；自欺者無氣，不勝艱巨，巧于趨避；自欺者無恥，不恤鰥寡，但畏強御；自欺者喪心，不事清明，而工虛妄；自欺者自戕，未有虛妄而不速亡。末世不自欺者，誰哉？

宜救火追亡，講大學之道。陽明之言曰：大學之道，誠意而已矣。誠意之道，毋自欺而已矣。人禽判，此也；聖狂判，此也；治亂興亡判，此也。如是其重大也，如是其切近也，如是其易簡也！或以為高遠難行，或以為迂闊無當，終不勝其人欲之私，而不一試焉，可痛哉！

陽明又言曰：意者心之動，知者意之體，物者意之用。是則知也者，即心之體，心之動體也。是則此知非知見之知，而心體之知也；知為心體，即《中庸》之誠也。誠者物之終始，無物非誠，即無物非知也。如其誠而誠之，謂之致知，即謂之誠意。用當而體複，謂之格物，即謂之誠意，如惡惡臭、如好好色，謂之誠意，即謂之致知。慎獨謂之誠意，即謂之格物。夫道一而已矣，屋漏是獨，大廷亦獨；進德是慎獨，修業亦慎獨。道不可須臾離，慎獨可須臾離乎！此《淇澳》之詩所以為格物事也。道學者，道問學也；自修者，尊德性也。恂栗者，盡精微也；威儀者，致廣大也；優優大哉，威儀三千是也。是則《中庸》之所以主張而貫徹者，皆格物事也。孔道至大，一言以蔽之，曰：古之欲明明德于天下者，天下一人也，萬物一體也，忝忝以量烏乎丈，銖銖以稱烏乎鈞？器原有若是之廣且大也，必先治其國，乃至致知在格物者，費而隱也；物格而後知致，乃至國治而後天下平者，微之顯也，皆誠之事也。故曰：大學之道，誠意而已矣。

曾子曰：夫子之道，忠恕而已矣。中其心之謂忠，如其心之謂恕，忠恕之道，誠意而已矣。忠恕所以正心，所以修齊治平，亦誠意而已矣。忠恕之道不行，忿[*嚏]四者有所，心不在不正，而身不修也。忿[*嚏]何害？害于有所故也。王赫斯怒，臨事而懼，仁者樂山，作易者有優患，心在無所，亦何害也。忠恕之道不行，親愛五者而辟，身不修而家不齊也。老安友信少懷之志，明德于天下之志，忠恕之志也。曰孝者所以事君，曰上老老而民興孝，非老者安之乎？曰弟者所以事長，曰上長長而民興弟，非朋友信之乎？曰慈者所以使眾，曰上恤孤而民不悖，非少者懷之乎？而曰所藏乎身必恕，是以君子有[(豐+刀)/糸]矩之道，非忠恕之是事乎？則亦誠意而已矣！

民為邦本，長國家者，其知之乎？民之所好，好之；民之所惡，惡之；此之謂民之父母。好人之所惡，惡人之所好，是謂拂人之性，災必逮夫身。民具爾瞻，辟則天下，峻命不易，失眾則失國。聖人所以重民，所以垂示于為民上者，丁寧反覆，深且切矣，長國家者亦知懼乎？眾怒難犯，專欲難成，亦知反乎？孔子歿，大學廢，

秦漢數千年來，體國經野，建官分職。豈為民極？子孫帝王萬世之業，視民之疾痛，固若秦越人之肥瘠。國有大災，民自拯之；道路橋梁，民自理之；強鄰噬食，民自起而抗之。匪唯忽之，又從而撓之害之。嫉有技，聚斂悖入，亦既災害並至，善者無如之何矣。嗟乎！天下不忠恕，死喪無日哉。嗚呼！為民上者，庶幾念民而忠恕哉。

民國二十一年（1932）十月歐陽漸敘于支那內學院

附：讀《大學》十義

讀《大學王注》竟，有須闡明者十義，錄之為行遠升高之助。

一曰大人之學也。大人亦不過充人之量而已，四端皆具而誰非人？大人亦不過與天地合其德而已，盡性知天而誰無性？故人亦第為大人，又何事而非大人？然而人皆可堯舜，而堯舜不再見，何耶？風氣力強，習非成是。自有生而少長而老死，自家庭而朋友而國人，曾不聞先王之法言，日夜與非聖為伍，交相習也，成自然也。冉冉悠悠，沓沓泄泄，溺淖失知，自視日卑，見義不為，危機無惕。譬如二人俱值非常，有鴻鵠志者，倉卒定謀，化家為國；作富家翁者，徘徊終夜，戀棧而亡。蓋一則有觸斯通，一則本無其事故也。而況窮性命之源，了生人之本者哉！國可亡也，種可滅也，人類可熄也，而終不勝其一己之私也。非故污也，非自戕也，非不欲為也，而終不能一鼓作氣也。然而擲一粒于平沙萬頃之地，而見雨即芽也，多方以植之，而蔽日參天也，苟試為之何如也，群而習之又何如也！作聖而日臧，不作聖而日亡，亦何憚而不為大人之學哉！夫大學者，大人之學也。

二曰天下之欲也。板屋之材，不足供明堂之用；斗筲之器，不足作釜鐘之歸；鄉黨自好者流，不足臨大事、決大疑、任天下艱巨。推己及物雲者，言舉斯心加諸彼而已也，非謂小知而可擴之大受也。有聖人之量者，然後可以聖人；有天下之欲者，然後可以天下；始之函乎天下者，乃終之盡乎天下者也。為仁之方，己欲立而立人也，誠者所以成物也，明明德者，非明明德于一己也，而明明德于天下也。是故格物者，為天下而格物也；致知者，為天下而致知也；誠意者，為天下而誠意也；正心修身者，為天下而正心修身也。是故言古之欲明明德于天下者。鞭辟近裡著己，崖岸高，門戶隘，異同之禍烈。宋明以來，儒者之學，非孔子之事；潔身之概量，非萬物一體之氣象。

三曰孔子之志也。昔者孔子有雲：吾志在《春秋》；又雲：大道之行，丘有志焉，天下為公，人不獨親其親、子其子，是謂大同；又雲：盍各言志，老者安之，朋友信之，少者懷之；而《大學》平天下則曰：上老老而民興孝，上長長而民興弟，上恤孤而民不倍。是數者合，有以異乎？無以異也！孔子天下至聖，以言所達，譬如天地之無不持載，無不覆幬。以言所本，則先王有不忍人之心，斯有不忍人之政。是則孔子之志，本其不忍之心，而達之為大同之政而已矣。《春秋》太平世，內外受治，老安少懷，則不獨親其親、子其子，[(豐+刀)/糸]矩之道，上下前後左右全體均平，皆大同之政。吾故曰是數者合，無以異也。雖然，《春秋》者，天子之事也，天子大事製禮，而禮生于仁，禮雲禮雲玉帛雲乎哉？蓋《詩》亡然後《春秋》作，彰善癉惡之秋霜，乃繼于溫柔敦厚之春露也。五始之元，即四德之元，元者善之長，而曰君子體仁，足以長人也。平天下不言夏時商輅，而曰好惡無辟，慎德好仁也。以是知大同之政其達，而其本乃在不忍之心也。孔子不得位，大同之政不容現，謂之為志，而至悲天憫人之懷，則又無息而非實現者。學者于此三致意焉！若夫

侈口大同，毫無悲愍，空談聖志，不解聖心，亂天下者，必此人也。故下之為夸誕之學，而上之有優偽之政。

四曰忠恕之道也。格致誠正修者，忠也；齊治平者，恕也。先修其身，乃至先致其知，致知在格物者，忠也；而後家齊，乃至而後天下平者，恕也。自明不已，所以親民止是修身、止是誠意者，忠而後恕也。惟囊括宇宙、包並六合者能恕，惟大公無我者能恕，惟舍己從人者能恕，惟順其幾之自然者能恕，惟行其所無事者能恕。而不然者，則矯揉造作矣，功必自我成，名必自我居矣，不以欲從人，而以人從欲矣，此天下所以騷然矣。夫亡國之君亦自有才，但恨其不能恕耳！夫千聖百王，豈有神奇，亦不過行其恕耳。是恕也，必忠信以得之，驕泰以失之。

五曰得國之寶也。水積成淵，蛟龍生焉；土積成山，風雨興焉；眾志成城，而國立焉。母謂兵強，民不畏死，強于兵者亡于兵。母謂財聚，生之不眾，而源竭不來。母謂政柄在我，民可得而欺，其所令反其所好，而民不從。母謂今不與于古，情切而無迂，明明簞食以迎師、火熱而望霓，不誣也；撻秦楚之堅甲利兵，不誣也；外患不足患，天災不足災，民渙而國渙，不誣也。吾所恃以敵強梁者，民，奈何並民而敵之。吾所恃以植基本者，民，奈何舍民而他植之。鋤異而異熾，噬我不我恤，而民不然，奈何獨于民而棄之？得國之實，在得民心，得心有道，無逾《大學》。

《大學》之言曰：民之所好，好之；民之所惡，惡之；此之謂民之父母。好人之所惡，惡人之所好，是謂指民性，而災必及身，彥聖不通有技嫉者，仁人放流之，是謂能好人、能惡人。民具爾瞻，辟則為天下矣。峻命不易，失眾則失國矣。徵諸近事，豈迂談哉！長國家者，顧不求實哉？

六曰格物之功也。泥德性者，先立乎其大者而無事矣，及其弊也，六藝廢，禮樂崩，言之無文，行而不遠。泥問學者，窮致事物之理而多事矣，及其弊也，支離于文字，逐物而誰歸？私意補經，欺今誣後。格物之不明，聖學之不行，千有余年矣。陽明釋《淇澳》之詩曰：引詩言格物之事，于是而格物之說明，証之于《中庸》，而格物之說愈明。自修而道學，即尊德性而道問學也，為性而學，學以盡性，以是為格物之主張也。威儀而恂[*溧]，即致廣大而盡精微也，以是為格物之貫徹也。君子之道費而隱，所以知遠之近、知風之自極于無聲無臭者，為格物事也。鬼神之道微之顯，所以知微之顯，極于參天贊地者，亦格物事也。《中庸》言可以入德矣，《大學》言格物而後知致，乃至天下平矣。夫道若大路然，未有若一丘一壑一先生之言者矣。格物之說建立不搖，天下自此平歟！

七曰孔顏之樂也。所謂誠其意者，毋自欺也，誠之事也。如惡惡臭，如好好色，此之謂自慊，誠之有得也，快也，足也，所謂樂也，知之者不如好之者，好之者不如樂之者也。君子造道自得，則居安資深，左右逢源，有諸己之謂信也。是則樂也者，誠也，而即信也。仁義之實，事親從兄是也；智之實，知斯二者是也；禮之實，節文斯二者是也；樂之實，樂斯二者是也。是則樂也者，誠也，信也，而即所謂樂

也。仁義智禮信，而即仁義智禮樂也。興于詩，立于禮，成于樂，是之謂孔顏之樂。與其雲蔬食而樂在其中、陋巷而不改其樂，謂之為孔顏之樂，曷若雲不厭不倦、拳拳服膺，謂之為孔顏之樂歟！學孔顏之樂，毋寧學孔顏之誠歟！或問：何謂孔顏之誠即孔顏之樂？曰：當下心安而已。又問：有殺身以成仁者，樂乎？曰：求仁而得仁，又何怨？

八曰真實之知也。知止而後有定，知所先後，則近道矣。于止知其所止，可以人而不如鳥乎？于是學者談行，必求其知；于是學者求知，不求于盲師，必求于故紙。夫知也，不求諸自我，不求諸現在，而顧可得而真實哉？陽明之言曰：非實能修身，未可謂之知修身。此言乎知，為其証知，非徒解知也。驟言証知，憑何而能，是有妙術不可思議，則必為聖人之志是也。譬如複仇，懷必死之心者是也。製之一處，無事不辦也，思之思之，鬼神通之也。是之謂真實之知也。

九曰《學》、《庸》之事也。夫學有區徑，有方術，有效果也。《中庸》之書，三者具備，孔學之概論也。費而隱、微之顯者，道也，區徑也。誠者，行也，方術也。贊聖者，極也，效果也。若夫《大學》，止示方術，唯是聖行也。格致誠正，止于至善也；修齊治平，止于至善也；皆行也。君子欲學問思辨，讀《中庸》；君子欲篤行，讀《大學》。

十曰《學》、《庸》之序也。常言《學》、《庸》，先《大學》而後《中庸》，為曾子之師，先于子思之弟，此說出朱晦庵，而不知其所據，故不從。《史》記子思作《中庸》，而未言曾子作《大學》，一也。《戴記》明明《中庸》列前，《大學》列後，二也。程子亦言：《大學》，孔氏遺書，不言曾子所作，三也。陽明旁注，逕題"漢戴聖撰"，四也。今之意，先欲明孔學概論，而後談孔學聖行也，故《中庸》先，而《大學》次也。

嗟乎！孔學之不行久矣。蓋支離之為弊，而迂闊之誤視故也。《王注》讀，而支離之為弊祛；十義明，而迂闊之誤視除。蓋實有不能已于言者，而豈好事之徒，嘵嘵不已者哉？

（選自《歐陽競無先生內外學》第二十五冊）

《心史》序

有由我，有不由我。由我者，咒愿是也。小之洞金石、塞滄海、移太行、王屋，大之生天、生地、生物不測、造極樂國，但一誠之所至，無不皆至。不由我者，現量是也。事本現在，不由乎人望後扳前。事自現成，不由乎人逞私營己。事原顯現，不由乎人索隱鉤深。運不守乎故常，理非極于一往，過時必複，皆不人由。若能永貞其由我，而時乘其不由我，天下事蔑不濟矣！古之志士仁人，循是道以收其效者，比比皆是。

鄭所南，其一人也。鄭所南作《心史》，其久久書，屢屢敘，療病咒，永貞乎由我者也。不起義兵，但以心志移灌後人，綿綿以俟時，乘乎不由我者也。元運終八十年，而河山恢復，所南心志竟成，非天下事蔑不濟歟！

夫人有心，國亦有心。心之精爽是為魂魄，精爽至于神明，強死猶能為厲，魂不附乎肢體，何論人事陰陽？悲乎！有國有家者不知也。徒眩人，不信自，懾惕而無氣也。虜強我弱，時也。神明之胄之強，日月經天，江河行地，萬古而不移也。不信自，無魂魄也，亡矣，直需時耳！若欲不亡，應信自，應信神明之胄必強，應攝持其魂魄。古今慷慨悲歌之士，鏤肺肝，括肪髓，不得已而發乎文字之聲音，皆魂魄之所寄也。中國有百千萬億如是之聲，如之何其必亡也！？中國有百千萬億如是之聲，如之何若存若亡而不一敷布也！？

敬恭告天下：天下今日迫切複迫切，殷重複殷重者，心學也。嗚呼！世之舍心言學，以提倡于國人也，久矣。《四庫》于《心史》，曰不避諱，錯人名，文詞蹇澀，紀事與史不合，斥為偽，不著錄。是蘄蘄于郛外，不知魂魄肺肝何物。夫以不知魂魄肺肝何物，率天下後世學，人奈何有氣，國焉得不亡？事急矣，學不可不變。

格兒二十年讀《心史》不得。得讀，出資請梓，因敘而梓之，以貽國人學。

民國二十二年（1933）八月敘于支那內學院

（選自《競無詩文》，《歐陽競無先生內外學》第十五冊）

《孟子課》敘

文武之政在方冊，人存政舉，人亡政熄，故為政在人。然久之而不得其人者，其故何哉？一、畏言聖人；二、不畏鄉愿；三、生死事大、仁義事小；四、貴勢不貴自；五、不知輕利而重義；六、不知生于憂患死于安樂；七、不知心之為聖；八、不知學之至易；九、不知學惟不已；十、不知虛名可恥。

以是十因，而草野無賢：一、不知民為貴君為輕；二、不知政乃不忍之心之所寄；三、不知廢興存亡之系于仁政；四、不知御侮之在于自強；五、不知時勢之易為；六、不知政外之政；七、不知巧便以行其政；八、不知王霸之辨；九、不知殺人兵戰之不可用；十、不知人民、土地、政事有根本之創製。

以是十因，而國家無政：一、不知事功之非極；二、不知勢祿之非泰；三、不知聖教之差別；四、不知成人之差等。

以是四因，而天下無道。無道則無人，無人則無政，無政而天下亂，乃至于亡。

反而言之，師道立則善人多，善人多則有政，有政而國理以強。若是乎，教之至足重哉！夫教必自童蒙始，蒙以養正，聖功也，先入者主之。人皆可以為堯舜，植基之教，不擇而施焉。乃斷章取義于《孟子》，得八十課而課之。

民國二十五年（1936）夏歐陽漸敘于支那內學院

（選自《論孟課》，《歐陽競無先生內外學》第二十七冊）

《論語課》敘

能使其國必亡而無可救藥者，偷與私也。能使偷私之禍深錮而不拔者，鄉愿也。求生則害仁，謀道不謀食。而鄉愿同流合污，奄然媚世。積習中于人心，豆羹簞食是圖，而何有于國？大廈將傾之勢，而聊樂我員；流血百萬，乃視若無睹、聽若無聞；若之，何其救之也！

疾雷破山風振海，儻足以動之；烈日當空，儻足以明之；其必曰：孔子真精神，嚴之以義利之界也歟！義利之界明，譬之播種，始可以言耕耨，以是談學，志不離道而游不廢藝，學祛其蔽而思通其神，忠必參前倚衡，恕必人立人達，詩必于思，禮必于本，性天必至于寂，而上達乎不可思議。若乎為政，則大同之世，必極于均和而安。孔子之道有如此夫！

義利之界不明，二千余年晦盲否塞，反覆沉錮，以極于今日也。《論語》至言，視之如秋日慘淡而無光也，嚼之如土飯陳羹而無味也。以是談學，鄉愿也，偽孔也。國危如是，人心如是。孔子真精神，嚴義利之界，于《論語》中表而出之，課己課天下，溺以是援，憤以是啟，誕先登岸，德以不孤，誠先務之急哉！誠先務之急哉！

民國二十七年（1938）五月敘于江津支那內學院蜀院

（選自《孔學雜著》，載《歐陽競無先生內外學》第十四冊）

《毛詩課》敘

迨天之未陰雨，綢繆牖戶，誰敢侮予？今則流血百萬，慘不可言矣。事前有備，謂之未雨綢繆；事後追隨，謂之亡羊補牢。然今日之亡羊補牢，又他日之未雨綢繆也。綢繆在作新，作新在作氣，作氣在觀感而憤悱。聲音之感人也，成于樂而興于詩。古人于詩，朝會燕饗則歌，鄉飲鄉射則歌，迎寒逆暑則歌，一室琴書歌聲，若出金石。蓋無時無處無人無事不歌，此其所以日新不已也。合樂曰歌，樂亡而歌亦亡，吾獨奈何哉！王陽明歌詩，二人堂上舒徐節奏，十余人堂下隨其節奏密詠酣吟。徒歌曰謠，亦善權方便而可法歟？滬戰烈，渡江棲六合，兩閱月成《毛詩讀》三冊，節彼三百篇之三十，以為課也。繞梁裂石，奮然起矣！

民國二十七年（1938）五月敘于江津支那內學院蜀院

（選自《孔學雜著》，載《歐陽競無先生內外學》第十四冊）

《中庸》傳

緒言

一、學有概論，乃有系統，雖不得全，猶知其概。孔學有系統談，止是《中庸》一書，《大學》猶所不及。顧幸有概論，而又為鄉愿所誣，則與無概論等。雖然，概論而原無，不害其無；概論而亂有，實害其有。故欲探學，必辨概論。

二、認寂本體。人非喪心病狂，無不知重自家本體。何為本體？寂滅是也，寂滅非頑空無物也，乃人欲淨盡，滅無一毫，而後天理純全，盡情披露，寂滅寂然，是其相貌，故寂滅為本體也。天下充量，動曰全體，全體者，廣大義，顧廣大誰逾于寂？天下至竟，動曰實體，實體者，精微義，顧精微誰逾于寂？是故寂之為體也。體但名字，廣大精微之寂，則實相也。人但緣目前小境，不肯緣全體大寂者，小兒不知天廚糗備，自不舍手中餅餌，無怪然也。此有三事：一、錯；二、駭；三、怖。達者則異。一錯者，不知人欲毫不可留，不知天理別有乾坤，但認寂滅全體無存，此其錯也。韓愈誤清淨寂滅，遂惡清淨寂滅，並使千載至今，張冠李戴，豈不冤哉！人何以服韓而不信聖書難讀也，習易從也，蔽之為害也，須辨也。演若達多，晨朝攬鏡，自怪其頭，駭絕狂走，蓋由誤來，乃至惡自而駭自，寧有目而返自，故宜辨急也。誤而駭，駭而怖，然無可怖，魚日在水中，人日在寂中，寂焉可離，怖亦不得，但辨之，即啞然也。故欲研《中庸》，須先認寂。

三、為眾立教。止有寂滅，是大王路，曾無人道歧于天道，然人質有殊，而皆可堯舜，是以方便，依天道性，立人道教。依天道性，雖雜染種，而隨順清淨種，由隨順趣向，而引發轉變，乃胎脫其凡家生于聖。是則教與非教之判，判之于寂滅清淨是依，流轉雜染是隨而已，而世見不知也。形色天性也，然是雜染種寄居清淨種之場，而不可隨也。教之為舍染取淨依，于清淨而引發其種也。是故性無頓漸，而教有等差。

四、切求功夫。功夫止是一，不已而已，念念相續，無有間斷，身語意業，無有疲厭是也。性修非二，二則功夫全然不是；性修非一，一則已至，不用功夫，故曰不已。不欺也，善推其所為也，苟能充之也，拳拳服膺也，固執也，立見其參于前也，在輿則同見其倚于衡也，一物也。心莫知其向，何所術而使之不已，然有二方便，曰：厚植善根，增上善知識。厚植善根，不外乎時習，譬如牧牛，若趨水草，狃之歸路，久則馴熟而有勢引。勢引者，根力強厚，如開導依，開前導後，謂之曰引。詩翁陳散原，一日謂予：作詩如有嗜好者，役命于癮，轉輾不舍，功于是深，癮之為言引也。善知識者：一、人；二、法；三、作觀；四、離擾。人，為師友；法，為圖書；作觀，如十目所視，十手所指，如《淨行品》一百四十當愿眾生；離擾，則可已之緣應遠離，持戒第一。

五、非一人之中庸，非高談性命之中庸。談者曰：習定是個人事，然則治天下國家，須終日擾攘耶？叢挫之謂何？故知非一人之中庸，而天下之中庸。談者曰：中庸高談性命，何補經權？然則所謂九經不必一誠耶？離位育參贊，誠不知其複何所為謂之實事。

六、非鄉愿中庸。中國自孟子後數千年來，曾無豪傑，繼文而興，蓋誤于鄉愿中庸也。狂狷中庸，義利之界嚴，取資之路寬；鄉愿中庸，義利之實亂，取資之徑封。似義實利，別為一途，如半擇迦非男非女、亦男亦女，如不死矯亂非是非非、亦是亦非。其曰無過不及之謂中，則迷離恍惚，無地可蹈也；其曰平常之謂庸，隨俗浮沉，無萃可拔也。東海西海，聖人心理無不皆同，而斥為異端，簡為禪學，防為淫聲女色，一不相避即入其玄，無非凡心支解聖量，遂使心思慧命，戕賊天下後世于邪慝之手，乃猶曰中庸法爾而然也，人皆盡承曰中庸法爾而然也，嗟乎冤哉！

為上六端，作《中庸傳》。

民國二十九年（1940）一月歐陽漸述于江津支那內學院

中庸傳

喜怒哀樂之未發謂之中，發而皆中節謂之庸。中，即無思無為、寂然不動之寂；庸，即感而遂通天下之故、之通。《莊子》：庸也者。用也；用也者，通也；通也者，得也，適得而幾矣，因是已，已而不知其然之謂道，易窮則變，變則通也。寂曰大本，通曰達道，寂而通曰中庸。未發寂也，與寂相應而中節，發亦寂也，寂即隱也。《中庸》有隱名，無寂名，故曰《中庸》索隱之書也。

《中庸》三大義，曰修道，曰素隱，曰不已。隱，道也；素隱，修道也，素隱而不已，修之成也。文詮三義，為三科：曰略論，曰廣論，曰結論。第一科略論，有三，初詮修道。人皆可以為堯舜，而中下人多，特開方便，建立修道之教，雖修屬於人，而道則皆天，趣向于天，修而不已，成功則一，故于人道而溯源天道。

天命之謂性，率性之謂道，修道之謂教。

初詮修道。命猶道也，天命，天之道也，先天而天弗違之道，一陰一陽，現成天然也。繼之者善，成之者性，天命不已，貫徹終始，謂之性也。率性者，後天而奉天時之道，不思而得，不勉而中，從容中道，亦天然現成也。此率性，是生知安行事，自誠明謂之性，天道也。修道，以仁、禮所生也。有至德在位而作禮樂，為國以禮，謂之為教。此修道，是學知利行、困知勉行事，自明誠謂之教，人道也。

道也者，不可須臾離也；可離，非道也。是故君子戒慎乎其所不睹，恐懼乎其所不

聞。莫見乎隱，莫顯乎微，故君子慎其獨也。

次詮素隱。天命不已之為性，故須與不離之為道。須與之不離是畢竟道，故不睹、聞之戒、懼，為畢竟修。畢竟者，大本也；大本者，中也；中者，隱也，乃其所以為中而素隱也。誠不可掩，大德必受命，虛妄則忽焉沒己，真實則日日常昭。用為見顯，體是隱微；有大本之體中，然後乃有達道之用庸。君子慎獨，獨者隱也，乃其所以為庸而素隱也。莫見乎隱，君子之道，費而隱也；莫顯乎微，鬼神之德，微之顯也。

喜怒哀樂之未發，謂之中；發而皆中節，謂之和。中也者，天下之大本也；和也者，天下之達道也。致中和，天地位焉，萬物育焉。

後詮不已。本曰大，道曰達，量不局于一隅也，充大與達之量，必天地位、萬物育，其體在隱，其功在致。在隱，則喜怒哀樂未發上求，發皆中節上求；在致，則拳拳弗失仁勇上求，溫故知新上求。其次致曲，致而不已，至誠如神，可以贊天地之化育矣。人道天道，一也。

第二科廣論。文分六段：一段、廣修道之德；二段、廣道之隱；三段、廣修之誠；四段、廣修之不已；五段、廣修道之禮；六段、廣致中庸之成。或分三段：初、道隱，為境；次、修誠、修不已、修禮，為行；後、致成，為果也。初段廣修道之德，有三節：

仲尼曰："君子中庸，小人反中庸。君子之中庸也，君子而時中。小人之反中庸也，小人而無忌憚也。"

初節，小人反中庸。君子畏天命、畏大人、畏聖人之言，所以時中。小人不知天命而不畏也，狎大人，侮聖人之言，是以無忌憚。君有短垣，而自逾之，無所不至矣。上天下澤履，履者禮也，為國以禮，辨上下，定民志，大畏民志，此謂知本。本實先撥，天下大亂而不止矣。

子曰："中庸其至矣乎！民鮮能久矣。"子曰："道之不行也，我知之矣：知者過之，愚者不及也。道之不明也，我知之矣：賢者過之，不肖者不及也。人莫不飲食也，鮮能知味也。"

次節，民鮮能中庸。飲食過量不及，量是一事，飲食知味是一事。中不在過、不及上求，亦不在非過非不及上求，捫燭扣盤，盲焉得日？髻珠懷寶，不悟終貧。仁者見之謂之仁，智者見之謂之智，百姓日用而不知，故君子之道鮮矣。

後節，君子能中庸。有二：初，分述達德；後，總明達德之行。初分敘達德，又三

:

子曰："道其不行矣夫！"子曰："舜其大知也與？舜好問，而好察邇言，隱惡而揚善，執其兩端，用其中于民，其斯以為舜乎！"

一不能中庸者，不如舜之知也。好問則裕，自用則小也。夫婦密邇，察以至天地也。君子以遏惡揚善，順天休命也。齊乎物論，道並行不悖也。素隱不已，用中于民也。

子曰："人皆曰予知，驅而納諸罟陷阱之中，而莫之知辟也。人皆曰予知，擇乎中庸，而不能期月守也。"子曰："回之為人也，擇乎中庸。得一善，則拳拳服膺，而弗失之矣。"

二不能中庸者，不如回之仁也。顏子心齋坐忘，三月不違仁。

子曰："天下國家可均也，爵祿可辭也，白刃可蹈也，中庸不可能也。"子路問強。子曰："南方之強與？北方之強與？抑而強與？寬柔以教，不報無道，南方之強也，君子居之。衽金革，死而不厭，北方之強也，而強者居之。故君子和而不流，強哉矯！中立而不倚，強哉矯！國有道，不變塞焉，強哉矯！國無道，至死不變，強哉矯！"

三不能中庸者，不如子路之勇也。辭爵不報，南方之忍；蹈刃不厭，北方之勁；皆不能中庸。君子和則中節，中為天下立本，而始終不變。故聞柳下惠之風者，鄙夫寬，薄夫敦。聞伯夷之風者，頑夫廉，懦夫有立志。聞史魚之風者，邦有道如矢，邦無道如矢。此孔子所以惡鄉愿而思狂狷也。

下總明達德之行。

子曰："素隱行怪，後世有述焉，吾弗為之矣。君子遵道而行，半途而廢，吾弗能已矣。君子依乎中庸，遁世不見知而不悔，唯聖者能之。"

素隱之名立于此。素之為言本也，隱之為言寂也，不言本寂而言素隱，則中庸之言也。達德烏乎行？所以行之者，一也；一者、誠也。君子居素隱之名而行離道之怪，不誠非知也。然君子遵道而行，而不能始終不已，非仁也。君子依中庸行，不知而不悔，則神勇也。《易》曰："龍德而隱者，不易乎世，不成乎名，遁世無悶不見是而無悶，樂則行之，憂則違之。"確乎其不可拔也。怪行，雖有述而弗為。中庸而不悔無所得行，地上無漏者行也。

二段廣道之隱。此有二節：一節、君子之道費而隱也；二節、鬼神之德微之顯也。

費而隱，即道不離也；微之顯，即莫見莫顯也。此所謂素隱之中庸也。費而隱節又三：初、費即是隱；次、隱不離費；三、素位而行。夫費即是隱，芥子所以內須彌也。隱不離費，無量不出乎現量也，知隱周法界，而後費之大小可以不拘。君子居素位之行，而惟持有素隱之功，此其所以為中庸也。豈不必素隱，而但素位之為中庸哉！中庸三大義，根依惟在素隱，修道立教，為素隱而立教也；推行不已，為素隱而不已也。明乎素隱一義，而後可以談彼二義。

君子之道，費而隱。夫婦之愚可以與知焉，及其至也，雖聖人亦有所不知焉。夫婦之不肖，可以能行焉，及其至也，雖聖人亦有所不能焉。天地之大也，人猶有所憾。故君子語大，天下莫能載焉；語小，天下莫能破焉。《詩》雲："鳶飛戾天，魚躍于淵。"言其上下察也。君子之道，造端乎夫婦，及其至也，察乎天地。

此明道唯是隱也。道唯是隱，誠為物體也。譬如百體，聽命天君，心不在焉，視而不見，不誠無物，無費不隱。誠，隱也；隱，寂也；寂，廣大精微也；廣大精微，無窮無盡也。有量有邊之費，即無窮無盡之隱之所寓。舉費，則夫婦與知能；舉隱，則聖固不窮盡。天地大小，費也，大猶有憾；莫載莫破，則無窮無盡之隱矣。飛躍造端，費也；戾天于淵，察乎天地，則無窮無盡之隱矣。費而隱，盈天地間皆道，盈天地間皆隱也。象山悟宇宙原是無窮無盡，悟宇宙內事即吾分內事，吾分內事即宇宙內事，知隱也。《楚辭?王注》："費，光貌也，察視也。"

子曰："道不遠人，人之為道而遠人，不可以為道。《詩》雲：'伐柯伐柯，其則不遠。'執柯以伐柯，睨而視之，猶以為遠。故君子以人治人，改而止。忠恕違道不遠，施諸己而不愿，亦勿施于人。君子之道四，丘未能一焉。所求乎子，以事父，未能也；所求乎臣，以事君，未能也；所求乎弟，以事兄，未能也；所求乎朋友，先施之，未能也。庸德之行，庸言之謹，有所不足，不敢不勉，有余不敢盡，言顧行，行顧言，君子胡不

爾？"

此明隱不離費也。盈天地間皆隱，故人之為道，道不離乎人，彼不離乎此，恕不離乎忠，彼之所求，不離乎此之未能也。何謂道不離乎人、彼不離乎此耶？道不遠人者，人之為道也；仁也者，人也；合而言之，道也。若以道遠人，不可以為道矣。若執柯伐柯，視此人之則，造彼人之治，人我之界存，道亦猶以為遠矣。是以君子以人治人，但改而止。而，汝也。為人君止于仁，為人臣止于敬，為人子止于孝，為人父止于慈，與國人交止于信。改止，君改其不止于仁，臣改其不止于敬，子改其不止于孝，父改其不止于慈，交改其不止于信而已，所謂思不出其位也。何謂恕不離乎忠耶？能止曰忠，充忠之量曰恕，但是一施，無間乎人之與己，一貫之為，吾道也。何謂彼之所求、不離乎此之未能耶？人二而道一，人封而道通也。隱不離費，是故君子處費而素隱，言行于庸，必求乎中節而應乎中，欲訥于言而敏于行也。

。言行者，君子之所以動天地也，可不慎乎！

君子素其位而行，不愿乎其外。素富貴，行乎富貴；素貧賤，行乎貧賤；素夷狄，行乎夷狄；素患難，行乎患難；君子無入而不自得焉。在上位，不陵下；在下位，不援上。正己而不求于人，則無怨，上不怨天，下不尤人，故君子居易以俟命，小人行險以徼幸。子曰："射有似乎君子，失諸正鵠，反求諸其身。"君子之道，辟如行遠必自邇，辟如登高必自卑。《詩》曰："妻子好合，如鼓瑟琴。兄弟既翕，和樂且耽。宜爾室家，樂爾妻孥。"子曰："父母其順矣乎！"

此明素位而行也。盈天地間皆隱，君子能素隱，故行但素位，素位即所以素隱也。隨其行于富貴、貧賤、夷狄、患難之位，而無不得其自于中庸之隱。無不得其隱，則所謂不陵、不援，不怨、不尤，俟命而反求，亦何憚而不為歟？卑邇而高遠，宜家而父母順，亦無非素得其隱而已。君子本素隱之中庸，而行于素位，鄉愿則創素位之中庸，而不言素隱。媚世求容，何所用涼涼蹢蹢、藏身求固，何必不憚憚爾思？乃使天下之人循習安常，老死牖下，曾無豪傑，不文而興，醉夢悠悠，安知身外？蓋未有害于爾家、凶于爾國之至于此極也。

下第二節，微之顯也。微之顯，又二：初、鬼神體物之顯；次、先王製禮之顯。

子曰："鬼神之為德，其盛矣乎！視之而弗見，聽之而弗聞，體物而不可遺。使天下之人，齊明盛服，以承祭祀，洋洋乎如在其上，如在其左右。《詩》曰：'神之格思，不可度思，矧可射思？'夫微之顯，誠之不可掩如此夫！"

此鬼神體物之顯也。死歸于土，謂之為鬼。其氣則發揚于上，為昭明 蒿淒愴，百物之精有所附麗，謂之為神。神，聰明正直而一者也，總一誠之為之也。鬼神不可視聽，微之至也。然為物體，無物可遺，則顯之至矣。至誠交于神明，如在格思，顯至如此，又可掩歟？誠不可掩而必舉鬼神者，鬼神隱也，隱而後誠也。

下，先王製禮之顯。亦二：一、舜受命之顯；二、文王以武周製禮之顯。先王與鬼神合德，立于禮，猶不遺于體。

子曰："舜其大孝也與！德為聖人，尊為天子，富有四海之內，宗廟饗之，子孫保之。故大德，必得其位，必得其祿，必得其名，必得其壽。故天之生物，必因其材而篤焉，故栽者培之，傾者覆之。《詩》曰：'嘉樂君子，憲憲令德.....宜民宜人，受祿于天。保佑命之，自天申之。'故大德者必受命。"

舜受命之顯如此。

子曰："無憂者，其唯文王乎！以王季為父，以武王為子，父作之，子述之。武王纘

大王、王季、文王之緒，壹戎衣而有天下，身不失天下之顯名，尊為天子，富有四海之內，宗廟饗之，子孫保之。武王未受命，周公成文武之德，追王大王、王季，上祀先公以天子之禮。斯禮也，達乎諸侯、大夫，及士、庶人。父為大夫，子為士，葬以大夫，祭以士；父為士，子為大夫，葬以士，祭以大夫。期之喪，達乎大夫；三年之喪，達乎天子；父母之喪，無貴賤，一也。"子曰："武王、周公其達孝矣乎！夫孝者，善繼人之志，善述人之事者也。春秋，修其祖廟，陳其宗器，設其裳衣，荐其時食。宗廟之禮，所以序昭穆也；序爵，所以辨貴賤也；序事，所以辨賢也；旅酬下為上，所以逮賤也；燕毛，所以序齒也。踐其位，行其禮，奏其樂；敬其所尊，愛其所親；事死如事生，事亡如事存，孝之至也。郊社之禮，所以事上帝也；宗廟之禮，所以祀乎其先也。明乎郊社之禮、嘗之義，治國其如示諸掌乎！"

文王以武、周製禮之顯如此！五禮莫大于喪祭，三年之喪，達乎天子，但有良心而無貴賤，立人道之大本，物之受命于心也。廟中者，四竟之象也，族姓之不淆也，上下之有序也，才能之有選也，群眾之得情也，老之有敬尊也，一日之有事，一國之化治也。禮樂而尊親，死亡而生存，事帝祀天，皆以至誠之極。達至微于至顯之場，雖參天贊化而不難，又何有于治國！

三段廣修之誠。自"哀公問政"，至"擇善而固執之者也"，《家語》亦載此文。有四節：初、明修道之概端；次、明行道以德，行德以誠，終無頓漸之別而始有引導之宜；三、明修身以及天下國家，不外知三行一；四、明誠與誠之者，其始有別，而終則同。

哀公問政。子曰："文武之政，布在方策。其人存，則其政舉；其人亡，則其政息。人道敏政，地道敏樹。夫政也者，蒲盧也。故為政在人，取人以身，修身以道，修道以仁。仁者，人也，親親為大。義者，宜也，尊賢為大。親親之殺，尊賢之等，禮所生也。在下位不獲乎上，民不可得而治矣。故君子不可以不修身；思修身，不可以不事親；思事親，不可以不知人；思知人，不可以不知天。"

此明修道之概端也。為政在人，人必修身而修道。修道以仁義，而極于禮，故君子修身事親，而極于知人知天。知人則俟聖不惑，知天則鬼神無疑，此唯誠為能。誠者天之道也，天道者誠也。

下明行道以德、行德以誠，終無頓漸之別，而始有引導之宜。

"天下之達道五，所以行之者三。曰：君臣也，父子也，夫婦也，昆弟也，朋友之交也。五者、天下之達道也。知、仁、勇三者、天下之達德也。所以行之者，一也。"

此明行道以德、行德以誠；五、三，一是也。

"或生而知之，或學而知之，或困而知之，及其知之，一也。或安而行之，或利而行之，或勉強而行之，及其成功，一也。"子曰："好學近乎知，力行近乎仁，知恥近乎勇。"

此明終無頓漸之殊，而始有引導之宜也。朱氏雲："聞道有蚤莫，行道有難易，自強不息，其至則一。"呂氏雲："愚者自是，自私者殉欲，懦者甘下人，好學非知，然足破愚；力行非仁，然足忘私；知恥非勇，然足起懦。"

下明修身以及天下國家，不外知三行一。

知斯三者、則知所以修身；知所以修身，則知所以治人；知所以治人，則知所以治天下國家矣。

此知三也，用誠之具也。下，行一也，用誠于所事之九經也。

凡為天下國家有九經，曰：修身也，尊賢也，親親也，敬大臣也，體群臣也，子庶民也，來百工也，柔遠人也，懷諸侯也。

九經之目。

修身，則道立；尊賢，則不惑；親親，則諸父昆弟不怨；敬大臣，則不眩；體群臣，則士之報禮重；子庶民，則百姓勸；來百工，則財用足；柔遠人，則四方歸之；懷諸侯，則天下畏之。

九經之效。

齊明盛服，非禮不動，所以修身也；去讒遠色，賤貨而貴德，所以勸賢也；尊其位，重其祿，同其好惡，所以勸親親也；官盛任使，所以勸大臣也；忠信重祿，所以勸士也；時使薄斂，所以勸百姓也；日省月試，既廩稱事，所以勸百工也；送往迎來，嘉善而矜不能，所以柔遠人也；繼絕世，舉廢國，治亂持危，朝聘以時，厚往而薄來，所以懷諸侯也。

九經之事。

凡為天下國家有九經，所以行之者，一也。

自修身以至治天下國家之事，壹是用誠為本，猶《大學》之條目也。

下，明誠與誠之者，其始有別，而終則同。初、明善；次、天道人道，差而無差。

凡事豫則立，不豫則廢。言前定則不，事前定則不困，行前定則不疚，道前定則不窮。在下位不獲乎上，民不可得而治矣；獲乎上有道，不信乎朋友，不獲乎上矣；信乎朋友有道，不順乎親，不信乎朋友矣；順乎親有道，反諸身不誠，不順乎親矣；誠身有道，不明乎善，不誠乎身矣。

初，明善也。以四類徵豫之立，言行事道。而道自治民，五推而至明善，乃知止在于至善也。

誠者，天之道也；誠之者，人之道也。誠者，不勉而中，不思而得，從容中道，聖人也。誠之者，擇善而固執之者也。博學之，審問之，慎思之，明辨之，篤行之。有弗學，學之弗能弗措也；有弗問，問之弗知弗措也；有弗思，思之弗得弗措也；有弗辨，辨之弗明弗措也；有弗行，行之弗篤弗措也。人一能之，己百之；人十能之，己千之。果能此道矣，雖愚必明，雖柔必強。自誠明，謂之性；自明誠，謂之教；誠則明矣，明則誠矣。

次，天道人道，差而無差也。誠者，天道；誠之者，人道。標也。

繼之者善，成之者性，率性則全善在握也，全善在握無所事于智仁勇，不勉而無不仁，不思而無不知，從容而無不勇，此所謂誠者天道，行無所得行，入地聖人能之。其次，則誠之者人道，不能握全善，猶能明善而得一善，又能以仁勇而固執之也。釋也。

學問、思辨，是擇善事；篤行，是固執事；學知利行以之。知行不已，百倍其功，神勇若此，明強必矣，況非愚柔哉！困知勉行以之。惟有致力，曾無成敗，教有困勉，聖無獨據矣。廣釋也。

自成之誠，握全善之明，為率性之性。自中得一善之明，執之不已，至自成之誠，為修道之教。及其成功，誠明不二，天人無差。結也。

四段，廣修之不已。有四節：初、明天人不已之殊；次、明誠與不已之所以；三、明不已之呈象；四、明不已是天與聖行之體。道以不已而大，功以不已而成，聖凡以不已而判，修道之具，不已而已，此孔學之惟一義也。

唯天下至誠，為能盡其性；能盡其性，則能盡人之性；能盡人之性，則能盡物之性；能盡物之性，則可以贊天地之化育；可以贊天地之化育，則可以與天地參矣。其次致曲，曲能有誠，誠則形，形則著，著則明，明則動，動則變，變則化，唯天下至誠為能化。至誠之道，可以前知。國家將興，必有禎祥；國家將亡，必有妖孽。見乎蓍龜，動乎四體。禍福將至，善必先知之，不善必先知之。故至誠如神。

此明天人不已之殊也。天道之聖，但以四事以充其量，以至于成，其性人性物性天地化育，盡而贊之，與天地合德矣。至夫人道之君子，不能四事充量，則必由六等之教推而致之。自初至終，念念不已，則亦至誠矣。夫所謂不已者，不已于不勉不思從容之聖道是也，道惟有一，頓亦由之，漸亦由之也。六等之中：善、信、美、大，是加行智，地前有漏境界；聖、神，是根本、後得智，地上無漏境界也。

其次致曲，曲一善也，一善而致之，可欲之謂善也。曲能有誠，誠自慊也；自慊而自得，有諸己之謂信也。誠則形，形則著，充于內者溢于外，成形暴著，充實之謂美也。著則明，煥乎其有文章，充實而有光輝之謂大也。凡此皆加行智也。明則動，有漏善引發無漏善也。動則變，變之為易種也，煩惱相應有漏種如莠，寂滅相應無漏種如嘉禾，種各不同，趣向易位，謂之為變也。變則化，渾然無漏，發生現行也，唯天下至誠為能化，則根本智而入地矣，所謂大而化之之謂聖也。夫道一而已矣，是非歧二不謂之道，有漏、無漏異種之說，外典所無，此文有所義，應以內典釋而明之。釋而明之，而後千載以後聖凡有判，因果有趣，不系三有，咸入涅槃。至誠全體之明，在前而知後，物自呈形，不由人索，故至誠前知如神，聖而不可知之之謂神也。地前，惟加行智；初地至八地，根本、後得智；八地至十地，唯後得智。中庸一宗趣，詳于素隱；中庸三智三漸次，詳于此文也。然後知中庸為修道之教也。

誠者，自成也；而道，自道也。誠者，物之終始，不誠無物。是故君子誠之為貴。誠者，非自成己而已也，所以成物也。成己，仁也；成物，智也。性之德也，合外內之道也。故時措之宜也。故至誠無息。

此敘誠與不已之所以也，誠何以為自成耶？本心之謂自，即一陰一陽之謂道也。無欠之謂成，即繼之者善、成之者性也。《大學》述誠意曰毋自欺，蓋後念本心不異前念本心，即繼之者善、止于至善也。曰自慊，本心無欠好惡至于快足，即成之者性也。合三經而讀之，乃得確解，曰誠者本心無欠之自成也。率性為道，道不離乎自也，如是凡物皆不離乎自也。君子知誠物不二，其于物也，見誠不見物，誠貫終始，故物有終始。眾人離誠物為二，其于物也，見物不見誠，終始無誠，故終始無物。格物以誠意，曰君子貴誠。誠者貴，誠之者亦貴，此一句也。全體為誠，于己自成，于物亦然。擇善而固執之，是為成己之仁。明照于全體，是為成物之知。性成而德得，成性存存道義之門。合內外全體之道，而發者中節，無往不宜也。曰至誠無息，誠之者無息，誠者亦無息，此一句也。

不息則久，久則徵，徵則悠遠，悠遠則博厚，博厚則高明。博厚，所以載物也；高明，所以覆物也；悠久，所以成物也。博厚配地，高明配天，悠久無疆。如此者，不見而章，不動而變，無為而成。天地之道，可壹言而盡也：其為物不貳，則其生物不測。天地之道，博也，厚也，高也，明也，悠也，久也。今夫天，斯昭昭之多，及其無窮也，日月星辰系焉，萬物覆焉。今夫地，一撮土之多，及其廣厚，載華

岳而不重，振河海而不泄，萬物載焉。今夫山，一卷石之多，及其廣大，草木生之，禽獸居之，寶藏興焉。今夫水，一勺之多，及其不測，黿鼉蛟龍魚鱉生焉，貨財殖焉。

此敘不已之呈象也。朱義：久常于中，徵驗于外，悠遠、博厚、高明，皆驗于外也。覆載成物，與天同用，配天地而無疆，與天同體。如此者，章不待見，變不待動，成不待為，即體即用，即寂即通，蓋至誠不息之呈象如此。此一句也，博厚高明，悠久為物不貳，天地山川生物不測，蓋天地不息之呈象如此。此一句也。

《詩》曰："維天之命，于穆不已。"蓋曰天之所以為天也。"于乎不顯文王之德之純。"蓋曰文王之所以為文也。純亦不已。

此敘不已為天行聖行之體也。天行健，君子以自強不息。所以為天，所以為聖，既得之矣，天與聖而違我哉？此中庸所以為須臾不離全體，見顯而素隱也。成以言境，不已以言行，厚殖種姓，善友增上，致行之始功也。

五段廣修道之禮。分四：初、敘禮必德而行；次、敘修德之足乎己；三、敘修德之信乎民；四、敘君子作禮之效。為國以禮教之至也，故微之顯敘喪祭之顯，修身為政，以禮所生為政，此之修道以崇禮、製禮為修道也。

大哉聖人之道！洋洋乎發育萬物，峻極于天。優優大哉，禮儀三百，威儀三千。待其人而後行。故曰：苟不至德，至道不凝焉。

此敘禮必德而行也。育物製禮，必聖人而在天子之位，故曰待人。又反言以足之。

故君子尊德性而道問學，致廣大而盡精微，極高明而道中庸，溫故而知新，敦厚以崇禮。是故居上不驕，為下不倍。國有道，其言足以興；國無道，其默足以容。《詩》曰："既明且哲，以保其身。"其此之謂與！子曰："愚而好自用，賤而好自專，生乎今之世，反古之道，如此者，災及其身者也。"

此敘修德之足乎己也。尊德性，率性也；道問學，修道也。隨順、趣向、臨入，則修道亦率性也，此句言修道也。廣大，達道之庸也；精微，大本之中也；致、盡，皆擴充意，即致中庸之意，此句言素隱也。如切如磋者，道學也，即道問學也；如琢如磨者，自修也，即尊德性也；瑟兮兮者，恂栗也，即盡精微也；赫兮喧兮者，威儀也，即致廣大也。《大學》以格物言，《中庸》以致中和言也。必極其功效于高明配天，而率履乎時中庸德。時習其故有，而增進其新知。皆不已之意。如是篤實修德以欽崇于禮焉。君子時中，是以崇禮，不驕而忽微，不倍而越尊；小人無忌憚，是以輕禮，驕不求微，倍越其尊，吉凶判矣。

非天子，不議禮，不製度，不考文。今天下車同軌，書同文，行同倫。雖有其位，苟無其德，不敢作禮樂焉；雖有其德，苟無其位，亦不敢作禮樂焉。子曰："吾說夏禮，杞不足徵也；吾學殷禮，有宋存焉；吾學周禮，今用之，吾從周。王天下有三重焉，其寡過矣乎！上焉者，雖善無徵，無徵不信，不信民弗從。下焉者，雖善不尊，不尊不信，不信民弗從。故君子之道，本諸身，徵諸庶民，考諸三王而不謬，建諸天地而不悖，質諸鬼神而無疑，百世以俟聖人而不惑。質諸鬼神而無疑，知天也；百世以俟聖人而不惑，知人也。

此敘修德之信乎民也。信乎民而民從者有三：一德，二位，三徵。徵又開四：天地、鬼神，以知天；前王、後聖，以知人。

是故，君子動而世為天下道，行而世為天下法，言而世為天下則。遠之則有望，近之則不厭。《詩》曰："在彼無惡，在此無射。庶幾夙夜，以永終譽。"君子未有不如此，而蚤有譽于天下者也。

此敘君子作禮之效也。已足民從，有所動作，有所言行，烏得而不風靡？是以君子素隱。

六段廣致中庸之成。有三：初以如天贊成，次以配天贊成，後以其天贊成。

仲尼祖述堯舜，憲章文武，上律天時，下襲水土。辟如天地之無不持載，無不覆幬。辟如四時之錯行，如日月之代明。萬物並育而不相害，道並行而不相悖，小德川流，大德敦化，此天地之所以為大也。

此以如天贊成也。一序成，二明贊。朱義：遠有所宗，近有所法，運本自然，理循一定，知天知人之大成也。覆載而並育不害，錯代並行不悖，蓋大德之化無疆，所以並育並行也；小德之流有系，所以不害不悖也。取辟四事，贊所成之大也。

唯天下至聖，為能聰明睿知，足以有臨也；寬裕溫柔，足以有容也；發掘剛毅，足以有執也；齊莊中正，足以有敬也；文理密察，足以有別也。溥博淵泉，而時出之，溥博如天，淵泉如淵。見而民莫不敬，言而民莫不信，行而民莫不說。是以聲名洋溢乎中國，施及蠻貊；舟車所至，人力所通，天之所覆，地之所載，日月所照，霜露所墜；凡有血氣，莫不尊親，故曰配天。

此所以配天贊成也。一序成，二明贊。朱義：聰明睿知，生知之質，其下四者、仁義禮智之德。充積于中，時發于外，庸德之大成也。天德及民，民信從之；聖德及民，民信從之，乃無少異。所以以配天贊成也。

唯天下至誠，為能經綸天下之大經，立天下之大本，知天地之化育，夫焉有所倚？

肫肫其仁，淵淵其淵，浩浩其天。苟不固聰明聖知，達天德者，其孰能知之？

此以其天贊成也：一、序成；二、明贊；三、敘知聖之難而自贊嘆。經綸大經者，即是九經，所謂達德之庸也。立大本者，即中；中也者，天下之大本也。知化育者，即天地位、萬物育也。生天生地，為一切倚，而倚一切哉，中庸之大成也。朱義：以經綸言肫肫，以立本言淵淵，以知化言浩浩，以其天非特如天，以贊成也。聰明聖知，雖生知全善，然與學、困之得，一善無殊，如陽明所謂鎰兩不同，真金則一也。達德為智仁勇，達天德則所以行之惟一誠。苟不固執其擇善而達德于一誠者，其孰能窺識聖相而表彰之哉！此子思之知聖而自贊嘆也。

第三科結論，結于素隱也。略、廣論《中庸》已竟，複又結而論之，如《騷》之亂是也。一、入德以隱；二、修己及人治國平天下以隱；三、示隱之真相。

《詩》曰："衣錦尚。"惡其文之著也。故君子之道，門+音然而日章；小人之道，的然而日亡。君子之道，淡而不厭，簡而文，溫而理，知遠之近，知風之自，知微之顯，可與入德矣。

此敘入德之隱也。朱義：淡、簡、溫，狀門+音然之象。不厭而文且理，狀日章之象。遠之近，見于彼者由于此。風之自，著乎外者由乎內，此言大本在中也。微之顯，此言寂無不通也。知二者之在隱，則知素隱，而有方便之門。

《詩》雲："潛雖伏矣，亦孔之昭。"故君子內省不疚，無惡于志。君子之所不可及者，其唯人之所不見乎！《詩》雲："相在爾室，尚不愧于屋漏。"故君子不動而敬，不言而信。《詩》曰："奏假無言，時靡有爭。"是故君子不賞而民勸，不怒而民威于鉞。《詩》曰："不顯惟德，百辟其刑之。"是故君子篤恭而天下平。

此敘修己及人治國平天下以隱也。引《正月》詩而無惡于志，隱以修己也。引《抑》詩而敬信于不動不言，隱以及人也。引《烈祖》詩而勸威于不賞、不怒，隱以治國也。引《烈文》詩而百辟刑于不顯，隱以平天下也。《大學》明明德于天下，《中庸》素隱于天下也。

《詩》雲："予懷明德，不大聲以色。"子曰："聲色之于以化民，未也。"《詩》曰："德如毛。"毛猶有倫。"上天之載，無聲無臭。"至矣。

此示隱之真相也。明德、中庸，名異義一。示明德真相，即所以示中庸真相也。舉聲色之不大，以狀明德也，而不知聲色已根本非是。舉毛之本微以狀明德也，而不知毛猶有對而非是。絕對之象，聲臭且無，非寂滅之境而何？是則明德之象，寂滅象也；中庸之象，寂滅象也。寂滅之為至善矣，止矣，箴以加矣！示隱之真相如此。

。

合觀略、廣、結論，則《略》之為不離見顯而素隱也，《廣》之為費而隱、微之顯而素隱也，《結》之入德與修己及人治國平天下莫不皆素隱也。誠哉！中庸之為書也，素隱之書也。

（1940年）

（載《歐陽競無先生內外學》第十三冊）

第七編 《論儒學書》

與陶士書（四則）

與陶士書一

鄉愿何以為德之賊？孔孟何以必取狂狷？蓋相似法流與義利之辨之所以必講也。

孔子開口曰：君子謀道不謀食；孟子開口曰：舍生取義。必如是充類至義之盡，而義利之界始明，鄉愿、聖人之分始晰。是則存一毫生望以為學，便是小人喻于利；有一毫苟且，淆襲神明不快足，便非君子喻于義。種瓜得瓜，種豆得豆，種子雖微，發生乃大，不辨于初，必墮于終，人禽之分一成不易，可畏哉！陽明有言：不扶其根日滋灌培，但培其惡，可懼哉！是則不欲為人則已，如欲為人，則必學聖。不欲學聖則已，如欲學聖，必辨義利以端其趣也。

鄉愿不然，謀食不謀道，舍義而取生，既持之有故、言之成理，而凡人又樂易于習俗而難有出類拔萃之志，如是輾轉相承，無非鄉愿。以兩可為中庸，以淆襲為道義，亦複誰能覺察哉？

孟子直指斥其立足曰"奄然媚世"，銷青年向上之芽；又直斥其毒害曰"為德之賊"。明白若是，尚可誣哉？有恆產而有恆心者，為一般平民言也；無恆產而有恆心者，唯士為能也；又直斷之曰：士何事？仁義而已矣！一簞食，一瓢飲，賢哉，回也！賢哉，回也！捉襟見肘，歌聲若出金石，吾黨之士則然也。嗚呼！士既困于特立獨行之無資，而又困于賢父兄之不得，銷沮英雄，往往若是，千百萬群有一于此不受困縛，而又縛于不愿人為聖賢，儕落于氓之蚩蚩，何其不幸哉！有平民之教，有豪傑之教。若不輕乎群眾，孟子則曰人皆可以為堯舜而已矣。

嗟乎！士，立教不當如是哉？救今天下，應以舍生取義之教。世無聖人，大亂不止，政變必不能善，雖強如列強，可以已哉？政變之變，變豈有極哉？

（1938年4月6日）

與陶士書二

昨發長函，辨明立教之邪正，大抵生滅立腳為邪，無生立足為正，孔孟與釋迦不異。若不先事辨明，息息直追，他日何能見危授命？夫見危授命，已是今之成人，並此而推翻之，曲順世求，此其所以多漢奸也！如某某者，學問文章、政治科學，擅絕一時，前後都以漢奸為藏身之所，蓋無以植基，聲譽日隆，浸假而入于岐途而不覺也。舍生取義，今日植基；見危授命，他日將事；不可錯也。寡尤寡悔，祿在其中；學也，祿在其中；忠信篤敬，蠻貊亦行，奈何懼政變餓死而改其趣！故既辨明立教之本，而複詠歌其事，得偈凡六。吾子不俗，當可談歟！

藝堪盟主千生造，文到驚人萬死來，解放且尋吾故我，黃昏杜宇一聲哀。

八十行年十二耳，古來七十且稀奇，莫將文字來求我，六念先應死念追。

求生的是利邊存，肯死方為義入門，瑣尾流離必有事，金剛威力自然尊。

孔子毗曇彌勒天，向來水火不同年，中庸無臭涅槃寂，菩薩原來倚佛邊。

涅槃非一複非二，橫固蹈非縱亦非，一語三玄玄三要，個中消息莫相違。

須知初步研唯識，二步還應唯智研，三步涅槃探果果，我常淨樂秘經傳。

（1938年4月7日）

與陶士書三

兩函談義利之辨，認明生之為利謀生而徇俗，是鄉愿之根株，此為入德最初法門。于此方針決定，無一毫夾雜，他日必聖賢。于此方針不定，謀食、謀道，紛然雜出，善斯可矣，何為踽踽？今日鄉愿，他日焉得而不漢奸？故不得不反覆丁寧也。世之所以一說聖人，即奔走駭汗而不願聞者，為其舍生也，為其舍生則于數事不可解也，餓死之教不可普及，仰事俯蓄不可不理，科學致用不可不悉，三事是也。

茲為解之：孟子"無恆產而有恆心"，明明為士言也。其為民言，明明說"有恆產而有恆心"也。士者，民之中堅，國之所基，而教之所寄，烏可以齊民恕哉？然子貢問政，子曰：足食、足兵、民信之矣，而必究乎民之所以為民，則去兵乃至去食，曰：自古皆有死，民無信不立。孟子：養生送死無憾，王道之始；而至談人之所以為人，則曰：人皆可以為堯舜。政可宜也，教不可移也。齊民可隨也，士不可恕也。樗櫟梗楠視其種，江漢澤淖視其趣，決定革命不惑保皇，決定抗虜國不可亡，近事取徵，矧談大道，而立大教。"仰不足以事父母，俯不足以蓄妻子"，孟子此言為齊民言也；士于事蓄乃無不足，衣敝袍而負米百裡，歌聲金石而黎霍晨昏，但見古人過量精神，未聞餓死豪傑父母。習膠貴族而夢繞玉堂，便不可織履辟[系*廬]，便不可泥涂胼胝。寄生之路塞，不得不趣高官厚祿一途，縱飫雞豚，而豈其養志？立身行道，揚名于後世以顯父母，豈犬馬之養已哉？大同之政不興，學供終歸無術，若但恆年粗，豈必稚子淒其？

君子喻義，已立初關，以此成材，自須博學。譬之藝木，播種植根，其始也；枝葉扶蘇，其繼也。立志辦道，其體也；多才多藝，其用也。豈惟科學致用應亟學也，文章淵雅豈廢學哉？然君子科學意在致用，小人科學乃以謀生，趣各不同，國家收獲，亦憑判豐歉。子路問成人，子曰：若臧武仲之智，公綽之不欲，卞莊子之勇，

冉求之藝文，之以禮樂，亦可以為成人矣。體用賅備，乃稱全人，然亦之雲者，猶有最上一層在也。今之成人，體用難並，姑先其體，曰見利思義，見危授命，久要不忘平生之言，亦可以為成人矣。此言亦者，但具人格，異非人而已。體之為物，人禽之路，邦家之基，禍福之胎，而可忽哉？

先不言體，遽談無體之用，且以致用之用作謀生之用，盜明堂之器，咽賣錫之簫，何教不摧，何法可益？為之斗斛權衡以信之，則並此斗斛權衡而竊之，亦窮于術哉！嗚呼！世之敗壞，至是極矣。觀國是者，莫不歸過于貪污之官吏，豪劣之士紳，苟且偷墮之社會，此固然矣。然亦知病本之由來乎？二千余年，孔子之道廢，鄉愿之教行。孔子謀道不謀食，鄉愿則同流而合污；孟子舍生而取義，鄉愿則曲學阿世。既有令名，複求壽考，腰纏十萬，騎鶴揚州，以視枯槁獨行，動輒駭俗，其于世間心理，孰得孰失？其于堯舜之道，孰入孰出？當判然矣。

天下之理，不上即下，豈有中流雜染無誤？豈有安樂忍性動心？亦習偷者之姑息自欺而已矣！夫人豈甘下流哉？無主于中，飢寒迫外，眾習所徇，牽率依違，不能自拔，隨風墮溷，漸染漸安而不自覺。緣起于不能舍生，依據于鄉愿以立足也。今日者，流血百萬，安全之地乃偃仰棲遲，曾不能掀床露柱，刺激淋漓，而門+塌閱委蛇，衣食奔走，若不闡明孔子真精神，何以建國？何以全愛？何以慰慘？夫孔子固溫良恭儉讓，吾非斯人之徒歟，而誰與也？但得其似，則中庸者，曲學阿世之媒；無可無不可者，包藏禍心之逋逃藪也。千秋萬歲遂至于今，孔子哀之，特于和平雍穆中，表而出之曰：鄉愿，德之賊也！此則孔子之真精神也。

再言鄉愿，亦止是義利之界不明，雜食于道，兩岐之立足而已。孫中山先生革命是一條鞭，不可雜保皇黨開明專製。今日抗戰到底是一條鞭，不可收容主和敗類。孔子謀道不謀食，孟子舍生而取義，踽踽獨行，不可夾雜鄉愿、兩邊立足之相似教。

（1938年4月22日）

附：示陶道恕

君子先志而後事，孝慈之志不立，建國救亡之公忠不植，而遽言科學，科學利用急需之要，以圖其植私謀食之媒，以學以教。此神奸巨蠹埋葬英材而不用畚鍤也。百萬忠勇流血于前，而曾不動不移于毫末，有良心哉！深錮如是，尚有國哉！人不為國謀，國可存哉？國之不存，身將安傳哉？孔子大聲疾呼曰：鄉愿，德之賊也！君子謀道不謀食也，舍生而取義者也。七十二子，誰不身通六藝？而必先立乎其大者，先其道而後其食，國與身俱強；先其食而後其道，身與國俱亡。供家小教習固非，識字田舍翁尤非。世兄亟須辦志，然後談事。

（1938年4月26日）

與陶門+豈土書四

昔有參道者，左參遭斥，右參遭斥，萬道俱塞，百思無術。最後憤極，乃得一決定法，索性不參，遂豁然爆發。又有一參者，坐攀樹上，祖師教放下，乃下一足，再放下兩足，手猶攀枝；祖師大聲：放放！乃放一手，最後一手抵死不放；祖師呵棒不已，並其一手亦放，遂爾頓墜；然未至地，忽然爆發。

漸參死字，不下十余年，今國破家亡，人生處處危險，無一毫安全可望，乃于儒門舍生取義，忽然開朗，快樂萬分，有把握無恐懼又千百萬分，証之佛說，乃無不合。遂欲與人共同享受，以諸函之來，正相觸動，因此喋喋多言，乃無一毫苛責人意，非背東門不得入西門，非置生死度外不得直趨涅槃。謀食以謀道，無此雜種，雜種不生稻而生莠，斷然之理也。此又非高談性命，乃生死呼吸腳踏實地也。

來書謂今日走高徑，他日反因以墜失者，此是苦節不可貞其道窮也之意。須知此種人，皆始念之志不真，繼念之學不篤，未得障堤而洪濤即至，是以隨流下駛也。若志真學篤，神明之地有無表色（小乘名詞）生，能為閑闌。劣種日銷，強種日熾，毫厘纖悉與心無欺，精積力久兢兢業業，但循其道消息盈虛，他日見危授命，可息息自驗矣。舍此則節節放松，泄泄沓沓，聖人無安坐以致之理，又況其植種之不同哉？本為解說，並無他意，乃不覺言之又長也，請止。

（1938年5月20日）

（選自《孔學雜著》，載《歐陽競無先生內外學》第十四冊）

覆張溥泉書

辱書：教我提倡墨學，墨義種種切到，儒偏中和，不適抗戰時用。盥誦之余，曷勝欽感！然吾有義陳前，幸鑒奪之！

抗戰是非常時期事，節節非常，應具一段真精神，觸處求益。今之抗戰，貞元交會，為非常非常時期事，不但非常異昔日之常為非常，又于造他日非常之常與之不異為非常非常。蓋建國也，應具一段超遠精神，觸處自在，是則取古以資今，但我合，而無他縛。萬不可執一先生學說處理一切，亦不必屏誰氏子論議，俾不入場，此一義也。

借資須權，而自樹必經，所謂立天下之大本，大本刊定，異則簡之，同則收之，必求大本相符，非取誰家誰氏，此又一義也。

人皆知墨，墨義于抗戰非常，多可權借。人不知儒，公亦曲從世稱，謂儒偏中和。嗟乎！此豈儒哉？取此偽儒，唯害于爾家，凶于爾國，人用側頗辟，民用僭忒，由昔平時取用至今，家國人民已如斯矣。然一談儒，無非舉偽，數千年前，儒已墮偽，彼篡此位，此代彼誅，帝閭三十三天鳴冤何處？九幽十八層地獄無此沉埋。朝野上下，此類尤多，必截根株，應明真孔。蓋吒補單那咒呼其名，然後去也。新周故宋王魯，革命之義出于《公羊》，而偽儒以為說經義齊駁，豈是魯純？民為貴，君為輕，民權之義出于《孟子》，而偽儒專製之奴，謂孟子泰山岩岩，英氣甚是害事。大同出于《禮運》，而偽儒竟謂《禮運》大同之說非孔子之言。凡不合其奴性組織，皆武斷廢除，職其根據，皆自誣蔑中庸而來。真孔以狂狷為中庸，偽儒以鄉愿為中庸。真孔中庸還我實落，偽儒中庸但有美言。朴者墮迷，奸人利用。曾子忠恕，子思素隱，孟子集義養氣而後，誰為豪傑，辨別孔子中庸？孟子集義，粉碎無遺，尚余浩然之氣一分，不失時呈。宋明節義之士，如文、史諸人，皆有造于國家，乃至今日抗日猶能長時，無非賴是。但有一毫真孔，得福不可道裡計，恆河沙數所不能盡，而況全體哉？真孔既分別，人皆知孔矣。孔義不但于抗戰非常，多可權借，尤于抗戰建國非常非常，足以經宗。蓋中國哲匠，猥起林立，于我大本，唯孔相符，同則取之，俾我大本之通于國中也。辨真孔而已，此又一義也。

何謂大本，求寂、主一、達情是也。

何謂求寂？思議者，測施有方，規矩不逾，範圍所及之事，用莫善之。範圍不能攝，思想所不到，不知所從來，烏得其究竟？則不恃思議，而恃有不可思議。夫不可思議者，非神秘也，深隱連屬之根株，運轉密移之經歷，全體披露，洞鑒無遺，先此後此，正方異方，供彼取用，一奠萬年，人莫測所來，強而名之曰智是也。妙智由洞鑒來，洞鑒由披露來。披露由何來？由二千年鄙儒謗棄之寂滅來，由二千年鄉愿誣蔑之中庸來。惟天下至誠，為能立天下之大本，中也者，天下之大本也，喜怒

哀樂之未發謂之中，中即是寂，故曰求寂。

先說寂象，求寂工夫，此姑不談。寂之境界，人欲淨盡，天理純全境界也。一泓秋水，蕩滌纖塵，漣漪不動，寂滅寂然：于此悟人欲淨盡境界，佛家名寂靜寂滅。天光雲影，人物山川，悉于中現，無勞一睇：于此悟天理純全境界，佛家名無損惱寂滅。小乘寂滅，止用寂靜，大乘兼用無損惱。今談治國，應大乘同，觸處洞然寂滅全體，故曰真孔中庸還我實落。

墨不能然，〈天志篇〉者，《墨》之談本也。以天之賞罰，知義從天出，以有義則治，無義則亂，知有義無義，轉展環徵，還不一毫實落，倒果為因，因明犯過，烏乎能立？亦何異偽儒無過不及之中庸耶？異我大本，是故簡之。

飛龍在天，利見大人，大人者，與天地合其德，四時合其序，鬼神合其吉凶，先天而天弗違，後天而奉天時是也。是以坐而論道，吁都俞，上之變理陰陽，中之經綸天下，下之格君心之非。堯、舜、湯、武之為君，禹、皋、伊、旦之為臣，知斯理而建國矣。自此以往，以漢高帝、蜀昭烈、唐太宗之犖犖大度、器量聰明，足以學道。以子房之沖漠無朕，諸葛之寧靜致遠，李泌之靜若用智，而玄奘之法門龍象，都為修道有得之人，乃未聞有坐而論道之舉。余則子孫基業之不了，救時宰相之尚難，是以補苴罅漏，苟且數千年，外侮內偷之至于今日也。忽聞建國，奚翅登天大道將行也，求寂之芹獻，烏容稍緩須臾哉？

何謂主一？一則真，一則能生，一而不已，所生之數量不測。是故建立大本于一，為學為政，以是焉進退。疾呼子慎，夢應而驚，孺子入井，怵惕惻隱，忽時變時，亦不失一矣。用志不紛，乃凝于神，勢用強大，天地萬物皆甲坼矣。為物不二，生物不測，宇宙海岳，精英誰悉矣！是故親親之殺，尊賢之等，為國以禮，不取兼愛。簡寬而狹，簡雜而純，一之為不動因也。

難者曰：大同之不獨親其親，子其子，主一者何解耶？

解之者曰：此數量邊事，非質量邊事也，親親子子，質之真也，其親其子，隘于一也，不獨其親其子，不隘于一也。千裡之行跬步起，起足跬步，畢乎千裡，仍跬步也，而千裡也。未聞始起跬步而千裡也。天行健，天之所以為天也，大道之行以不息，文王之所以為文也。一而不息，乃大同矣。誠者自成，至誠不息，所以成物矣。明德自明，自明用其極，而新民矣。忠者不欺，忠而不已，謂之恕矣。吾道一以貫之也。大同以不已生，非以兼生也。而不然者，舍質而談數，初政必大同，則民族主義幾何不因以隨逐而動搖？

難者曰：大悲之冤親平等，主一者又何謂耶？

解之者曰：判凡以執，物以執封，界以封限，此限此界，不通于彼，彼限彼界，不通于此，色不通聲，香不通味，戚不通疏，是以冤不通親，不平等也。聖判于無執，執無故封無，封無故人我界無，界尚無矣，從何所限？是以皆通，通則無不平等也。故曰：冤親平等，聖者邊事。凡者以直報怨，法界不亂，法界亂而世界滅亡矣。是故求學當求不執，毋開口平等。

難者曰：愛人者，人恆愛之，亦主一者之言，墨子兼愛何害耶？

解之者曰：兼不真，李種桃種，無桃李種。兼無力，千鈞而二用之，生之能耐不強。兼者頓象，漸而後繼，頓則不繼。以是故，兼之為害，不可勝言。黑白之于色也，義利之于理也，忠奸之于人也，不嚴其界而故談兼，初假其名，後反其真，今之發現變態怪形以危害邦國者，尚何言哉！孔子曰：惡似而非者，惡利口之覆邦家者，行岐道者不至，事兩君者不容也；目不兩視而明，耳不兩聽而聰也，是故君子結于一也，誠惡乎兼之為害也。自動者有力能，有精神，有繼續，作新民者應激民自動。唯性情是自中物，唯性情是相率自動，舍性情而用感情，母曰互助也，已棄自動而被動矣。墨義無非感情互助來，感情互助，寧有種乎？感情互助，力能勢用過自動乎？感情互助，百年不變而不息乎？

何謂達情？仁者人也，仁愛結撰之謂人，是故人類之立立以情。過此不生，謂之死邊，死邊以往，衣食住行，乃至文物聲明，世宙以生存，謂之達情。唯王建國，設官分職，舉國勤動，夙夜匪懈，謂之達情之行。五行百產，天之所生，源源不盡，謂之達情之供用。是故物受支配于情，但可為情而益物，不可因物而損情。假達情之名，行縱欲之行者，情不稱物，謂之暴殄天物。物已盡而情莫達，情與物俱害也，如是須節用愛物，是謂節財之流。夫節財之流，亦唯求其情之達而已矣。至若物不稱情，不當損情而當益物，是謂開財之源。夫開財之源，亦唯求其情之達而已矣。墨不達情，役于物者，但有節流。情不稱物，節流也。物不稱情，寧抑損情，仍節流也。曾不聞一論開源。履短而削足，冠小而戮首，其與幾何，亡無日矣！至愛者誰逾父母，大事者誰逾送死，哀痛迫切之余，桐棺三寸，掩不及泉，三月無事。傷情無奈何，又摧其情于喘息未定之際，與其生也，無寧死。動感以樂，奮發以樂，鼓勇以樂，赴湯蹈火以樂，宣郁以樂，通幽以樂，使民久而不亡以樂。季札聞樂，判十五國之治亂興亡，樂固可非哉？墨以酣歌恆舞之巫風，毀鐘鼓笙竽之聖雅，懲羹廢食，吁其甚哉！

夫抗戰達情也，達羞惡之義之情。喪葬達情也，達惻隱之仁之情。樂達情也，達四端之情。俱情蘊，俱本心；而謂相礙不通，不互助，不相成，乃至相克。固矣夫，何其重物若是，而輕情又若是耶！夫為逸樂以暴物，人見而易刺也，至為偷習以暴物，則多所忽而不察矣！避難後方，建築、藏版、印訂、流通，凡木工、瓦工、土工、雜工、印工、訂工，材料所需，無所愛惜，摧殘與作成，大者一與一之比，小者不啻一與三、四之比，以此而推天下暴物，可算數譬喻哉？人世三十年，送死所

費，準其所生，上者不逾十年，下者或不能一年。養生所需之摧殘，費不啻一倍二倍。若設工官，竭誠研究，督斷摧殘，以視短喪薄葬，誰贏誰絀，必有能辨之者。

上來大本所稱求寂、主一、達情，犖犖大端，墨氏皆違，違則簡之。然則墨義無所取耶？夏後氏尚忠，禹勤民事，足胼手胝，誠適用於抗戰非常之時。除〈天志〉、〈兼愛〉、〈短喪〉、〈薄葬〉、〈非樂〉諸篇，余則應深研幾，信受奉行。如公來書，〈尚同〉者，服從主義，不容異議，抗戰之成，首在是也。〈魯問〉者，大國不當攻小國，抗戰極合也。〈貴義〉者，赴湯蹈火，積極精神不回顧也。〈非攻〉者，弱小民族不可犯也，反侵略不可緩也。親戚私好鄉人，不可偏重，是故〈尚賢〉。細文繁禮悉除，是故〈節用〉。必盡人力，毋委氣數，是故〈非命〉。抗戰死士忠魂不滅，是故〈明鬼〉。其他〈備穴〉諸篇，無非兵法，切用于目前。懇摯精誠，淪肌浹髓，誠甘露味，吾當與公共宣布也。

公則應于大者、遠者，極深研幾也，求寂、主一、達情，是也，非偽儒說也。

（1940年1月2日）

（選自《孔學雜著》，載《歐陽競無先生內外學》第十四冊）

跋《中庸傳》寄諸友

每年人日大會一次，貢獻以言。入川三年，今其三次，貢此一冊。世亂由漢奸，原出于鄉愿中庸。書生不能從戎，然有道。天下溺，援之以道，道也者，寂滅也，涅也，孔、佛之道一也。

寄呈若木先生，須識此冊繼孟子學旨，唐宋以來，諸儒皆背孟而行，此其所以產鄉愿而亂世也。請細讀此冊，競無非七十之年不能說此，毋輕視之。不薄今人愛古人，公豪傑，有此態度。（蒯若木）

入川定道友一年會一次，時在陰歷正月七日，名人日大會。會上必貢獻以言，今會談此冊。君雖不與，而奮興逾人，爰贈此冊以表敬意。天下亂于鄉愿中庸，真實中庸，請精研此。前君寄之文，敬佩，非力爭上流者，不能道其只字也。（傅冰芝）

人日大會，去年談《心經》，今年談《中庸》。漸自認識佛義在無余涅，轉讀孔書，始粲然矣。此作系七十之年乃能，毋輕視。衡如聰明，何所不能，顧知之易，而行之難也。（劉衡如）

士死矣，行誼不愧古人，斯亦足矣。無人傳意長者，乃逕情直達，未具正式箋候，不敬歟？孔、佛原來無異，而唐宋人異之。無病而藥，又藥以醫藥。饒舌哉，然不可已已。（趙堯生）

孔、佛通，通于此冊。漸非七十之年不能說是，幸毋忽之。一字一句，皆有根本。孔書本孔，不牽于佛，解經家法，法爾如是，唯我文通，始足與談。孔學聊發其端，大事無量，甚望我弟繼志述事。（蒙文通）

寄此冊，閱後與倪、毛、王諸君同看。能擴充宣傳，俾人人知狂狷中庸，然後佛法乃大昌明也。（虞修庵）

孔學，文通外唯君尊重。寂滅義，扼于唐宋元明清，猶不提出，可謂無心肝人。不敢苟從，亦我芸生所計及也。（彭芸生）

士去，我愴然，公愈甚也。衛武公髦而好學，寄此冊求匡正。鄉愿中庸為數千年，乃不能不提出狂狷中庸也。（李泉涌）

君不能與會，大減色矣。雖然，講學亦不在見面，寄呈此，必有見以見教矣。（賴以莊）

孔家義唯君講，孔與佛無異義亦唯君談。顧無溝通，著述不得，今寄此冊，視如何

耶？此不過概論，略呈。多大事，希續現于世。（梁漱溟）

此書以寂滅寂靜為趣，力辟鄉愿中庸，救今時漢奸之蔽。（楊權吉）

（選自《孔學雜著》，載《歐陽競無先生內外學》第十四冊）

覆蒙文通書

昨日得二十五函，更發此函，心中無限欣悅，不覺瑣瑣詹言也。雲何喜耶？喜吾弟能以所學會友，孔門生趣將自此發動。昔以洙泗之傳，期諸漱溟與弟，果不負所期哉！陳學源君，相見于南京內院，頗多時日，今猶不倦所學，誠難得也。曾義甫君，與弟同赴人日大會，雖未傾談，然挹德深矣。諸君子濟濟一堂，各以所得，發明妙義，向往何已！蓋不減稷下諸賢，而上毗鄒魯之盛也，嗚呼，足矣！漸老無用，得見諸君子之林，誠不為不幸矣。欣悅之余，乃將私見一陳于前，可乎？

道之不明也，于此數千年，究其原始，乃在孔子既沒，無結集大儒，缺毗曇大教，秦火漢儀，安知道之攸寄，如阿難、迦葉之于佛教者？故佛學尚有典型，而孔學湮沒無緒，可勝嘆哉！今欲不忘大教，以正人心，應談最勝極最勝三事。

第一、道定于一尊。一則真，二則偽。孔一貫，孟一而已矣，經旨具在，而可誣哉？！中國推至全球，唯有孔、佛，理義同一，余則支離曼衍，不可為道。陸量弘而程量隘，東海、西海，聖同心、理，淫聲女色，強忌于先，識者知所判別矣。是故欲尊孔而有力能者，當先握生天生地、唯一不二之權，乃可整頓乾坤，位育一世，雖有萬魔，無損毫末。孔道不行，式微中露，尚惕然哉！

第二、學得其根本。根本者，性道文章。性道仁也，文章禮也。性道略以《易·系辭》談性，曰：一陰一陽之謂道（一句，所謂天道，語言心行俱滅）；繼之者善也（二句，善無準則，續乎天道為則）；成之者性也（三句，性非苟得，圓滿充足而完成）。《大學》則談誠意，曰：毋自欺也（自即語言心行俱滅之天道，凡人皆具，始念常見。不欺者，繼其始念也，所謂善也。孔學全在不已，在止于至善，止于不已而已也。天行健，所以為天；自強不息，所以為君子），如好好色，如惡惡臭，此之謂自慊（慊，快也，足也，則誠至于成也，所謂圓滿充足之性也，此之謂盡性）。《中庸》則談誠之不已，曰：誠者自成也（易一句同），物之終始，不誠無物，是故君子誠之為貴（物之終始即格物，無別格物。易二句同）。誠者，所以成物也，故至誠無息，則無為而成（易三句同）。修道原于率性，既誠于道，而可忽于性天哉？性天不可聞，子貢聞而嘆息不置，猶佛書之得未曾有也，遂謂不談性天，豈理也哉！子罕言仁，亦不作口頭禪而已矣。文章不但禮，而禮為干，克己復禮，充之為國以禮。居廬郊，見精神極其貫格；法製政刑，見巧便不離其宗；故性天為未發之中，文章則中節之庸；仁融于心，而禮寄于事。自鄉黨以至朝庭，自小學以至大學，舉足下足，皆禮是蹈，禮之為孔道之達哉！

第三、研學必革命。天下英雄，使君與操，世間霸圖，尚須包藏宇宙之機，囊括乾坤之量，況大道之所寄哉！毗廬頂上行，直探第一義，依文綴字，三世佛冤矣。曰古之人古之人，雖無文而猶興，在陳思魯，狂簡縈于夢寐矣，價黎須仔細，此何如事，與無擔當人商量乎？補清末所缺，事也，非志也；比肩鄭、馬，上溢董、劉，

事也，非志也；極追游、夏，猶事也，非志也。刪修大事，有德必有言，若使顏氏子在，安知不能贊一詞哉！顏、曾、思、孟，是一流人，不惡于志。顏淵曰：舜何人也，予何人也，有為者亦若是；孟子曰：乃所愿，則學孔子也；孔子曰：吾十有五而志于學，故必先定其志歟？孟子曰：士何事曰尚志，無志失士名矣（宋明程、朱、陸、王最足崇拜，在能尚志）。觀唐虞夏商周于《尚書》，得伊尹、周公之志；繼以《詩》，則記言、記事之外，采風什雅，感人音律，幽歌雅詠，胥見其志，見盛周之全也；《詩》亡然後《春秋》作，孔子志在《春秋》，《春秋》者，天子之事也。故必有志，然後乃可言學。數千余年，學之衰弊，害于荀子，若必興孔，端在孟子。《詩》、《書》、《春秋》，統歸而攝于《禮》，《荀子·禮論》無創製之意，《中庸》本諸身，徵諸人，皆製作之能。學《荀》未免為弊人，學《孟》然後為豪傑之士也。有志然後能文章，更能進于性天。《禮》須囊括宇宙，《易》則必超于六合之外；《禮》唯集中國之大成，《易》則必契般若、瑜伽之妙，而得不可思議之神。《中庸》之素隱不已與修道，語語皆與涅槃寂靜相符，漸既揭之矣，而《易》之契般若、瑜伽者，留待能者可乎！自來說經，唯《易》采道家語，而猶未能融佛氏理，藉益《禪解》，八股時文最足害人。發菩提心，超祖越佛者，干雲直上，唯見遍周沙界，真幻一味，則必不遺《易》與瑜伽之參究者歟！

三段私見，若解經家都愿學孔，或不河漢視之。

（1943年2月1日）

（選自《孔學雜著》，載《歐陽競無先生內外學》第十四冊）

第八編 《人物行狀》

歐陽東汭斃哀紀碑

東，宜黃歐陽漸之子也。生三歲，以目視日而不，入裡社廟，視土偶人崢嶸而不惕，薄暮居空院，承塵走鼠，落其鼻，大聲誦咒。山中無可學，拾芋栗而已。其姊梁，年十七，歿江南，東乃于是歲辭家而至寧。是時，陳真如愛護之甚至。轉展寧滬間，入學校者數年，學未得也。習染甚，體為之羸。東大恐，中夜憤悔，痛哭不可仰。熊子真挾與北學，幽燕水深土厚，不半年而體強。得友詹大權、王平叔、韓佯生諸君子，慨然有通中西學、超古先哲人之志。乃習德文，入滬同濟大學，為奮發權輿。誰知乎浴泳而溺以死哉！溺處，先有德人拉佩克者，同濟物理教員，于九年五月十八日溺，而東又于十二年九月十八日溺也。東年十九，英挺有大志。同一時，許一鳴死于寧。先一月，黃樹因死于燕。皆能于玄學有發明。是歲也，倭人大難，橫死無慮數十萬人。吾如之何弗悲。徒碑以悲之無益，吾乃為東發愿，為一切眾生發愿：

愿一切眾生，如舍利弗，智慧第一。若在重纏，登高臨深，曠野險，乘急戒急。或稍離縛，威儀庠序。除不得已，絕現神通，都無游戲。

愿一切眾生，永無溺事。人如魚游，水如空氣。鳧浮龍潛，過涉厲揭。耨池香海，康達坦地。

愿一切眾生，匪徒無溺。罡威海嘯，山烈地坼，霎時惶惑，虛空逼塞，雉經刀藥，王難虫食，一切夭橫，永茲除祓。魔不得便，人不得隙。

愿一切眾生，匪徒不夭橫，首丘賢善，終其天年。預知時至，脫然須臾，如比丘入三禪。

愿一切眾生，心溺超度，淨六根三毒。情纏靈汨，虎耽獸欲，鬼謀神蠹。滔滔洶洶，稽天沉陸。莫大心死，毋矜身續。心海波平，溺事焉觸。

愿一切眾生，無冤無債。亦恩者平，非讎者快。三業清淨，祥光溢乎大宇，胡夷胡隘。

愿一切眾生，有恨皆消，無症不釋。滄桑精衛，胡俚胡厲。夢響影焰，飄何根蒂。蒼莽乘白雲，帝鄉且憩。

愿一切眾生，各安各居。烈火寒冰，誕育蠕孳。水府幽宮，友虬侶支。便大莊嚴，利樂熙熙。悲愿以有為。

愿一切眾生，普皆發愿，仗佛光力，及愿光力，無間幽獄，痛苦齊息。同發大愿，

愿一切眾生，生生世世，飫聞佛法，得值知識。無死無生，証大菩提，入大涅槃，永永元吉。

民國十二年（1923）十一月某日歐陽漸撰並書

(原載《內學》第一輯，收于《歐陽競無先生內外學》第十五冊《競無詩文》)

楊仁山居士傳

清末，楊仁山居士講究竟學、深佛法，于佛法中有十大功德：一者、學問之規模弘擴；二者、創刻書本全藏；三者、搜集古德逸書；四者、為雕塑學畫刻佛像；五者、提倡辦僧學校；六者、提倡弘法于印度；七者、創居士道場；八者、舍女為尼，孫女、外甥女獨身不嫁；九者、舍金陵刻經處于十方；十者、舍科學伎藝之能，而全力于佛事，菩薩于五明求，豈不然哉！

此土思想，涵蓋渾融，善而用之，登峰造極，故曰中土多大乘根器；其不善用，則凌駕顛頂，毫厘千里，亦足傷慧命之源。北魏菩提流支重譯《楞伽》，大異宋譯，譯籍雖多，岐義屢見，于是《起信論》出，獨幟法壇，支離伺之害，千有余年，至今不熄。蓋《起信》之謬，在立真如門，而不立証智門，違二轉依。《般若》說：與生滅合者為菩提，不與生滅合者為涅槃；而《起信》說：不生不滅與生滅合者為阿梨耶識。《瑜伽》：熏習是識用邊事，非寂滅邊事；而《起信》說：無明、真如互相熏習。賢首、天台欲成法界一乘之助，而義根《起信》，反竊據于外魔，蓋體性智用，樊亂淆然。烏乎！正法乘教何分，而教網設阱，都談一乘，胡薄涅槃，天台過也。不明增上一皆合相，圓頓奚殊，襲四而五，賢首過也。契師西返，《瑜伽》、《唯識》日麗中天，一切霾陰蕩滌殆盡，誠勝緣哉！有規矩準繩，而方圓平直不可勝用，法界一乘建立，自無殞越之殊。獨惜後人以唯識不判五法，圓頓甘讓《華嚴》，而一隅自守。職其法義，精審有余，論其法門，實廣大不足耳。

仁山居士，學賢首遵《起信論》，刻賢首《起信論義記》及《釋摩訶衍論》，而集志福等注以作疏。博求日、韓，得賢首十疏之六，與藏內十余卷，都二十種，匯而刊之曰《賢首法集》，刻《玄文本論》，而詳論五位以籠罩一切法門。然其《與桂伯華書》曰：研究因明、唯識期必徹底，為學者楷模，俾不顛頂伺，走入外道而不自覺。明末諸老，仗《宗鏡錄》研唯識，以故《相宗八要》諸多錯謬，居士得《唯識述記》而刊之，然後圭臬不遺，契、基之研討有路。刻《門論》、《百論》等，然後中觀之學有籍，而三論之宗複明。嘗示修禪，曰離心意識參，曰守當前一念，曰《中峰廣錄》善，然後禪有徹悟之機，而宗門可入。與日人論十念往生，而必發菩提心，然後淨土之宗踐實。唯居士之規模弘廣，故門下多材：譚嗣同善華嚴，桂柏華善密宗，黎端甫善三論，而唯識法相之學有章太炎、孫少侯、梅擷芸、李証剛、蒯若木、歐陽漸等，亦雲夥矣。然其臨寂遺囑，一切法事乃付托于唯識學之歐陽漸，是亦可以見居士心歟！

居士喜寄書，有老尼贈以《金剛》，發逆亂甫定，于皖肆得《起信》、《維摩》、《楞嚴》，循環研索，大暢厥心。因而遍覓經論，又卒不一獲，于是發憤而起，與王梅叔、魏剛己、曹鏡初等謀刻大藏全經。獨江都鄭學川最切至，厥後出家名妙空，創江北刻經處于揚州磚橋雞園，而居士創金陵刻經處于南京。居士在英牛津時，與倭人南條文雄善，後仗其力由海外得古德逸書三百種，挾其最善者刻之。而倭印

《續藏》，居士亦供給多種。然以為《續藏》蕪雜，應區別必刊、可刊、不刊三類而重刻之也。

居士嘗謂，刻經事須設居士道場，朝夕丹鉛，感發興致，然後有繼以漸而長。昔年同志共舉刻事，乍成即歇者為多，雖磚橋刻經不少，而人亡業敗，以故設立學會于金陵刻經處，日事講論不息。今以避難移川，而刻事猶未衰歇者，由是而來也。

居士謂比丘無常識，不通文，須辦學校。當時金陵南郊、揚州、常州，皆設僧學，而金陵刻經處辦祇桓精舍，僧十一人，居士一人，以梵文為課，以傳教印度為的，逾年解散。因詢居士何因歇廢，居士以無學生答。意以奘師未游印時，《婆沙》諸籍精熟無倫，今欲印游，須研解固有學義，而後法施資糧不匱。今時印通，若談游印，非仍居士之說無當耳。

居士于事純任自然，每有水到渠成之妙。嘗謂漸曰：牛應貞女夢中讀《左傳》全部，以志不遂而夭折，此父母不善處之之過也。故于女圓音任其出家，于孫女輩聽其獨體。辛亥八月十七開護刻經處會，居士問幾鐘，而曰：吾刻事實落，吾可以去。即右脅而逝，蓋自然如此，生死亦自由矣。

居士于事又複能舍。金陵刻經處經營五十年，刻經三千卷，房室數十間，悉舉而公諸十方，以分家筆據為據。此猶物質，而精神亦舍。居士聰慧嫻科學，從曾惠敏赴英、法，又複從劉芝田赴倫敦，廣有製造，悉售于湘時務學校，而以其資創金陵刻經處。居士善工程，李鴻章函聘不往，曾國藩密保不就。志在雕塑，先事繪畫，成《極樂世界依正莊嚴圖》、《靈山法會圖》，布列數十人無間隙，雕刻則極其精微，而又一本造像度量，使人觀想不誤。

居士名文會，字仁山，石埭人。父朴庵，成進士，官部曹。居士二十七失怙，家貧世亂，跣足荷槍從戎，百煉險阻以成器，而一趣于佛事，年七十五而卒。著有《等不等觀集》若干卷，《玄文本論略注》四卷，《佛教初學課本》一卷、注一卷，《十宗略說》一卷，《觀無量壽略論》一卷，《闡教編》一卷，《陰符》、《道德》、《南華》、《冲虛》四經《發隱》四卷，《論》、《孟》、《發隱》二卷。子自新、自超、福嚴，孫庭芬、桂芬、穎芬、智生、緣生、雨生、祥生，曾孫時逢、時中。塔于金陵刻經處，遵居士囑，經版所在，靈柩所在也。

贊曰：居士有言，末法有七千余年，初分時經論不昌，安能延此長久？居士初生，母夢古刹有巨瓮，啟笠則一朵蓮華，殆天生居士昌大教于初分時耶！元明來，書則有缺，

以迄清末，居士出而宗風暢。嗚呼！豈偶然哉！

(1942年5月25日)

(選自《內學雜著》下，《歐陽競無先生內外學》第十二冊)

附：親教師歐陽先生事略

呂澄

師諱漸，字競無，江西宜黃人，清同治十年十月初八日生。父仲孫公，官農部，歷念余年，不得志。師六歲，仲孫公即世。

師幼而攻苦，精制藝，年二十，入泮。薄舉業不為，從叔宋卿公讀，由曾、胡、程、朱諸家言，博涉經史，兼工天算，為經訓書院高材生，時稱得風氣之先。

中東之戰既作，國事日非，師慨雜學無濟，專治陸、王，欲以補救時弊。友人桂伯華自寧歸，勸師向佛，始知有究竟學。

年三十四，以優貢赴廷試，南旋，謁楊仁山老居士于寧，得開示，信念益堅。歸興正志學堂，斟酌科目，體用兼備，自編讀本課之。

年三十六，生母汪太夫人病逝，師在廣昌縣教諭任，遄返，僅得一訣。師本庶出，復幼孤，一嫂一姊皆寡而貧，來相依，霾陰之氣時充于庭，母病軀周旋，茹苦以卒。師哀慟逾恆，即于母逝日斷肉食，絕色欲，杜仕進，歸心佛法，以求究竟解脫焉。

期年，赴寧從楊老居士游。又渡東瀛數月，訪遺籍。返謀久學之資，任兩廣優級師範講席，病濕罷。與友李證剛謀，住九峰山，營農業，又大病瀕死。乃決舍身為法，不復治家計，時年已四十矣。

歲庚戌，再赴寧，依楊老居士。越年，老居士示寂，以刻經處編校相屬。值革命軍攻寧急，師居危城中守經坊四十日，經版賴以保全。翌春，與李證剛等發起佛教會，撰緣起及說明書，並警告佛子文，勸僧徒自救，沉痛動人。以主張政教分離不果，解散。自是長住刻經處，專志聖言，不復問外事。

溯師四十年來，篤學力行，皆激于身心而出，無絲毫假借。嘗曰悲憤而後有學，蓋切驗之談也。師既主編校，病刻經處規模未充，又乏資廣刊要典，乃設研究部，只身走隴右，就同門蒯若木商刻費。比返，愛女蘭已病卒刻經處，哀傷悱憤，治《瑜伽》，常達旦不休。稿久，乃曉然法相與唯識兩宗本末各殊，未容淆亂。敘刻法相諸論，反覆闡明，聞者駭怪，獨沈乙庵先生深贊之。每敘成，必赴滬謁沈，暢究其義而返。至民國七年，遵老居士遺囑，刻成《瑜伽》後五十卷，復為長敘，發一本十支之奧蘊，慈宗正義，日麗中天，自樊師以來所未有也。

會友人符九銘來蘇省，掌教育，因籌設支那內學院以廣弘至教，刊布緣起章程，遷

延數載未就。南游滇，應唐 賡請講《維摩》、《攝論》，北赴燕，為蒯若木講《唯識》，稍稍得資助。民國十一年，內學院始成立，創講《唯識決擇談》，學人畢集。梁任公亦受業兼旬，病輟，報師書曰：自恨緣淺，不克久侍，然兩旬所受之熏，自信當一生受用不盡。于以見師教入人之深矣。由是廣刻唐人章疏，《瑜伽》、《唯識》舊義皆出。

又就內學院開研究部試學班，及法相大學特科，大暢厥宗。立院訓曰：師悲教戒。揭在家眾堪以住持正法之說，教證鑿然，居士道場乃堅確不可動。及民國十六年，特科以兵事廢，同懷姊淑又病亡，師悲慨發願，循龍樹、無著舊軌，治《般若》、《涅槃》諸經，窮究竟義，次第敘成。其間更輯印《藏要》，經論二十餘種，各繫緒言，莫不直抉本源，得其綸貫。而尤致意揀除偽似，以真是真非所寄自信，一時浮說游談，為之屏跡。

自九一八事變以來，國難日亟，師忠義奮發，數為文章，呼號救亡如不及。一二八抗日軍興，師筮之吉，作釋詞，寫寄將士以資激厲。繼刊《四書讀》、《心史》，編《詞品甲》，寫《正氣歌》，撰《夏聲說》，所以振作民氣者又無不至。于是發揮孔學精微，上承思、孟，辨義利，絕鄉愿，返之性天。以為寂智相應，學之源泉，孔、佛有究竟，必不能外是也。

民國二十六年夏，集門人講晚年定論，提無餘涅槃三德相應之義，融瑜伽、中觀于一境，且以攝《學》、《庸》格物誠明，佛學究竟洞然，而孔家真面目亦畢見矣。講畢，日寇入侵，師率院眾並運所刻經版徒蜀。息影江津，建蜀院，仍舊貫，講學以刻經。先後著《中庸傳》、《方便般若讀》（即《般若經序》卷三）、《五分般若讀》，《院訓釋教》。以頓境漸行之論，五科次第，立院學大綱。自謂由文字歷史求節節近真，不史不實，不真不至，文字般若千余年所不通者，至是乃畢通之。

民國二十九年，遭家難，矢志觀行，于《心經》默識幻真一味之旨，夙夜參研，期以徹悟。三載，始著《心經讀》存其微言，蓋師最後精至之作也。

師受楊老居士付囑，三十年間，刻成內典二千卷，校勘周詳，傳播甚廣。及國難作，文獻散亡，國殤含痛，師又發願精刻大藏以慰忠魂。選籍五千餘卷，芟夷疑偽，嚴別部居，欲一洗宋元陋習，以昭蘇藏教，籌畫盡瘁。本年二月六日，感冒示疾，轉肺炎，體衰不能復，然猶繫念般若不已。至二月二十三日晨七時，轉側右臥，安詳而逝。享壽七十有三。

德配熊夫人，子格、東，女蘭，皆先卒。孫應一、應象，孫女筏蘇、勃蘇，俱就學國外。由門人治其喪，權厝于蜀院院園。

師平生著作多以播遷散佚，晚年手訂所存者為《競無內外學》。其目曰：《內院院

訓釋》，《大般若經敘》，《瑜伽師地論敘》，《大涅槃經敘》，《俱舍論敘》，《藏要經敘》，《藏要論敘》，《法相諸論敘》，《五分般若讀》，《心經讀》，《唯識抉擇談》，《唯識研究次第》，《內學雜著》，《中庸傳》，《孔學雜著》，《詩文》，《小品》，《楞伽疏決》，《解節經真諦義》，《在家必讀內典》，《經論斷章讀》，《四書讀》，《論孟課》，《毛詩課》，《詞品甲》，《詞品乙》。凡二十六種，三十餘卷，悉由蜀院刊行之。

師之佛學，由楊老居士出。《楞嚴》、《起信》，偽說流毒千年，老居士料簡未純，至師始毅然屏絕。蕘稗務去，真實乃存，誠所以竟老居士之志也。初，師受刻經累囑，以如何守成問，老居士曰：母然，爾法事千百倍于我，胡拘拘于是。故師宏法數十年，唯光大是務，最後作老居士傳，乃盛贊其始願之宏，垂模之遠焉。嗚呼！師亦可謂善于繼述者矣。弟子呂澄謹述。

澄侍師講席久，側聞緒論較多，師遷化後，輒思略敘列之以志追仰，而悲懷難已，終不能就。然不可以無述，爰據師自訂年歷，稍加編次，有未審處，則就教于李證剛先生及幼濟世叔，並得同門陳證如、王化中二君糾正數條，僅乃成篇。觸處掛漏，固未能盡吾師行事之百一也。澄附記。